


1

HARVARD COLLEGE LIBRARY  
FROM THE  
HARVARD-YENCHING  
INSTITUTE  
SEP 30 1962

2787  
ChL 2940, 4082  
2007



平

圃

志

平

回

士

漁南王乃開鯨

光齋弓丑季夏

光緒己丑季夏  
劍南王氏開雕

平回志序

毓秀少嬰疾病足迹未嘗越鄉國其後益屏處深山與人事  
疎遠當其時海內烽燧四起材武之士咸思有以自效顧獨  
守其羸瘵頑鈍之軀手一編以終老竊自比散木怪石之委  
翳墟莽無所用於世而亦蒼然不自知求爲世用爲可笑也  
然爾時常從先師龔九曾王螺洲兩先生遊兩師皆不樂  
用世特以憂

國之忱託於文章故得竊聞其緒論而當事諸公於螺洲師  
尤時以書札往還諮商

國計師獨時時稱湘陰左公之賢以爲有古大將風計其時  
文襄尙居幕僚也會文正公旣平江南嗣聞東靖閩浙西定

回疆皆出文襄之勩始歎師言爲知人然亦無從究其設施  
丁亥之冬有友人宦游自西歸者出平回諸奏牘暨陝甘土  
人所記述見示且屬爲編輯成書夫以不諳世務之胸而貿  
然欲任載筆之事扣槃揣籥以爲日其不見嗤於人者幾何  
顧毓秀以衰年喪其二子家居鬱鬱得此藉資排遣且樂得  
討論文襄之事業用謹依舊冊次其年月刪其繁蕪勉竭百  
晝夜之力而成之蓋回之發難糾結種類與漢民尋讎凶殘  
特甚其勢較粵賊之起於烏合者爲牢固難破也其始多忠  
勇公奉

命往勦方將肅清陝疆而遽以戰歿於是回氛益熾甘肅新  
疆皆騷然矣嗣典軍者迄不得其要領而泰西諸夷伺中國



多故羣起爲難議者將擬棄新疆而專事海防文襄公  
爲新疆經

聖祖

高宗兩聖所開創恃以固西陲近者諸夷惟俄最強其壤實  
邊新疆苟棄此不顧是啟俄人之侵軼而示諸國以弱東西  
受制首尾跋扈水戰又其長技海防恐未可專恃孰與先固  
西邊使俄夷懾于

國威則東南可徐圖耳於是排眾議而起合軍與餉皆一身  
任之

朝命甫下人人皆爲公危又西土苦寒諸將校多不願往公  
獨毅然率其二三同仇提師由秦踰隴以達關外察賊之情

偽以定勦撫五六年間雷驅席卷遂舉萬里雕敝之疆掃盪  
湔除以還之職方伊犁久爲俄據

朝廷遣使與約各畫舊疆而守而俄人有違言公時駐肅州  
乃調集各軍親出哈密以臨之戰有備矣會有

詔徵公還而俄亦遂斂手就議卒歸我伊犁公所議於新疆  
建行省設義學以誘教回民子弟疆理田畝及善後諸政則  
盡付爵撫劉公踵而成之今且蒸蒸臻富庶服禮教丕變於  
華風焉然則文襄所樹立匪特紆

朝廷西顧之憂抑亦貽回民以萬世之賴蓋公之處事務固  
根柢與物一推誠信每克一城必移民以實之嚴兵以衛之  
始議再進故已復之地不聞再陷賊之就撫者察其材力可

用聽入伍籍一同叙功受賞如願歸農畝爲授田廬牛種使  
安生業故其歸誠也若脫陷阱之險投慈母之懷而安有反  
側哉則其將校士卒之效死樂用更可知已而又能持以臨  
幾之警敏任人之專一故程功似迂而收效實捷也獨憶往  
者粵寇之興度支告絀秉鈞者方將事權算亟徵輸以濟  
國難而吾九曾師獨創爲重農固本之議冀以諷諭當途人  
多以爲迂闊不可用然東南之亂且遲之十餘年而後定今  
觀文襄負謗議以任鉅艱謀出於萬全而利規於遠久其深  
固不搖之氣用意多有與九曾師相爲表裏者而又參酌於  
螺洲師之籌畫以操縱張弛而準於古人伐畔柔服之義卒  
使荒徼萬里之外咸讐服於

朝廷之威信天下始曉然嚮所稱爲迂闊者苟本其精誠果毅以達於用其老謀深識固遠勝於綠飾苟就媮取一切之爲而毓秀獨悲吾九曾師發憤著書徒垂空文賚志以沒曾不及一親見文襄之業爲快也書用編年例起同治元年訖光緒十三年分三志曰志陝西者二卷曰志甘肅者四卷曰志新疆者二卷綜八卷凡回亂之始末撫勦之方略粗具焉而一以文襄爲宗文襄奏牘悉出親誦絕浮飾故所錄爲詳自餘死事諸臣及偏師之勝雕剿之捷其勞不可沒皆得備書間有一事所記各異姑兩存之以傳疑焉事有詳畧而無去取將待裁于史氏亦猶待材者宗桷根臬之用大小畢具惟聽匠者之采擇云爾光緒己丑秋七月柏壘山人楊毓秀

平回志卷一

太湖王志沂

東湖楊毓秀子堅編纂

受業長陽張榮澤同校

姪楊存澤

蓬溪蓬萊山館刊

志陝西上第一

回紇自唐平安史之亂留駐內地種類蔓延四域實肇始關輔受土納賦與科目登仕版

朝廷一視同仁與編氓無異而回則歲時婚喪與一切習尚  
歷千餘年猶仍舊俗用自區於漢民以故漢回錯處閒釁數  
開結黨尋仇械鬥劫殺往往而有官吏難於切究彌縫改釋

習爲故常，咸同之際，粵賊捻匪南北交訐，回民乘機構難，自陝而甘，延及關外，南北諸城相率以叛，遂啓俄夷之覬覦，糜爛者萬數千里，雖回性悍猾難制，原其首禍，未始非撫馭之乖方也。會中原廓清，金陵底定，乃鼓全勝之氣，悉湘淮精銳萃天下財賦，專制一方，攻勦撫綏，然且竭十餘年之經營，始漸就安輯，用力亦勤矣。陝省大荔渭南之回，世居渭北沙苑，咸豐十一年，河南巡撫嚴樹森以汴省爲粵捻諸賊往來要衝，患之樹森故渭南人，習知回俗強而樂效死，使人至陝募渭涇原回勇六百人，赴汴爲親兵，資扞禦，頗賴其力。同治元年，樹森移撫湖北，旋里展墓，率之歸，而以屬諸團練大臣張芾，極言回勇之力編入團伍，足稱勁旅，回民明習戰陣，自此

始二月粵賊自雒竄秦武關不守西安戒嚴陝西巡撫瑛  
慮標兵不可恃與張芾謀舉鄉紳募勇丁防南山要隘遂檄  
長安紳知府梅錦堂以十八厥之眾守子午峪自玉山以西  
屬焉渭南紳訓導趙權中以沙苑之眾守箭谷自玉山以東  
屬焉權中奉檄卽趨省城謁芾備言回勇難馭芾不謂然而  
權中歸卽募丁壯具糗糧軍裝五日而辦於是率鄉團五千  
渡渭而南自箭谷至少華設七汛所實無一回民也四月癸  
丑朔有回目馬世賢馬四元者率五百人歸附權中稱奉團  
練大臣檄募本教人助守且出檄以示權中留置閭處當是  
時粵賊屢犯渭南而牧虎關七盤嶺等處有逃兵導寇潛入  
其隘遂失權中知事不濟乃馳告各汛諭馬四賢等皆退守

渭水渡口。諸回聞寇至，遂不待遣，各散歸。行至華州之小張邨，回數十人，強斫民竹爲軍械。邨民鬪逐之，斃其二人。餘遁逸秦家邨。邨固回堡，遂勾結其黨三邨堡，欲與邨民構難。謀洩，已已。小張邨人亦糾合大張邨赤水鎮魏家灘十餘邨堡，近萬人，期先發以攻之。華州回知勢不敵，挈其老弱涉渭而北，寄居沙苑回巢。遂煽言三州縣民傳帖，約於三日內齊發，將盡殲我族類。回於要衝伺得漢民，縛之歸，搜衣中，果得傳帖如所云。其實華回僞作也。於是眾回聞之，響應而影從矣。回巢之巨者，在大荔曰王柯邨，曰喬店，曰羗白。在渭南曰禹家莊，曰倉渡，曰邸家莊。界於華荔渭者曰乜家灘。其餘星羅棋布，不下數百邨堡。其回目之悍者，赫明堂、任老五、馬世賢。



洪興馬龍馬四元也代榮也代恩郎元魁大瓜蛋哈哈  
禍者則赫明堂任老五也兩人者咸豐七八年間嘗倡亂雲  
南未果遂逃至倉渡潛於禮拜寺造軍械旗幟謀不軌各巢  
回皆聽命焉王柯郵羞白鎮與大荔之八女井鄰井民素強  
悍稔知回之將叛也甲戌合眾萬餘謀殲回富紳李樹德聞  
而往解之且與回議和回佯許之井民信之遂散其眾不數  
日事起井民驟不及備皆束手受屠而樹德乃僅以身免是  
日粵賊以河防密不得渡遂陷渭南知縣曹士鶴與其妻萬  
皆罵賊死於是粵賊由華州出潼關趣陝州矣先是趙權中  
守渡口與粵賊相持聞回釁急馳歸請鄉紳與回善者往排  
解丁丑鄉紳同回目七八人就權中約和約未成有回丁馳

馬至大呼曰東方火發矣時回縱火燒入女井馳馬者反言井民燒回巢回目遂奮袂起不顧而去是時沙南渭北諸郵堡焚殺無遺矣己卯遂掠孝義鎮權中所募勇自渡口散歸其家室悉爲回所戮而權中尙與其從客十餘人居守有奸民劉錫裕偕二回目率黨百餘以巾車至強邀權中往禮拜寺議事權中堅不往則挾之登車去比至則眾賊欲擁權中爲首權中痛罵遂與其從客僕夫皆遇害於是渭南二華高陵相繼失守三輔擾亂省城東路郵報不通被難之民望官兵如望歲而瑛棨乃誤信回子戈什之言以爲漢回械鬥可以彈壓息事張芾亦信之遂欲自往撫諭五月丁亥芾自省城登道從者同知呂紳知州陳煦知縣馬毓華朱雙之鄉紳

從者知府馬百齡知縣蔣若誦百齡回族也方登輿時城  
諸紳皆勸勿往芾笑謝之戊子由新豐渡渭宿臨潼之油坊  
街於是臨潼知縣繆樹本往治館舍各鄉團聞之率數萬人  
以爲之衛芾使止之不聽芾怒之曰不散去當坐以叛逆鄉  
團始懼而退是夕倉渡回且偕十餘人來謁具言漢民凌逼  
太甚所以拒之者緩死耳非敢爲逆也芾因諭之曰汝等皆  
良民惟欲得造孽者任老五一人而已任老五適在列聞之  
大恚乃潛歸倉渡他回私語馬百齡速去勿罹禍百齡以告  
芾芾不悟從官四人見百齡神色沮喪遂相與語曰事變矣  
速趣張公行人見芾則與二紳樹本皆相對默坐趣芾行芾  
不語百齡厲聲曰君等不速行欲同死耶四人者乃皆出走

樹本復趨之芾請朝食而行樹木以餅進芾更素粥炊粥食已方徘徊門外而任賊擁眾至遂殺若訥樹本而擁芾與百齡去壬辰擁至倉渡任賊踞上座縛芾階下迫使跪芾怒罵之截其耳甲午途遇害自回禍起荔涓各團長死難者縣丞劉藩劉炯同知劉炳訓導陳大本歲貢唐凝緒唐義衡生員陳洪範參將趙錫祺監生杜朝選崔文采崔文兆孝義鎮則拔貢嚴鑫廩生趙申中生員趙紹德監生趙汝及廩生吳訕從九品吳天成雲騎尉喬同雲監生同步霞從九品王生葵在黃家園戰粵賊死者則帶勇官陳茂經張龍驤龍驤子新緒其他州縣殉難士女難備採不悉記而同民中守義不肯從逆自死者喬店馬化朝勸其族不爲亂皆不聽自劉死沙

家莊沙黎兒先令其家五十口悉投井乃自焚其  
七兒禹成法業種蔬皆聞變自經禹祥故渭南捕盜隸回變  
卽散家財於鄉人之被擄者自餓死生員馬某同州人館食  
於外聞亂歸自剄於同州城門外滿刺者不欲爲逆爲其阿  
渾所制命爲伯長一日阿渾掠得婦女十餘人以屬之刺刺  
乘間送出回巢贈以資自投井死而馬百齡乃竟踰年逃歸  
矣於是回賊遂圍同州城中兵少居民不任守陣知府朱元  
慶令官紳率兵民分城拒守日給飲食元慶自提輕刀日夜  
巡城與守城者同寢食時出溫言循拊之復激以公義民皆  
鼓舞效死賊騎馳突城下喊殺聲終夜不絕則令懸燈外照  
燃油炬擲城下使通明防賊穴城又掘城根深尺許納甕其

中使瞽者以頭入探聽之。賊計莫施。自壬寅至庚戌。凡攻撲八晝夜。瀕危。元慶呼眾曰。勿懼。吾夜夢關帝往來城上。救護汝等。第堅守。自有神助。於是昇關帝像供城上。眾心賴安。會華州知州濮垚襲賊老巢。賊回援。城圍始解。六月甲寅。賊遂分隊犯省城。甘肅提督馬德昭。提督孔廣順等。以兵擊走甲子。德昭率隊往河灘草店護運鹽炭。遇賊數百迎擊。德昭揮兵奮殺。斬數十賊。以鹽炭歸。丁卯。賊於黎明帥大隊徑犯北關。德昭營。德昭分兵應敵。防東關之總兵閻丕敏截擊之。城上礮發。擊中騎馬賊十餘。始解去。旋復糾眾圍汪朝海。王錫爵二營。德昭先往救朝海營。沿牆開礮。賊亦發鎗砲抵死相持。我軍出牆擊賊。賊復出大隊從中路。張左右翼抄中營。我

軍以擡鎗隊由中路潛擊，佐以火毬拋燒三路賊。時孔廣順由南路督大隊會擊，別遣將分兩路直入賊隊，鎗礮齊發，立解朝海之圍。復會德昭軍四面奮擊，中營圍亦解。次日賊分二隊犯西北兩關，馬德昭揣知賊意，欲以一隊牽制北關軍，圖專攻西路，立遣馬隊一百馳救西關，自督各隊由東北隅迎擊，賊大潰。會見後路賊隊蜂至，卽駐軍督放擡鎗城上發大礮，應之賊力不支而退。其西關一隊孟百林迎擊，走西南燒村堡。適孔廣順等從後突薄賊，遂驚亂竄歸，而省城克保。是時陝兵多出援他省，瑛榮奏請調回，皆以賊羈牽不能撤還。

詔荊州將軍多隆阿率提督雷正綰馳援關中，亦遷延未至。

防省城者僅孔廣順所統分駐四關總計不過三千餘人晝夜防禦疲於攻拒七月丁酉滇匪郭刀刀犯平利在籍贊善邢景周都司銜陳玉武生楊應麟帥鄉團至巴山峽遇賊接戰驅入楚境而三人同時遇害回賊以萬餘人圍攻六村堡堡距省城二十里丙午我軍往救協領圖克唐阿訥勒和春皆以前鋒馳突戰死馬德昭居中權持仗深入殺傷甚多汪朝海傷左股將弁死事者佐領德盛防禦法福哩倭仁阿驍騎校色勒善雲騎尉珠爾松額馬步兵勇死者二百餘人六村堡卽於是晚攻陷堡中萬餘人屠戮殆盡圖克唐阿訥勒和春皆以驍將自豫調歸圖克唐阿曾於靈寶擊賊解圍訥勒和春曾與潼關守城親發砲轟賊二將平時交最篤同日



殺賊死義，是時直隸提督成明與賊戰渭北，兵潰賊勢彌張，遂圍涇陽三原，犯咸陽，而鳳翔諸屬縣回亦聞風起，與甘肅諸回接通，作聲勢，又興安商南紫荊關漢中平利爲陝南邊，蜀楚諸賊不時出入，西安守城兵單，惟馬德昭數著聲威，羣賊所憚，民心恃以無恐。八月庚申，馬德昭帥師往草店，護運薪炭，遇賊邀之，至磁塚，前隊兵趨登塚上，半登賊圍之數重，鏖戰一晝夜，都司徐尙高衝圍入，斃賊多，賊見後軍至，乃遁。於是

欽差大臣勝保自洛來陝督軍，行抵臨潼，邀擊賊，縣城西五里敗之，生擒回目馬友德等，協領烏章阿鳳春戰死。乙亥遣雷正綰及總兵成祿等攻咸陽馬家堡，一路賊巢克之，先後

斃賊四千餘，斬其酋阿渾二人。閏八月，抵西安，攻破灞橋，杜曲及景陽長條，卹六堡寨回巢，省城解嚴。甲午至咸陽，戊戌率大隊進攻咸陽賊巢，賊二萬人列隊拒之。雷正綰成祿督隊迎擊，賊屹立不動。勝保麾軍直搗中堅，鏖戰四時，烏勒興阿、宋詩等見步軍陷陣持久，遂領馬隊兩翼進。雷迅風馳，賊眾皆靡。陣斬黃馬褂賊數人，賊遂北奔。馬隊奮鞭追殺，雷正綰等短兵馳突陣中，賊皆棄仗潰。我軍遂躡追逼賊巢，火彈噴筒齊發，乘勢擁入，賊投井墮崖，相踐踏死者無算。張家堡藥王洞海家卹卡家卹四巢同時悉平，共殲賊四千餘，生擒百餘，獲大礮十一，其餘軍械無算。庚子賊復以五六千人來犯，勝保憑高揮軍，馬步兩路進，截賊陣爲二，賊腹背受敵，遂

大亂奔東北，我軍追奔三十餘里，流血成渠。其時滇匪郭刀  
刀自湖北竹谿竄入甯陝廳境，勝保回省調兵防。子午谷九  
月庚申，至咸陽會雷正綰兵，擊敗畢郢原賊。畢郢原卽細柳  
營故址也。壬戌，攻克馬家堡。勝保令雷正綰領成祿等馬軍  
攻各路援賊，而令總督馬陞等步軍攻賊巢，克之。遂乘勝掩  
殺破其七巢。自馬家堡至蘇家溝，縱橫三十餘里，賊尸遍野。  
奪獲大車千餘，大礮二十，軍械無算。馬家堡阻山帶川，爲西  
路進兵要地，賊之精銳悉踞其中。是日潼關副將哈聯陞駐  
軍敷水鎮，賊詐降，竟劫哈聯陞去，并失其關防。其時西路賊  
勢已摧，而涇陽被圍亟，勝保令成祿領步馬各軍馳救。雷正  
綰仍駐咸陽簡練軍旅，以扼西路。自統步馬赴華陰潼關扼

賊東路癸亥成明王永慶攻敗同州城西平陽防賊賊復糾眾圍攻朝邑城十一晝夜王永慶等擊退西奔永慶裒創力戰首先陷陣功多十月甲申甘回由神峪河犯法延鎮隴州知州邵輔以赤延爲府要隘檄崇信華亭兩縣督鄉勇會勦自駐鎮上屢摧賊軍賊撲營輔力戰死乙酉勝保在潼關奏言回賊詭譎異常醜類繁多西勦則東馳東攻則西竄以趨避爲長技勢難專制請調西安將軍穆騰阿以自助委以東路攻討就潼關立爲大營且請陝甘總督熙齡暫留潼關以資鎮壓庶兵力不爲一隅牽制於是同州告急乃與穆騰阿移軍由朝至同沿路攻勦卽於同州城外西南高阜列屯而王閣邨羗白蒼頭各鎮之賊或數千或萬餘不時渡洛來襲

十一月己未庚申賊疊犯同州營我軍失利三品銜佐領傅新色游擊馬德麟戰死丁卯黃得魁等攻東西聯郵賊巢克之於是以前隆阿爲

欽差大臣先是

朝命自楚援陝途遇粵賊陳德才合捻首姜汰凌張落刑等二十餘萬三路窺秦多隆阿慮賊奪隘乃令先鋒雷正綰以陶茂林軍三千人兼程進自帥大軍繼之甫抵商南陳曾已躡於後截我餉道乃回軍掩擊破之於紫荆關復其城賊遂宵遁次日多隆阿單騎馳商南而令馬隊追賊比至商南姜曾適由富水關至商南陋邑城中衛卒數十人合邑恒懼多隆阿從容布置城防令城門洞開列十數騎以待賊不敢逼

歷五晝夜賊漸北趨後軍隨至多隆阿預檄茂林設伏武關  
截賊去路自率五千人追之商南亂山崎雜兵難施展乃自  
棄馬登山持令旗覘賊所向指揮軍眾三戰三捷賊無出路  
攀藤木墮崖澗死者無算姜酋僅以身免是役也以數千疲  
兵滅五六萬悍賊

朝廷偉之而張落刑已聞風遁去方悉軍入陝會

朝廷命勝保督陝軍移多隆阿東勦陳會追及樊城又敗之

唐縣鎮遂屯軍樊鄧間及是勝保軍覆回氛益熾復有是

命乙亥入潼關遂解同州圍擊賊之背一戰大捷焚其韓村

八營回賊倡亂九閱月至此始挫遂扼於洛河之南其地林

木叢雜產蒺藜表斜百餘里卽古沙苑所部多南勇跣足搏

戰苦不得逞多隆阿乃多置草履行滕命著之以戰步伐及  
便又以滾營法逼賊而壘十二月己卯令穆圖善率九營步  
隊往洛水北岸築營別令陶茂林列陣以護之而自領三營  
遙見賊壘叢列僅隔一水礙於修築於是令陶茂林帥三營  
渡河誘賊離穴賊果以全力注之卽別令三營中路設伏濟  
河直撲賊壘賊敗走五六里而四路援賊大至復令穆圖善  
分九營之半修營半出擊賊賊始踉蹌奔我軍縱橫截殺賊  
死尸狼籍夜半渡洛歸而築壘已成副將徐德明手刃多賊  
力竭死又以長稍勾矛爲方圓大陣循環無端沒途置瓷礫  
刺芒以礙賊騎每日四更出隊且擊且前輪流替戰士卒不  
勞而賊疲於迎拒計窮乞撫多隆阿力拒不納

二年正月戊申朔多隆阿令軍士嚴備別選徒伍作雜劇魚龍曼衍傾營縱觀以誘賊賊堅壁不出己酉偵知賊於王閣邨外掘陷阱濠塹爲死守計乃及其未備攻之囊土填濠賊復於羗白鎮五里許列入營以屏蔽王閣邨我軍投炬焚壘而還維時陝境城市疊被屠掠赤地千里軍餉兵械皆缺乏難驟辦多隆阿方慮無以禦敵適有回酋乞撫者知其譎因佯應之遣曹克忠赴賊營驗繳器械馬匹以覘其虛實遲迴十餘日後路軍火糧運悉至於是召回酋責之曰爾等反覆靡常豈真降者殆借以驕我耳昔武侯七擒孟獲南夷始不復反汝歸修甲兵與吾決死戰俟力屈心服再議撫耳縱之歸而卽勒兵攻羗白鎮王閣邨等老巢圍正合東風大作吹



沙拂面矢石皆退飛陣稍移乃手斬先卻者以徇各將校乘  
盛氣咆哮而前賊眾驚敗擒斬千餘庚午賊馬步千餘寇省  
城營馬德昭擊退之次日賊數千分東北正北三路來犯德  
昭分隊應之自率馬步出正北往來衝殺二十餘合城上發  
大礮助之擊斃多人賊猶不退復轟以新製馬礮斃黃衣賊  
目一人而穆騰阿復率新練馬隊出西城門賊見援兵至始  
竄我軍乘勝壓之追殺至十里舖遇大雨收隊回乙亥多隆  
阿率步軍九營分進復以三營近羗白鎮北扼隘而軍別遣  
馬隊伏鎮左右令羸卒誘敵部署定賊萬餘人由王閣邨南  
路來綴我師而羗白鎮賊二三萬眾由北門長濠舞蹈而出  
我軍佯北賊乘之九營步隊出抄賊後三營橫扼賊吭兩伏

騎齊起賊皆墮圍中遂大潰突出追殺至濠邊斬擒二千及  
夜賊潛以輕騎劫營多隆阿預堅壁壘三攻不得逞乃退是  
時馬德昭爲熙齡奏調赴甘肅又爲多隆阿檄解興安圍省  
城紳道員李宗沅等五十三人合辭呈總督署請奏留書略  
云闔省倚軍門爲長城數百萬生靈得苟延至今日者實軍  
門一人之力情詞哀切奏上

詔允之二月丁丑朔五鼓多隆阿督各營進勦見賊掘長濠  
自沙窩繞羗白王閣十餘里而西路援賊驟至多隆阿部署  
衆軍定齊進抵賊濠軍士爭以柴薪土囊填平湟塹羗白堡  
砦壁立千仞鹿角豚柵密排數重周圍繚以棘刺礮臺警樓  
高矗雲表守禦最固爲賊所倚恃多隆阿乃令先攻之與諸

將約曰一鼓齊進再鼓畢登三鼓不克者杖四鼓不克者  
會賊馬隊馳而前副統都蘇倫保拍馬當先迎擊賊大潰奔  
入壁遂乘勝奮登攻克羌白鎮堡破時堡中老弱婦女哭聲  
震天盡屠殺無遺隨分兵進搗王閣邨賊見羌白已破方驚  
擾會陶茂林伏兵出林中四面圍勦遂入其壘殺賊尸山積  
流血成川追擊十餘里奪輜械牲畜無算獲藏鏹數萬盡以  
犒軍日暮奏凱還營觀者億萬計歡聲雷動遂遣陶茂林率  
步隊八營屯王閣邨東西兩頭互抱爲却月陣首尾應擊變  
化不測王閣邨爲古沙苑地沙土輕揚人馬不能開目而賊  
尸腐變毒流井水所部多南勇不慣食麥時疫大作十病四  
五多隆阿親爲和藥食士每食必撤珍膳與之時鳳翔回酋

崔巍圍府城近半載瑛檄屢調兵往援并所自募勇丁僅得五千兵少圍訖難解庚子

詔書切責瑛檄復遣副將王夢麟率馬步百餘人赴鳳行至秦渡鎮賊自西來抄夢麟駐軍迎拒賊圍之數重夢麟死力衝出仍率其百餘人東歸省城游擊陳德龍等自楚募勇歸到藍田而西安副都統伊昌阿適至擬同赴省未行而賊大至由西北犯城伊昌阿卽率所領登陴助守礮斃賊多賊繞南門德龍等伏兵突出往來抄擊賊退追殺里許德龍卽帥所募勇千三百人駐藍田三月甲寅

詔西安副都統德興阿移師同朝以壯多隆阿聲勢己巳多隆阿攻雷化鎮克之庚午攻龐谷莊令德興阿領馬隊百餘

為後繼而自率親兵進攻莊前樹木箐叢卽揮軍衝林木入時烟塵障天迎面不見人賊矛盾自相擊踐踏死者無數龐谷莊遂平其別部軍同時攻破喬店副將何成江戰死是日卽屯軍自龐谷莊至喬店列八營辛未賊大隊由孝義鎮至喬店列陣十里多隆阿先別遣軍設伏絕賊後路遂分兵四出拒之賊大敗遇伏殺斃無算乘勝遂攻破孝義鎮賊屯獲哈聯陞所失潼關副將關防及偽孫大元帥斬賊三千餘多隆阿卽麾軍直搗倉頭賊屯倉頭城塹深阻濠內設鐵蒺藜梅花椿防備嚴密進攻逾時城上礮子雨下勢難驟克乃收隊回四月丁丑朔移營環賊屯築礮臺以擊倉渡戊寅四鼓傳令出隊面授諸將方畧誓軍曰今日不得倉渡不得收隊

於是將士騰躍竟日奮攻薄城賊見官軍上城遂大亂追殺二十餘里賊投渭水死者無算倉渡遂平遂以步隊七營移屯倉渡遣潼商道備船艦造浮橋於渭夾水駐軍與省城通聲勢以成建瓴之勢由是東路肅清其敗賊悉西竄糾合附近賊衆圖逞志省垣四月中賊犯省城大小十餘戰多或數千人少則數百人馬德昭相機隨勢以應之多所斬獲守城軍前後戰死者咸甯武生張占魁六品軍功黃雲安千總李鳴山外委孫獻魁是時甘肅平涼被圍

詔多隆阿撥勁旅遣雷正綰應甘肅援正綰本駐三原蓋自三原撥遣也甲辰賊犯省城西關馬德昭分隊迎擊五品軍功張振躍馬衝入賊陣斃數賊隔馬生禽一賊衆軍遂乘勢

衝擊賊退其大隊復來犯德昭回兵督戰金勝寺追殺十餘里五月丙午朔賊攻三橋營總兵曹克忠督所部擊退克忠於前月始以新募楚勇七營駐三橋以通省垣糧運立營甫定屢爲賊擾克忠皆擊走之丁未馬德昭率各營往援三橋之軍中途遇賊把總耿忠超奮呼殺賊手刃數人中鎗墜馬死復有大隊由東北犯城濠瑛棨調虎威營出城與德昭軍合擊之適曹克忠督所部自東來賊以馬步包抄克忠麾軍作雙龍陣輜重及難民居中隊伍分左右出自率親兵及烏拉馬隊戰且走殺斃賊七八百賊馬二百餘奪獲軍械無算行抵十里鋪東與德昭軍合賊見援兵始退克忠遂以各營分駐十里鋪與省垣通聲勢戊申總兵陶茂林攻克郿縣之

槐芽鎮及近鎮各賊壘多隆阿師次交河口患腹疾憊不能督戰乃擇諸將中持重者穆圖善陶茂林令分軍跨渭爲營而以驍將朱希廣趙旣發輔之希廣旣發素相善請併營於北岸當賊衝多隆阿弗許力請之乃許戒之曰賊至堅壁勿戰吾自有術破之慎勿輕出也六月丁亥賊攻交口石汊河軍屯希廣旣發以賊數辱詈不能堪遂違令出戰設伏擊敗之乘勝渡渭追殺數十里平其十三壘副將關行莊劉聯升黑夜攻壘先登中礮死己丑旣發希廣移營渡渭壘未成賊大隊至旣發等拒戰希廣奮氣衝入賊隊戰死旣發突圍救之受重傷亦死賊遂圍新壘辛卯多隆阿力疾乘肩輿率後隊二千分遣諸將銜枚疾進賊猝不及防敗走遂解新營圍



溫德勒克等馬隊邀賊歸路多隆阿親督諸軍三面蹙之斃賊無算壬辰曹克忠移屯韓信塚白楊寨滄河等處以通藍田路營甫立賊大隊來犯穆騰阿遣黑龍江吉林馬隊及西安駐防兵往援擊賊走甲午馬賊三千餘步賊千餘直北撲營克忠親督各營四面迎剿賊敗績自此藍田一路郵傳復通乙未賊攻陷甯羌州知州金玉麟吏目馬錡死難

詔馬德昭統兵救鳳翔紳民痛哭請留許之賊犯南關德昭擊賊至八里舖伏兵突起德昭墮馬乞假養傷七月丙午朝廷以瑛榮擁衆自衛不肯調兵外援

詔責頻仍多隆阿亦數奏言其短至是免之而以劉蓉爲陝西巡撫其未到任前以張集馨攝理辛亥多隆阿攻蒲桃窪

賊屯破之遂進攻十三邨克其三邨共殲賊四五千乙卯攻破三府里賊巢及其六營進攻白鴨嘴巢丙辰移營三府里丁巳攻馬烏什賊十餘堡一日就平戊午馬德昭以罪免詔西安副都統德興阿代統德昭軍是日多隆阿攻沙河賊以大隊拒之鏖戰移時賊屹立不動多隆阿乃大誓三軍將士騰呼一鼓而賊潰追北至灞河賊赴水死者數千灞水爲之不流沙河賊巢平是役俘賊二百餘及南岸總會馬阿渾獲騾馬器械無算南岸灞河以東賊巢皆肅清

朝廷以多隆阿膚功疊奏遂以全陝大局責其籌畫丙寅多隆阿提師入西安蒐簡軍實汰羸老節浮糜軍容爲振遂遣陶茂林勦陝省西路之回與曹克忠赴援甘肅八月庚寅陶

茂林以兵三千五百馳解鳳翔圍先是粵賊陳德才沿漢入興安城中文武皆遇害團練擊走漢中至是攻陷府城復分隊竄褒沔略陽等處藍朝柱踞洋縣張第才由石泉漢陰駐鎮安曹燦章竄盤屋分屯槐埡於是京堂李雲麟奉

朝命督勦壬寅多隆阿自普陀原進兵攻十三邨平之九月乙巳移營進攻高陵克之於瀕河數十里悉爲賊藪皆次第蕩平時三原知縣監利余庚陽素得民心稱循吏亂起倡立同德局團鄉勇懸重格募健兒共得數千人使其子若孫四人及邑紳分督之以禦賊於是邑人踴躍輸將一時得白金二十餘萬兩簡邑紳廉能者司其出納凡臨戰死傷及奮先殺賊者酬賞動至數千金庚陽登城巡警凡十八閱月晝夜

無聞三原逼近省城鄰邑皆爲賊藪賊不時圍攻左拒右迎日不暇給而士氣不懈孤城卒保省城尤賴爲唇齒賊去詳請蠲緩征徭大吏嘉之通諭各州縣傳爲楷法戊申多隆阿進北至涇渭合流處賊竄渡涇我軍遂屯北岸賊於南岸發大礮擊我營壘多隆阿先遣馬隊趨上游備截擊遣穆圖善及諸軍泅水而濟賊大潰我軍分兩隊沿渭涇追北四十餘里賊至長陀灣走入邨堡門不及閉我軍奮擊之長陀灣兩邨皆平其時雷正綰先攻破永樂店塔底兩賊巢其敗賊仍聚南岸多隆阿遣馬隊擊之正綰亦濟涇與穆圖善合勦先後共殺馬隊賊三千餘涇水深沒腹我軍渡者多溺死次日多隆阿命造游橋移屯長陀灣以期前進永樂店之戰成祿

首先入賊壘功多甲寅移營進逼蘇家溝賊巢先遣雷正緒率所部渡涇扼賊西竄遣曹克忠趣咸陽堵禦賊自滑至涇綿亘十餘里列陣以待多隆阿部署諸軍分路前進鏖戰兩時斃賊數千賊奔蘇家溝渭城老巢我軍遂攻高陽莊等賊壘一時悉平壘中賊搜殺無遺乘勝進趣蘇家溝破之忽馬賊數千自渭城來援我軍迎擊追北一路攻破馮家圍子諸卡直抵渭城副將孟宗福先登總兵姜玉順相繼超距上城門開諸軍奮呼擁入渭城爲賊老巢城內賊逾萬一時勦滅殆盡救出難民千餘其逸出之賊馬步千餘而已是日前後綜斃賊不下萬七八千獲馬牛器械無算爲近時第一大戰丁巳陶茂林攻克麻子崖庚申攻克油房街癸亥攻克第一

邨白家凹諸賊巢遂進兵解鳳翔圍乙丑陶茂林攻克風伯廟屈家河等處賊巢鳳翔境內肅清回首崔巍走甘肅十月李雲麟攻山陽粵賊復其縣城庚辰陶茂林夜以火箭噴筒攻克鐵樓邨辛巳攻克鄭家邨鳳翔東路賊巢悉平甲申雷正綰攻克拜家河辛卯曹克忠軍由百子溝至史家河其地四面阻山賊巢在溝內亘十餘里克忠設伏誘擊之悉平癸巳進攻白吉原賊巢山路險隘軍士皆匍匐進山上滾木礮石亂下我軍多中傷克忠賈勇先登將士裹創繼進大呼而上衆賊驚竄殺斃千餘生禽賊酋李阿渾等五人邠州境內肅清賊酋黑阿渾斃於亂軍乙未雷正綰會蘇倫保馬隊攻西南兩原大佛寺等賊屯平之卽乘勝進兵屯甘肅靈臺縣

境十一月李雲麟攻克鎮安之程家川回賊生禽賊酋胡滿等殺之降其被脅者千餘人簡壯捷者數百立爲隴軍歸化營隨進勦漢中十一月壬戌張集馨奏陝省各州縣紳民團練皆自備軍械口食隨官軍攻勦守禦雷正綰盛稱長武民團之功凡收復鎮安山陽及商南各處防禦多資團練而石泉等廳州縣自漢南陷賊逾兩月除周有全礮船外更無一旅之援特以扼西鄉茶鎮爲漢南屏蔽者皆民團力也前安康平利紫陽漢陰諸縣藍賊竄擾民團出死力防勦其尤著者平利訓導史兆熊臣曾奏請

議獎今漢南兵力未合民團所繫尤重其有捐資助糈或冒險衝鋒者容臣請

獎以昭激勸焉

三年正月官軍克復漢中陳得才仍順流下竄漢中及漢南前後戰死者千總左雲桂外委戴金山軍功陳國珍李百順參將黃星堂游擊梁松鶴千總張大興副將徐祥泰六品軍功劉得勝岳雲龍二月戊午曹克忠攻雨亭寺花花廟賊十餘巢悉平遂會陶茂林軍趣隴州關輔既肅清多隆阿以爲欲度隴西征必先掃除漢南之賊以清後路賊偵知之乃東遁而賊酋藍大順尙踞蓋屋乙丑遂往圍之蓋屋城小而堅藍酋善守備發地雷攻之不下百計誘之不出乃簡健卒數百攻其月城令將士曰賊雖善守月城破彼不安處矣吾今分諸軍更擊之以逸制勞不出兩日賊必西走吾已設伏禽



藍酋矣，乃親登礮臺，擊鼓督軍，戰逾兩時，悍賊死，寶什子中傷，多隆阿左目，而鼓音不絕。是夕，賊果由西門遁，伏兵起，藍酋被鎗逸，獲偽賢主藍朝元等三人，藍三順、藍七順等十五人，偽先鋒顏貴忠及小酋方元勝等八十餘人。總兵桂學高協領穆騰額戰死，賊首藍大順者，與李短塔塔於咸豐九年倡亂雲南昭通府，李賊授首四川，大順率其黨三千餘竄陝，據洋縣。以去年十月攻陷蓋屋，蓋屋克復時，與其黨數十人竄新口峪，復裹脅二三百人，將與甯陝曹賊合，中途爲佛坪團練截殺其半，大順竄漢陰，漢陰團練邀殺之。三月甲寅，多隆阿以中礮病篤。

詔穆圖善署理欽差大臣關防，幫辦多隆阿軍務。四月癸未，

西安將軍忠勇公多隆阿薨於蓋厘大營，多隆阿，蒙古人，隸黑龍江部，年少高氣，膽畧過人，粵賊之亂，應募入關，著功楚皖，臨戰身先士卒，不避鋒鏑，運籌決勝，料敵如神，統兵十餘年，所得奉分給將士，未嘗私其家，疾革昏瞶，猶手作揮軍狀，口呼殺賊，無一語及家事，生不識漢字，得札牘，使人讀而聽之，指論是非，無不中綮，殆有天授，是時陝回皆西竄，與甘肅回合踞平涼等處。

朝廷以都興阿爲欽差大臣，雷正綰幫辦軍務。

四年正月，甘回在邠州長武隴州汧渭間者復滋入陝境，先是陝境肅清，盡掃境內之兵以援甘，腹地空虛，劉蓉請分雷正綰、曹克忠所部各三營屯邠隴要隘，以防陝邊，復撥省城

防兵及正綰新募之軍，檄撫標中軍彭體道由岐山武功往會勦。癸丑，提督彭基品會彭體道軍，雪夜攻克醴泉之趙邨。體道率死士三十人躍登堡牆，既克而邨北小堡賊突出抄體道軍圍之。副將羅洪德、照磨唐楚翹憤率所部突圍前救副將朱之南、叅將艾傳泗，游擊譚孝友戰死，洪德等仍督隊繼進，大呼突陣。體道亦大呼潰圍而出，賊勢始靡。復鏖戰兩時，斃悍賊六百餘，賊奔淳化境。死事者守備高松林、梁清泰、羅境乾、郭聯升、孫仲祥、千總龍正大、把總李春發，外委鄭玉山。是時雷正綰率軍回駐涇州，分遣諸營駐北塬、黨塬、花所等鎮，以遏後隊竄賊，而固邠、長門、戶。七月，甘肅靈州賊擾陝邊，初陝回赫明堂爲雷正綰招降，安置黑城子，近復招聚回

衆至八九千人，雷營叛將胡大貴等勾結赫明堂及穆三、楊大娃子，各擁馬賊千餘，由鎮原甯州崇信三路圖竄陝西。劉蓉乃奏遣同知鄆太愚領四營，合總兵段登雲軍，扼定靖要路。總兵楊得勝、扼鄜延，楊能格率魏添應等相機截勦。復奏檄總兵劉玉興軍屯鳳翔，知府黃鼎屯邠長，總兵蕭德揚駐鳳縣，更咨漢中總兵蕭慶高分其四營駐畧陽，以防禦之。八月甲午，鄆太愚攻克吳旗鎮，叅將孫士立持矛大呼入賊隊，生禽賊酋惠喜，中供稱金積堡巨賊馬化澁、蘇玉保、馬生彥等，令其與馬成海揀精銳數千，分撲官軍營，以通入陝之路。五年三月壬戌，甘肅省城兵變戕官，武庫軍械擄掠一空，逼脅藩司林之望檄署官司，飾詞具奏，而陝甘總督楊岳斌在

慶陽聞亂急欲回勦劉蓉建議以爲宜姑置蘭州爲緩圖專  
用力東北杜平固出竄之路通慶涇饋運之途後顧無虞然  
後可鼓行而西宜先遣曹克忠督兵援蘭州藉其聲威暫爲  
鎮撫秦上

詔允之辛未至己卯鄆太愚等攻克鐵角城亮馬臺西嶺嘴  
諸賊巢追北二十餘里達於甘肅界劉蓉檄段登雲移軍鐵  
角城白家屯等處以厚兵力而資防剿戊子段登雲等攻克  
馬家畔回五品軍功陳元龍民人李崇玉戰死四月辛亥提  
督邱時成等攻賊於鳳翔之洛城河灣通判周宏謨戰死五  
月踞固原回首孫義章棄城東竄靜甯會甯渭源等賊亦皆  
傾巢移踞隴境蔓延五六十里謀欲東歸其酋則有馬生彥

衆至八九千人，雷營叛將胡大貴等勾結赫明堂及穆三、楊大娃子，各擁馬賊千餘，由鎮原甯州崇信三路圖竄陝西。劉蓉乃奏遣同知鄆太愚領四營，合總兵段登雲軍，扼定靖要路。總兵楊得勝、扼鄜延，楊能格率魏添應等相機截勦。復奏檄總兵劉玉興軍屯鳳翔，知府黃鼎屯邠長，總兵蕭德揚駐鳳縣，更咨漢中總兵蕭慶高分其四營駐畧陽，以防禦之。八月甲午，鄆太愚攻克吳旗鎮，叅將孫士立持矛大呼入賊隊，生禽賊酋惠喜中，供稱金積堡巨賊馬化澁、蘇玉保、馬生彥等，令其與馬成海揀精銳數千，分撲官軍營，以通入陝之路。五年三月壬戌，甘肅省城兵變，戕官武庫軍械，擄掠一空，逼脅藩司林之望，檄署官司，飾詞具奏，而陝甘總督楊岳斌在

慶陽。急欲回勦。劉蓉建議以爲宜。姑置蘭州爲緩。用力東北。杜平固出竄之路。通慶涇饋運之途。後顧無虞。然後可鼓行而西。宜先遣曹克忠督兵援蘭州。藉其聲威。暫爲鎮撫。奏上。

詔允之。辛未至己卯。鄆太愚等攻克鐵角城。亮馬臺西嶺嘴。諸賊巢追北二十餘里。達於甘肅界。劉蓉檄段登雲移軍鐵角城。白家屯等處。以厚兵力而資防剿。戊子。段登雲等攻克馬家畔。回五品軍功陳元龍。民人李崇玉戰死。四月辛亥。提督邱時成等攻賊於鳳翔之洛城河灣。通判周宏謨戰死。五月。踞固原回首孫義章。棄城東竄。靜甯會甯渭源等賊亦皆傾巢。移踞隴境。蔓延五六十里。謀欲東歸。其酋則有馬生彥。

任老五李大帥馬星福蘇蛤兒崔三穆三鄒保和海子馬之屬劉蓉以爲羣賊麋聚正宜變防爲剿合圍野戰誠令陝甘兩省精銳併力圖之不難一鼓而殲奏請

遣穆圖善撥金順馬隊赴鳳陽

遣楊岳斌調王得勝軍赴隴州會剿維時蕭德揚黃鼎印時成劉玉興等軍會楊岳斌所遣總兵劉効忠馬隊抵隴州蕭慶高軍抵鳳翔相與接應遂將遼玉邨穆家莊曹家灣王家嘴等數十巢攻克掃盪數十里餘賊走故關鄆太愚段登雲亦擊敗保安一路賊六月譚玉龍赴隴軍行至赤廛鎮攻破白陽林華亭上下關等賊巢賊走尖骨山老巢戰死者副將方得元參將余炳忠游擊殷得高夏得勝林得勝都司邵至



咸其時官軍攻克故關賊壬寅馬隊賊由靈臺史家河偷  
邵寨十餘日內馳突麟遊咸陽邕陽等八九州縣叅將彭體  
道率馬隊追擊陣斬游擊劉義安以徇軍於是士氣百倍晝  
夜窮追賊旬日不及炊眠遂竄回平固辛亥譚玉龍會陳德  
隆軍攻熾暖莊川等賊巢丙子楊德勝等攻克神峪河八月  
譚玉龍等攻克尙家店白石川甲午譚玉龍會劉厚基鄢太  
愚攻走娘娘廟賊時楊岳斌親督甘軍擊敗清水張家川賊  
走華亭劉蓉復遣劉厚基等由下關會上關蕭德揚等軍逕  
搗尖骨山老巢丙午官軍四路環集賊懼分途奔竄約至山  
寨鎮合隊老弱婦女先行馬步殿後時蕭德揚黃鼎等移營  
磨坪川近賊壘偵知賊走遂會諸軍追剿及賊後隊叅將孟

學文等驍馬馳突截殺殆盡尖骨山四面巢穴悉平追北至十里鋪擊獲甚夥餘孽向平涼隆德竄走華亭崇信遂無賊迹劉蓉乃遣西蒙克西克等軍由邠長趨涇州進擊與楊岳斌會軍以防賊竄慶陽復分軍駐汧隴麟遊邠長要隘九月劉蓉以病求代安徽巡撫喬松年調補陝西自汧赴任旋命左宗棠督陝甘軍宗棠奏引前浙江按察使劉典幫辦軍務疏中稱典剛明耐苦廉幹有志節用兵長於審度地勢臨陣身先士卒然性稍褊急有所見必直達其是以此嘗見忤於人臣常言之曾國藩楊岳斌皆不以臣言爲然也又稱臣軍入甘當先分兩大支由東路廓清大局勘定然後入駐省城蓋進兵陝西必先掃清關外進兵甘肅必先掃清陝西駐

兵蘭州必先掃清各路然後餉路常通師行無梗得以一意  
進勦無虞牽制隨卽開設屯田已復之地不令再擾當進戰  
時卽預收善後之效民志克定兵力常盈事前計之雖似遲  
迂事後觀之翻爲安速也十月擒匪張總愚由靈寶閿鄉竄  
入華陰朝邑等處欲由魯山竄漢中

詔曾國藩遣鮑超軍入關及湘楚各軍援陝鮑超未至甲辰  
劉蓉奏請

遣曾國藩調廣東提督劉松山軍由商山進劉秉璋楊鼎勳  
由潼關進張賊專恃馬隊若併力扼諸潼關之南原潼峪蒿  
峪一路澗谷間則賊無能施其長技或可全數殲除鮑超旣  
無意入關如賊逸出豫境仍令其分扼閿鄉盧氏及荆紫關

卷一  
陝西一  
三  
截賊去路以圖聚殲復奏

遣穆圖善率所部由鹽茶趨平固駐軍涇州

遣雷正綰等軍遏賊東竄以杜回捻合併始得專力捻賊無  
西顧憂又以爲防河不如防渭請增置防兵於風陵渡上至  
龍門以杜賊渡渭越晉境山西臬司陳湜亦以礮船赴三河  
口巡防劉蓉復調步隊分駐渭水北岸以壯河干圍防之氣  
十一月甲子周承顯領涇防各營合雷正綰張在山等攻破  
紅河川回巢

平回志卷一終

平回志卷二

太湖王志沂

東湖楊毓秀子堅編纂

受業長陽張榮澤全校

姪楊存澤

蓬溪蓬萊山館刊

志陝西下第二

六年正月劉松山駐軍西安城西雨花寨。擒賊全隊犯營。松山會軍擊之。張錫嶸居前迎戰死。松山率諸軍力戰賊敗。追殺八九里。斃賊千餘。時雷正綰軍屯邱家寨。慶甯回賊數萬人。於去冬圍正綰營。正綰被圍二十餘日。糧路絕。殺驟馬食。士忍飢苦戰。甲戌衝潰。重圍遂將泰昌新莊諸賊擊退。而慶

甯賊復分竄入鄜州長武喬松年奏

遣庫克泰德與阿爾軍由邠長赴涇州與正綰諸軍夾擊之  
又回賊竄三原咸陽意欲渡渭與捻賊合譚玉龍堵擊賊不  
得渡退至涇陽二月曾國藩遣總兵馬德順領馬隊來陝與  
劉松山等軍攻捻賊於金渠銀渠兩鎮殺斃長髮悍賊甚夥  
兩鎮悉克賊退踞齊家寨劉松山部下戰死者參將劉福勝  
劉發蘭彭榮致游擊張得豐陳萬勝李振五都司舒瑤林賀  
爾山由是回首崔巍由靈臺竄入鳳翔擾及岐山扶風其大  
隊踞鳳翔之橫水鎮喬松年遣譚玉龍等截擊癸卯捻賊由  
郿縣泅水渡渭馬隊殿後劉松山等追擊之賊由扶岐東走  
譚玉龍等軍遇之於扶風擊敗其後隊張總愚率悍黨圍我

軍王龍等衝破賊圍，賊退踞益店。時左宗棠自鄂調集各軍，編爲前中後三路，十五營。宗棠自統親兵營十哨，及先鋒後勁新前新後四營旂馬隊五起。甲辰遣總兵劉端冕、周紹濂率前中十營啟行。戊申自率總兵楊和貴後路五營繼進，由雲夢德安達襄陽。三月，擒賊全隊，由菊花邨竄乾州之臨平鎮，回賊亦同時東竄，分踞傅家莊、徐家堡，爲犄角勢。郭寶昌軍追至醴泉，攻破賊莊，殺斃援賊五百餘，救出難民二千餘，直抵乾州。時西安將軍庫克吉泰督馬隊與劉松山等軍至乾州，會勦。己巳，諸軍會攻臨平鎮，分三路進。左路郭寶昌、右路李祥和黃鼎、中路安佳全、福及各營馬隊左右包抄，直搗賊巢，賊戰敗，追殺十餘里。臨平辛店南齊堡上渠堡等數十

巢悉攻克之。殺賊近千人。救出難民數千。獲騾馬三百餘。賊遂東竄。由咸陽三原窺同朝。譚玉龍等軍東掃後路盤踞之賊。自菊邨至武功興平。迭獲全勝。四月。劉松山等追賊至同州。戰於晉戍堡。姜彥邨賊敗走東北。欲渡河。松山等議全福郭寶昌由朝邑一路傍河夾擊。爲迎截前隊渡河之計。松山自率湘軍及黃鼎所部追勦。遂破其許莊小壕賊堡。其首張總愚率大隊迎戰。馬步橫亘二十餘里。以滾龍車攜牌包裹。而前圍我軍。松山嚴東隊伍。以洋礮四面轟擊。長髮老賊中礮而顛者如林。賊陣瀕潰。張總愚復糾合前隊。馬賊捨命攻撲。總兵黃萬友以短兵分路接殺。斃馬賊無算。鏖戰自午至酉。賊始散亂。盡棄其軍械。以竄。追北十餘里。禽殺近三千人。



救出難民數千，乘勝攻破大壕營小東坡，餘賊竄伏謝家坡，戰死者游擊胡理明、參將李順才、游擊蕭忠恆、左明德、都司楊崑益、胡聯陞、守備熊吉福、千總周福泰、李明祥、把總熊志昌、劉建祥、羅錫涼、外委曾楚榜。其時郭寶昌軍行及朝邑蒲城，富平凡三戰，富平之戰，賊以長鎗馬隊包鈔，寶昌自率小隊撲入，諸將皆短兵往來衝突，力戰終日，賊乃走。是日殺長髮賊千餘，而劉松山亦追賊及於富平之文川團，復及於永豐鎮、蒲溪堡，賊不得喘息，圖欲渡渭，松山躡其後，而使郭寶昌繞渭而南，以迎擊之。於是回賊窺省城，喬松年嚴兵以備。回賊望風逃，而擒賊尙踞渭濱之普集鎮，郭寶昌復渡渭北，與劉松山等軍夾攻之，遂克普集鎮，別奪堡邨二十餘處，賊

過渭欲犯省城松山寶昌分道疾追丙午敗之李家橋賊仍  
望省城前進丁未德興阿自率馬步迎擊喬松年遣中軍彭  
體道出城以禦而松山寶昌已追賊及於城南山門口木塔  
寨賊死力拒戰呼聲震地松山寶昌分隊鏖戰將士皆奮不  
顧身盪而復合却而復前德興阿親督隊助戰共斃賊數千  
至日暮賊東竄次日我軍拔隊追至灞橋是役也賊中脅從  
囚敗而逃者不下萬人賊馬斃者數千爲官兵所得者數千  
山門口一路枕尸十餘里辛亥劉典率新募四營自鄂至樊  
城會左宗棠軍復分路入關宗棠自潼關入典自紫荊關入  
提督高聯陞軍亦由長沙取道襄陽溯漢水抵洵陽陸行達  
西安五月劉松山等軍追擒賊自灞橋沿渭至鄠縣西聯邨

敗之賊復涇水渡渭北至興平松山各軍躡其後與郭寶昌等分兵繞道至武功截其前夾擊之賊復渡南岸伏於鄠縣大玉鎮我軍追而薄之賊仍回舊路奔興平是時提督劉厚基攻克鄜州之張邨驛及洛州中部回賊總兵胡世英攻敗安定延川回賊卽駐軍延安喬松年檄延綏總兵陶茂森提軍赴綏德合剿又調副將鄭春元軍勦韓城回賊春元遇賊於白水戰死時甘肅大飢眾回無所得食遂紛紛竄陝入北山擄掠其酋最著者有海大北李得倉崔三其在鄜州甘泉者則有土匪董福祥在保安安塞者則有蘇阿紅馬辣子在靖邊則有袁炳曾時劉厚基軍駐鄜阻截賊不得南窺省垣六月擒賊自渭北由富平蒲城將窺同朝以悍黨踞流曲鎮

王寮鎮阻我追軍。時劉松山患暑病，遂力疾會安住等軍，立將兩鎮攻克。賊之前隊已進同州，松山等星夜繞傍北山，至朝邑苦泉鎮，出賊前分三路進，以馬隊抄後，直前毀巢而入。賊大潰，追殺二十餘里，賊亡命奔回蒲城，共斃賊六七百，生禽二百餘。救出脅從者三千，戰死者參將邵得勝、千總陳慶祥、五品花翎穆通額、左宗棠軍至潼關。甲辰，喬松年就商軍事。七月癸丑，劉松山、郭寶昌等自昌甯邨追賊至富平之何家莊，收隊。黃鼎料賊累日狂奔，人馬倦乏，當乘其敝。是夜三更，率壯士二百餘，行至九郎廟，遇守卡賊二十餘人，酣臥地上，殺之。遂自率數十人伏卡外，而令勇丁潛襲張家廟，廟門洞開，勇丁躍入，亂刃斫之。賊驚叫狂竄，鼎馳至，截殺之。賊紛

紛跳堡牆走，黑夜顛墜，死者無算。丁巳，賊竄三原。劉劾忠擊之，遂薄涇河。將西渡，聞官軍追至，復傍山斜折而東。癸亥，遂回竄三原。劾忠躡追至焦家堡，叅將張心楊路扶，劉維善遇伏力戰死之。賊遂由渭水北岸東竄。左宗棠以賊明知前阻大河，而復東趨者，殆以官軍嘗尾賊而行，意欲引官軍悉東，乃乘虛西走。以渡涇渭，乃緘致松山，勿窮追疲我兵力。可改道由富平出蒲城，變尾追爲迎擊。遂遣總兵楊貴和等、田郃陽朝邑赴華州。劉典及總兵劉端冕由藍田進駐臨潼，與華州各營遙應。皆憑渭立營，扼賊南渡。劉劾忠移駐涇水西岸，扼賊西渡。提督高聯陞由藍田進駐咸陽，俟賊蹤漸西，宗棠卽自率親兵各營進勦。其臨潼、咸陽各軍，屆時當架浮橋跨

渭南北隨賊所向擊之復遣山西臬司陳湜造礮船六十置  
渭水是時陝回之逃入甘肅者瞰官軍方萃力討捻皆紛紛  
入犯宗棠以爲官軍之討賊也宜先捻而後回蓋捻強於回  
捻懾則回益震一也捻在秦徒爲秦患竄豫則中原之患大  
又一也捻聞大軍自潼關荆紫關進遂避竄渭北其欲回鄂  
豫之心未嘗忘也意俟大軍進至渭北乃乘間南渡耳故勦  
捻又非先扼渭水杜其偷渡不可惟渭水漲落不時自三河  
口抵咸陽五百里間多可偷渡咸陽以上水勢更小隨處皆  
可淺揭防禦爲難惟在臨時相幾調遣隨賊所向而截之并  
檄西安鳳翔漢中三府各遣所屬將鄜縣寶雞各峪口路徑  
掘塞以杜回賊內竄甲戌至八月丙戌官軍往來擊賊於渭

陽臨潼咸陽等處賊渡涇東竄時大雨兼旬不能進勦捻  
攻陷宜君知縣張傑殉難回賊攻陷靖邊之甯條梁有眾萬  
餘戊子復以馬隊攻圍米脂縣城知縣張守基會游擊楊樹  
棠擊走之甯條梁旋亦收復九月至十月捻賊在三原富平  
間者被官軍四面截擊竄入北山劉厚基鄜防各軍擊之於  
中部洛川屢次獲勝庚寅捻賊陷寶雞縣城左宗棠遣楊貴  
和等攻復之辛卯捻賊攻陷安塞縣城丙申劉松山等追捻  
賊自中部移營將至宜川戊戌後隊壽春鎮李祥和提督劉  
芳桂方小憇太賢邨回賊驟至祥和倉猝應敵馬中礮子遂  
下馬持矛刺殺數賊右臂復中鎗子仍裹創力鬥芳桂遂斫  
圍入賊亦舍騎搏戰祥和身被十創矛中喉死賊復斫芳桂

面正危急間，郭寶昌、黃萬友馳至，擊賊，敗走龍安鎮。十一月辛亥，黃鼎等軍攻敗汧川黃里鋪五里坡回賊，斬馘三千，獲騾馬三千，賊首張非率其餘黨與崔三、米賈合竄鳳翔岐山。楊貴和等分兵堅守岐山，擊退撲城賊。癸丑、甲寅，出擊鳳翔賊，斃賊二千餘。戊午、夜，劉松山、郭寶昌、劉厚基軍分路攻克綏德州城，追殺至距城二里之石家灣，斃回賊近三千，投河死者無算，救出難民三千餘。松山所部戰死者，守備王春濤、把總張藻林、厚基所部死者，都司羅瑞卿、守備張成保、把總董興成、彭玉林、戴祥發。丁巳，高聯陞軍攻敗宜君洛川諸回賊，而董志原回賊馬壯元、蘇萬元於時率萬餘人襲劉端冕、朱脂營壘，端冕等擊之於鳳凰山、楊家店、建莊等處三日，疾



馳百餘里以二千之旅大破萬餘之賊馬壯元伏誅官軍不  
損一人辛未劉松山等軍至宜川郭寶昌攻克羊獻坪回賊  
副將王立洪躍馬陷陣鎗子穿立洪胷死而松山亦攻克劉  
管部賊伏溝竄匿者皆抄殺之餘賊南奔兩軍合追四十里  
至張家灘宿是役斃賊千餘得騾馬五百餘松山所部死者  
都司戴星懷於是擒賊竄近河壬申松山等拔隊疾趨龍  
王廵擒賊馬步三千扼守冰橋官軍直前衝擊賊敗竄官軍  
遂悉渡冰橋追勦十餘里日暮軍士食盡乃收隊分駐龍王  
廵七郎窩東岸以待輜重松山等本擬循河堵禦爲劉管部  
羊獻坪回賊牽制比攻敗回賊而擒賊已渡河矣於是左宗  
棠檄劉松山郭寶昌兩軍先自上游渡河迎擊隨調各營親

率入晉督勦丙子賊陷中部城高聯陞攻克之丁亥譚玉龍黃鼎攻密店鎮回賊馬步大隊伏鎮後而以數百騎誘戰遇我軍交綏卽佯敗走玉龍等軍本分三路進伏賊起官軍繞出鎮後者與前軍夾擊賊敗瓦雲驛及老塬次日玉龍等復分兵搗瓦雲驛老塬賊見官軍卽竄回涇河川我軍追至吊子堡斃賊二百得騾馬百救出難民千餘賊所棄糧足供數日軍食癸巳甘肅靈臺縣西裊裊山有平固土匪二千餘馬數百玉龍等往攻燒其堡勇丁秦中德擁大旂先登賊斫中德手中德不顧率眾蠶擁入斬其僞大元帥寬玉龍僞先鋒李老五陳正洪及悍賊二百餘獲賊糧四百餘石牛馬千餘解散其脅從者而瓦雲驛及老塬復有賊乘虛來犯玉龍等

回軍攻走之。遂分軍駐邠州窰店鎮東臯等處。旋攻敗香花臺賊。時三水大峪鎮回賊三千餘騎攻圍民堡。丁酉提督劉効忠自三水北關塬往解其圍。斃賊三百。生禽賊酋馬阿渾。得賊馬四百餘。救出難民百餘。獲賊糧千餘石。分給太峪鎮附近邨民。効忠軍仍駐邠州堵禦。其時劉厚基自榆林至米脂。解五甲坡圍。殲斃賊酋馬阿渾。救出難民數百。獲騾馬二千餘。復於宜川生禽逆酋馬祿。辛丑夜隴州知府湯敏率峽口堡玉龍堡民團攻克蔣草渠土匪。生禽賊酋尙得祿。崔先生。關先生。王大。楊世發。殺之。丙午甘肅提督高聯陞攻敗洛川溝東回賊。斃悍賊三百餘。獲牲畜五百餘。生禽賊酋毛惡寬。李四善等。是日回賊據寶雞城。寶雞城去歲以久雨坍塌。

致賊竄入前知縣崔銓殉難後令黃傅紳以修築無資移縣旁二里西堡爲治所城無兵守故復闌入後劉効忠追賊至寶雞收復其城

七年正月乙卯甘肅回賊攻陷甯條梁馬隊營總敦奇祥阿戰死甯夏將軍金順總兵胡世英自定邊馳救賊走懷遠總兵文星明往援遇賊戰死癸亥甘肅回攻陷懷遠丁卯自榆林竄神木陷其縣城城中文武多死者參將慶聯糾鄉民克復之賊仍竄榆林喬松年遣劉厚基駐延安與延榆綏鎮總兵劉聲集鄜州防劉端冕相爲聲援二月壬午喬松年以病求代

詔劉典署理陝西巡撫典時駐軍耀州先是左宗棠赴晉以

陝甘軍務付典，典以陝省兵力不足，請調蜀軍助剿，以爲回賊東西劫奪，來去無常，貴在急搗巢穴，而尤宜自立於不敗之地，是必先儲備軍糧，並防賊斷糧道，則防禦後路之兵，實爲要圖。請調現住陝西之貴州提督周達武率所部進駐隴汧，既顧陝省西路，卽保蜀省邊陲，實兩全之道。而陝軍得以移營進攻，制賊死命。又奏言臣以草莽書慵，自咸豐五年前甯紹臺道羅澤南邀之出理營務，雖久於行間，而疎於帷幄，如第責以督率軍隊，專顧一路，與賊對壘衝鋒，或可自効。若通籌全局，進退諸軍，動合機宜，實非臣才力所及。舉廣東巡撫蔣益澧以自代。

朝廷不聽，旋復有是。

命甲午劉典在三原以書商庫克吉泰喬松年會檄高聯陞  
進駐宜君之楊家店兼顧同官耀州檄提督劉端冕駐鄜州  
總兵周紹濂率所部分駐中部洛川原駐鄜州之劉厚基相  
勢北征兼顧中路總兵羅洪德駐汧陽甘肅臬司張岳齡駐  
隴州提督蕭德經駐麟游以固西路邊防惟黃鼎駐長武譚  
玉龍駐邠州陳集賢駐三水三軍仍舊駐不移典自率數營  
駐三原庫克吉泰仍駐咸陽以資調度周達武已遣六營進  
駐鳳縣典奏請達武率全部移駐寶雞以厚兵力俟各軍抵  
防後抽撥勁旅進攻乙未劉端冕行抵洛川聞鄜州失守遂  
領各將士露宿街子河次日四鼓分道出隊至二十里鋪賊  
列陣以待端冕令各營立方陣鎗礮轟擊賊人馬應鎗倒前

者斃後者繼督隊之賊揮刀壓陣陣不稍移戰兩時賊始敗奔鄜城我軍追及鐵箱城中萬餘騎齊出迎敵遂乘其麇集發大礮間以劈山洋鎗擊之賊尸積道賊馬驚亂相踐踏我軍乘勢殺入南門適劉厚基由東路牛武鎮來攻克其北門及小東門賊不能成隊伍出城西竄遂收復鄜州城是役約共殺賊三千餘生禽五百餘救出難民數千獲騾馬千餘戊戌周紹濂於洛川之吉子峴擊斃回賊千餘救出難民千餘獲騾馬器械無算時譚玉龍冒雪攻走麟遊邠州境內回賊崔三者由崇信川竄入汧陽寶雞境張岳齡蕭德經羅洪德及周達武所部提督李輝武各軍往來搜勦自丁酉至戊申肅清汧陽隴州寶雞三州縣賊走靈臺鄜州之陷也劉厚基

適赴宜州勦賊聞鄜警遂回軍援鄜丙午賊乘虛以雲梯六十撲宜川城知縣余觀瑞督鄉團死守賊擲火彈燒城內屋乘亂登城者百餘人觀瑞督鄉團奮擊斃四十餘人餘賊不敢上城得以保軍功陳慶榮鍾南英教諭趙鳳鳴同時戰死戊申晦劉端冕劉厚基由鄜州追勦賊仍竄鄜州回甘肅老巢三月回賊土匪潰勇盤踞董志原數百里地人多缺食辛亥回首鄒馬王三阿渾偽元帥馬五什馬正和馬二元封一頭張泗明與常胡兩酋共率五萬餘人竄踞宜君之馬欄鎮以萬人擾三水騎二萬餘竄淳化三原留兩萬餘守馬欄巢穴甲寅高聯陞率師自五溝口進攻馬欄克之賊衆西竄常胡二阿渾死於軍生禽馬五什殺之賊之竄三水者候選州



判喻兆圭總兵陳集賢等攻敗於職田鎮遂奔楊坡頭馬正和由耀州之柳林將犯三原劉典自以五百人守三原遣總兵李大有等率所部自朱家邨祇方里乙卯克方里賊壘千總袁必壽張東元揮戈陣斬回酋封一頭擊傷五風子我軍銳進又斃賊酋胡正海崔家玉賊遂大敗叅將吳國富率馬隊要之於梅子殺賊五十餘是日共斃賊八九百獲騾馬千餘耕牛三千餘軍糧數千石皆分給難民各軍仍駐朱家邨是夜賊酋馬正和張泗明等復收合餘黨踞方里鎮而黃鼎等亦於是日攻敗涇河川賊回酋禹得彥馬陷泥中都司康得勝斫其左臂生擒之得彥自稱渭南人同治元年漢回蚌起得彥領禹家十一邨回與官兵戰後竄入甘肅與孫義寶

分領各部回義寶爲官兵擊死回衆遂推得彥爲首與馮君幅等駐蕭金鎮具言回衆無地耕種不能生活竄擾擄掠皆非得已願假一死以書召衆回歸化劉典以爲回黨甘心爲亂者十祇二三可就撫之遂以上聞後察其實無投誠意乃奏請梟斬之丙辰李大有等軍行抵方里賊伏兵起圍大有軍大有列方陣以持之力戰兩時我軍不移寸步於是三路援兵至夾擊之賊大敗北前抵深溝追兵奮擊賊尸盈溝敗賊復竄走山岡憑高以禦衆將皆自持矛先登分三路齊上張泗明中鎗死餘黨敗走追殺十餘里計斃賊二千餘生禽二百餘救出難民數千獲騾馬牛四千餘丁巳敗賊竄三水之土橋喻兆圭陳集賢余明發等乘月夜分三路往攻集賢

首先衝入，遞殺三賊，軍士齊進，賊敗奔左，左隊截之，奔右，右隊截之，三路截殺，賊陣大亂，呼聲震天，我軍應手斬馘，無敢抵禦，賊越嶺北走，黎明，後隊賊繼至，集賢等復分兵迎勦，集賢身受四創，追殺十餘里，苦戰一晝夜，斃賊千七八百，生擒賊七十五，獲騾馬五百餘，於是三水洄化境內無賊，辛酉，甘回千餘人竄隴州白石川，總兵蕭羣魁等攻敗之，是時涇州賊踪往來蹂躪，駐涇各營，無日不戰，食缺兵單，賊不時繞後路，全賴黃鼎一軍撐持危局，戊辰，劉厚基等軍攻敗廟灣賊，都司楊秀芳、千總劉秀江戰死，己巳，回賊土匪二萬餘過涇河川，由紫荊坡雁門口分擾黃鼎等，分兵擊走總兵徐占彪，坐騎中鎗倒，賊趣之，占彪手刃數賊，賊解散，北竄，癸酉，譚玉

龍解史原及永樂鎮諸堡圍方造飯賊掩至圍其軍大雨鎗  
礮不然力戰一晝夜圍不解外無援救副將張士榮管占敖  
何金營都司呂金明皆裹創力戰死玉龍督諸將衝殺鎗子  
中玉龍耳猶力呼突陣手刃數賊哨長親兵相繼戰死玉龍  
徧體受創遂以力竭捐軀玉龍諳習戎機與士卒同甘苦從  
征十餘年由兵勇超擢至提督未嘗少耽安逸自詡其功同  
治五年自甘肅提兵來陝力遏回氛救護邨堡角逐於邠涇  
間旄麾所指百姓倚爲長城乃以援民堡致隕厥命陝民聞  
者皆哀之於是賊竄太峪劉典以副將胡日盛代統其軍乙  
亥黃鼎攻敗施家堡賊丙子雷正綰攻敗涇屬之邱家寨副  
將閻定邦身先士卒鎗子入小腹從髀穿出猶督隊力戰四

月甲申黃鼎解涇州城圍癸巳周紹濂等軍擊敗中部之隆坊踞賊旋復續至紹濂遣諸將分路邀擊由雙柳樹至大香邨賊踞險抗拒衆軍合擊賊遂無一脫者甲午土匪攻圍延長城先自西城以雲梯登延長丁憂知縣宋良與其諸子率民團禦之手刃數賊賊以洋鎗擊中良傷脇良裹創力戰奪其雲梯賊不能登遂趨犯東南城典史鄧兆璫宋良子監生庸榛兆璫子從九品鄧邦平等擊賊退已而賊夥繼至遂回攻勢益猛兆璫庸榛邦平皆戰死賊遂登城宋良猶力疾督戰腹背受傷又死訓導張賡泰等復麾北城團勇禦敵鎗礮轟擊戰三時之久賊已不支而宋良子布經歷銜庸監生庸植兆璫子未入流邦靖邀同候選教諭馮師詠痛哭登城

團勇皆奮氣巷戰殺賊賊遂由西城奪門出團勇居民被害者不滿三十人城中悉安堵如故時劉厚基軍在延安宜川甘泉間旬日轉戰多方抄擊於南泥灣生禽偽元帥言得盛得盛本捻賊張總愚黨去年土匪杜全福推爲帥有衆七百餘人南泥灣之戰斃其五六百脫者百餘人而已是時鄜甘之間遍地皆賊劉端冕累日東西攻剿殺斃六七百千總蕭千勝力戰受傷死而北山榆林神木等縣回賊土匪潰勇出沒滋擾總兵劉集馨不時追剿丁未賊犯神木參將慶聯遣守備林必榮偵探行十餘里賊數千人從山溝出斫必榮墮馬直犯南門慶聯上城守禦中洋鎗洞胷死賊入城無所掠縱火走府谷閏四月戊申朔王培蔭駐守府谷之萬家墩賊

攻陷之，而高家堡尤爲榆東門戶。劉集馨督兵守禦，檄王守基會勦。時劉端冕攻克槐芽鎮賊堡，傷其僞元帥白添玉，斃賊數千，救出難民及所獲驢馬皆數千。是時董志原賊數十萬，壘陷慶陽甯州鎮原平涼，力圖竄陝掠食，而陝省西邊二千餘里，皆逼甘肅地濶路歧，防禦尤難。劉典移駐咸陽，備調遣各軍，隨機進勦。己酉，回賊大隊由交口渡洛，周紹濂、劉甫田等軍分隊伏於西溝上下夾擊之。張大雄軍原上誘戰，賊見我軍少，鼓噪而前。我軍三路環攻，斃賊七八百。賊折竄，復掩殺數百。敗至洛河，賊尚萬餘。劉甫田軍轟以劈山炮，死者盈溝壑。賊人馬擁擠爭渡，我軍蹙之，無不應鎗而倒。尸填洛中，水爲不流。賊所棄牛馬以萬計，游擊周懷德受創死。

游擊張致祥都司李昌明皆被重創庚戌高聯陞攻走宜君之楊子店賊守備劉祥仙戰死甲寅回賊由寶雞之虢縣鎮渡河南竄李輝武追賊於汧渭之間自乙卯至甲子隨賊所向往來攻剿殺偽馬大元帥及劉趙二賊首賊竄渭南自九龍山入廟入山輝武慮賊入漢南遣副將鄧貴華搜勦及於嘴口賊復出山竄渭北蔓延岐山扶風及渭陽郿縣間劉効忠黃鼎莫德勒常興阿等先後追逐遂由鳳翔麟遊竄入甘肅境劉典檄中書吳士邁率所部駐鳳翔聯絡汧陽寶雞各營檄魏光燾回咸陽黃鼎移駐邠州聯絡駐涇長之雷正綰以防賊由邠長三水內竄乙丑甘回由甘泉進逼延安劉厚基遣叅將梁得勝副將劉文華游擊甘彰輝率兩營五成



伍馳赴三十里舖禦之營壘未成而賊前隊至章輝等遂  
殺賊數十生禽賊十四賊大隊驟至圍我軍鏖戰徹夜文華  
彰輝皆中鎗死得勝鎗子穿足猶裹創督陣戰至丙寅辰巳  
之交我軍傷亡將半厚基聞之急率隊赴援斬紅衣賊酋數  
人戰良久厚基身被數創不少弛賊知不可犯乃解圍走俘  
賊稱阿渾哈玉林前爲官軍擊死茲特遣兩萬餘悍黨尋報  
復也檢我軍傷亡者三百餘人是日延川縣團長楊泰率勇  
攻高家臺賊手及騎賊三人力戰死丁卯賊以二萬人分三  
路日行百里將犯中部城周紹濂偵知之遣文武各員率兵  
民分城守禦設伏兵於東門河岸部署定自率兵三路迎敵  
左路賊方涉水叅將鄧廷望擊敗之於是紹濂麾軍奮擊賊

敗走原下，而耀州糧運適由南路至，賊見而趨之。紹濂復分前迎護，親兵張得勝等陣斬數賊，鎗斃兩賊首，賊遂大敗。竄北原，當紹濂慶戰時，賊分隊撲城，幕友蕭芳澤等督勇以開花礮擊走。遇黃勝龍伏兵衝殺，幾盡。俘賊稱僞大元帥曹福堂，於陣前擊死。尚有李天祥、楊磁娃、康纏兒、張士元、趙雲等，將由中部進攻白水蒲城云。於是劉典、檄楊德明、吳國富等，起白水宜君會勦。壬申，宜川知縣余觀瑞集鄉團壯丁千餘，會劉厚基所部游擊李恒勝，攻解秋林甘草兩民寨，生禽擒賊王泳勝等，自稱舊隨張總，愚爲賊，隸賊酋袁大魁，領馬步七百人。去年戰冰橋時，竄陝甘交界地，招集潰勇三百餘，土匪二千餘，及裹脅難民共萬餘人，踞宜川雲巖鎮。大魁加修

舊城鏊深壕壕外架木城，又於山坡立寨堡，分途擄掠，以期  
久踞。劉興檄道員魏光燾，由三原赴鄜州，會劉端冕往勦。癸  
酉，賊萬人竄宜君之馬攔鎮，高聯陞部將李端霖擊走石門  
關，駐石門。叅將何昌梓率勇扼要禦之，賊敗反奔。於是劉興  
遣副將賀潤蘭拔赴涪化防勦，並護民收麥。乙亥，高聯陞等  
軍追賊至涪化通潤溝，擊斃賊千餘。丙子，賊自涪化乘夜竄  
蜂蜜橋，越溝飛遁。人馬號嘶之聲震山谷。喻兆圭率隊向人  
聲多處發鎗礮擊之，遂追越五溝，歷一晝夜，賊墜溝踐踏死  
者數百，跌死騾馬盈溝壑。餘賊由陽坡頭奔甘肅界。五月丁  
丑朔，魏光燾及周紹濂等軍攻敗中部白水竄賊張岳齡。會  
李輝武所部攻敗涇陽之毛家山馮坊河賊，副將蕭賞謙以

大礮擊斃賊酋馬四彰，賊撲李佑厚軍，佑厚下馬持大刀衝陣，中洋鎗，洞左脅，負創上馬，右臂又中鎗，次日死。把總吳清奇、大旗吳長興、中鎗死。劉典奏言：臣維用兵之道，軍民貴一體相維，臨敵士卒荷戈應戰，其附近之民爲之運軍裝、送糧、精兵與民兩無隔膜，自緩急可收指臂之效。是在守土官與將領和衷共濟耳。今則官不惜兵，將不愛民，軍餉絀而官擁倉庾不爲籌濟，其弊在守例太拘，賊至而將每因行糧無措，不能迅速進征，其弊未必不由於玩視民瘼。臣查陝省延榆綏屬素稱瘠苦，兵興以來，糜爛更甚，官與將皆視爲畏途，將之不樂往，誠恐士卒飢餒而致譁潰也。臣擬作變通計，檄候補知府成定康募勇千五百，進駐綏德，卽令署理綏德州事。

責以安民勦賊成定康由廩生從戎歷安徽江西四川屢著戰功薦擢今職左宗棠札調來秦臣知其人明白勇敢血性過人委以是任必有裨益

詔許之庚辰李輝武張岳齡擊走汧陽竄賊乙酉賊酋馬正和率賊數千攻長武之淺水堡閻定邦擊走之游擊李祥豐中洋鎗裹創戰猶殺賊數百丁亥甘肅隆德縣回首馬豔魁及其弟豔寶豔虎共統三萬餘人由華亭崇信竄踞靈臺北里鎮等處不時擾及靈遊屬吳士邁率五千人合總兵于奇泮左日升提督邱時成分道並擊轉戰五十餘里傾其巢禽斬數千得糧萬餘石獲騾馬牛羊萬餘賊酋馬豔魁中鎗長矛手周志仁等共刺殺之戊子喻兆圭諸軍擊三水賊賊偽

大元帥馬生彥來援我軍擊走之斃賊五六百間定邦與黃  
鼎雷正縮合軍解長武圍己丑賊復踞三水率五六千人取  
河川之麥候補直隸州知州劉倬雲帥三原之師會馬聯陞  
喻兆圭等軍攻走之保全十餘邨堡救出難民百餘壬辰劉  
倬雲陳集賢李大有等軍攻敗正甯看花宮之賊癸巳李大  
有劉倬雲等擊敗萬家南吾諸邨賊截之於溝中殺斃數百  
獲牲畜糧糶無算六月劉典奏漢中形勢險固爲南山重鎮  
回賊所窺伺漢中有警蜀楚震動記名提督李輝武自蜀入  
秦屢著奇功臣見其人樸實果敢撫馭有方請

遣署理漢中總兵既固秦邊兼顧蜀防

詔許之丁巳吳士邁會提督蕭德經軍攻敗麟遊賊獲馬牛

五百餘，高聯陞周紹濂合軍擊敗宜君五里鎮西村賊，禽斬二千餘人，獲馬牛無算。戊午，延榆綏總兵劉聲集攻克黨家岔賊，斬賊數百，救出難民千餘。壬戌，綏米交界四十里鋪踞賊萬餘，劉聲集攻敗之，救出難民二千餘。癸亥，黃鼎移營邠屬之世店，回首馬正和攻犯之，鼎督軍力戰，正和屢敗屢進，怒馬回衝，在馬上自稱其名，副將韋占雄麾洋鎗隊叢擊之，傷其左股伏鞍而遁。總兵徐占彪督兵追刺正和，復遞中矛傷，猶能左右格鬥，不至落馬。其悍黨持護遁去，餘賊遂皆披靡。追至紅崖河，時已二鼓，沿途殺賊千餘，擊斃馬數百，戰死者總兵侯鼎綬，軍功扈品恆，吳占魁，甲子，劉倬雲，會陳集賢，喻兆圭，軍攻敗三水之湫坡頭椒邨賊，殺斃二千餘，救出難

民數千丙寅劉厚基所部總兵田玉廣知縣梁以恭攻克膚施縣棗樹灣賊得偽印一具生禽賊酋孔天喜自稱山東人爲賊酋袁大魁僞指揮前官兵攻雲崖鎮乘夜縋城逃與夥黨王元盛招集七十餘人行至棗樹灣遇土匪李長新復集流亡得八九百人據寨掠食印爲袁大魁所殞丁卯劉倬雲解正甯北岸頭民堡圍復合喻兆圭軍與賊馳逐至子夜始收隊於是三水以北宜君以西遍地皆賊戊辰回首赫阿渾馬僞元帥賊黨萬餘騎爲周紹濂魏光燾高聯陞各軍累日追逐及之於晉王渡沿途掩殺賊窮蹙將渡洛洛水適漲我軍薄之賊溺斃者衆爲元帥中鎗落水死渡者四五千人未

者尙千餘我軍復乘之溺死殆盡辛未回首楊文治賊黨



六七千人竄踞文家川三家原劉倬雲李大有喻兆圭等軍攻克其堡殺賊酋馬跛子斃賊千餘千總胡芳益先登胸中礮死壬申回賊渡洛攻邵陽城守備任効孟擊退甲戌魏光燾追賊自向方鎮至北岳莊勦禽殆盡而段莊合義等處賊數千來援光燾麾衆軍擊之至於新莊共斃賊七八百七月丙子光燾追賊至蝴蝶山下禽斬千計獲糧馬無算是時清澗被圍劉厚基遣總兵劉厚填等解其圍追殺十餘里斃賊千餘生禽三百六人救出難民數百丁丑賊復回馮原魏光燾遣各營分路擊之賊大敗走戊寅賊由黃龍山回奔渡洛光燾率隊躡其後比官軍渡洛賊已竄蒲城劉典先期遣楊恆春等兵堵蒲城賊遇恆春戰敗遂攻鮑家寨恆春等復攻

克之己卯劉厚塤等攻解清澗縣南十里鋪圍總兵王雲孚  
身先陷陣中洋鎗督陣不懈賊敗追殺十餘里陣斬賊二百  
獲馬畜千餘庚辰回酋金翥以騎數百夜行九十里襲三原  
城壘適劉典遣知州成定康提勇丁赴富平辛巳昧爽出三  
原城行十里遇賊騎迎戰賊莫測出兵之速訝爲神兵遂折  
竄富平壬午成定康追賊至富平賊不敢西遂併集富平之  
曹邨同官癸未魏光燾軍抵曹邨分兵攻之賊敗分三路走  
甲申高聯陞所部副將賀茂林等率隊由馬欄至廟灣遇賊  
先鋒數百騎倏至茂林列陣而前斃紅衣賊三十餘大隊繼  
至茂林分三隊禦之賊大敗追擊三十餘里賊回馬觸陣百  
餘次我軍不爲撼動逼前刺搏原草皆赤賊棄驟馬糗糧盈

路茂林禁士卒拾取督令亟追至油榨灣悍賊千餘騎一  
皆下馬持矛誓決死戰茂林揮長矛手扼險以禦而令洋鎗  
隊循環轟擊賊敗追至柳林由文王山東北走高聯陞自耀  
州沿途追賊戰瑤渠山復戰楊家店三日之間轉戰二百餘  
里賊皆遠遁無蹤聯陞一軍前後殺賊不下二三千賊輜重  
盡棄丙戌賊由涇陽竄涇化成定康及李大有等追奔石門  
關折回土橋喻兆圭軍截殺之幾盡其竄宜君中部賊高聯  
陞守營之副將向正泰金鎖關之知府楊銘澹及賀茂林周  
紹濂諸軍追擊殆盡於是陝省腹地肅清魏光燾率師回三  
原庚寅劉厚基所部總兵王雲孚等攻克清澗之惠家圍賊  
堡雲孚分三路進攻賊憑牆固拒矢石雨下相持移晷適知

縣趙聿灝以乾糧饋軍士卒飽騰直逼堡下奮力圍攻聿灝復領文童方功榮王允暉團勇助之賊勢不支叅將陳國珍及聿灝首先登牆雲孚功榮斬堡門入衆弁勇隨之入堡巷戰國珍以洋鎗擊斃賊二千餘生禽百二十三救出難民千餘獲其牲畜輜重分給難民惠家堡賊全隊殲滅辛卯涇北岸賊萬餘騎渡涇至長武雷正綰設伏誘擊敗之於石牌生禽賊酋馬雙之都司張金學戰死壬辰北山土匪扈鞞欵延安劉厚基營願歸化劉典奏請予撫

詔許之戊戌劉厚填追賊及於延川之西溝口賊酋袁大魁先遁搜殺其黨羽無孑遺八月乙巳朔成定康會周紹濂所部叅將毛正明追賊自蘭臺橋黑水邨逼之於蒲蘭大炕出

斃賊數百，黃鼎亦於是日攻敗永樂底廟麻原賊，劉倬雲  
敗平房均邨賊。九月，扈彰自率六千人移駐安定之蟠龍寨，  
而令小酋徐尙、秦梁、可彩管奉征等率萬五千餘人移駐安  
塞之上川。先齎清冊繳送器械，劉典遣刑部主事周瑞松往  
撫其有家可歸者，予資回籍，遣散男婦六千餘人。扈彰又自  
率千二百餘人先抵延安，瑞松以其屬安置膚施之北川。時  
北山兵燹之後，人少田荒，其難民隸藉甘肅不能歸者，遣往  
開墾，資以糧食耕牛。辛巳，雷正綰追攻靈臺賊，自獨店至涇  
河川，遂會黃鼎軍攻賊於上良，追至娘娘廟前後斃賊五六  
百餘，賊悉竄回董志原。於是涇靈境無賊。壬午，董志原賊分  
萬餘人竄甘泉之府邨麻子街，總兵黃超羣擊敗之，其僞元

帥余月彪中鎗死。是日，劉聲集成定康軍，會米脂知縣張守基所率練勇，攻走米脂之蕭家寨、張家寨賊。癸未，成定康攻敗綏德城外王家溝蒲家圪峪賊，俘賊供稱高偽大帥所部四五萬人，見高已死，李登代之。其賊目李雙良、張萬飛、田老四、辛滿、城盧大帥等，糾合董福祥悍黨，冀攻破綏德，以圖東掠。頃者戰敗之賊，乃李雙良所轄也。明日當更來攻城。甲申，乙酉，賊果累日以大隊犯城，定康皆擊敗，奔三皇峒老巢。丁亥，宜川知縣余觀瑞督團勇隨撫標兵攻賊於房家原，殺賊多。生禽賊目馬虎兒，正追殺閒，忽報馬步賊隊由北來犯縣城。觀瑞回援，甫交鋒，賊即敗走。我軍追至北原，賊大隊萃於絳桃邨。觀瑞等偵知賊四路設伏，孤軍未敢深入，乃回軍防

城以待援，劉典飛檄游擊雲松守隘，無令賊南竄。檄劉端冕、吳士邁會剿。癸卯，劉端冕部左營副將劉仕祁攻賊於甘泉之麻子街，賊圍其後隊。仕祁回救，山後賊隊更圍仕祁。仕祁縱橫衝殺，賊屢卻屢進。仕祁身被十餘創，猶手刃數賊，力竭而殞。叅將曾恆勝游擊曾柱德把總謝文泰皆以身翼仕祁，植立不移，戰死於陣。於是賊大隊竄至鄜州之劉家岔。端冕往勦，中途聞仕祁信，卽令副將喻先知往救。行至左道鋪，見賊正圍攻左營牆壘，卽解其圍，急趨仕祁戰所，則已無及矣。端冕擊敗岔口邨賊，令後營暫駐左道鋪，自還鄜城。初，捻賊張總愚自龍王廸渡河入晉，直薄天津，遂竄山東。左宗棠提軍追勦，盡殲其醜類。十月，旋師入陝討回，劉典自三原行營

赴乾州會商軍事丙午賊攻洛川境內民寨劉典調中書吳士邁軍往勦扼賊於洛川南頃之溝口四路官軍圍逼而前賊不得脫殺斃二千餘獲騾馬二千餘庚戌周紹濂攻敗中部賊是時董志原賊大隊至隴州甘肅臬司張岳齡道員魏光燾知府喻步蓮等軍合力追勦甲寅隴州肅清十一月甲申成定康攻敗清澗賊松山全軍馳抵山西永甯州偵知賊聚榆林東北乃急渡河留所部三千人駐山西之軍渡防東岸而自率馬步馳綏德州與成定康計事適賊聚榆林西南懷遠縣之小理川大理川等處必不虞官軍由山西來攻也亟搗其老巢可以得雋辛亥松山由綏德西行北繞岔把溝自北而南定康由州西七十里大理川自南而北會師夾攻



是夜松山行至吳家山，訶知北路無賊，賊巢在小理川南。大理川北縱橫二十餘里，卽遣將分隊先攻大理川西續家灣。一路賊巢兼扼西北，以防賊竄松山。度其行十里後，始親率軍分兩路直搗小理川諸巢。行二十里，賊覺出巢拒敵，列陣十餘層。松山麾軍衝擊，賊敗，奪路狂奔。官軍乘勝壓之。小理川店子寺二十餘巢悉平。於是賊由山南竄大理川周家窰。其騎賊不能越山，沿小理西遁。中後營馬隊追而殲之。官軍遂退近周家窰老巢，賊不敢入巢，而巢中賊出隊迎敵。松山方布陣，賊騰呼搦戰。官軍暇以應之。少頃鼓聲起，三路殺入。賊遂大敗。附近賊見大巢已傾，遂不戰自潰。時新月初升，官軍乘月分路追殺數里，賊尸狼籍滿路。是日成定康由三皇

窮進午刻至樓兒砭見諸賊壘橫踞路傍定康令各軍緩進俟松山戰克則賊無所歸可恣殺獲未刻始麾軍進攻賊敗長驅而前遂遞克其十餘壘復搗三眼泉劉家坪諸戍壘又破之而松山軍適至合軍縱擊賊披靡西南奔窮追六七里是夜五更提督易德麟章合才由大理川西續家灣一路犁掃二十餘壘是役共破賊壘百數十斃賊五六千生禽三千餘解散脅從二萬餘獲騾馬三千餘甲寅至丙辰松山定康兩軍追剿敗賊踏平賊巢夜以繼晝綜計殺賊萬餘生禽賊五千大小賊酋四五十獲戰馬騾驢四千五百餘拔出難民數萬松山全軍僅亡弁丁十五人定康一軍僅亡五人內有把總杜宗太一人定康以有職守不能遠征遂撤隊回綏德

松山以爲由榆林至靖邊一路賊巢林立官軍自綏德迅  
而前已有大蛇中斷之勢若引軍而西節節搜勦則榆林邊  
內外之賊必亟回顧而東北河防自可解嚴特邊牆內外久  
遭賊掠商旅不通前路無糧可因而各軍行糧已罄丁巳屯  
軍安定僅購米六千餘斤卽殺所獲騾驢雜煮充食是夜三  
鼓率軍向西北進自胡家山追賊至小李莊沿途禽斬千餘  
拔出難民數千戊午與部將章合才蕭章開攻克黑牛川邱  
家坪諸賊巢前後斃賊千五六百解散脅從數千獲騾馬二  
千餘軍械七八千敗賊逸鎮靖堡俘酋孔福興呂萬源具言  
鎮靖堡賊壘甚固董福祥恃爲巢穴其眷屬則居靖邊縣城  
云己丑劉松山軍進攻鎮靖堡董福祥之父董世有及董福

祿投誠于西松山馳行百三十里率易德麟攻定邊之高小灣賊禽斬八百餘人獲戰馬六百餘官軍死者二人受傷者十四人而已是日松山別遣章合才等攻洛珠川賊賊敗走西南追北三十餘里禽斬二千餘救出難民數千獲騾馬八百餘官軍受傷者三人而已劉典奏言臣維榆延北境橫抵甯夏正當河套古爲用兵地自陝回倡亂甘回繼之環慶平涼人民自相團結以與回鬥敗喪之餘流爲盜賊情實可原董福祥高二扈彰之徒阻兵多年官軍未遑征討失業無賴之民飢軍潰卒相與附之又結甘回蘇阿渾馴致戕官踞城而罪乃不可追矣上年扈彰畏罪求撫臣典受之然其黨之散附高逆者不少故高逆黨與多至十餘萬眾此次劉松山

成定康所勦皆高黨也。其漏逸者實不過數千，大小渠率殲除殆盡。松山竭六晝夜之力，轉戰七百餘里，禽斬數萬，軍械山積，實有勁風掃箐之勢。奈軍遠糧匱，運輸不繼，不免有喜而憂耳。是月魏光燾擊敗將臺賊，復自中部渡河，追賊於石堡川。劉端冕攻克延安之下寺灣賊，復與魏光燾軍攻敗甘泉之勞山上曹邨賊。提督郭運昌、張雲松軍攻敗甘棗鎮雲巖百尺鎮等處賊。高聯陞軍追賊於澄城之武安邨。雷正綰軍敗賊於涇州之董家堡。死事者游擊史秀成、把總鄭有德、都司張鵬程、千總王化臣、副將謝春臺、余國榮。

八年正月辛巳，劉端冕敗賊於甘泉。賊回竄府邨，魏光燾伏兵於將臺，邀之。自率親軍待敵，賊至徑前撲陣，官軍奮擊之。

賊且戰且退，追十餘里，伏兵從賊陣中突出，賊驚潰，委棄糧橐軍械，塞途。官軍數路追擊，禽斬逾千，獲駝馬千餘，所掠糧盡爲官軍有。賊由太白鎮竄回老巢。乙酉至，戊子，劉端冕軍攻賊於延安之勞山、牛武川，共殲賊千數百，禽回目馬光福、楊超龍等三百餘人。官軍受傷者九人。庚寅，李輝武軍攻賊於鳳縣之梅見溝，總兵王名滔怒馬衝入賊陣，賊大潰。各營乘勝掩殺，溝中賊撲滅盡淨。賊酋王明章死於軍。二月壬戌夜，有賊圍甘肅提督高聯陞於楊店營次，遂入帳殺聯陞。營官副將賀茂森、總兵黃毓馥聞變來救，皆遇害。遂圍攻同官城，城守游擊桂錫楨、聯陞營官總兵楊銘濬攻復之。先是聯陞以各營多留駐外來游勇，中有哥老會匪藏匿，因令各營

哨嚴緝之前營親兵丁玉龍畏罪倡亂糾各營入會者並  
回賊同舉事於是劉典遣各軍分別勦撫禽獲逆首丁玉龍  
凌遲處死傳首各營聯陞從軍楚粵屢著戰功左宗棠來督  
陝甘自粵馳牘堅求同勦回賊來陝後無戰不克身爲大將  
臨陣輒躍馬爭先恥居士卒後及收隊論功推獎諸將若未  
嘗親與其事者尤自奉最約任實缺提督多年廉俸均充公  
用左宗棠劉典以其兩親在堂家無儋石欲分廉使資贍養  
聯陞以爲軍餉久絀義不可先願已私堅辭不受其節概如  
此董志原回賊號稱十八營其中回首陳林崔巍禹得彥馬  
正和白彥虎于彥祿等皆擁衆萬餘分隊擄掠被官軍擊敗  
屢次乞撫訖無成議遂糾集十八營合悍黨三四萬傾巢來

犯戊申出屯正甯南北兩原及永樂堡白吉原等處將逕犯  
邠州三水并力擾秦川陝安道黃鼎率隊自邠州往勦庚戌  
敗之於白吉原追至高里坊前阻深溝于彥祿率衆死拒副  
將劉治均持矛躍馬刺之落馬軍士亂矛攢刺割取首級其  
姪于驢兒馳救游擊朱蘭亭生禽之辛亥乘雪追至官河賊  
大隊竄回老巢是役共斃賊二千餘我軍受傷者五人癸丑  
雷正綰軍雪夜自長武馳至獨店鎮殺賊三四百獲騾馬千  
餘乙卯張岳齡邀擊於新集鎮賊悉向崇信竄回歸巢後賊  
酋馬正和遂下僞令挈眷北徙預望城半角城金積堡等處  
併十八營爲四大營以其半護眷口輜重先行留崔巍馬正  
和等悍黨萬餘伏董志原斷後左宗棠令各軍預足芻糧規



賊動卽銳進追勦甲子謀報賊輜重已行悍賊仍扼太昌鎮  
乙丑雷正縮黃鼎馬德順李耀南率各軍由長武分三路直  
搗太昌鎮戰敗之遂將焦邨什社蕭金鎮董志原諸賊巢一  
時平燬隨收復鎮原城丁卯收復慶陽城追殺至蔡家廟賊  
竄環縣由紅德城北走各軍不及遂收回董志原正縮耀南  
兩軍會楊世俊等軍於鎮原合追至白馬鋪紅河川賊去已  
遠亦收隊回蕭金鎮是役殺斃餓死及墮巖死者實不止三  
萬騾馬之殺斃及奪獲者約二萬餘拔出難民萬餘慶涇一  
路肅清戊辰駐紮德老湘營前軍後旗勇邀結哥老會爲其  
營官緝得將縛斬之其同營勇丁遽起奪囚一時左軍四營  
右軍後旗馬隊四營皆附和起應襲踞州城左宗棠飛檄各

軍圍之其城內未叛之勇聞大軍至皆越城投歸叛勇開城南竄劉松山由清澗截堵搜殺叛勇收撫其脅從者董志原既平游匪潰卒散匿山谷間綏德延安一路郭寶昌劉聲集等搜斬殆盡其叛軍漏誅溷迹營伍者劉松山等先後搜緝正法於是北山迤北縱橫數百里漸有甯宇而鄜州甘泉西北一路游賊十百成羣飄忽出沒莫測其栖泊之所四月左宗棠檄魏光燾劉端冕兩軍由黑水寨進太白鎮合水縣以向慶陽軍發時捕獲蓄髮賊張有福等訊供賊首袁大魁自雲巖鎮破後率其死黨逃入保安縣之老巖窰老巖窰者地絕險有居民百餘戶結寨自保諸賊頻攻未能下也去年冬袁大魁僞爲官糴糧者給寨民遂入據之糾集游匪潰卒數

百遍脅鄰寨土民千餘皆蓄髮從賊分爲五隊隊設一僞元帥一指揮統之賊官軍進止爲趨背往來劫掠燹疾若風官軍不能得其蹤迹也光燾斬有福釋其餘黨令爲前導而會端冕周瑞松等軍往勦丙午攻克距老巖窰三十里之馬啼溝丁未攻克鶴子川皆盡殺其守卡賊及僞元帥指揮等戊申光燾遂合諸營分路直逼老巖窰諸營環攻竟日力無所施遂收隊老巖窰壁立千仞下臨洛水窰孤懸巖中左右闌以木柵旁皆深塹小橋僅通人行賊所由出入見官軍至以巨繩曳橋令起路已斷矣窰前石磴如螺旋水樓矗立賊踞其上壁上開鎗眼是爲窰之外郭光燾以爲必先攻燬水樓以逼窰庚戌令賀卓吾等攻水樓之賊而自率各營從窰外

兩旁夾擊，竟日力攻，外窰雖破，斃賊不過數十，而壯士死者已十餘。窰內礮石紛下，被創者益多，水樓火起，賊旋撲滅之。於是收隊，諸將累日會議，以爲賊踞高險，巖下兩旁皆無可著手，是必於巖頂鑿石作橫孔，貫長柱直前，令壯士引繩而下，或可徑抵洞門也。光燾乃令各營於巖旁巖下，分隊輪攻，而陰遣石工鑿石施柱。丙辰，至戊午，更番攻卡，鎗礮晝夜不絕聲。時放噴筒火箭，令賊不得休息，且不虞有巖上之計也。鑿孔成，乃令軍中曰：有能絕巖下洞門者，受上賞。五鼓收隊，昧爽，壯士十餘縋險而下，至柵外，賊戰倦，方酣臥。少頃，下者益眾，遂拔柵入，舉火彈亂擊之。袁大魁急喉悍黨迎拒，窰內人聲沸起，官軍短兵撞刺，賊尸枕藉。大魁被火傷倒，於是都

司涂國榮守備楊振家等齊入割取大魁及其弟袁二首  
大呼以徇軍各軍競奮立將上下卡水樓攻拔老巢十五窰  
之賊除斬馘外皆墜巖落水死無一免者周瑞松既克老窰  
審復攻克延安魯家屯諸土賊巢殺其酋杜占元等郭寶昌  
部提督宋朝如等攻克宜川之南莊羊肚原諸巢於是榆林  
綏德延安鄜州游匪潰卒剗削一空五月左宗棠乃自乾州  
檄全軍度隴西征北路劉松山一軍由西北進指定邊花馬  
池以截甯靈之賊令不得東中路魏光燾劉端冕周紹濂諸  
軍西出合水正甯甯州以向環慶雷正綰黃鼎諸軍由董志  
原涇州趨鎮原固原崇信華亭以蔽汧隴而窺平涼南路李  
耀南吳士邁諸軍由隴州寶雞趨秦州宗棠自率親兵由承

陝西二  
壽邠州長武以赴涇州遣馬德順簡臨敬各軍暫駐靈臺之上良百里鎮以策應南北兩路且耕且戰安民以防亂焉己丑劉典奏回賊盤踞董志原陝省邠邠屬縣實爲回逆入境要口一入腹地則渭水以北地勢平衍無險可扼勢將被其衝突三原地居河北爲邠邠各屬出山間道臣駐軍於此所以遏賊南竄東控同州西制鳳翔一時聞警調度各軍呼吸相應不至遲誤機宜今陝境就清界陝之平慶涇等府州屬回氛亦遠正宜以民事爲急臣擬回省督同司道府縣整理地方安撫難民以期稍益民生

詔優答之丁酉典回省經理一切善後事宜復奏曰陝省用兵八載地形凋敝今境內漸就肅清亟宜安撫涇陽咸陽境

地安插難民六千餘，委員督令墾種，臣親往勘察，其民均能恪遵訓飭。鄜州膚施甘泉延長等縣安插扈彰歸化難民，委刑部主事周瑞松經理，董福祥歸化人數繁多，劉松山收撫安插安定保定靖邊各縣境，委延榆綏道成定康經理，均屬安靖。渭南荒地無多，渭北則蓬蒿遍野，尙須招墾，現令駐防營勇分地耕種，漸有規模。通計北山內地未墾者十之六，山外未墾者十之一耳。惟涇陽三原高陵爲多，涇陽鄭白渠旣廢，復有龍洞渠，注田甚廣，前撫臣劉蓉興修未竟，臣近與左宗棠籌修，加築堤防，月內可成，則涇陽等縣皆爲沃壤。

聖諭以爲宜選循吏撫民，臣竊以陝省民力之竭，弊在差徭役車載道，攤派頻仍，官吏藉此支銷書役，從而需索脂膏，竭

矣。追呼如故。臣與左宗棠出示禁革流差。民困稍蘇。其各衙門陋規。尙有未革者。臣親與司道查禁。總期一洗舊習。咸與爲新。北山一路人。每視爲畏途。臣與藩司商酌。凡委苦缺。預給養廉銀。俾官吏足資辦公。斯閭閻可期安輯。擇吏安民。臣之職任在此。臣之志願亦在此。斷不敢以

朝廷赤子。付諸貪污之吏。惟百廢待舉。人地必取相宜。墾

敕部准臣因地擇人。暫弗拘以成例。其於撫綏必有裨益也。邊防一事。臣查陝省西北表延千餘里。與甘肅毘接。回逆竄甘。其心無日忘陝。防範無處可疎。左宗棠現令中書吳士邁。道員李耀南等。率營進駐秦州。又令漢中鎮總兵李輝武。率所部分駐鳳縣寶雞。屏蔽漢南。宗棠自赴涇州。提督雷正綰



陝安道黃鼎兩軍由涇川左右並進與秦州之軍聯絡此陝西西路之防範也道員魏光燾駐慶甯間總兵張福齊率臣舊部駐正甯提督丁賢發率所部駐三水均相聯絡是陝省正北一路兵力足資防勦提督劉端冕周紹濂兩軍現住廊州之黑水寨張家邨驛以扼入陝要途與駐甘泉之提督劉聲集駐延安之主事周瑞松等聯爲一氣又有郭寶昌之營分駐延長宜川等縣兼顧河防尙屬周密延安迤北尤爲要隘綏德則成定康駐之榆林則劉厚基駐之兵力均堪禦寇俟劉松山由甯條梁進駐花定則東北局勢更緊三原駐臣親兵左右翼共千八十人約束甚嚴臣現調猛字三營與之合駐以壯內地聲威此現在布置扼要之情形也臣查督臣

啟節西征自以陝西爲根本後顧無虞然後可一意進勦左宗棠所以再三籌畫者不敢圖近功而誤全局也臣又查甘肅回逆不似從前猖獗兩省兵力尙足惟餉糈支絀每有停兵待糧之患臣前赴乾州面商督臣入甘之後宜以裁併營勇整飭營規爲急務蓋兵不貴多而貴精統籌終始左宗棠自知從長計較也臣治軍旣乏長才治民亦鮮實效捫心多愧惟有謹遵

訓誠實事求是虛衷集益期報

高厚於萬一耳十二月丁巳夜回賊攻陷定邊縣城知縣李廷獻手刃敵賊力竭戰死典史毛福昌同時遇害副將廣勳刺傷左股已未廣勳率鄉團會卓勝營都司何全忠軍收復

之時陝軍皆入甘金積堡賊分隊出擾官軍後路而成定康兵單難禦敵劉典飛咨左宗棠請援

九年正月己巳賊襲安定縣城知縣陸均率民團守禦城陷下城巷戰力竭被縛罵賊不屈賊擁至城外縛樹上斷其舌割其頤以洋鎗擊死支解其尸庚午延安知府喻步蓮攻復之回首馬正綱竄入涇陽官軍擊敗復圖渡渭副將陳瑞齡拒之於交口及上漲渡副將黃本富以礮船擊之於解家渡等處賊不得渡踞渭北故市本富分兵進勦賊敗奔大荔境劉典調總兵張佑庭夏奉朝等由蒲城追及於白水之西溝賊敗由穆王河奔北山提督劉端冕赴洛截勦回首馬正和陳霏復率馬步數千自金積堡入寇甯條梁營成定康遣游

擊殷忠廷率隊齎軍火往助甯條梁營已卯起行行二十里前途塵起令守備余發勝往偵遂被賊圍發勝揮戈衝突賊環刺之身受十餘創死忠廷見賊勢盛乃分隊齎軍火回鎮靖堡而自督隊戰定康聞之亟遣總兵成榮華往援靖邊知縣梁以恭會都司皇昆山率隊繼進出城數里遍野皆賊而忠廷尙困圍中血戰十餘里不得出榮華以恭等追至力戰逾時斃賊多忠廷始得脫出遂合軍與賊戰賊仍馬步齊衝洋鎗子飛濺如雨游擊張永田總兵劉求益都司張貴和守備倪顯濤同時中鎗死於是我軍皆憤忿奮氣衝殺賊不能禦遂分隊繞道攻靖邊成定康督隊迎擊提督彭緒所督勇分撲扼守榮華等亦亟收隊回援賊勒兵迎戰皇昆山率

總羅聯陞、把總羅煥新、衝入賊陣、立斬悍賊數人、而賊洋鎗環擊、昆山等同時戰死、賊遂至堡外、忠廷督陣力戰、亦中鎗洞胷死、同時中鎗死者、都司蕭得貴、易培文、定康見傷亡過多、遂自率守堡勇、與彭緒所出南北兩門併力促之、賊始敗退、我軍方入堡少息、而賊復四面環集、夜中以雲梯攻堡、定康等督勇擲火彈、噴筒燒殺無算、有悍賊緣梯登堡、榮華揮刀劈賊、賊應刀墜、已而榮華復中礮子死、以恭亦於堞口中手斬悍賊一人、戰終夜、至日出、賊始敗退、旋復有千餘賊拒堡列陣、定康遣都司鄧萬盛等出擊賊、敗追之、而萬盛復中鎗死、賊遂由邱家坪走、時安邊堡甯條梁鎮靖堡等處、老湘卓勝兩營、儲糧甚富、而定康兵單、故賊尤睥睨之、甲申、賊七

八百騎至甘泉境，劉聲集擊敗之。賊由勞山東竄，劉典令延安知府喻步蓮截剿，賊攻米脂縣城。知縣遠有望，率民團擊走北城團長訓導高仲魁，戰死辛卯。回酋馬正綱自洛川竄黃甫鎮，劉端冕分隊追走殲除殆盡，逃出難民稱馬正綱於是日中鎗死。癸巳，總兵張佑廷追擊回酋馬呼來，自宜川孟家嘴至郃陽，賊分竄韓城澄城。二月丁酉朔，賊犯延川縣城，知縣余銘恩會喻步蓮所部總兵蕭羣魁擊走，張佑庭等攻馬呼來，賊及之於同官白勝溝，別隊追及於宜君米子嶮嶮，賊由楊家店奔甘境。己亥，劉厚基所部總兵田玉廣等攻克清澗之馮家岔高家岔賊巢，獲賊酋王懷興、蔡正超、劉成宗、壬寅，賊攻宜川之西瑤窠梁子深民堡，知縣樊繼英督民團

會喻步蓮軍攻敗走韓城癸卯回酋馬長鳳秦三元帥由宜  
川南走澄城邵陽張佑庭等軍擊走之於是北山內無賊蹤  
甲辰至乙卯劉端冕追賊自韓城邵陽遂合眾軍邀之於乾  
州武功間賊大敗由扶風永壽竄甘境於是馬長鳳秦三陳  
瞎子等賊勦除殆盡而陝西內地無賊矣丙辰劉典奏前奉  
旨允留刑部主事龍錫慶於延榆綏道成定康軍營幫辦營  
務旋因收撫董福祥扈良儒等降卒委錫慶以安插賑濟之  
任辦理甚善降卒無歸者近萬人安插安定清澗交界之瓦  
窰堡墾種自給今年正月賊攻陷瓦窰堡殺掠一空時錫慶  
駐石灣糧局聞警赴援遂收集降卒難民會延安知府喻步  
蓮擊走之土匪游勇不時攻陷民寨復督令降卒王彥成尙

學禮等往來攻勦多所殺獲自是瓦窰堡一路人賴以安惟是儲糧被掠居民降卒嗷嗷待哺臣就近撥膚施縣糧三百石以濟之臣查北山瘠苦儲待無多自遭回擾民生益蹙現督同藩司籌款付喻步蓮酌量賑濟復令龍錫慶襄理其事臣維賑濟固需籌款而奠安必須增兵川楚淮豫之勇素耽安逸視北山爲畏途若迫令入山逃亡必眾增一勇實多一賊臣前奏刑部主事周瑞松收集難民編成四旗駐涇渭間時時訓練有警督令禦賊無事率之耕田俾立室家漸成土著昨回逆由同州上竄深賴其力茲查瓦窰堡降卒尙有壯丁三四千臣擬遣成定康選壯丁五百編成一營駐鎮靖堡而遣龍錫慶選降卒二千編成四營駐瓦窰堡勤加操練此



與鎮靖南與延安各營相聯絡既藉以禦寇緝盜而墾荒生植將來無煩遣散或亦弭害之一道也臣查龍錫慶品學膽識俱優辦理諸務均矢實心羣黎感戴實陝省難得之具懇以直隸州知州留陝西儘先補用

詔許之三月乙亥回首崔三禹得彥閱阿洪以三千人自隴州入縣頭鎮逼近鳳翔李輝武督隊往勦遂合副將邵永齡軍追至牛頭山又別隊賊入鳳縣時巡撫蔣志章始蒞任遣總兵張福齊及吳士邁會勦丙子田玉廣等擊賊於榆林之白鶴廟軍功侯藩國死之玉廣身受八創猶力戰殺悍賊數十賊西奔己卯至甲申李輝武吳士邁等追賊於陳邨羅局鎮大敗之張福齊復攻敗四堡賊走高陵復竄渭南河北之

交口上漲，王里、弔莊各渡，思渡渭南副將黃本富等扼要擊之，賊潰退。己丑，賊竄踞新寧鎮，張福齊合總兵王萬年等軍攻敗，追至鐵牛河，墜河人馬死者六七百，棄糧畜甚多。叅將黃萬陞戰死，辛卯，總兵黃超羣敗之桐樹河，壬辰，竄榆林川。劉端冕又擊敗之，賊西走，於是陝境西同乾、鄜郡縣仍復肅清。丙申，回賊自草地竄入榆林之土孟三道河，劉厚基督田玉廣等擊敗之。九月丙寅，回賊一二百人於懷遠之三道盜刈民禾，成定康遣提督成鏡春追至油坊頭，攻敗之，殺賊五六，獲牲畜三十餘。都司鄧茂盛戰死，其時清澗靖邊米脂綏德等處馬賊日行二三百里，颺忽無常，成定康龍錫慶喻步蓮等往來追擊，蔣志章以濱河吳堡清澗延川延長宜川

等處將屆冬令水橋處處可通遣總兵王名滔扼宜川龍王  
廵以遏東竄十一月直隸提督劉銘傳提淮軍來陝督辦軍  
務以所部提督劉盛休王德成等十四營駐乾州提督吳宏  
洛總兵張佩之九營駐耀州乙巳銘傳自率親兵礮營往乾  
州駐中路檄提督譚仁芳將原駐乾州各營移駐鳳翔與李  
輝武聲勢聯絡是時北山一路敗賊潰卒百十成羣嘯聚破  
窰圮堡中劫掠行李蔣志章遣各防營因會哨爲搜勦山隙  
伏莽捕獲殆盡更議定賑墾章程遣成定康龍錫慶會同道  
員邵聯舉行之招集流亡安撫難民分地給種

十年十一月劉銘傳請假回籍

詔甘肅提督曹克忠來陝代統其軍時李輝武以貴州巡撫

曾璧光檄援黔而四川總督吳棠奏留輝武駐大安驛固蜀邊蔣志章以甘回被勦正急陝軍大半入甘恐回賊乘虛竄入奏李輝武素得漢南兵民心諳悉地情懇

遣仍鎮漢中既可兼顧鳳翔而川北門戶仍自周密

詔許之於是陝境肅清惟駸駸嚴防禦勤撫瘡痍民漸安業矣

論曰回亂之生也亦有不能自己者乎夫以回之隸吾區夏安恆產樂室家非盡如粵捻諸賊之亡命無賴也二三黠桀之徒嘯呼羣起遂不一顧父母妻子肆其凶頑屠城戕官沮

王命是豈如柳子厚所云天賦以是性雖欲不爲毒螫而有

不能者歟。泊乎撻代既張，鏹犁巢穴，痛盡根株。河洛汧渭之間，縱橫千里，血海骨山。雖以劉蔣兩中丞之賢，匡直輔翼，傷殘之餘存者，尙不及什一二。然則亂之初生，法令伊始，雖欲稍寬假之，又何可得耶。

平回志卷二終

平回志卷二終







2

2807  
ChL 2946 4282  
2888  
NATIONAL LIBRARY  
SERIALS ACQUISITION  
SERV. DEPARTMENT  
INSTITUTE  
SEP 30 1988







平回志卷三

太湖王志沂

東湖楊毓秀子堅纂編

受業長陽張榮澤仝校

姪楊存澤

蓬溪蓬萊山館刊

志甘肅一第三

甘肅自省垣及所隸府廳州縣大半參居回民同州同尤悖  
驚不畏法州大東鄉山谿深險林木箐密回巢其中以劫奪  
爲耕作每秋穫登場三五成羣公掠民稻囊橐而去民不敢  
較遠近商旅尤受其害在承平時已然矣州之老巢三城北  
之華寺畢家場祁家場通稱拱北拱北者清真寺也又稱其

教首曰牟弗諦牟弗諦者猶云渠魁也三巢爲眾回淵藪陝甘及他省回皆依歸聽命焉而省東北甯夏一路其始回民懦而漢民強遇事輒凌轢之以聞於官多置不問回積忿深往往與漢民相仇殺互有死傷越在邊陲格於上聞官吏旣袒漢民又以回之易與也輒任意出入其法回殺漢者抵死漢殺回者令償斂葬銀二十四兩於是回滋不服同治元年春陝西以捻賊不時出沒州縣興民團自衛檄甘肅亦行之陝回遂乘釁起煽言民團旣成將盡誅回族通使甘肅諸回訖於關外合謀作亂以爲不先發制人坐受屠戮後將噬臍於是眾回一時騷動甘肅自甯夏發難踵而興者馬化澂反靈州馬彥龍馬占鰲反河州馬桂源反西甯馬文祿反肅州

其他府州縣回雖未變者亦蠢蠢懷異志與漢民相猜忌甘境之靖者蓋十無二三大抵甘回不如陝回之悍而狡詐過之始則攻陷城邑據之以叛見官軍至則又陽爲歸誠服罪藉稽誅討選蠕觀望以趣時變其挾術多此類也閏八月陝回自鳳翔邠州將窺甘置護陝甘督恩麟方謀防禦檄道員萬金鏞李懷庚以兵駐涇州秦州於是鹽茶廳平遠所靈州同心城遂同時以變告丙申陝回竄入華亭民勇甄玉招張友德趙迎涼趙迎溫因賊圍戰死丁酉陝回竄清水之大麻池張家川回民開堡門納之叅將范玉春等率隊往勦至瓦泉溝溝內突出千餘賊衝敗官軍軍械多失玉春退駐清水城外己亥平遠賊攻破固原黑城堡民商多被戕賊擄其貨

財以歸。九月乙卯，同心城賊圍攻靈州。甯夏道侯雲登以甯夏總兵慶興力難任事，自請兼署總兵篆，以資調遣。

詔嘉其能，特

旨俞允。戊辰，鹽茶廳同知莊裕崧、涼州鎮萬年新等馳赴鹽茶之秦家灣賊營，回目王大桂等跪道求撫。裕崧等領回眾赴固原，遣員分赴各莊收復散賊。三營蕭和城三百戶諸賊皆招撫解散。賊目馬彪、馬新成、蘇三麻子等抗拒不服。王大桂立殺之。其首逆楊祥逸爲團勇王鴻烈殺斃。十月，侯雲登會提督定安軍攻靈州賊圍，五戰皆捷。己丑，遂解靈州圍。賊竄金積堡。初，狄道州洮河沿甘崔二姓家口數百號強武莊，當回出入要衝。每河州大東鄉回行劫歸，兩家輒率佃丁邀



截回畏其強，不敢抗。至是乘陝西回亂，闖入陝境行劫。歸過  
洮河沿，二家復截奪之。回遂約大東鄉回數百來復讐，二家  
不能敵，遂攻破其莊，殺男女數百口。中有脫者，赴省白官。恩  
麟遣中軍馬繼祖偵探，繼祖本回族，庇護回類，以無事覆。數  
日回見官兵不出，益無忌，肆殺掠於庚王川等處。漢民被害  
者，復赴省鳴冤。恩麟遣提督成瑞往撫，而回目馬萬祥、馬有  
明等跪迎哭訴，稱與狄道漢民素無深仇，因爭渡起釁。回民  
每過漢邨，輒多方難詰，搜取財物，以致糾眾報復。一時眾忿  
難遏，不能約束，罪實難追。今願解散黨類，聽候處辦。恩麟卽  
奏請撫納，而回眾仍焚殺自如。漢民遂興團防禦，數日間得  
萬餘人。然與回戰輒失利，於是河狄各回皆蠢動矣。乙未，侯

雲登等勦賊至胡家堡斃賊三百餘守備郭宗魁防禦慶聯  
衝陣泥滑墜馬被害丙申協領拴林等勦賊至郭家橋軍甫  
至橋北賊於上流決湖溝水軍陷泥淖足不能立乘危圍撲  
佐領吉星毓秀守備王廷澤外委楊天貴楊沛奮力衝突各  
手刃數賊力竭死恩騎尉陸安定藍翎教諭包協恒率勇往  
援亦各殄數賊泥滑墜馬死拴林等軍追至殺賊三百餘賊  
堅守吳忠金積二堡不出甯夏平羅諸回莊悉爲流言煽變  
侯雲登親入各莊安撫解散平遠所之亂皆謂鹽茶同知屈  
升之勒捐致釁及回目王大桂投誠臬司楊柄銓奉檄赴鹽  
茶安撫詰問起事之由大桂具稱平遠所把總馬兆元素懷  
異志當陝回起事卽有渭南回二十餘人至平遠所結夥煽

亂兆元爲之布散傳帖且稱奉上司檄官兵刻期殲除回頭  
各莊同民聞而驚怖羣往附焉遂率眾分路逼脅至王家團  
莊見王大桂所騎馬蹶蘇提刀刎其馬足且言將殺大桂老母  
大桂懼遂爲所脅奔平眾竄韋州惠安各堡肆焚掠裹脅靈  
州同眾攻犯州城靈州同心城金積堡皆非甘心爲亂者實  
爲兆元煽惑柄鏗卽遣大桂隨游擊馬世勳赴同心城金積  
堡宣示

朝廷恩威申諭大義同心城回目周法金積堡回目馬化澂  
卽隨至臬司行營投誠而馬兆元在靈州爲官軍擊走以馬  
化澂投誠不肯附己領其餘黨二十餘人回平遠所隨圍攻  
固原之下馬關復分途裹脅又遣人往約王大桂之子明忠

爲夥且誘大桂復叛大桂受柄鏗計佯許之且給以眾情嚮附願一辱詣家中計事十二月庚寅兆元領三千餘人竟往王家團莊大桂請俟糾眾以徵信壬辰回眾悉集遂請兆元出莊驗閱而先遣人隔斷其所領之隊兆元甫至郊卽麾眾圍之並其副元帥馬萬岡亦陷圍中兆元勢窮長跪求降大桂於眾中數其辜曰汝身膺職秩背叛

朝廷煽亂殘民尙欲緩死耶大桂奉臬司諭脅從者概免惟馬兆元馬萬岡罪在不宥喝令縛之遂請游擊馬世勲立斬兩首齎柄鏗行營搜獲賊貲分給回眾解散其餘黨是時賊攻平涼游擊張悅千總年啟榮自固原帥兵往援行至白土口遇賊接戰同時力竭死

二年正月戊申朔，瓦亭踞賊出其黨二千餘人，竄入固原，  
殺平慶涇道萬金鏞，吏目戴承恩，據其城。時王大桂自鹽茶  
廳集所部回眾數千人，由萬年新督同赴三營防堵。諜知固  
原賊約四五千人，爲首蓮花城，逆回穆二喇三及楊大娃子  
大娃子楊祥子也。盤踞州城裏脅搜搶，城內回民多離心者。  
大桂遂自請收復固原。乙丑，率回眾抵未及州城五里之馬  
蟻河，遣使入城詰責賊，旋使人赴大桂營謝罪，且言願還州  
城，請大桂入城商辦。大桂信而允之。戊辰，穆喇二賊親出郊  
迎大桂，分其眾半駐城外，半自領入城。丙子，鹽茶廳忽諜報  
固原城內火起，鎗礮聲不絕，城門嚴閉。廳城人皆駭異。二月  
己卯，大桂狼狽奔回廳城，言始與穆喇二賊相見，具言誤聽。

楊大娃子浮言正月二日漢民欲乘回民拜墓閉城搜殺家  
口以故先發令悔無及矣大桂責以大義俱各首服卽令其  
遣散夥黨縛送戍官首事諸逆而二賊乃欲以賄贖罪大桂  
好言止之復明白申諭乙巳申刻穆二等聲言遣散黨與而  
卽率其黨直撲大桂寓鎗礮轟擊大桂倉猝不能禦俄見四  
面火起卽乘亂縋城逸途中聞所部回民多被戕害拘執墮  
賊姦計不勝憤憾乃囑莊裕崧嚴備廳城復自回王家團莊  
調眾復讎而楊大娃子等於大桂眾潰後卽以馬步二千餘  
賊追大桂父子直犯鹽茶萬年新等以兵迎戰失利三月壬  
子遂逼廳城莊裕崧率文武登埤守禦土城低小兵單賊遂  
攻陷裕崧及都司高如岡照磨胡枚皆被執罵賊死廳幕友

縣丞易舉並家丁李暢十一人同時被殺而大桂與其子明忠方回團莊調眾突被賊追獲殺其全家乙丑蕭河城土匪合固原賊攻圍靜甯州城城中文武督兵勇紳民登城轟擊賊退踞距城三里之高振寨辛未參將李友伏知州恩祿等攻破之生擒偽帥寨雲兵團分路追擊斃賊三百餘隆德團總趙合璧以鄰警來援斃賊百四十餘殲賊目單海單滿賊北竄固原蕭河城老巢四月自庚寅至丙申鞏泰階道林之望軍與賊戰秦州之萬家堡王家堡壘獲全勝先後斃賊千餘先是賊撲秦安城外營軍屢失利秦州知州託克清阿典史黃元慶皆中鎗死至是軍聲始振六月甲午夜狄道州民團放火燒城內禮拜寺及回民屋宇五百餘戶家小四千餘

口焚殺盡淨。於是各鄉回眾，麇集城外，意圖報復。乙未，瓦亭賊以二千餘人犯隆德城。李友伏領兵勇六百馳擊，時賊將近城，見官軍至，卽四面圍撲。友伏持矛衝入賊陣，斃二賊，得其首級。賊抵死攢刺，友伏身被數鎗，仍麾軍力戰，士卒大呼奮殺，斃賊二百餘，殺紅衣賊五人，皆獲其首級。賊始敗竄，友伏乘勝追殺，復斃多賊。隆德賴以無警。賊圍平涼，自二月至八月，官民嬰城固守，糧食軍火皆竭。丙戌，城陷，城中文武皆被害。壬寅，回目馬大漢率死黨，扳登狄道州城，大聲喊殺。城中驚亂，各放火燒屋，開城逃奔。馬大漢乘亂闖入，知州屠旭初都司陸陞倉惶勒兵截擊。旭初手及數賊，黑夜被賊亂石擊死。陸陞恐火藥局爲賊得，遂放火燒藥局，自焚死。居民逃



避不及多被殘殺。九月，馬大漢將分隊犯洮州。土司指揮僉事楊元遣番兵伏於洮狄交界之羊撒寨。賊至，土守備張漸達等率伏兵起，前後截擊，斃賊四百餘。餘賊潰竄，元復出奇兵繞賊前，杜其去路，夾擊之。復斃賊四五百。墜河死者無算。番兵大捷。都司鄒占元軍駐狄道四十里十八盤大灣等處。賊累日來撲，敗走。癸亥，復以馬步大隊來攻。占元揮兵力拒，斃賊無算。都司張占標身受重創，猶手刃四賊。馬大漢中礮死。癸酉，提督梁生嶽攻狄道賊。賊聞大軍至，遂西竄入山狄道。收復。十月丁酉，甯夏失守。先是回馬化澂既投誠，夥黨尙聚軍械不繳。遊擊梁生嶽親詣金積察驗，接見化澂，承奉極謹。地方亦甚安謐。因詰問人眾，何未遣散，輒以恐漢團復讐。

爲辭、漢民亦皆觀望、不敢復業、於是甯夏平羅等處漢回相持、不時劫殺、甯夏將軍慶的、令梁生嶽及甯夏知府呂際韶、親往回莊開導、各回咸願投誠息爭、歸商計於侯雲登、雲登遲疑不決、遂有漢團王添德自稱道署總役、領二三百人、燒殺回莊、而回亦復糾眾、疑王添德爲雲登所使、已而夜中甯夏道署火起、城中人見羣回乘火喊殺、侯雲登立時被害、知府呂際韶亦自戕、城門皆開、城中難民逃出云、馬化澆者、世居靈州金積堡、富甲一鄉、有智計權謀、納捐爲武職、遠近回民皆悅服焉、曾犯巨案、被逮至省、化澆以重賂彌縫、得免、其時陝甘雲南各回、爭致金錢、助爲贖罪、費累鉅萬、事解歸家、餘金猶充行囊、人以爲有郭解杜季良之遺風、甯夏

之變武舉姓赫者率眾回與城回內外應合城陷戕殺官  
三日傳呼王爺入城合城回漢悉跪道恭迎則見化澹坐大  
轎擁衛多人馳入公署隨傳令部署一切住數日始回金積  
由此觀之則甯夏一路服屬於化澹顯然矣化澹在金積練  
勁勇數千持矛擊刺旋舞如飛鎗礮雖利勢不能展敵陣稍  
亂卽以馬隊縱橫衝突官軍鮮不爲其所乘陝甘之回又恃  
以爲逋逃藪化澹皆收納之居中調度無不用命又不時納  
款投誠以懈弛我師而息養其鋒銳爲謀可謂譎矣戊戌靈  
州失守十一月丁未雷正綰軍入甘解涇州城圍戊辰攻克  
王邨花所鎮老巢斃賊二千餘獲騾馬二千餘轉戰五十餘  
里都司戴洪臺陷陣戰死十二月乙酉攻克鎮原賊巢遂解

城圍

三年三月雷正綰自靈臺攻破上梁鎮賊巢進軍崇信搜捕  
四路逃賊斬戮殆盡遂疊破赤城鎮戚家川諸巢直趨神峪  
河會陶茂林擊破其老巢復由白水眉見兩鎮一路掃蕩進  
駐平涼之四十里鎮陶茂林自鳳翔追賊至汧隴肅清陝境  
遂由崇信進軍勦捕磨坪各巢踏毀一百餘穴遂解華亭城  
圍礮斃悍賊千餘陣斬紅衣賊百餘進駐軍距平涼六十里  
之策底鎮會正綰軍攻平涼丁卯街子上四工撒拉以三千  
人勾結循化廳城內回爲內應開門納賊時同知吏目守備  
皆不在任所叅將陝成英與訓導何雲翹調集伍兵百餘人  
禦賊門開陝成英及何雲翹巷戰被創城內漢民見賊勢威

齊擁至成英前痛哭求救，成英乃率殘兵護男婦三四百人出南門，雲翹因創重旋死，而清水工撒拉聞城陷，沿河具船救度難民，力白下四工撒拉，無一人從亂者，且言願出力助官兵往勦，陝成英令安住難民於碾伯之三川，隨赴省報難。四月，馬化澂遣回官馬精忠齋還甯夏城，陷所失鎮道兩印，退出府城，願求撫，恩麟以大軍方萃，力攻平涼，勢難兼顧，姑許投誠，以事羈縻焉。癸未，曹克忠攻克長甯驛，馬鹿鎮賊巢。丙戌。

詔都興阿代統直隸提督訥欽軍入甘肅督勦。辛卯，雷正綰、曹克忠各軍攻賊於平涼近城米家溝，復追至太和溝、紙坊溝，共斃賊七八千，生禽百三十二人，平涼援賊皆盡，遂於城

外掘地道，築礮臺，晝夜圍攻焉。李俊堡同目張保澹前歸化同目王大桂舊部也。穆三旣殺大桂，保澹遂爲所脅，屢通款爲內應。至是聞雷陶兩軍攻平涼，屢捷，保澹震懾，兵威亟思投誠。關漢紳郭登瀛代白，願率其部眾克復鹽固兩城，立功贖罪。恩麟許之。平涼穆賊被官軍屢挫，城內危急，屢調外賊往援。保澹遂乘機率其部下四千餘人，詐稱赴援平涼，道經固原，賺開城門，密商前陷賊內文武官弁，與大桂舊部同民千餘人齊發，殺賊無算，生禽賊首花萬六藍天祥等八人，獲文武官印記關防，及僞大元帥偽經篆印。卽日傳諭鹽茶廳城一併收復。臬司楊柄銓前往籌辦，將逆犯解省正法。安撫鹽固城內同眾，遂分遣保澹所部同戍各要隘。乙酉，平涼賊

敗績，賊竄固原。固原同眾閉門拒之。五月戊午，雷陶大軍齊集平涼城下，四面雲梯登城，賊失措不能禦，縱殺逾時，餘竄入平涼西瓦亭峽城內。庚申夜半，遙見瓦亭城火光燭天，人馬聲不絕，賊大隊皆北竄。瓦亭城內無賊蹤，維時東路雖通，而北路甯夏靈州等處同族素繁，軍興以來，滇陝之同踵至蟻聚，今平涼瓦亭賊復合併之，勢彌張矣。陝同黑牙古赫明堂眾萬餘來靖遠乞撫，楊柄銍許其歸誠，好言慰藉之。是時道員趙必達以果義軍勦河州同賊，賊引撒匪三千人以自助，必達屢出奇兵致勝，平其州城賊巢，殺獲無算。營官戰死者鄧資深、駱長青、雷步雲、陳錫弼、陳添培、楊茂林、黃龍章、陳全忠、癸亥臨洮營都司王勇、會土司楊元，調買吾剛拭多。

哈多各族番丁行至買家集遇河州撒拉回萬餘人迎戰擊斃賊六百餘生禽二十餘平燬兩壘奪獲無算賊敗退馬家灘拉布浪火力藏番族勦賊於土門關亦迭獲大勝平其賊莊八月辛未雷陶軍攻克張家川賊巢斃賊萬餘壬申卽移營攻龍山鎮克之正綰隨進攻蓮花城茂林駐軍張家川鎮歷是時踞張義堡之陝回孫易保率其黨四千夜半襲固原城甯夏鎮穆隆阿成瑞及張堡濬所部回民皆駐城內而赫明堂在城爲內應門開賊入驟不及禦保濬部下多爲殺傷保濬乃越城逃歸李俊堡而城內回民護送穆隆阿成瑞出城趨平涼正綰聞之欲急克蓮花城以向固原壬午癸未斬隘直前與陶茂林攻克邵家堡馬家堡各小巢殺賊二千餘



乙酉賊傾巢出拒我軍擊賊反奔追近賊巢左右山溝伏出於時山路崎嶇人馬窒礙難行不及收隊賊已逼近矛刺正綰中頤軍遂大敗官軍死者近千入然正綰雖挫敗軍容尙盛是時楊柄銍方議招撫眾回乞撫者今日獻城納款明日畧堡攻寨旋復旋畔漫不得其要領正綰深以爲撫局爲不可恃謂甘肅之回他處或可寬宥至於西南河州蓮花城張家川等處其人習爲標掠凶狠好鬥平涼鹽固之陷皆出其謀玉帛子女掠歸巢穴旣居萬山之中又處適中之地疾在腹心若不痛加勦洗徒事羈縻適以遂其姦謀將終無了局耳遂決意進取蓮花城九月壬子踞鹽固陝回二千餘犯靖遠縣城副將王德恒禦之賊佯敗官軍追之伏賊四千餘從

旁抄襲陣亡官兵二百餘。亟收隊登陣固守。甲寅賊三千人犯渭源。知縣張大榕、典史竇澍槐登陣守禦。鎗藥盡。城陷。大榕罵賊死。澍槐同時被殺。十月壬申。黨原踞賊攻合道街。秦將馬天祥營壘。鏖戰數日。天祥營幾殆。總兵譚玉龍副將劉効忠力解重圍。追殺數十里。直至黨原。賊以萬眾來拒。玉龍設伏擊之。殺斃七八百人。餘賊旁竄。鎮原。癸酉。雷正綰攻克蓮花城賊。卽回軍平涼。向固原進取。陶茂林赴河州。壬午。河州總兵曹克忠自蓮花城行抵秦州。乙酉。攻敗甘泉寺巨賊。燒殺二千餘人。遂解秦州城圍。癸巳。賊攻靖遠城。督標遊擊常守仁禦之。千總陳策勲戰死。賊復扼阻城中水道。守仁率隊出城取水。賊輒迎擊。我兵隨機馳勦。乘閒得水。十一月克

忠進攻高樓，賊以馬步大隊迎擊。我軍佯敗，至董家壩，營齊出，斬馘二百餘。戊寅，克忠冒雪移營，密遣總兵王得勝等潛伏山後，復調林之望迎前助勦。賊抵死抗拒，王得勝等從山後繞出，賊始潰。我軍圍攻，斃賊二百餘。賊退回高樓堡。己卯，傳令各將分兩路抄出高樓堡前，克忠自率各營扼堡後，爲夾擊計。附近各堡賊萬餘來援，官軍鏖戰多時，斃賊四百餘。賊敗盡竄鹽關。庚辰，四鼓傳令，留兩營困高樓，而以全隊抵鹽關。比至賊皆斲膳，我軍齊聲喊吶，賊驚覺失措，紛紛棄巢逃。我軍截殺斃賊二千餘，墜崖死者無算，獲騾馬千餘。復追殺三十里至祁山堡，沿途殺賊五百餘。遂克鹽關。附近賊壘悉平，遂回軍攻高樓，密遣勇丁鑿兩地道，施地雷，築二

礮臺戊申寅刻我軍四面圍攻地雷火礮同時發西南堡城  
圯克忠率各營冒煙衝入石子亂撲如雨會東南北三面勇  
丁縵梯齊上賊遂大亂我軍又斃賊七八百賊首張福海何  
朝何蛟等皆斬馘秦州境肅清己酉由通渭勦賊厯中林山  
斜坡嶺馬營監遂解安定圍所過賊巢爲墟賊目馬恆福夥  
黨分踞安定之內官營水家坡等處內官營爲安定渭源狄  
道金縣四達要衝茂林營駐安定賊率眾犯壘壁茂林分兵  
由內官營後路放火燒賊巢自督兵橫擊賊見巢內火起越  
嶺逃追殺賊四五百獲牛馬三千餘復分兵盡掃水家坡清  
水驛各巢直趣金縣庚戌申刻由新營清水驛兩路抄入合  
渠義軍及齊廷瑞鄉團環攻之賊開北門迎敵茂林所部佯

敗賊追十餘里高餘慶伏兵突出賊回竄周玉超扼堵歸路  
茂林反戈向賊三面夾攻賊南竄餘慶等追殺三千餘里逸  
賊復過玉超後路我軍奮力衝突賊敗入城玉超追至北門  
殺入城內茂林亟麾張在德六營以三營隨玉超入城三營  
扼北門又遣親兵五營在城外東南兩面圍擊城內搜殺移  
時墜城者悉禽殺靡遺遂將金縣克復救出難民四千餘卽  
以高餘慶五營移守金縣張在德九營駐清水驛防東西兩  
路親兵馬隊駐甘草店部署定先遣周玉超西顧省城而自  
領圍隊赴省金縣之初陷也知縣蔡同死於城北眷屬幕友  
皆殉難典史劉述寬閣署自焚把總牛文海中鎗死陶茂林  
至省親往尖山相度地勢周歷附省西南阿千鎮關山嶺各

要隘遂與恩麟議進取以爲狄道河州渭源靖遠遍地皆賊  
無論進勦何路皆宜先衛省城譬之疾病狄河渭源已成痼  
癥可以徐圖靖遠被圍危急之癥治緩則變生乃先趣靖遠  
靖遠之賊其眾約三萬乘城者六七千環城民房廟宇皆賊  
屯穴牆壁以施鎗礮對城轟擊又於城東北隅鑿地道四處  
通入內城常守仁伺知卽令塞之於是城中飢渴交迫已未  
守仁親督士卒出城遇伏賊鎗中守仁左股穿膚出猶負痛  
力戰因眾寡不敵收隊回茂林乃先遣提督高慶餘張在德  
合十一營之兵進勦十二月辛未慶餘攻平黑城賊卡十餘  
生禽黑牙古等數十人殺之丙子曹克忠軍攻克高家堡老  
巢丁丑雷正綰軍攻克開城十九壘追賊二十餘里殺賊二

千餘燬其營帳旗幟生禽百餘獲僞元帥馬林明耿懷氏正法己卯高慶餘等移營喬家雪灘賊馬步萬餘撲營我軍失利慶餘及其部下副將謝萬年守備吳南雲張在德部下游擊王繼祥守備傅平川嚴有由先後皆戰死總兵陶在林身被重創在德以賊氛惡遂收隊堅壁待援辛巳曹克忠戰賊於楊家山斬賊五六千生禽三百餘賊分兩隊一竄平涼一竄華亭克忠遣將追至華亭兩隊復合爲一遂僞官軍賺入靈臺城雷正綰聞之率親兵圍隊竭一晝夜之力馳三百餘里及之於靈臺靈臺倚半山爲城遂從山上礮擊之賊不能守奪門出竄擊斃過半餘奔涇州正綰復追及賊伏匿城南溝岔復斃其數百餘奔荔家堡欲并合固原賊又爲正綰別

部邀擊之於當原禽斬盡淨無一人漏網者正綰仍回開城靈臺之陷也知縣祝賓賜罵賊死其眷屬及幕友李芳玉姚輯瑞楊春畦孟際雲家丁孫升趙珍周貴張銓皆殉難城危時賓賜以印付其子毓奇令縋城逃故印不失癸未茂林親領圍隊並調他部四營徑趨靖遠遂將楛栗園杜家山等處同巢攻克以通糧道殺其悍賊八九百墜崖澗死者無算戊子己丑攻克大小樓子庚寅直取黑城賊巢殺賊七百餘禽悍賊馬如虎等數十人殺之於是餘黨悉竄西北諸山茂林恐繞襲我軍之後甲午單騎入省與恩麟密商部署

四年正月己亥回營次日師次喬家雪灘凡賊壘與附城賊通聲援者分遣諸將先平之丁未茂林親督各部由西山壓



出城後，張在德由二十里鋪繞至南山，直衝賊壘，前後夾擊。賊敗回，東西兩關戍申先遣游擊黃超羣駐糜子灘，截賊回竄。遣張在德直前誘敵，總兵仇有道居中策應，茂林自以兵伏東西兩山，四面包抄。賊大亂，東關賊巢平，乘勢追至城下。知縣鈕明善督紳勇登城助戰，游擊常守仁、副將伊密揚阿守備賀得昌等，各率所部自東西門出勦。西關賊巢平，賊奪路狂奔，城圍立解。徐將靖遠附近巢穴次第平燬。癸丑，雷正綰遣提督沈懋貴等攻克彰義堡，自是旬日之內，曹克忠軍攻克馬家嘴、蕭河城，將嘴頭、隆德堡、夏家寨諸賊巢，蕭河城同民蘇上達齎其馬匹軍械，領閭城人民來營求撫。漢民一百六十餘莊，具保上達實爲良善，被蓮花城賊裹脅，無計投

上達亦王大桂舊部也是時張集馨在行營一切安撫事宜多賴籌畫雷正綰稱其見事敏決思慮周詳在甘肅兩任藩司地情熟習奏請

留甘以資補益己未夜涼州東關廂回放火燒民房與漢民互鬥殺傷民商甚眾隨持械攻撲入城時涼州鎮莫德哩甘涼道琫武預督兵勇登城開礮擊止而城內回眾與回奔馬忠及在伍回兵齊集禮拜寺約千餘人頭裹白巾持械放火將至城下開門漢兵民團於各巷門堵禦復令居民各上屋擲甃瓦亂擊之回眾始阻退時涼州副都統聞變勒兵守滿城而卽率馬步數百馳救適近城鄉團亦至四面兜勦先後

殲回八九百，越牆衝隊逃者百餘人。城內兵少，與回相持，不能敵。遂增調滿營兵四百入城，合圍禮拜寺。寺牆高厚，衝擊不破。乃然薪草投牆內，延燒其寺內房宇。回眾冒火持械出，兵勇與戰。終夜賊始盡，殲約二千餘，獲旂幟鎗礮軍械甚多。徐令撲滅餘火，檢兵勇死者二百餘，漢民死者千餘。先是古浪回變，被民團殲殺無遺。故各路回眾反側生事。庚申，雷正綰會降回張保澂，攻破固原城外賊壘十五座，斬馘千餘。於是晝夜環攻，賊以馬步五六千死命撐拒。我軍復斃其僞元帥馬得力，遂掩殺至城下，斃賊千餘，生禽賊目三十餘。城內回舊隨張保澂就撫者，見賊敗輒縋城來歸。其言陝回皆膽落，其他亦俱懾兵威。各思自全，願爲內應。張保澂遂與城內

六防阿暉約尅期舉事。正縮乃掘地道造雲梯，投各將機宜。二月丁卯朔，親督各軍登城。譚玉龍、劉正高冒矢石先登，內應之。回在城內倒戈巷戰，守城賊斬刈盡，俱回首。孫義保自殺，眾陝回亦自相屠殺，餘二三千人奪北門走。張保濇率李俊堡等數十邨降，回沿途截斃，復斃賊五六百餘。賊逃黑城子、鹽茶一路去。副將熊觀國首先登城戰死。是役斃賊共四五千，禽賊目黨長齡等二百四十三人正法。孫義俱在固原僭稱大漢正西王，僞封節度總制元帥等官。庚午大通縣回與漢團接戰入城，劫縱監犯掠漢民財物一空。居民驚恐投井服毒者男婦以千計。戊寅回目馬文義同十大莊頭人齎錢布入城安撫，願悔罪投誠，賠還贓物，縛獻首惡。西甯知府

達昌以所遺錢物分給難民息事己卯陶茂林軍自中灘追賊至王家窰遇賊馬隊數千追至王家集殺賊千餘生禽蘇萬全等九人壬午至辛卯陶茂林軍合外委蕭福民團次第攻克郭城驛中灘大小白草原李家原諸巨巢中灘爲鹽囤扼要之區逆首馬恒德招集各路竄匪并結狄河悍黨負隅日久又以大小白草原老巢恃爲後勁路險巢堅攻勦爲難茂林設伏誘敵多方取勝旬日之間蕩爲虛莽共計殺賊四千餘墮崖澗死者無算救出被脅婦女二百餘獲器械甚多惟時靖遠新城堡會甯王家集賊尙盤踞茂林以爲若不乘勝進追東路仍梗且河狄爪牙未除用兵仍虞跋扈乃留三營駐金縣以顧省東門戶遣黃超羣一軍堵平番要路以通

省西咽喉且防河狄遂凝由靖會進勦壬辰肅州城陷初安肅道恒齡知東關回眾將爲亂鎮標復多回兵恐與東賊通因集團勇六百欲誅之而未有聞也會回民馬天才以回亂告恒齡乃調團勇會標兵執首亂者數人誅之亂乃息行賞不及標兵兵多怨望回兵尤甚旣而東路回氛日熾眾遂蠢動恒齡欲卽事翦除以清內患肅州知州陳墉者專欲以恩結回而回弁藍吉珍復曲意承奉之墉遂信不反嘗與往來畧無戒備於是官民一言一動回皆知之今年春假禦賊爲名造軍械火藥部署隊伍軍民皆知其謀以告墉墉反斥爲妄言而恒齡獨以爲憂乃令嚴詰城門出入置礮城上將盡殲之墉意不忍往見恒齡願以合家保回不反且請親往撫

諭乃乘轎至東關與回眾談飲竟日忽東關民趨入城告回已整隊將變矣恒齡卽令開礮而墉子震叩馬泣訴伊父未歸請少俟焉二鼓時守門卒望見舁大轎至明燭前導人馬扈從甚眾意州官回衙不敢阻及至門眾齊擁入始知墮賊計而城遂陷蓋賊以酒食絆墉而卽以其轎馬燈篝賺入城門也賊入城放火殺掠肅州總兵成瑞方卧未醒標下回兵悉爲賊內應漢兵則皆閉門不出恒齡見事敗急督團勇乘夜出門勇怯退至明已散亡大半復勵殘卒巷戰自辰至午從者皆亡身被數創因思父柩厝關廟卽奔柩所及廟門而廟已火遂投火死母妻及二子一婦皆引火自焚成瑞醒見勢急跳城出揚言往金高調兵遂脫身去右營游擊巴某跨

馬提刀呼兵出戰無一應者隻身衝入賊中巷戰三時馬傷  
墮地復起步戰鎗子洞胸死死時身無完膚妻子僕婢皆殉  
難中營游擊尤光組時已卸任出城至安家莊招集戶勇百  
餘往攻被賊衝散身被重創回莊僅存殘傷五六人共勸圖  
再舉光組曰官以城爲命城既不保尙苟活耶遂自刎百姓  
憐之收葬其尸莊側學正邵次侯亦合家殉難民之投井墜  
樓被焚死者無算乙未城東壩貢生郭釗嘉等糾合義勇千  
餘圖復城行至踞城二十里之馬坊遇賊戰潰生員魏修文  
田貴江福邦梁國治蕭立成農民閻雲章等皆戰死廩生張  
先烈張海涵被執罵賊賊鬻殺之郭釗嘉自縊其因公在肅  
陷賊內者安西知州李灝玉門知縣俞銓王子莊州同嚴蓬



裒率城中義民數百，屢與賊戰，均力竭死，合門殉難。獵戶  
始甘州提督索文本，口外回部，欲盡用其種人，乃悉隸眾回  
於各標。其餘令充獵勇，置南山諸番口，以防番肅州之變。各  
獵勇皆不靖，其尤狡悍者，則爲分置赤金之獵目馬忠良，卽  
馬四也。所率回眾八十餘人，皆最强梁。善父子鎗，三百步外  
發無不中。眾嘗出獵，見巨狼熟睡草灘上，欲刺之。及醒，乃馬  
四也。眾大驚，因共推爲首。聽指使無違。肅亂之先，帶勇入關，  
住肅數日，密約肅回同舉事。而肅城諸官未之知也。及反，嘉  
峪見守關游擊他出，卽乘間發難，奪關而據之。其同教者皆  
附焉。游擊聞變歸，抵關不得入，駐兵關下。越四日，肅回亦變。  
馬四恐孤城被圍，往投游擊，請攻肅回。以自贖。成瑞、陳墉皆

許之馬四因得與肅回合遂招南山各獵回入城黨與始盛  
亂稍定成瑞陳墉遂指馬四原名馬忠良爲逆首而改馬四  
爲馬文祿謂據嘉峪關叛肅城者皆馬忠良也馬文祿隨官  
軍奮勇攻賊馬忠良伏誅羣回受撫皆文祿功遂保馬文祿  
爲鎮標都司領勇守城於是馬四乃得專擅兵權威挾官民  
矣馬四旣得志招叛納降凡渭南金積河州西甯諸竄賊悉  
附之聲勢日張生殺自由不復聽命於官府每戰勝輒報捷  
於陳墉墉亦爲賀功馬四外雖恭順實虜繫之居賊中兩載  
後爲馬四出城與官軍講和有譏之者回城抑鬱而死時年  
七十餘矣妻子亦相繼亡三月丙申朔高臺縣馬家莊回聚  
眾燒漢民郵莊城中文武率兵團殲之是日撫廳黃家灣

同起事焚殺漢民壬寅甘州城內同舉火倡亂兵團併力撲  
勦賊奪門逸復勾結撫彝賊與西甯撤回欲來復讐是日官  
軍攻肅州賊於距城十里沙灘廟官軍傷亡大半癸卯曹克  
忠將攻鹽茶廳賊眾萬餘迎戰於韭菜坪賊大敗乙巳賊以  
二千人趨廣武棗園諸堡都司康永壽等攻走之斃賊五六  
百庚戌雷正綰會各軍攻拔黑城子老巢先後斃賊三千餘  
生禽賊首黑虎等百七十八人獲牲畜三千餘辛亥獵戶攻  
陷永固堡踞堡城二十里洪水營同眾亦放火倡亂洪水營  
游擊玉禮把總蘇元發皆同族爲內應團勇圍其衙署王禮  
等與戰不利王禮及蘇元發皆與其妻孥自盡壬子曹克忠  
軍攻克鹽茶廳巨巢先後殺賊三千餘獲賊馬千餘驢騾牛

羊無算軍械旗幟委積如山生禽賊目田吉成馬保等百三  
三十五人餘賊竄李旺堡同心城等處登城戰死者千總周  
文貴陳光明把總余永威軍功周永貴於是甘省東南廓清  
正綰等遂長馳北進遞克官橋李旺等堡規取靈州矣是日  
陶茂林軍自大岔山進攻羊營寨等賊巢平之次日賊撲陶  
世貴營茂林時駐軍大岔山卷旗息鼓傳令諸勇僞作賊營  
聲息賊亦誤以爲羊營寨夥黨大呼助陣各勇振步直前鎗  
礮猝發賊失措大亂斃賊四五百獲牛馬千餘四月甲戌甯  
夏敗賊六千餘將趣中衛都司康永壽等擊之於廣武棗園  
斃賊八九百獲牲畜軍械無算賊仍東竄丙戌賊復以萬餘  
擾廣武棗園兵勇擊敗之梁生嶽遣都司魯剛泰以兵圍七

百助勦行至石空堡遇賊馬隊二千餘遂墮入賊圍剛泰及  
千總李醞把總雷國珍外委鐵清泰喬應魁皆力戰死游擊  
馮守勲追至救出兵勇多人賊仍竄河東五月道員黎獻領  
兵進勦肅州自黑城子攻破馬營墩賊堡獲菴園營都司關  
防及各鈴記都司吳占鼇游擊陳桂章守備王廷勝均受重  
創死旋收復永固俄博兩城烏魯木齊提督成祿解安定圍  
己酉曹克忠軍攻克牛角城雷正綰軍攻克預望城及下馬  
關賊巢岷州回族最繁洮岷協營守備李發珍與原任洮州  
之河州鎮標千總丁永安皆回弁陰結黨羽冀竊據廳城閏  
五月己巳有外來回賊千餘入廳城直撲州署殺知州增啟  
都司烏聯登及其眷屬暨漢民百餘人復放火燒廟宇民房

半由東南路逸餘數千人由城北渡河竄洮州民團分路擊斃賊數百人恩麟遣臬司林之望領張華所部黔勇會鞏昌知府趙桂芳勇丁併力往勦癸酉總兵鶴齡等軍合民團攻克省城北紅圈回巢賊竄中衛靖遠交界之石碛子鎖罕頭防中衛梁生嶽軍失利戰死者都司馮守勲協領拴林雲騎尉馬兆瑞千總王思明黃登雲外委徐大功馬忠孝徐福春恩騎尉李登雲外委常壽力時金積堡回目馬化澂招納黨與西竄中衛攻犯梁生嶽營壘曹克忠自半角城移營平燬羅山麻圪塔七壘殲賊三千餘遂至甯安堡聲言渡河救中衛乃直趨金積堡老巢中衛賊解圍回救雷正綰亦由下馬關沿途攻勦至惠家堡與克忠聯給時克忠與賊戰强家沙

高大捷禽斬二千餘。於是糧運不繼，師旅飢困，竟日一餐糊粥。後乃擷草根木葉以食。賊偵知之，日率悍黨攻撲，截克忠運道，掘放溝水。旬日之內，士卒絕飲，金積堡夙稱饒沃，遂思因糧於賊。六月丁酉，戊戌，忍飢攻克賊卡十餘，糧亦無多。庚子，克忠自西路，正綰自東路，同時攻入。賊卡林立，復平其八卡，直抵老巢。賊預伏馬隊萬餘，從十里外繞越來抄。巢內賊傾巢出拒，我軍腹背皆賊，鏖戰半日，以薦飢之師，當久戰之後，遂至敗績，傷亡弁勇前後二千數百，軍火旗幟多所遺失。乃亟收隊，徐復策勵飢軍，令王得勝、周朝望等四路游擊，攻破高章及強家沙窩賊卡，斃賊六七百，金積之敗，士氣未靡。正綰乃擬糧運，既通，當卽廓清靈州，回軍向河狄，陝甘總督

楊岳斌乃以狄道逼近省城宜先致討乃調曹克忠一軍去而正綰亦多爲牽制不能自由故靈州久無成功於是馬化澂復有投誠之請矣當克忠之進討也化澂遣人奉千金求緩兵克忠不受令縛送陝回首逆卽予投誠去後我軍至滾泉又遣人送麥麩十車情詞懇切迨進軍至強家沙窠則見礮卡環而屹如山立濠寬水深飛渡爲難礮牆上鎗礮密布轟聲如雷士卒相顧失色始悟前此銀麩之饋以皆覘我虛實耳此其老謀深計心懷叵測也七月曹克忠軍由靖遠往援鹽茶留十營牽制金積堡遂自長樂堡石梯子白季郵茶園子遞平賊巢斬獲無算鹽茶賊勢孤遂解圍去克忠一軍自閏五月己巳至六月庚子陣亡官弁八十四勇丁三百七



十三餓死官弁黎飛鵬等十三員勇丁七十七人八月庚子  
陝回及狄河回圍攻鞏昌庚戌雷正綰軍變由三汭河潰往  
固原其弟雷恒與李高啟胡大貴等爲降回赫明堂煽惑進  
攻涇州不克回踞平涼胡大貴肆掠隆德莊浪諸路正綰不  
能制辛亥甯遠亦被圍十月曹克忠軍攻克鞏昌圍賊馬步  
萬四五千踞九座山頭克忠部署眾軍以重兵兩路設伏少  
兵誘敵迎戰賊大敗追至官棹溝皆越嶺逃落崖澗死者無  
算綜計殺賊千餘生禽七十餘獲義子鎗三百戰馬四百餘  
驢騾三百餘是夜近城賊皆棄營退走南山城圍解戊申黎  
獻軍潰肅州獻始來勦賊大懼旣而知其可以利動啖以重  
賂獻遂變勦爲撫且不設備賊乘夜襲獻營全軍覆沒遂狼

須走金塔十一月涼州賊焚毀黃羊川邨莊團總毛榮川被  
執不屈死民勇被害尤烈丙寅甘州賊二千餘攻大馬營堡  
圍果勝營守備江沛霖駐防川勇三百山丹縣知縣熊常鼇  
糾集民團赴援殺賊數百賊退踞石圈子把總渠慶寶外委  
聶耀先李天貴戰死庚寅賊攻陷涼州之水泉堡堡守備賈  
潤德戰死兵民皆殉難十二月癸巳甯夏回目馬萬選投誠  
將倡亂之千總納萬送營正法獻地繳械移其回眾於納家  
闡戊申曹克忠攻克鴛鴦鎮遂遣張在山移營進勦癸丑在  
山攻牛營子賊巢分兵四路圍擊山徑窄狹賊馬步不能驟  
進遂聚殲其男婦三千餘甲寅總兵彭楚漢攻皋蘭之水阜  
河賊賊眾三千餘官兵不滿千人楚漢分三路進賊倉猝格

門不成伍遂大敗路皆爲我軍遮絕左有煙筒溝乃從溝  
遁各營兵邀截之又大敗殲賊三百餘餘眾潰散戰死者游  
擊周玉元守備張崇謙把總張文俊康學海馬福槐伏羲濃  
馬得成

五年正月戊辰楊岳斌請自出省督勦取道鞏昌至涇州與  
曹克忠商勦洮州丙戌克忠行抵洮州之李岐山次日回目  
馬芳率老幼男婦環跪乞降克忠令將城內文武官弁及印  
鈴關防賁送來營縛獻首惡呈繳軍械牛馬糧糈皆唯唯聽  
命是日署洮州同知淡殿臣率閣城文武漢回紳民到營親  
齎文武關防印記縛送首惡回官丁重選回民丁重聯李四  
五子等二十八人繳戰馬千六百五十二匹刀矛矢叉鎗以

萬計耕牛百九十頭軍糧四百石克忠將丁重選等訊明正法梟示軍械馬匹分給各營牛給被害漢民糧則勇與飢民分食復親督各營比戶搜索實已不留寸鐵外來回民悉令遷出本住城內者設保甲法選保長牌頭互相結保於舊駐洮州各營內編立提選七營揀降回精壯者立京馬右一營留五營駐洮防守餘三營及所收馬隊令隨營助勦洮城千家寨回眾一律收撫事竣率師回鞏二月雷營叛將雷恒李高啟胡大貴等伏誅三月曹克忠軍攻克華家嶺牛營溝等賊壘戊辰彭楚漢軍由條河至金家崖遙見狄道回眾攻劉家崖民堡勢甚盛卽駐軍至夜四鼓乘賊不備斫營入斃賊數十游擊劉南瑞戰死丁丑總兵楊明海軍與賊戰車道嶺

賊敗乘勝追殺斃賊百餘副將張定元叅將會國福戰死游擊屈國香面中鎗子穿頸出初回賊馬洮沅攻陷靈州城回弁馬朝清設計殺兆沅嚴禁靈回無任滋事地方粗安於時甯夏失守復有陝回馬生彥肆擾致道路梗塞朝清者卽化澀也至是朝清親詣穆圖善大營願捐銀米繳軍械馬匹哀懇投誠靈州紳耆亦以近日地方靜謐漢回歸業呈請設官安民穆圖善乃遣佐領豐伸等往收復州城委員赴州任事壬午省城制兵入督署殺楚勇殆盡復引陝回馬生彥來犯省城曹克忠自鞏昌聞亂星夜率隊赴省以好言安撫眾心稍安比馬生彥至而城內已有備乃駐河北廟攤子觀釁居數日拔隊回皮家營去初省城回分十方方設禮拜寺每寺

有眾二三千入營伍者居大半是時各路回多變亂而省城內外防守甚嚴其尤無賴者皆逃往河狄惟老弱在城以故無事楊岳斌始來督軍聲威甚盛回賊大懼居數月不聞進兵惟仿江南水師造戰船數百艘欲由黃河順流爲攻取甯夏計後見事無濟復沉其船於河而回遂無忌益搜掠邨堡棲畝之糧民不能穫北山秦王川爲膏腴省城所仰賴者陝回馬生彥勾結紅圍土回肆行焚掠數百里無完區於是省城糧湧騰岳斌所領楚勇則月給糧餉鹽茶外日食稻米制兵則月給雜糧數升漢回兵各懷快快不敢發後岳斌率隊赴涇州留親兵楚勇一營駐督署制兵因岳斌不在遂作亂及亂定省城糧價益貴斗至三四十金無糶者道殣相望飢

民割死人肉食之繼乃殺人而食攜持男女赴河者官至不能禁城中生靈存者不能什一二四月辛丑慶防統領張在山遣副將劉明泰戰賊於柔遠川賊敗退守備楊正興戰死五月壬戌涼州總兵楊占鼇攻解鎮番縣圍占鼇在涼州與紳耆籌餉募兵舉行保甲團練軍威大振同總兵王仁和一軍與賊大小數十戰屢挫賊鋒居民賴安全活者多復與提督鄧全忠等疏通驛路旬日之間回會楊文智馬生彥相繼遠竄肅清涼境運道通行是時成祿奉

命出關勦回適遇肅州城陷借助勦爲名以軍駐肅東鄉肅州總兵黃楚淦以十營駐肅北鄉其北又有玉門游擊馬秀干總張大倫督勇駐老官堡城南則把總玉斌駐塔爾灣馬

王二軍兵少而精，賊不敢犯，歌之曰：南門老虎，北門狼，東門兵勇，賽絲羊。成祿聞而忌之，使副將孫啟後制之，使不得自專。賊因乘之，斌遂戰死。馬秀勢孤，亦戰死。大倫又爲楚淦所抑，未幾撤去。賊易黃成二軍，遂四出焚殺。東至甘高，西至安燉，北至金王毛目天倉，無日不遭蹂躪矣。八月丙午，狄河回夜襲鞏昌城，由老城東南隅越入。時副將喻正祥軍駐鞏昌，西關鶴齡軍駐北關，各進兵攻撲賊，不能由城出關。我軍亦不能由關入城，相持至曙，賊抵死衝出老城巷戰。至日晷，官軍多死，敗退出。於是游擊江成萬亦戰敗，跳城出，獨隴西知縣孟鐘瀛、典史雷牲、春率民團禦西北兩門，力不支，復糾集城內居民，退守鼓樓，戰五晝夜，力竭自經死。牲、春被重創，府



學訓導武瀛殉難時楊岳斌方督軍擊華亭賊聞變亟遣總兵傅先宗率七營馳救辛亥抵距城二十里楊坡寨偵知賊兵甚眾老城西北兩關及西關外屯賊近萬人乃令江成萬爲鄉導壬子夜潛行至城下成萬先率趨捷二十餘人越入老城東門諜賊無備於是先宗率親兵中營列陣東門遣兩營伏西門內遏賊竄外絕賊援復遣三將分路登城昧爽喻正祥潛入開門先宗乘機入一聲號舉鎗礮齊發賊倉黃失措城內賊見圍已合死力衝拒關內賊力撲老城東北呼援我軍阻遏奮擊皆跳關牆走關外賊擁至西南門緣牆撲上屢擊屢顛賊不知所爲遂西向奔兩營伏兵出衝殺數百先宗遂督將士圍勦城內賊自寅至午搜殺盡淨是役殺斃逆

首二十餘賊黨三千餘獲騾馬二千八百餘救活難民四千餘九月雷正綰軍攻敗華亭策底鎮及平涼三十里舖各賊斃賊六七百副將錢葆恩戰死楊岳斌由水洛城回省傳令搜殺制兵爲楚勇復讐割取都司席光斗千總汪琦之心以祭楚勇先是制兵之爲亂者知制軍歸必窮治乃皆棄伍逃其留者皆懦良至是一律抵死甘兵多躡單梁履凡躡單梁履者亦皆殺之曹克忠屢諫不聽遂負氣請假回籍於是始息怒停殺十月癸巳雷正綰張在山周顯承沈大興軍攻克璜河川老巢遂竄入平涼城乙巳顯承仍會正綰軍攻克之十一月總兵陳德隆遞解伏羌甯遠鞏昌三城圍庚午洮州都司丁永安結通狄河回及城內回民據城作亂副將周潮

旺率兵接戰不利退走岷州丁永安復遣人誘殺舊姚城都司雷興隆脅副將馮光明教授劉升嶽皆不屈被殺遂盡殺城內漢民數十家洮州新舊兩城太平寨千家寨汪家嘴喇嘛川皆爲回踞於時陝回馬生彥楊文智等乞撫

朝命許之十二月戊戌賊攻陷皋蘭之江水堡縣丞沈紹裕率團勇攻之戰死團勇旋克復堡城丁未甘州賊逼南古營堡守備梁飛雄戰死南古城陷黎獻軍克復之

卷三  
甘肅三

平同志卷三終

平回志卷四

太湖王志沂

東湖楊毓秀子堅纂編

受業長陽張榮澤全校

姪楊存澤

蓬溪蓬萊山館刊

志甘肅二第四

六年二月雷正綰率張在山各營攻長官賊敗之庚子貴德廳回與西甯回馬歸源河州回沙萬全合謀攻陷廳城殺同知承順及其老母眷屬武庫軍械擄掠一空四月楊岳斌以親老乞養

詔甯夏將軍穆圖善接署督篆乙酉賊襲陷安定城知縣多

齡守備秦兆祥把總孫光英均戰死城上教諭藍毓秀縊於  
文廟糧臺委員陶堦不屈死外委曹環禦賊頭創暈倒復甦  
猶拾械手刃數賊河州總兵李助發率圍隊入城擊殺賊數  
百立時收復縣城多齡秦兆祥眷屬均投井死辛卯賊襲陷  
華亭城知縣張衍福典吏哈慶雲經制孟宗孔巷戰死壬辰  
焚掠城內遂東竄賊酋馬士元以萬眾犯延安總兵胡世英  
軍遇之東川攻走之五品花翎馬起明隻身匹馬衝陣殺賊  
多五月乙丑賊陷環縣壬申雷聲遠督兵勇知縣翟棟梁督  
民團攻克之六月提督梅開泰鄧忠全合軍攻克米拉溝賊  
巢平其二十餘壘斃賊三千餘獲騾馬二千餘米拉爲西路  
河運要衝回族滋繁百餘年來盜賊公行爲遁逃藪西甯涼

州多受其害。己亥，叅將范銘會洮州同知王廷梓、土司楊元收復洮州廳城。其附近之千家太平二寨及洮州舊城踞賊皆投誠。七月，西甯河狄各回目皆赴省投誠。穆圖善遣官前往經理。眾回皆願奉條約而河州東鄉回素強悍不肯呈繳軍械馬匹。八月乙未，遂率大隊賊騎自東岡鎮來犯蘭州道。蔣凝學率隊往勦，賊敗入山。丙申，賊復以大隊分三路：一出省城正東東岡山，一出東南焦家灣，一出西南阿干鎮。穆圖善飛調各營分路來援。叅將常泰游擊呂松堯、千總常正甘、外委徐茂春、武舉蔣潤、提督周保和首先陷陣，墮賊圍格鬥死。丁酉戊戌，賊來愈多，踞東西南三面山岡，惟北面逼河無賊。總兵彭文林麾軍沿山而上，賊望見官軍來，飛奔下山。文林

督勇鎗斃百餘人。因思西南四墩爲西關要害，急率勇爭據頭二墩，猝中賊鎗，復裹創追殺，急呼士卒先登，賊回馬轉戰。文林被亂矛刺死，胡先勝等合力抵禦，賊始回奔上山。是日游擊戴得勝、都司何正筍守備王義春、千總羅枝桂先後戰死。己丑庚寅，賊負雲梯分隊晝夜攻城，別以馬步牽制官軍。河州三營本狄河難民招撫成軍，恨賊深，誓死戰，其營官胡先勝等督勇在南關教場三日內屢戰，皆勝斃賊千餘。戰迫墜河死者無算，其撲城賊各營迭相防禦，於是大兵環集，兵力漸厚。賊夜從南山遁。九月丁卯，肅州賊撲官軍營，提督黃祖淦與賊戰北崖中，礮死。成祿遂統其軍，賊益輕之。成祿性驕橫，駐肅數載，聲伎不離於側，且兵無紀律，勇於殃民而怯。



於任戰遣弁勒捐民糧復昂價賣之戊寅總兵陳德隆軍抵秦安之鐵櫃河州賊來犯營德隆迎戰自己至西德隆左額中鎗子直穿左目出瞳子墮落七竅血出猶力戰將士奮進斃賊二百餘賊由羅鎮逃十月辛巳鐵櫃賊復以馬步萬餘分踞黑石頭馬家店副將敖天印提督王得勝迎勦賊眾遠颺秦安糧道遂通壬午涇防提督張在山會雷營趙金彪軍攻敗蒲河川賊癸未賊陷正甯縣城知縣黃紹薪會雷營軍收復之癸卯穆圖善率各營進勦河州東鄉回軍駐中鋪丙午賊大隊渡河集洮河沿提督梅開泰率隊抵石家莊方列隊賊大至開泰令各隊不輕動賊衝突力竭遂一鼓直進賊猝不及防麀戰數時遂漫山四散追擊十餘里斃賊千數百

墮河死者無算，獲騾馬千餘，解散隨教漢民數千，洮州迤東肅清，遂收隊駐中鋪，河西東鄉三十六會之回，惟陳馬莊尤悍，將擬造浮橋，安建營壘，爲規取計。於是賊竄正甯之山河鎮，知縣黃紹薪糾民團往擊賊，遂乘黑夜迂道襲陷縣城，紹薪與典史彭覺禦賊被創死，其母妻子女皆殉難。訓導李蓬峯團首歲貢于騰輝率眾戰死，外委師應麟與賊戰，賊矛撥跌城下，受重傷，初降回孫義章謀殺赫明堂，明堂之黨爲之復仇，謀殺義章，彼此積怨仇殺，己酉晦義章黨復殺明堂，徒眾十數人，聲言欲比戶搜殺，固原城民大驚恐，黑城子回民李正雲等排解之，居民乃安。十一月穆圖善率各營於洮河沿造橋，河西岸賊晝夜嚴防，鎗子如雨，橋不克成，戊午陳馬

二賊酋由狄道古城堡竄踞洮河十里安家嘴梅開泰善山保等擊敗之賊退駐古城庚申夜賊壘驚亂大呼官軍至自殘殺其黨五百人陳馬二莊賊來援擬造浮橋偷渡合南路賊抗官軍且分隊襲官軍後路穆圖善聞之以爲軍前阻河後慮賊抄乃以梅開泰劉精益二軍及善山保馬隊駐中鋪南字明字等三營駐關山彭楚漢五營駐阿干鎮復調駐安定提督彭國忠分六營移駐羊寨馬坡而自回省城賊遂以數千人竄禮縣攻破竹林坡馬家河劉家山諸堡寨傅先宗設伏誘竹林坡賊出千餘人圍殺盡淨馬家河劉家山二堡賊遂由固城回竄戊辰雷正綰張在山兩軍將赴慶陽至靈州攻拔大莊賊卡都司左金玉劉應彪外委楊桂林死之辛

未正綰軍攻克襄樂賊巢壬申哈密幫辦大臣景廉將出關  
勦賊師過甘州解其城圍甲戌正綰攻敗方城土匪其附近  
三十餘堡皆懾兵威乞撫有眾二萬餘正綰悉散遣之糧道  
爲通遂進軍盤客鎮與慶陽軍聯絡乙亥收撫自方邨至盤  
客三十餘里賊堡受降二萬餘人丙子正綰軍攻鄧家堡賊  
卡古城川賊來援正綰遂以各營環堡外自率兵擊援賊遣  
小隊伏道旁嶮峴俟賊上原卽掘斷其歸路正綰至原邊賊  
躍馬飛奔上坡遂乘其未定合兵擊之賊敗回走嶮峴已斷  
棄馬超距越溝跌死無算回軍攻堡十二月庚辰朔克之壬  
午進攻古城川賊敗之追北十餘里斬獲無算賊悉由北原  
遁是日知府雷聲遠軍勦賊至柳溝踞古城四十里遂與正

綰合軍甲申攻克雙柳邨諸賊巢慶陽圍遂解提督王德勝  
傅先宗二軍以穆圖善召勦河狄賊辛卯師過渭源攻復其  
城德勝先宗親率各營擊敗城外賊部將李奉清高月桂周  
潮旺率隊自南北兩門入殺賊盡淨丙申王德勝等攻破楊  
家大莊賊卡甲辰賊撲渭源官軍壘德勝等擊敗之追殺三  
十餘里丁未傅先宗追賊至渭源之火兒寨平其壘副將滿  
萬亭臨陣退縮斬以徇軍

七年正月戊午賊竄距陝西甯條梁七里廟兒畔肅州總兵  
程興烈使部將守營自率隊會防安邊副都統敦奇祥阿往  
勦方酣戰斃賊五六百忽大隊賊萬餘分二隊一繞道至梁  
鎮一迎攻我軍遂墮賊圍敦奇祥阿張紹武督士卒以刀矛

衝擊斃賊約千餘，賊不少卻。敦奇、祥阿、張紹武皆中礮死。軍士傷亡過半。程興烈數被矛創，抵死力敵。至日暮，望見梁鎮東火起，人聲鼎沸，知營壘被陷。而西街營亦火光繼起。興烈恐賊北趨，撲安邊城，遂率其殘卒百餘衝出重圍，收潰卒得三百餘人，疾保安邊。而梁鎮於是日失守，興烈營陷。其營官總兵王培森、吳萬餘、游擊蕭明發、總兵吳朝駐、鐘炳榮均戰死。時傅先宗奪得一桿旗，隘築壘，而軍以塞狄道門戶。梅開泰等以官軍攻克渭源，宜乘聲威直搗陳馬二莊。戊午，四鼓造飯，梅開泰善山保親領馬隊先行，平明至巴下寺，賊馬步五千餘直渡冰橋來抗我軍，遂亟催後隊分路前進。賊亦分隊迎敵。河鎮四營詐敗誘賊，開字營鏖戰多時，無勝負。開泰

乃自督戰進攻善山保亦率馬步策應陣斬多賊賊勢靡仍渡河西竄開泰等領三隊渡河疾追逼賊巢賊知不能守乃留精悍與官軍戰而大隊紛逃上山我軍合力奮殺盡毀其巢綜計斃賊千五六百獲騾馬二千餘正收隊渡河賊復潛由山坡來襲善山保擊走之而古城安家嘴復有賊隊突出抄我後軍各軍整隊擊退至未刻回營時渭源敗賊恃官堡爲狄道咽喉皆聚集之穆圖善檄各軍亟取官堡以趣狄道副將范銘自洮岷應調沿途勦賊行抵距官堡二十里之鐵門關馬賊二千餘迎戰我軍擊退至新集賊步隊復大至又擊敗之於是軍糧告匱銘乃會王得勝傅先宗等約以壬戌合攻官堡以爲枵腹久待孰與忍饑一戰爲因糧於寇之謀

遂先期傳令以所部十二營各出七成攻賊遣部將何建威  
領六營直趣堡前番兵楊玉成等馬隊二百餘由高家嘴前  
進作疑兵誘敵范鎔等分領六營由松樹灣橫抄堡後復遣  
楊兆元等分路督隊銘自督親兵馬隊由木耳山松樹灣兩  
路之中娘娘山相機督勦賊見木耳山高家嘴馬步齊至乃  
皆出巢應敵銘知賊巢空卽麾范鎔六營由後路抄出其出  
巢迎敵之賊望見官軍由松樹灣直撲其巢皆驚惶失措何  
建威等乘其意亂而擊之賊無路可歸遂向狄道城逃銘亟  
自率馬隊及兩路兵勇迎前包抄追至尖山峽口殺賊千餘  
堡內餘賊二千餘悉搜殺之獲牲畜器械無算官保平銘遂  
駐軍其處癸酉甘肅軍務翼長金順軍攻賊於定邊之梗兒



莊追殺三十餘里，斃賊千餘，獲牲畜五百餘，奪賊酋馬拉，拉  
僞纛，戰死者叅領顏廷選、訥青保、協領佛爾青額、驍騎德福。  
二月，傅先宗等軍抵狄道，築營於半邊山，及二十里鋪等處。  
賊累日圍攻新壘，我軍數捷，殺獲多，乙未，駐甯安堡，提督黃  
金山軍應調來省，會攻狄道。穆圖善遣營務處蘭州知府舒  
之翰往督隊。庚子，梅開泰、善山保常順各軍皆至，會狄道東  
二十里鋪，值大雪，山路崎嶇，士卒失足落崖死者百餘人，跌  
死馬騾尤多。辛丑，各軍輜重齊至，狄道南北兩山賊皆設戍  
守，其中平川巢穴如林，於是我軍僅足浹旬之食。舒之翰與  
諸軍計曰：若再緩師，兵飢且潰，宜亟剋期大舉。冀因賊糧，遂  
部署各軍分三路當南北兩山及平川進。壬寅，軍甫出平川。

賊先出迎敵，黃金山督隊接戰。移時，賊敗奔平。其數巢，南北兩山賊見平川敗，疾下山援應。傅先宗、梅開泰軍截擊敗走。遂追北至十里鋪。日暮前，阻長濠，乃收隊。三路共斃賊千餘。獲騾馬三百餘，旋聞賊求援於河州，欲與我軍決死戰。乃乘援賊未至，翼日昧爽，復進攻。遙望南山戍壘十餘所，山腰拱拜地甚闊，踞悍賊千餘，拱拜者，回眾誦經處也。北山戍壘亦十餘所，山下大巢十餘，內有大堡曰北莊，爲教首牟弗諦所居。聚黨尤眾，拱拜北莊，南北相望，皆高寨深濠，兩堡中鎗子亂下如雨，聲震山谷。傅先宗由南山冒險先登，李奉清、高月桂繼之。平其戍壘數所。北山賊時亦與梅開泰、彭國忠二軍接戰。戰方酣，而川內復出悍黨萬餘，與黃金山遇之。翰教金

山佯敗賊進逼數十武我軍舉號善山保常順兩軍迭進斃賊多賊始回竄我軍縱馬直追及狄道城外之洮河沿截諸浮橋先後殺賊不下三千餘人其時傅先宗等將兩山戍堡悉攻毀之獨拱拜北莊不下之翰麾軍曰狄城苟克此兩堡固易與也乃先分隊守浮橋以防河狄兩賊交通遂會各軍萃城下時城內賊僅數千皆登城禦敵鎗礮木石亂擊於是叅將關得勝劉錫海副將陳長安都司劉才棟游擊周得順賈勇登城皆中鎗死黃金山憤怒呼隊冒火石攀城而上之翰等緣梯繼登賊眾紛墜城下或啟門而逸遂克復狄道城城內賊剗除殆盡卽遣彭國忠七營入城駐守善山保堵扼浮橋黃金山會各軍勦拱拜賊死守不下金山等衝鋒入立

將踞賊搜殺無遺我軍是日傷亡八九百人而河州援賊數千已潛入北莊其牟弗諱震於軍威願悔罪投誠之翰未之許也仍擬進攻洮河浮橋最爲要害復遣高月桂駐軍修成堡預爲攻取河州東南鄉計范銘一軍之翰先遣堵後路嵐關坪甲辰攻破店子賊巢獲賊糧與各營分食之於時賊多竄秦州鞏泰階道豫師於牡丹園鹽關等處攻敗之三月大軍進攻河州東南鄉其地處洮河迤西兩山峙列中間川口俱爲賊巢舒之翰以爲地勢面山背水軍難立足必先築營壘乃議進戰壬子築壘未成川口賊隊大至之翰遂背水列陣將校皆出死力與賊戰斃賊二百餘追至山梁賊五百餘欲逃無路復盡殲之提督喻正祥衝入賊陣追禽逆首髮

際中鎗子猶督隊力戰至二鼓時收隊而營壘已成是役共  
殺賊千餘於是軍威大振穆圖善親赴前敵北莊牟弗諦盡  
繳其馬匹軍械前河北援賊入其莊者皆誘之出官軍殲其  
半焉遂率男婦老幼三千餘人痛哭投誠穆圖善皆收撫之  
而西北鄉歸化回目馬占鼇等叩營門代爲東南鄉回乞撫  
具言渠魁張菲馬哥得等先後皆死於官軍其餘頭目皆非  
甘心爲逆今願洗心向善不敢自陳泣懇代白穆圖善以山  
路崎險徑途不測且軍糧乏缺成功難期欲暫事羈縻焉於  
是與馬占鼇剋期令繳馬匹軍械繡納錢糧遂分遣諸軍駐  
各要隘而白歸省城丁巳鎮原失守旋收復辛酉慶陽失守  
癸亥防慶陽知府雷聲遠安化知縣郭雄藩率兵團攻復之

典史李遇春督圍守禦戰死城上千總陳鳳鳴幕友查炳炎均被創死丙寅甯州失守庚午賊酋馬政和崔三白彥虎擗早勝關復分隊圍攻甯州二里半民堡雷正綰沈大興馳救賊已由後溝越入堡牆正綰等方分隊圍攻營官游擊趙金標駛至前門中鎗子死大興憤將後溝悍賊擊敗賊尸滿溝遂跳入堡牆正綰兵亦至合擊堡內賊無遺救出難民三百餘方收隊正綰大興殿後馬正和忽回哨追至正綰回馬扣鎗而賊鎗適中大興左臂鎗子穿右脅出立死而賊大隊復由後包抄正綰亟麾兵回礮擊賊走遂累日攻剿至戊寅晦始解早勝圍時政平糧局被圍正綰亦攻解之士匪剛八卽張貴本靜甯州漢民因被賊害家室淪亡遂逼脅難民入夥

劫掠邨堡。攻寨殺人。復與黨惡安楨桐楊文運聯絡。有眾萬餘。穆圖善遣舒之翰至秦州往撫。而卽令善山保陳德隆敖天印以兵隨其後。六月。之翰至秦州。與鞏泰階道豫師甘涼道張瑞珍會。衛張榜曉諭。解散黨與。半月之內。脅從者逃歸萬餘人。張貴等勢孤。急欲投誠。以大兵臨境。心懷疑懼。之翰復以印諭招令來營聽撫。張貴安楨桐乃率所部先後到秦。安之翰復由秦州就往納降。其從匪中途多逃散。點驗名冊。祇五千餘人。精悍者不過什二三。軍械馬匹皆疲敝。之翰乃會善山保等宣示。

恩威諭以順逆之理。眾皆感激涕零。遂簡楨桐所領編成二營。仍令其管帶。歸善山保統領。餘三千餘人。張貴所統。貴始

稱病不敢出。繼見楨桐受撫無事，乃投營謁見，察其人鄉野農夫耳，無他長。獨倚爲心腹者，武舉樊國昌，性素凶惡。貴始爲團總，後藉團脅勒，皆國昌主謀。楊文運亦不過隨聲附和而已。之翰乃勒令將樊國昌獻出正法，宣示眾人，諭以殲厥渠魁，脅從罔治之意。眾心始皆帖服。之翰皆分別遣留，以張貴部眾多，靜甯人曾辦團有功，卽令張貴領其眾分駐水洛城威戎堡，以保靜甯於無事時補種秋糧，藉資餬口。同心城匪首楊生魁結黨擅殺，奪踞漢民寨堡。六月庚申，回目馬忠海、馬朝青等糾眾進勦，斃匪首及夥眾百餘人，餘黨散潰。七月壬辰，赦天印夜解清水圍，河州回自投誠後，軍械租糧仍抗拒不納。九月甲申，穆圖善親督各軍往勦渡河，師次高家



集喻正祥梅開泰兩軍拔營至巴羊溝巴羊溝在三甲集之南中亘兩山山有深溝山頭賊卡林立勢難進取復遣王得勝一軍駐龍王嘴山上與喻梅兩軍爲犄角以便攻取三甲集老巢於是善山保黃金山奮勇進攻穆圖善遣范銘軍繼之山路陡狹祇容一騎我軍魚貫而上至山腰山上矢石亂下士卒不能立足善山保等併力仰攻賊爲之卻前途多險遂收隊次日穆圖善遣王得勝分四營進駐清水溝與龍王嘴軍相應援卽遣黃金山范銘由南山平衍處進兵而令舒之翰督視高家集各營將爲夾擊之舉辛卯之翰遣喻正祥等軍攻破清水溝五壘及黨川鋪賊巢盡戮其壘中賊壬辰善山保等由南山攻克段家坪劉家坪二峽溝諸老巢遂駐

軍南山以圖規取新路坡要隘自劉家坪至新路坡路尤峻險舍馮馬家店一路無可攀援而上者十月辛酉范銘等軍遂自段坪山進攻穆圖善亦遣王得勝等軍自黨川堡進部署定而賊已出新路坡范銘前隊迎敵善山保等軍助戰賊少挫而黨川堡軍適至夾擊之賊敗退保小山諸集我軍三面環集穆圖善親率圍隊及喻正祥一軍從中橫擊斃賊千餘小山十壘悉平壬戌五鼓遂領諸軍攻克新路坡斬馘千餘救出難民數萬癸亥王得勝軍攻克祁家集堡遂卽堡駐軍十一月諸軍會攻太子寺汎城喻正祥先進墮賊圍身被數創部卒多損穆圖善率各軍追至救正祥出賊圍各軍遂四面環攻賊遁入汎城我軍駕梯直上齊入汎城賊之死於

兵與火者無算。遂將太子寺。汎城克復。於是河州南鄉就清。東鄉則十得其四。穆圖善以三甲集爲東鄉咽喉。距太子寺尙數十里。隘口極多。控制爲難。乃分遣諸軍駐山爲營。先杜賊竄路。以圖進取。是時陝回馬正和崔三以三萬人分隊攻秦安清水秦州諸城。敖天印會張瑞珍田興恕軍。攻解城圍賊竄關山隴州。成祿楊占鰲兩軍圍肅州城急。靈州回紳馬朝清爲肅州回乞撫。壬午占鰲領三騎入肅州城。羣回見之皆驚服。伏地占鰲乃詳爲開導。明示禍福。回眾皆踴躍歡呼。占鰲留宿城內六日。揆察眾情。皆實心向化。乃出與成祿商定章程。處置一切。次日眾回目欵營門。齋前所失鎮州印信。請地方官入城視事。占鰲更簡回民中老成數人爲頭目。頒

給翎頂令同地方官約束其眾數曰之內城內漢回底定商旅出入民大和洽占鼇乃撤城外各軍以一軍駐北巖頭而自率各營回甘州或傳占鼇領十二營馳勦肅州回與賊戰賊每佯退示弱占鼇遂以賊不足平直趣城下三面圍攻賊略無懼意四出殺掠如故旣而賊復詭作窮蹙狀出四五老叟頂香羅拜於南門哀辭求撫占鼇遂欲入城左右止之占鼇曰賊實懼而投我我何畏哉乃跨馬獨往甫至弔橋伏兵突起縛占鼇裸其體挾之入城馬四乃盛設供帳親釋其縛予衣裳慰勞謝罪占鼇初頗不懌後見禮貌優隆意乃解因與結兄弟歡講和罷兵乃邀成祿同定和議而推成祿爲功首住城內月餘多受餽遺自慮不得脫乃市恩信以結賊心

遣散各路防營復勸戶民月捐錢糧以輸回眾遂請於馬四以回勇三百充甘標親兵多方承順馬四始許放還十二月戊午出肅城南抵甘州回勇遂將東關攻陷占鼈反謂覺自甘民起殺甘民數人以安慰回勇甘民皆怨痛入骨成祿有部將馬天祥驍勇敢戰賊甚畏忌陰使占鼈縱反間於成祿而殺之於是成祿勇潰乃因占鼈同與賊講和歲時通使無間遂自謂辦撫有功日刮民財演劇軍中以為樂又忌黎獻分其功齟齬之使潛遁而以其親信寶型為安肅道型亦兄事馬四賊知官兵無能為乃復叛肅城之陷生民無主與賊近者俱被脅惟金王所屬自始至終無一從者賊不敢入其境每出行劫皆繞道避之與賊為仇日尋干戈前後死於賊

者數千如威虜壩生員王哲等二十四人夾營武生梁進珍等二十七人梧桐壩武生李文炳三十七人皆與賊戰死馬四以諸官皆附已獨知州李元嘉不從數以甘言給元嘉請入城安民元嘉素抗直有膽氣卒恥從賊賊又從元嘉索糧餉皆不與元嘉以頭觸馬四曰吾肉任汝啖之糧餉不可得也馬四怒謀害之而不敢未幾以去官得免

八年土匪惠常魁踞鎮原安家山寨陝安道黃鼎軍駐涇州三月辛丑晦遣都司鄧虎臣率勇百人宣諭常魁開礮拒之外委田澤波戰死鼎領隊繼至遣弁陳占魁復往常魁仍拒如故占魁中鎗子洞左臂鼎周覽山寨三面皆峭壁下臨深濠寨踞山巔無路可上賊由濠中鑿竇出入有警則寨上木

石交下，兵不能攻，鼎乃令各營扛劈山礮對寨轟擊，無間。夜陰，選力士於寨旁掘地道三穴，七晝夜穴成，實火藥其中。四月丁未，地雷發轟塌山寨右角，壯士自缺口躍入，遇賊卽斫斃百餘人，常魁投井死，窖內收出匪黨惠勳魁數十人，斬之。安家山寨平。五月丁亥，河州回陷，兩當李輝武軍戰之於楊家店，胡國珍陣斬黃旗賊目馬海臣，追殺二十里，至韓家灣。是夜卽駐兩當城，河州逆回周瑞踞隴州之康坪堡。己亥，吳士邁攻之，賊憑險設卡，無別徑可通，百長羅如松冒死肉薄而上，卒破其堡，周瑞中鎗死。時左宗棠移軍自秦度隴，以爲用兵以固餉源爲先，甘肅轉輸恃秦州一路，而河州逆回專斷餉道，此度隴之師，所以先檄諸軍指秦州也。有此數捷。

可破驕賊之膽足樹度隴先聲初靜甯州回目李得倉鹽關營回目何士秀率靜甯南八營及鹽關營十六萬人投誠詔張瑞珍王得勝往撫瑞珍按冊稽點實得九萬六千二百餘人其中漢民脅從者三萬一千五百餘人遣散回籍其無歸者尙千餘令在肅河城以北至鹽茶采旺城一路墾種荒田回眾陸續因飢病死亡尙存三萬一千餘皆願回籍瑞珍以回眾舊住秦安清水所轄之張家川等處令其各認舊產生理遣李得倉嚴束所部不得擾及漢民鹽關營回亦安插於秦州靜甯等處兩年來漢回和好商賈通行張家川附近民堡及隴州知州湯敏皆稱李得倉約束有方去冬陝回竄南路得倉所部回眾與漢民守望相助共禦外侮六月穆圖



善以爲張瑞珍等能恩威並濟安插回眾數萬未煩一兵未糜一餉南路州縣獲保安全辦理有方奏請

給獎以示激勸是時左宗棠軍抵涇州接督篆奏曰竊甘肅回匪土匪皆由陝回構禍而起回入中國已久然其教則專習天方別爲氣類雖老教新教東彌西彌亦自有殘殺猜忌之時至與漢民爲難則攘臂紛起視如公仇聲息潛通速於郵傳陝西肇釁之初雲南回族卽與逆謀有稱普洱阿洪者在賊中爲戎首遇各省有調發本地回民先通消息俾陝回得預爲備卽甘肅已撫之回若馬化澂李得昌或以馬械糧糗顯與市易或勸其暫就安撫相時而動皆以回教隱相親附外雖貌爲恭順內實暗肆披猖至如西甯之馬朵三藉就

撫以挾持官吏而漢回兵民諸務陰歸其掌握名爲官撫回  
一則回制官與滇回之包藏禍心如出一轍也今欲概加勦  
絕微特誅不勝誅亦恐未變種人反側不安致妨大局若廣  
示包荒隨宜招納則賊心未死轉瞬變生甘肅所辦撫局前  
車之鑒也陝回敗竄甘肅散布黑城子預望回心各堡有遞  
呈求撫者有投附河州回巢者有由中街渡河東竄旋復敗  
回者互相猜疑不如前此之固結甘回恐官軍進勦波及於  
已有預陳實爲良回者有閉拒不納陝回者馬化澂代爲陝  
回求撫臣仍以前年分別勦撫之諭示之生死禍福聽其自  
擇蓋欲以申明

神武不殺之德與怙惡必誅之威以期久遠也劉松山一軍

向清澗指定邊花馬池。臣令其先辦三月軍糧。遞運以進。到花馬池後。小住察馬化澹撫局虛實。及陝回離合踪跡。再定進止。其餘各軍。分駐安化合水正甯。互相聯絡。臣駐軍涇州瓦雲驛。地當慶陽汧隴之中。足資控制。仍凜遵

諭旨。祇分良莠。不論漢回。爲制賊之本。盡瘁圖之。不敢玩寇以誤戎機。亦不敢求速而亡至計也。自回氛起。官軍不能制賊。民間堡寨。有被回攻破無家可歸。流而爲匪者。有因官軍誅求無厭。無所控訴。激而爲匪者。今已撫之董福祥。扈彰。張貴孫。百萬等。指不勝屈。官軍因急於招撫。遇有投誠者。輒以翎頂優之。若輩遂糾聚黨夥。妄立營名。自刻木印。私製旗幟。居然以統領營官自命。征糧民間。藉肆剽掠。無業之民。趨之

若驚似兵非兵似團非團似賊非賊泯泯勞勞徒爲民害現聞臣軍度隴或赴營投効或請助戰臣擬簡其桀黠者束以營制餘皆勸令歸農各安生業毋相侵暴否則誅之此擬治逆回治土匪之大略也甘肅兵爭之壞由於餉絀而營多不擇將而廣募勇將領勢力相傾無所秉承其勇有一營只二百三人而仍領五百人之糧者每營日派糧八百斤而以其半折取糧價兵勇日食不足將領薪水則務取贏故勇額日有逃亡而將領未聞乞退者亦有一營而數多至一二倍者如范銘十二營人數多至萬數千一人充勇一家隨之以食與客軍虛額相反而虛糜則一也故不能戰而亦不能守臣與穆圖善未嘗謀面以所聞見論之愛克厥威似所不免

將非惟不知感激方且狎之穆圖善非惟不加裁抑方且柔  
之隴事所以難於整理也臣接督篆尙未接准穆圖善咨復  
所有兵餉一切未便輕率置議七月喻正祥軍冒雨攻解禮  
縣城圍殺賊千餘隨攻解石橋川斬鹿灣民寨圍魏紹珍首  
先陷陣手斬八賊各營繼進斃賊三四百獲牛騾馬二千餘  
禮縣境肅清我軍拔營至鹽關八月庚子劉松山自花馬池  
擊賊至甜水河遂追至靈州回目周斌詣營稱陝回敗遁靈  
境分踞甘回各莊甘回畏其悍不敢校松山卽飛檄金積堡  
馬朝清令傳知各寨官軍祇勦陝回其甘回之就撫者各安  
居無恐又令周斌選十餘人隨隊行沿途傳諭於是陝回余  
彥龍馬正綱等皆敗歸郭家橋老巢壬寅松山率隊攻之賊

戰敗平其二十餘巢。追敗賊至下橋。下橋架秦渠上。水深橋窄。賊急不得過。返旆回拒。松山督各營薄之。衝賊隊爲十餘處。渠西溝港交錯。窒賊行。又追殺數里。追吳忠堡。始收隊駐下橋一路郵莊。是役共斃賊千數百。生擒百十三。奪騾馬千餘。餘賊竄金積堡。方官軍進郭家橋也。沿途寨堡皆放鎗炮。列隊呼殺官兵。松山令各營皆置不理。癸卯甲辰。各回寨復出。隊向官軍索戰。松山以朝清尙未遍傳。甘回驚疑致然耳。仍按兵不動。且榜諭免勦。已又如之。人更多。且逼近營壘。松山始令各營出擊。斃其多人。其時馬朝清以賤抵松山營。稱陝回撫已有緒。而陰遣金積堡各回。及陝回等。踞吳忠堡。又遣靈州各回。踞官軍之後。又於甯安堡四百戶一路引陝。

回馬正和崔三等來助，遂決秦渠之水以自固，而困官軍。朝清仍三上書總督行營，代陝回乞撫。初，土匪張貴之就撫也，仍居莊浪之威戎鎮、水洛城等堡，遂復與其黨候得應、攻破靜寧、莊浪、會寧、通渭、秦安等縣民堡數十處，聚眾至二十八營，仿官軍營制，旗幟器械具備，與鎮原匪首孫百萬勾結，慘毒甚於回賊。前黃鼎攻駙馬關賊路，過鎮原，禽孫百萬，鎮原知縣廖溥明亦獲其弟孫百智，俱解大營。左宗棠說明其罪，斬之。張貴聞之急，與其黨謀變。宗棠以爲此賊不特爲平涼秦州害，且靜莊會寧秦安皆通蘭州大道，寧靈回與河狄回往來所經，將欲南北分馳，掃清餘孽，而土匪中梗，餉道堪虞，乃調黃鼎簡敬臨吳士邁等軍往勦。張貴於底店鎮門扇

岔曹務川各隘築十餘壘以抗官軍丁未官軍盡攻破其壘而賊遂敗遁威戎堡己酉追至威戎堡而賊已至新集壩張貴候得應累日狂奔黨夥盡散官軍遂抵水洛城一路十餘賊堡皆平燬之先後斃賊二千餘禽匪目馬爲龍陳世印及各悍匪二百餘收撫匪黨千七百餘難民數千獲牛騾千餘自丙午至丁卯劉松山一軍與吳忠金積二堡賊大戰十餘合皆勝實殺賊萬數千悍酋馬正和中礮落馬是時馬化濬恃金積堡居秦漢二渠間足以阻水自固復調集各路回眾陝回馬生彥白彥龍郭阿洪自黑城子牛角城至河東河西各寨及靈州王洪周斌等亦應召來援陝回馬正和將甯安四百戶護守眷屬各壯丁皆來決戰而卒敗於官軍蓋松山



至靈州先據下橋後五里之永甯洞恃定池河渠之水以爲衛故能制賊而不爲賊困也然此次戰死者亦眾提督譚建高胡玉元總兵牛得超副將陳士標鍾定晉龍賜玲楊朝友萬名高易本集參將張澤友易光前李名成楊篤才遊擊劉疏元黃得祥賓義和都司徐育南章如山金崇德鍾貴德守備趙祥友王玉順常中華陳國恆涂碧勝吳名填蕭其中千總劉桂堂把總單洪桂熊玉貴滕家全鄧代全楊芝蓮丁卯雷正綰軍戰敗陝回白彥虎甘回李正榮於平川追至固原北三十里頭營禽殺賊二千餘獲騾馬千餘戊辰劉松山軍攻克吳忠堡北顧馬二寨踞賊兩寨相距僅數十丈四鼓時松山令分兩翼向兩寨左右進以一隊當兩寨之中自率各

營分左右兩支，稍取遠勢，備拒他堡。援賊及堡中逸賊，戒諸軍不進賊寨，不開鎗呼殺。行抵兩寨前，見賊方往來交雜，尙不知官軍至也。遂雷鼓發號，提督何作霖等從中路衝入。道員劉錦棠等乘寨門未閉，揮軍直入。賊人馬相蹂藉，各營鎗礮齊發，兩寨賊盡殪。其旁小顧家寨亦卽時平燬。夫方明已收隊，三寨共斃賊千二百餘，生禽百四十餘，獲騾馬八百餘。馬化澂之乞撫於總督行營也。左宗棠批令劉松山雷正綰就近察驗誠僞，而卽以咨松山牘。交化澂親齎。是日化澂遣人歛營賫批文，並請松山停兵待其勸導。陝回松山許之。令呈繳戰馬軍械。九月辛未，化澂覆牋云：已諭令陝回具冊結呈繳馬械，力請移軍吳忠堡界外。松山令將馬械悉繳再議。

之是日化澀復歎督營求撫左宗棠惡其譎批其牘曰當察誠僞以定勦撫貳則討之服則舍之務在攻心以規遠久耳乙亥化澀賤抵松山營繳抬鎗十支小鎗十五支瘦馬二十匹解米糧萬七千斤賤中於甘回就撫事一字不及也松山知其詐嚴令限兩日悉繳馬械丁丑復遣人來營稱陝回又繳抬鎗五十支馬五十匹隨解送大營其餘俟官軍退駐橫城續繳松山不許仍令刻日呈繳後遂無覆賤而賊馬四出游弋夜中修寨掘濠如恐不及戊寅簡敬臨等戰賊於固原楊老莊斃賊八百餘復會雷正綰軍解彭壽山營圍於何家溝殺紅衣賊首楊文治文治陝回素稱狡悍所持鐵矛重十七斤屢以乞撫誤官軍者也庚辰雷正綰周蘭亭攻克李旺

堡穆家潭賊巢禽僞副元帥楊輝雲斃賊千餘獲騾馬千餘  
自楊文治伏誅陝甘回益震懾而馬化澁爲劉松山勦敗益  
令各回求撫於是陝回心更不安禹得齊白彥虎等潛率黨  
由鹽茶西竄復約崔三馬生彥等西趨長流水打拉城出會  
甯安定南合河洲回辛巳劉松山親率隊赴金家湖察驗賊  
濠縱營丁四出刈草以試賊金積吳忠兩堡賊相繼出松山  
麾軍列陣急調老營出隊策應賊易官軍少結隊數十團冒  
死衝突步賊傍敬家莊兩堡列陣松山令撲之騎賊敗退兩  
堡旁開鎗死拒俄而老營隊伍馳至松山方指麾軍眾賊見  
之卽驚潰蕭章開劉錦棠追殺賊敗回堡松山截殺幾盡遂  
焚堡門克其兩堡堡中賊無一逃者賊之晝夜修寨掘濠也

將引秦渠水灌官軍。且爲守堡計。壬午五鼓，賊於吳忠南決秦渠，引水東流。吳忠東南平陸成川，賊仍併力築壩。松山遣各營攻之，令曰：如賊不至水漫溝，則勿深進也。軍近賊壘，賊憑壘拒之。官軍方奮力進攻，忽西北賊騎來援，衝過水漫溝。蕭章開劉錦棠不顧，仍攻壘如故。賊敗走，遂乘勢決水漫溝。壩頭水遂西注。章開等督各營擊之，賊潰奔溝西，水衝斷其後騎，復折而北。又爲馬隊截阻，迫溺急溜中，無免者。章開等見溝東一寨水浸堡腳，遂麾軍掘堡，劈寨門，破其寨，以歸。甲申，水勢漸消，賊仍掘壕。是夜松山傳令各營，多攜鉏鍤草束，三鼓出隊，向水漫溝。馬步五路銜枚進攻，未至溝半里，賊始覺。是時月明如晝，官軍五路齊撲，遂擲草掀土，平壕壘進。賊

不能支，西走劉王陳三寨。松山令馬隊勿前，麾步軍踰溝躡之。賊被追急，不及入寨，紛紛撲濠。官軍乘勢掩殺之，受刃墮水者頃刻，尸滿壕塹。將士躍尸過，而蕭章開劉錦棠兩軍已抄賊後，賊無可逃，皆越墻入堡。官軍卽奪門入三寨，同時攻破。寨賊皆斬盡。松山急督隊攻王家莊、梁家莊，又破之。天明收隊，是役實斃賊千五百。陣斬賊目馬大華、馬奮剛，哈得招生擒百一十人。是日黃鼎馬得順各軍追賊至鹽茶，見炊爨，尙然知賊去未遠，猛進四十里，至西安堡。一望平川，延袤三四十里，賊帳滿野。見官軍至，老弱婦女號哭紛竄，悍賊數千吹角齊出。馬德順令馬軍半下馬持矛衝殺，半縱馬發鎗立斃五六百人。賊敗奔黃家園及西山。德順及黃鼎、胡應芳追

之沿途斃賊千餘，復追至劉家井，路隘不容車，旁夾深溝，德順方策馬前行，兩旁伏賊出，山上拋石如雨，德順身被七創，猶與副將張顯揚共手刃數賊，力竭而殞。賊酋白彥龍死於亂軍，乙酉黃鼎率軍向打拉城三路攻勦，皆勝，守備賈洪順衝陣礮子穿胸死，副將黃虎臣功多，賊酋藍九阿洪戰死，藍九阿洪者陝回所最信崇者也。是役共殺賊二千七八百，獲橐駝千二百，騾馬二千餘，生擒賊二百餘。是時甯安甯州陝回已盡，西竄，預望城半箇，城韋州堡各回皆款營求撫。左宗棠遣道員曾傳理往理之，丙戌劉松山軍攻克王家高樓，張家灘，及朱於兩寨，斃賊千七百，生擒回目馬得貴等二百一十三人。五寨爲北路糧運所經，松山令馬軍分守，步隊回營。

松山軍壘次戰死者副將李洪吉、叅將李明發、李恆楚、遊擊李三元、都司易其友、鍾錦堂、陳志林、守備陳炳煒、袁洪輝、徐玉武、李華富、張桂馥、丁楚賢、千總劉友文、把總潘宗德、龍桂益、劉貴發、己丑黃鼎軍追陝回馬正和、陳林于、新堡子斃其黨六七百、救出被脅漢回千餘、陳林等復圖回竄金積堡、雷正綰由半箇城向長流水截之、追至四百戶、提督周蘭亭亦馳至合隊、沿途追勦、行至黃河邊上橋、諜報甘回、李應春率賊千餘自西橫竄而東、出官軍後、正綰蘭亭分途截勦、過北口與賊遇、兩軍夾擊、斃賊數百、又追至石家潭、是夜駐石家口、庚寅馬化澂復遣漢民齎米十萬斤來營、具言永無翻復、獨不繳馬械、松山以其仍襲故智、徒以甘言微利誘我、非賊



心求撫可知於是察驗金積堡東北各寨雄峙參錯深溝環繞是夜傳令各營携鋤鍤草束四鼓出隊銜枚夜行向楊家寨進取比抵寨前賊始驚覺寨上礮石雨下各營擲草平濠揮鋤掘堡併力合攻一鼓克之馬家兩寨亦相繼下復傳令進攻李丁金何四寨松山察李丁兩寨地勢低窪溝渠錯雜令各營運蘆葦築壩蓄水灌之俄而金積堡援賊蠶至松山自督軍築壩遣劉錦棠等分三路迎敵賊敗追至秦渠渠橋忽斷殿後之賊泗水溺斃者無算遂返旆攻李丁兩寨渠水已浸堡脚矣賊勢蹙開西門走金何兩寨賊亦倉皇棄巢竄官軍分路抄殺餘賊敗歸金積堡松山卽令分營填駐五寨而還是役斃賊約千五百甲午正綰等軍至馬家河陳林等

逆知追兵至先將輜重家小送金積堡自率悍賊二三千殿後正綰蘭亭結方陣擊之賊奔潰復追二十餘里望見賊輜重家小在前賊復回戈返門官軍奮力衝擊斃賊數百獲騾馬數百薄暮收隊馬家河自半角城迤北皆沙漠乏水草糧盡引還是時提督徐占彪楊世俊追賊至會甯至嶢口站灘復追至狄道州四十里之漫窪十八盤始收隊回累日斃賊千數百獲騾馬千餘占彪軍在會甯時官紳稱張貴候得應等逃至會甯嘯聚匪黨攻掠岳家等堡六寨請兵速勦占彪擊之斃賊百餘張貴率黨伏地乞撫占彪率所部押令回甯點驗分別遣散劉松山將勦靈州城踞回先五日諭馬化澂速令諸回出城就撫不然當往勦踰三日化澂始馳牘求寬

限松山知其詐也嚴責之於是靈州賊潛移家小輜重於金積堡留精壯守城復引陝回入城以自助丁酉五鼓松山傳令各營裹糧夜起分五路布壘陣向靈州進架橋過清水溝行數里望見城南卡壘旗幟林立壘外野潦縱橫淺者猶及馬腹劉錦棠蕭章開分左右泗水進松山督各營直搗中堅抵城南五里團圓寺卡各營鎗礮仰轟拔渠架橋踰濠而上克其外卡敗賊遁南門外石壘官軍躡之忽城東塵氛起馬步千餘向西南馳突松山麾軍分兩路擊之賊敗奔東南官軍追殺十五里於時劉錦棠蕭章開軍抵附城卡壘旁城賊開南門拒敵松山亟遣黃萬友等軍攻城南石壘而自督陶定昇等從中路猛進鎗礮迸發賊靡退入卡門劉錦棠蕭

章開乘勢奪卡入賊退入城各營躡賊踪爭入賊開東北兩門狂竄官軍追殺五里收隊其石壘踞賊三百餘黃萬友等擒斬無遺是役斃賊千四百生擒二百七十三拔出漢民七百餘獲騾馬千餘靈州敗賊悉踞城東南十里海子墩買家莊馬清兒羅家橋四寨是夜松山皆分兵攻克之復斃賊六百餘松山令黃萬友李樹棠兩軍駐城內將拔出漢民安插州城復招徠舊居城內者認產復業而自率各軍回下橋老營松山軍戰死之弁總兵楊玉賢參將趙盛國陶昭福遊擊杜雲龍都司張貞吉守備謝福有李應有千總許育萬劉占魁唐國政何義勝把總鄧寶德張先發周陞祥周心則方松山之夜入靈州也馬化澁馳牘稱靈回方出城就撫忽有

南來陝回乘間入城焚掠請示遵辦並請遣辦撫局之總兵胡昌會於甯郡五屬擇地安插以掩其勾結之謀不知松山破馬家寨時已搜得化澧給其偽叅領馬三重札函函上偽銜書統理甯郡兩河等處地方軍機事務大總戎馬鈴以偽印其狂悖陰狡之端先已敗露矣先是有奏言松山軍在靈州肆殺不分良莠致降回陷城等語

詔書詰問左宗棠奏辨之言松山爲人忠勇明方畧當時諸將罕有比倫卽如此數次大捷正奇迭用他人得其一節已爲奇功而其所陳戰狀語語切實絕少矜張亦可概見臣與曾國藩議論時有不合至於拔劉松山於凡眾中信任最專其謀國之忠知人之明非臣所及又言辦他賊必先勦後撫

辦回賊必以撫爲先、蓋回之所籍爲亂端者、漢與回有異視也、非布宣

朝廷德意、分良莠、不分漢莠、則賊有詞、以脅其黨眾、將勦不勝、勦然一主於撫賊、且以乞撫愚我、陰集其黨、蠶食漢民、又將撫不可撫、臣前疏所言、攻心爲上者、以爲大局、雖終歸於撫、然非俟其畏勦之極、則未可漫然允之、是時湯聘珍及傅先宗、攻敗河州、回於西和禮縣境、斃賊千餘、李耀南復攻之於通渭、李家灣、斃賊五百餘、陣斬逆目馬恆福、戰死者都司唐治能、正振清、守備楊宗英、千總李集成、把總高齡、陝回之敗、奔狄道及清水、駙大營、川甘草店者、楊世俊、徐占彪、李耀南各軍屢攻敗之、先後斃賊三千餘、十月庚子、劉松山攻破

附近下橋營之里仁渠八寨兩莊馬化澗復因胡昌會求撫  
松山仍令悉繳馬械陝回所集自秦渠南板橋西蔡家橋達  
金積堡數十村莊人眾心雜投誠之議累日不決松山以回  
性凶狡仍宜痛勦以懾服之甲辰四鼓傳令分三路布陣左  
路進板橋右路進蔡家橋自督中軍出左右兩軍之間馬隊  
張兩翼伏左右路旁按兵不動俟步兵破賊則飛馬分道抄  
之部署定進抵渠南半里許賊巢角聲四起紛紛憑渠開礮  
官軍撲近渠邊鎗礮交轟賊抵死不退松山急令劉錦棠蕭  
章開越橋卡分左右路泗水抄擊中軍步隊亦越渠撲之賊  
潰向東西兩路狂奔馬隊馳至截其歸路守巢之賊見官軍  
四集棄巢西遁官軍乘勢奪門入同時平其大小三十餘莊

賊眾圍殺殆盡其逸出餘黨各營四面兜勦合併西趨前阻  
波浪渠官軍發鎗礮擊之人馬應聲倒渠水盡赤遂躡至金  
積堡外馬隊直追過堡西敗賊向强家沙窩遁各軍遂分駐  
堡東北何家莊板橋一路松山駐距金積十四里之劉家寨  
是役斃賊約二千餘生擒二百八十四是夜化澂復請胡昌  
會乞撫次日又繳馬匹鎗矛百數十具其餘願陸續呈繳松  
山勒限三日按兵待之乙巳松山擊敗陳林馬正和等賊丙  
午雷正綰周蘭亭兩軍由四百戶抵鳴沙洲聞張恩堡東西  
四堡爲馬化澂先鋒袁希孟所踞兩軍往攻克其東西二堡  
希孟率其眾求撫正綰受之自正綰提軍進金積堡秦渠左  
宗棠遣提督周紹濂率所部五營分布固原以北黑城子李



旺堡半角城其四營將則副將桂錫楨提督丁賢發道員魏光燾提督劉端冕也庚戌雷正綰周蘭亭簡敬臨張福齊各率所部逼渠築壘皆距金積十里內外胡昌會馬化澂云陝回因官軍衝散馬械驟難收集乞寬期悉繳後陸續繳馬七百八十四鎗械千七十具松山以賊人眾心雜必欲盡撫輾轉時日變故更生令願撫者移居吳忠各空堡具籍繳馬械以便安插庚申周紹濂所部張大雄桂錫楨攻敗半角城西陶家壯土匪甲子左宗棠奏調前署福建布政使周開錫總統秦州諸軍十一月戊辰宗棠自涇州移營駐平涼陝回馬正和先移其男婦二百餘人吳忠堡其繼遷者陳林之黨東彌回眾阻之正和黨羽亦多違前議互相阻撓其渠首不能

禁也。庚午，松山飛書雷正綰等，軍會勦。於是金運昌所部自花馬池馳至，同出隊行，抵板橋，眾回，皆吹角列隊。松山屬金運昌，向金積堡西門進，自分所部爲三隊。蕭章開等由右向堡北，劉錦棠等由左向堡東，陶定昇等出中路。松山自率譚拔萃等爲壘陣，相機策應。馬隊張左右翼，斜出三路之旁。賊見官軍布陣，更寬騎者，飛奔迎戰。步隊不動，官軍馬步衝擊，鎗礮甫息，聲刀矛隊排牆繼進，立斃悍賊數百。賊遂大潰，官軍縱橫盪決。金積堡北二十餘賊寨，同時悉平。遂於堡北四里立營，運昌軍亦達於金積堡濠邊，平其十餘巢。收隊與松山聯絡爲營。是役共斃賊千一二百，生擒百三十。夜中有漢民自賊中逃出者，稱各同自議將眷屬輜重併歸金積東西。

各寨明日當決死戰。辛未，賊果馬步傾巢出，步賊行半里，卽止不前。騎賊則東西馳騁，勢驕甚。松山令分五路進，先遣馬隊四營嘗之，遇賊撲近，且戰且收。俟步賊漸前，則奮起猛擊。於是馬隊果引賊近，前中軍號鼓發，五路馬步齊進，賊敗乘勢衝散，賊奔入巢，憑寨死拒。各軍掩殺其殿後賊，填尸滿濠。是役斃賊八九百。提督李雲貴、譚上聯俱中鎗傷，而賊酋余彥祿亦中傷。於是累日朔風大起，塵沙彌天，不能出隊。松山以賊圖死守，當再移營以逼之。乙亥，分兵護築營壘。暹昌出隊助之，賊亦就浪波渠堰築長牆以拒官軍。丙子，松山率各軍向長牆進，賊騎皆下馬，與步賊憑牆列隊，官軍奮攻不退。松山飛遣董福祥、余虎恩等繞出卡後，賊始亂，各路馬步乘

勢齊撲，墮其長牆，敗賊竄金積旁禮拜寺，官軍躡追其後，大風捲塵起，賊復旁寺列隊，回拒而金積北復出賊隊，循牆而東，松山令朱德開，李就山擊敗之，賊仍從容振隊，官軍戰益奮，賊卻而前者七八合，始敗棄巢奔，遂攻破其禮拜寺，時風勢更厲，遂收隊，是役陣斬悍賊七八百，礮斃者千餘，提督易致中，左眼角中鎗子，從口出，軍功董福祥，右肘中鎗子，是日金運昌由西路進勦，賊分隊迎戰，馬賊逸西而北，圍繞官軍後，運昌遣王鳳鳴領馬隊禦之，自督大隊合松山右路兵，擊敗前隊，悍賊轉旆而西，以應鳳鳴之軍，時西北馬賊猶下馬步戰，軍士挾全勝之勢，趨距而前，當者辟易，搏擊逾時，賊飛騎狂遁，官軍斬其殿後多人，追及金積堡西寨外而還，是役

斃賊三四百。總兵郭占榮躍馬當先，面被矛刺，手中礮傷。副將李占標驍勇突陣，左肱傷矛，右股中礮，簡敬臨軍在金積南。銳欲與松山合隊，率所部繞道波浪湖，遇賊戰敗。松山時已回營，不及知也。次日始知之，驚悼不已。乃率五營馬隊馳赴漢伯堡，敬臨營所。賊偵知松山所在，以騎千餘遮其歸路。松山至，騎賊數十團猛撲。松山指揮迎擊，劉錦棠等望見之，亟督隊馳救。賊始潰。己卯，賊以磚石砌長牆，自金積堡外壕至波浪湖，拒官軍。庚辰，松山遣各軍擊之，賊憑牆固拒。鎗石雨注，官軍五路進，劈山洋鎗齊發，賊死傷多，猶隔牆挺矛對刺。官軍見鎗石漸希，賈勇齊登，賊敗遁歸寨，薄諸寨門，又敗之。追至濠內，又敗之。先後斃賊千六七百，轟死偽元帥沙

學德提督李就山礮子洞胸死松山軍屢次戰死者總兵周本立易作義副將溫其林叅將李必貴游擊王順明盛德林張盛魁廖德英楊寶玉陳芝蘭都司萬友山葉宜功楊俊發謝春和守備朱鳳翔千總譚聯城王義勝李金山把總劉萬勝劉得功楊復盛是時金積北路各堡塞已盡存者惟東西十數堡而已陝回之併入金積東西各堡也與甘回雜處甘回多附之馬化澂又時憇憇堡中回夜間潛與陝回助逆賊所由屢蹙而數反增於前也陝回屢敗後意本求撫其喪失眷口無所係戀者則仍思乘冰橋北竄以故留馬械不繳賊中呼爲乾馬隊者也馬化澂資其糗糧軍械使抗官兵則又告官軍曰陝回不悉繳馬械請急擊之賊所以勢窮而仍悍

者以此辛巳賊仍修築波浪渠長牆壬午夜二鼓賊出馬家  
灘運馬芻松山運昌乘月襲之毀其牆斃賊千餘生禽百八  
十餘提督楊清源鎗子中胸死運昌遂移營壓金積堡西北  
而壘以斷賊往來馬家灘路馬家灘本回寨自官軍由固原  
掃蕩而北預望城李旺堡之回多竄匿其中皆馬化澂新教  
黨也甲申松山運昌等攻破金積堡西北各村莊礮臺斃賊  
七八百生禽賊目金虎恩等八十八人乙酉魏光燾攻破固  
原元城子盧家灣賊巢戊子復敗賊於元城子西道蓮寺賊  
首海生春因良回楊如雨求撫光燾納之甲午松山運昌向  
金積堡東西並進悍賊千餘迎敵兩軍夾擊之賊冒死趨波  
浪湖風勢緊官軍按隊未追賊憑渠抗拒風定運昌部邵升

堂選壯士數十人，挺予從左路，越渠猛刺，賊驚潰。右路賊亦爲松山擊敗，各營追近賊巢，收隊。丙申，徐占彪、楊世俊軍攻敗安定之巉口，好麥川竄賊。劉松山築新壘於金積堡東，賊傾巢出擊，松山擊敗之。丁酉，賊又傍金積堡西北築土壘，附以礮牆。十二月戊戌，松山運昌平毀其礮牆及兩壘，斃悍賊六七百，生禽百餘。運昌軍前後戰死者，游擊朱鳳章、都司劉振邦、守備孟繼聲。是日，傅先宗所部提督丁桂智敗賊於禮縣石東溝。庚子，周紹濂所部副將劉甫田遇賊，崔三禹得彥等於半角城戰死。傅先宗所部提督高月桂敗賊於甯遠之包家莊，雙礮柱。辛丑，周紹濂所部毛正明等攻半角城，回堡克之。癸卯，金積堡賊索糧於甘回，王洪、楊明兩寨，道出胡家



堡松山運昌邀擊之賊沿黃河向馬家灘遁乙巳湯聘珍同  
梅開泰敗賊於漳縣三岔山周紹濂所部兩營步隊護糧至  
王家團莊北十餘里墩子溝園良回馬柏森率馬隊爲前導  
遇劫糧賊衝散其隊柏森戰死總兵李良穆副將周玉林各  
以所部步隊結圓陣禦之輜重居中外環刀矛鎗礮騎賊人  
馬皆縱橫衝突官軍屹立不動遇賊近則鎗礮迭擊之賊人  
馬應聲倒賊騎不得逞繼以步隊千餘猛撲之軍士皆殊死  
戰戈矛撥刺終夜有聲步賊不敢近退入破堡以父子鎗穴  
牆對擊騎賊則分隊環繞更番不休李良穆左肩被鎗子洞  
穿復裹創血戰軍士屹立一晝夜勺水不入口相持至丙午  
酉刻魏光燾丁賢發軍馳救賊見官軍大至卽狂奔官軍追

十餘里，齊抵牛角城。光燾等直擣段家溝賊巢，賊悉越西山遁。官軍乘勢，將爛泥溝、段家溝等處賊巢皆平之。追十餘里至峽口，賊由長流水西竄鹽茶，共斃賊八九百。己酉，黃鼎軍攻賊於鹽茶之老虎溝、鴉兒灣等處，禹得彥奔打拉城。崔三走靜寧。癸丑至丁巳，楊世俊、徐占彪、李耀南等追勦崔三，賊於巉口、李家灣、麻子川等處斃賊二千餘，生禽三百餘。陣斬偽副元帥馬得海、禽崔三之叔崔官。各軍戰死者，副將邱元章、徐廣發、王清祿、游擊饒開鈞、把總黃正魁、黃安邦、陝回屢敗之，餘不能分踞各寨，盡附金積壩內外，列幕而居。屏以長牆，其舊踞寨馬化澗，令金積堡附近甘回踞之。丙辰夜三鼓，松山、運昌等往攻，以火箭射燒賊幕，壯士踰牆而上，賊敗。

壕內官軍分途掩殺各寨甘回皆出援官軍復擊敗之追至  
寨邊守寨之賊閉門拒之賊不得入循牆而遁壕內甘回恐  
官軍擁入自斷其卡橋陝回墮濠死者無算戊午松山攻敗  
胡家堡賊斃賊三四百生禽四十三己未庚申攻破胡家堡  
附近趙馬兩賊寨斃賊七百餘陣斬賊目馬世傳生禽賊目  
何彪壬戌夜賊往韋州堡掠糧歸松山分三隊伏破堡以待  
之漏二下賊由漢伯湖踏冰過松山雷鼓發號迎頭擊之賊  
委棄輜糧顛躓冰中狼狽北竄我軍攔截而東遂繞波浪湖  
趨金積堡松山分隊截勦之敗賊脫者數十人而已松山軍  
先後戰死者提督張四維文官勝總兵劉上達陳尊榮劉士  
福熊德佑副將陳啟禮周聯勝叅將李壽游擊袁勝義李鏡

輝湯棣安曾起輝都司彭恆貴董萬福守備陳世真章友德  
符楚南張俊臣把總熊德新廖廷雲毛信成林家聲維時賊  
屢敗勢窮圖他竄或外出掠糧雷正綰周蘭亭各軍於油麻  
湖漢伯堡諸處不時堵截雕勦多有斬獲

平回志卷之四終





3

2837  
CNL 2940 4282  
2568  
LIBRARY  
OF THE  
MARTIN YENCHING  
INSTITUTE  
SEP 30 1929





平回志卷五

太湖王志沂

東湖楊毓秀子堅纂編

受業長陽張榮澤全校

姪楊存澤

蓬溪蓬萊山館刊

志甘肅三第五

九年正月丁丑有賊馬步千餘自胡家堡至秦渠踞石家莊諸空堡松山以石家莊扼秦渠之要形勢所必爭立督隊趣石家莊則賊已於西南廢堡築三壘矣松山軍分三路進各攻一壘一鼓克之斃賊千數百其逸賊入馬五寨松山卽令易致中朱德開李占標分駐三新壘於是松山周覽賊所踞

諸寨正南馬五寨正東馬八條馬七兩寨皆牆厚濠深遂令  
逼寨築壘以便圍攻庚辰壘成辛巳齊隊往攻復有援賊自  
東南馳至松山與金運昌約先勦援賊壬午黎明進兵步賊  
陣於各破堡前騎賊左右分列布隊甚整松山令先勦騎賊  
騎賊敗奔步賊仍屹立不動松山麾軍衝殺賊殊死鬥屢斫  
屢進騎賊更縱馬回撲官軍鼓銳盪決斃悍賊多賊始向東  
南胡家堡遁冰凌路滑軍行不前追賊五里乃收隊斃馬步  
賊近千人遂傳令攻馬五寨悍賊皆踞寨東卡松山遣譚拔  
萃往攻馬七馬八條兩寨來援之賊則令易致中等擊之令  
金運昌陳於寨東北以防逸賊布置定譚拔萃等率所部循  
寨繞出外卡一鼓齊登克之外卡悍賊百數十人盡殪松山

急令舉火焚寨門策馬寨下督攻甚厲忽飛礮子洞中松  
左乳墮馬弁丁急負入破堡中譚拔萃等往省松山叱令速  
督所部猛攻毋顧我致亂軍行拔萃等含淚出四面梯登縱  
火延燒遂平其寨生禽馬五乃收隊繳令松山諭以傷重不  
能得生爾等殺賊報

國我死無憾言訖氣絕其攻馬七馬八條寨之隊尙未撤也  
松山由湘鄉勇丁從征積功洊擢廣東陸路提督凡吳楚閩  
粵豫晉秦隴燕齊勦辦各巨寇無役不從無戰不克在靈州  
蕩平堡寨五十賊巢九十餘皆策馬前行躬冒鋒鏑回賊之  
會犯顏行者無不聞名膽落左宗棠稱其行軍布陣方圓平  
銳各適其宜得古人靜如山動如水之義其居心仁寬而條

理秩如遇時局艱危輒義形於色不復知有身家性命年已三十有七聘婦未娶者二十餘年宗棠由直隸西征時知其婦家送女至南陽已兩年餘矣屬其行抵洛陽尅期完婚會甘肅土匪蔓及延榆綏宗棠令渡河入秦奉檄卽行屆期甫半月耳觀人於微是雖古良將何以加前西甯馬朶三嘗引撤回千五百騎應援馬化澂未及半月松山勦喪其大半遁歸自後不敢復至河州馬占鰲亦欲以其眾助陝回誓於松山之威不敢動松山之死左宗棠嘆曰吾方冀甯州肅清後奏請駐師甯夏以取猛虎在山之勢不料事未了而遭此變也左宗棠以松山全軍皆湖南人而隸籍湘鄉者尤多其老湘一軍營哨官多保至提督總兵者非位望稍崇又能調護

諸軍才堪方面之寄者，不足資鎮壓，乃奏請以卽選道。棠賞加京卿銜，代統松山軍，記名提督黃萬友爲幫辦。錦棠爲松山從子，從征多年，諳習戎機，而優於膽畧。萬友與松山皆王鑫舊部，現理營務，素得軍心，故奏用之。丙戌，狄河回自渭源漳縣，出石灰溝口，撲周文翔營壘。湯聘珍率隊攻擊之，斃賊三百餘。辛卯，周開錫遣高月桂等軍，勦賊於秦州之朱家祠康家巖等處，敗之。馬化澂聞劉松山已死，數嗾回眾圖犯官軍，獲賊諜稱賊謀犯吳忠營壘，奪永甯洞水口，阻葉昇堡。運道劉錦棠黃萬友會商，以地勢在所必爭。壬辰，整隊出擊，賊三四千出金積堡，官軍分路勦。馬賊旣敗，而遂併力於步賊，追殺其悍黨數百。自東道旣梗，糧運皆取道河西，賊時

乘間抄掠金運昌商劉錦棠各分兵夾河築壘以防之癸巳  
兩軍甫至河邊胡家堡甘回王洪等寨馬步三千餘鋒至運  
昌鏞棠合軍擊敗錦棠仍遣李占椿護築新壘甲午壘成胡  
家堡賊離營五里而陣占椿守壘運昌迎敵方戰錦棠率隊  
馳至併力追殺四五里而還兩戰斃賊五六百二月戊戌金  
積漢伯兩堡賊四五千麇集板橋圍董福祥營李雲貴助福  
祥禦賊肅章開率所部直貫賊陣雲貴福祥出營夾攻賊駭  
奔官軍掩殺斃賊二百餘是時凍冰漸解野潦縱橫錦棠等  
度地勢以疏濬隄防之運昌軍駐金積堡西北界秦渠東近  
馬家灘早元堡賊巢壬寅早元堡賊數百倚秦渠築隄設卡  
運昌會章開勦之俄而金積各堡角聲四起援賊大至運昌

右緣隄衝擊錦棠分隊左進而自督易致中等策應賊敗  
渠北章開越渠擊之金積各堡復出悍賊來援錦棠督何作  
霖併力猛撲賊遁老巢甲辰陝甘各回傾巢出騎賊數千馳  
進板橋步賊兩路一出正北築壩決隄一出正西撲金運昌  
營壘錦棠麾軍援勦望見渠隄已決水勢南趨渠北之賊甚  
厚運昌兵已阻於水正西賊眾如林冒死撲營分三路泗水  
猛進軍士見賊即斫運昌馬步應之黃萬友率陶定昇等越  
渠橫出賊前怒馬衝擊截賊爲數段正西賊即竄歸巢正北  
賊猶死拒壩口萬友發礮轟之賊始盡逸兩軍斃賊約千餘  
是夜運昌以正北蔡家橋一壘距城卡里許商錦棠撥營聯  
絡以資控制己巳五鼓錦棠遣步隊十營出正北修壘知賊

必爭約運昌伏兵渠南廢堡以黃萬友右路兵陣於渠北錦棠督中路修壘昧爽金積賊絡繹出巢至蔡家橋錦棠按兵不動戒軍士併力急築且備擊賊晨晡時賊不時緣隄放鎗或越渠撲壘伏兵出擊渠內賊二百餘盡殲中右兩路乘勢壓殺賊敗歸各堡而東南胡家堡王洪等賊復決山水溝以淹河西運道錦棠令各營環壘修堰引注小渠合流入黃河丙午各營方掘渠賊馬步千餘隔水擲戰官軍發開花礮側準擊之賊退二鼓渠溝通賊復運磚石築卡於北環以長隄丁未錦棠令各營攜鉏鍤分道並進賊逼隄以拒官軍躍馬衝陣當者辟易賊遂向金積堡東門敗走官軍躡至堡外次第平其卡而還錦棠軍先後戰死者提督周和美參將趙吉



祥周大禹游擊馮餘雲都司龔龍舜鄧晚雲黎亮高守備李世梧章賞義馬呈祥董福生把總曹松茂許忠美吳永清劉德勝馬化澹被勦勢蹙惟圖洩渠水以困官軍官軍既決隄濟溝水注永甯洞口合流入河賊不得逞馬化澹復憑山水溝築三壘丙辰錦棠運昌合湘皖兩軍攻之賊大敗平其三壘悍賊千二百餘盡殪丁巳楊世俊勦賊於定安馬家河世俊左脅中又子鎗賊敗竄紅土窰敖天印等遇之於剪子岔又敗退馬家河東竄是時陝回馬阿渾由陝境敗回甘肅而甘南徽縣兩當竄賊戰事方殷陝回河回又乘間踵其後左宗棠慮諸回併合以窺汧隴寶鳳遣周開錫嚴督甘南各軍分路堵勦檄李輝武由鳳翔合甘軍先清徽兩之賊分兵防

隴以顧陝疊門戶檄吳士邁尅日由乾州赴汧隴而西力遏  
竄氛戊午劉錦棠金運昌等湘皖兩軍勦賊於山水溝賊復  
大敗斃賊五六百丙寅錦棠軍攻克王銀柵賊壘斃賊千數  
百官軍數捷之後馬化澂復率其子馬耀邦乞撫言時亟春  
耕求大兵退駐吳忠堡錦棠許其耕墾不許退兵仍勒限繳  
馬械錦棠軍前後死事者副將陳思忠都司阮金春沈天成  
把總朱泗木張德勝林渭清三月丁卯副將盛照魁率所部  
護糧過固原三關口遇賊劫糧哨弁楊雪亮躍馬斫陣力戰  
死照魁追勦奪回騾馬數十頭己巳丁桂智等軍勦賊於禮  
縣莫家山大峽口癸酉湯聘珍攻解清水城圍賊悉趨張家  
川脅陝回海成等東行入陝吳士邁李輝武劉端冕殷廷華

等軍追勦之金運昌所部王鳳鳴攻克花馬池賊乙亥總  
趙興隆等護餉至固原高崖子參將林定遠守備黃錦團並  
騎先驅遇賊刺死趙興隆等由黑子山溝進勦良回楊如海  
縛獻賊目海寬殺之降其餘眾賊酋明七十子刻仲祿踞狼  
兒溝蒲家墩辛巳趙興隆等潛師襲之平其兩巢刻仲祿爲  
官軍亂及斫斃明七十子單貴兩賊隻身走荒谷固原鹽茶  
間東西兩山廣袤數百里山谷盤互漢民少而回民多其間  
良回每爲匪回所劫難於自拔故馬化澂得以煽惑而勾結  
之自左宗棠立旌善一營擇良回馬柏森穆進善李百寬等  
爲營官令總兵蘇如松督之分駐中路勦撫兼施又錄用諸  
良回爲嚮導誅莠育良腹地伏莽乃漸肅清陝甘逆回或由

金積堡南來或由陝境北竄諸營錯落布置地網四張良回復爲偵探導引每得掩其不備而殲之馬化澂遣陝回馬正和甘回李花喜等圍預望城時馬柏森居預望周紹濂及蘇如松由半角城往援甲申擊之於楊家灣乙酉賊攻李旺堡營官李光賓解賊圍遂竄黑城子李良穆擊敗之俘賊言馬正和中礮子自鼻出腦後逾時氣絕李花喜等出韋州至下馬關踞距預望城四十里吳家腦徐占彪遣馬柏森設伏虎牢山而自薄吳家腦賊敗遇伏馬柏森擊斃賊目蘇文舉盡禽其賊目李花喜馬有全等八人及悍賊七十餘馬正和敗黨自下馬關竄韋州徐占彪追敗於花子臺戊子王鳳鳴遣游擊馬心勝赴安邊護糧運遇賊於磚井堡鳳鳴麾隊逐之

至張家園禽賊目張福保賊黨救之何全忠衝入賊陣頭中  
木棒墜馬鳳鳴前救疊被矛劖猶力戰軍士悉銳陷陣全忠  
復躍馬助之斃賊百餘賊狂奔俘賊稱張福保爲馬化澼所  
遣掠糧於東路者是日金運昌於下橋東南攻破賊所築新  
壘癸巳賊之竄陝西者復竄回甯州界遂由鎮原三汭河至  
固原白家塙四月丁酉黃鼎率徐占彪等禦賊固原洪溝巖  
山斃賊千餘陝回李經舉米阿渾及金積堡竄出之單仲明  
皆陣斬之惟禹得彥四百餘騎走鹽茶乙巳至丁未楊世俊  
敖天印等軍追賊靜甯通渭之間斃賊千五六百生禽海洋  
花等二百九十六戊申分駐定邊都司牛允誠敗賊於甄井  
鎮賊酋陳林中礮傷己未賊目楊興隆護糧回金積劉錦棠

伏兵靈州之懽喜梁斃悍賊六百餘陣斬楊興隆獲騾馬牛羊八百餘頭雜糧二萬餘斤壬戌提督李雲貴護糧至定邊遇賊迎擊殺賊百餘總兵江登雲千總孫九齡戰死五月丁卯傅先宗擊賊鞏昌丁家門新寺鎮等處兩獲大捷斃賊二千餘生禽賊目麻曜廷等百三十七餘賊竄岷州喇嘛口酒店子范銘軍擊敗之又竄洮州土司楊元會洮州兵團擊敗於線家灘賊西遁乙亥至庚辰楊世俊管春林等擊賊甯遠禮縣等處金積狄河出竄之賊掃除殆盡丙子劉端冕軍攻賊鄜州王家角斃賊五百餘生禽百一十三是時馬化澂及其子耀邦復哀詞乞撫繳馬七百匹鎗械五千餘具劉錦棠仍未許撫靈州諸回巢以金積吳忠兩堡爲最著自靈州城

迤西數十里秦漢兩渠間堡寨共四百有奇近吳忠者皆稱  
吳忠近金積者皆稱金積非止兩堡也官軍前後攻破堡寨  
百數十所逆回畏勦紛竄有棄堡寨歸併各大堡者有歸馬  
化澧所踞各堡者所遺廢堡留軍擇其當衝要者據之餘則  
毀之統計金積吳忠各堡尙爲賊踞者三十餘所而已馬化  
澧穆生花乞撫不得乃遣老弱回民赴湘皖兩軍乞就板橋  
琴橋吳忠等廢堡架棚而居以便耕作爲圖復踞之漸錦棠  
等漫應之靈州中路回酋王洪又請修秦渠之堤引水灌田  
甲申回民百餘來修堤錦棠等戒軍勿動乙酉五鼓率隊分  
三路伏永甯洞下橋渠北伺之於是王洪楊明王忠等率各  
回目及壯丁數百齊至伏兵突起生禽王洪等二百數十人

斬之餘悉陣殲之訊俘賊稱諸回目皆以官軍中計趁此可奪回永甯洞下橋與板橋琴橋各廢堡及棗園堡聯給一氣官軍將截爲兩段不虞反墮官軍計中也丙戌湘皖兩軍攻克馬七馬八條兩寨俘賊稱馬七馬八條皆化澧弟前此皆逃入金積寨中所居者陝回馬生彥夥黨也是時傳先宗合王德勝彭忠國何建成馬步二十二營回鞏昌行抵首陽城誦賊眾千餘踞渭源城陝回與狄回方爭糧私鬥先宗等乘勢收復渭源遂奪一桿旗之險就地築壘周開錫令梅開泰分營扼之檄先宗率諸軍進攻狄道六月丁酉遇賊酋六阿渾禹得彥等數千於狄道東三十里鋪大戰斬悍賊數百平燬沿途賊卡戊戌乘勝直薄城下王得勝自北門入先宗自



東門入賊開西門逸越洮河而西官軍蹙之河邊斃賊無算  
李佛諦守堡之賊見官軍拔州城震駭乞撫先宗麾軍亟進  
賊敗入堡乘勝躡追立克其堡餘賊泗水遁牟弗諦堡卽北  
壯前所未下者也左宗棠以爲論用兵之勢則宜長驅以規  
復河州然自秦州迤西鞏昌狄道四百餘里中間渭源二百  
餘里彌望蒿萊人烟斷絕大軍前進後路糧運防兵宜多則  
進勦之兵少可俟北路甯靈肅清再圖之王洪楊明兩賊旣  
誅餘黨猶踞堡寨而靈州中路胡家堡洋麻湖海子墩大沙  
井諸處麥穗垂野向熟矣壬寅錦棠運昌率隊向楊明各寨  
刈麥奪獲牲畜六七十頭癸卯軍抵王洪寨賊倚寨拒之而  
復分黨競出刈麥官軍頓旗勿動俟其穫多縱馬隊衝殺之

盡掠所獲，捆載而歸。甲辰，攻拔杜家寨，斬逆目杜舉，斃賊立百餘。乃至王洪寨南，刈麥，並調靈州難民千餘，隨隊刈之。乙巳，刈胡家堡，麥破其西南二卡，斬逆目馬濠。丁未，錦棠、運昌及雙壽各軍攻王紅聯寨，寨外禮拜寺高與寨牆齊。錦棠遣譚拔萃等於寺頂累磚爲牆，置鎗礮其上，擊寨內。遣朱德開等攻寨西北，以分賊勢。遣王承贊等會雙壽軍於中路，遏賊援。布置定，中軍鼓起，各軍肉薄登寨，賊憑牆拒守。鎗礮如雨，官軍胥死，拔棚填濠，積薪燒寨門，掘牆豎梯，寨上木石紛下，雜以火彈，弁勇被創者數十人，梯不能豎。錦棠揮寺軍發鎗礮，親督將士推傾牆上磚，搦譚拔萃等遂率壯士豎三梯，騰躍而上。牆上短刀相接，墜而復上者六七。寨內賊復傾熱湯。

麥粥釜孟齊下軍功張俊敗賊少處躍登各營壯士隨之揮  
刀斫賊賊拋械紛遁首逆王紅聯伏誅盡殲賊千二百餘寨  
平是日提督譚拔萃李雲貴皆被創弁勇戰死者三十七受  
傷者百七十四戊申攻破王洪寨外卡斃賊千餘壬子刈洋  
麻湖粟梁苗遇賊戰斃其三百人獲牲畜六百餘頭癸丑攻  
克郭家寨寨首郭慎之投井死寨內賊八百餘悉殲之甲寅  
會攻王洪寨寨賊不出各軍以開花礮擊之寨內人聲鼎沸  
而守堞賊仍植立如故官軍刈青苗而還乙卯攻斃王洪寨  
東廢堡賊六百餘丁巳攻胡家堡開花砲子轟入堡中者數  
十賊困守如故戊午軍出大沙井刈青苗各軍前後死事者  
副將汪有餘游擊賀隆春潘祖勝楊景岱孫玉貴劉淮美都

司張光華黃閔理姜道友千總宋德元王學成孫九齡羅金榜把總宋雲書謝德祿丁有元吳仁長羅澤安李保懷張學成外委孫廷玉魏南華由固原一路進攻金積以馬家河灣爲總要以韋州堡爲間道馬家河灣回目馬忠海始受馬化澂僞封爲誠正王後雖就撫仍嗾其黨劫掠糧餉軍裝與靈州河州相勾結左宗棠密使周紹濂誘馬忠海赴平涼而令馮桂增潛率所部徑搗韓家水巢穴遂次第攻破韓家水五堡生禽回目十三人及河州回海隆一人五堡逆回三百餘皆斬之磔死忠海傳首固原各境韋州堡回目蘇兆明本金積逆黨受元師僞職乞撫後仍持兩端凡金積出竄之回皆經韋州兆明供給資糧丁賢發誘與議事兆明及其黨與悉

至賢發數其罪悉斬之出榜安撫回眾令各安堵無騷馬  
河灣韋州堡既平則金積迤西各堡可直由中路進勦無後  
顧憂於是左宗棠檄中路諸軍交黃鼎會雷正綰於四百戶  
齊隊出何家堡規取峽口七月己巳諸軍攻張恩堡賊憑壘  
拒敵徐占魁等麾隊疾攻拔花籬越重塹奪入外堡賊入堡  
死守官軍環攻半日不下已而金積援賊至正綰鼎分兵擊  
之於牛頭山仍合力攻堡甯磚石而上守賊憑堞斫刺壯士  
登而復隕者再令各營環濠築壘掘地道以攻之庚午五鼓  
地道將成悍賊二百餘開壁突圍出官軍遮擊鎗轟矛刺賊  
尸滿地乘勢入堡搜斬堡賊盡淨當賊突圍時賊目袁希義  
率數騎奪路奔徐占彪急督隊躡追生禽之供稱馬化澗聞

中路進兵急遣希義領死黨據守以固金積峽口藩籬也左宗棠復遣陳廣發等由四百戶渡河而西扼峽口北岸於是賊從龍王廟渡八塔之路皆斷矣壬午左宗棠奏請以前山西臬司陳湜總理營務正綰等遂麾隊進牛頭山逼峽口徐文秀軍亦來會賊見官軍雲集堅壁不出戊子正綰鼎進攻賊開壁迎敵徐占彪方酣戰金積各堡賊絡繹來援鼎率軍扼牛頭山右截之正綰文秀爲策應併力擊敗援賊復轉旆至峽口賊敗退河岸陳廣發等對河列陣賊腹背受敵遁伏壘中徐占彪躡殺入壘文秀各軍繼之破其二壘餘三壘爲雷正綰閻定邦等所克殘賊東逸鼎分隊截之五壘悍賊千數百盡殪是晚有河西回接濟賊糧者來八塔口呼渡尙不

知峽口已爲官軍得也。陳廣發等潛師掩之，盡獲其輜重。已金積馬步萬餘，憑漢渠列隊古靈州城。於漢渠達秦渠處築卡浚濠，拒官軍。甲午，徐文秀等越漢渠立營，夜襲賊卡，破之。遂乘勝入古靈州城，賊棄壘而遁。八月乙未，馬賊緣山而至。步賊分隊伏漢渠隄下，大隊列渠岸。雷正綰、綠山、右擊馬賊。徐文秀進中路，擊步賊。黃鼎率大隊橫列，步賊之左分兵陣渠旁，防伏賊。部署定，李廣珠、陳天壽、熊祥麟躍馬突陣，與馬賊相持。劉治均、吳元璋、張兩翼抄之，馬賊敗而復前。正綰方揮刀督陳文秀隊伍齊撲，馬賊靡步。賊蠶起，挺矛進。鼎督各軍橫貫賊陣，賊大敗歸巢。丙申，敗賊於古靈州。乾渠、丁酉、五鼓、黃鼎令徐占彪選壯士攻賊卡。賊夢中驚起，倉惶走官。

軍遂至賊濠守濠之賊不敢拒爭入丁家堡官軍躡追卡內礮石雨注不能下占彪卽扼賊卡而營正縮列隊濠外鎗礮迭轟文秀督軍發後膛開花砲炸彈飛落卡中當者齏粉各營乘勢躍入盡殲卡中賊而堡賊猶憑牆以抗黃鼎遣各營繞漢渠出秦渠中空地築壘斷金積援賊文秀仍疊開後膛大礮礮子穿牆入堡中賊始慌亂突圍出將併趨金積正縮文秀從堡牆缺處躍入搜殺無遺其賊之逸出者鼎預遣徐占彪等挺矛以待得脫者十餘騎而已俘賊常惺本靈州廩生同治二年陷入金積者云馬化澂以丁家堡地形扼要遣其子耀邦建邦領悍賊駐守先二日之戰楊大娃子陣斃耀邦等走洪樂堡丁家堡破時丁一剛伏誅開壁遁者化澂孫



進孝也。戊戌，遞克金積西路二十餘堡，賊皆望風靡。官軍遂逼洪樂堡，立營。壬寅，各軍攻馬家堡，未下。文秀占彪作長圍以困之。黃鼎率馬步攻洪樂堡，金積出悍賊應援。鼎所部營官何玉超、李洪超、李金貴皆被鎗創。由平涼城迤北踰固原，抵中衛靈州，九百餘里。爲通甯夏孔道，其間巖谷複沓，澗壑幽險，回民雜處，堡寨林立，爲盜賊淵藪。自中路官軍進，勦金積，回賊時嗾悍黨四出抄掠，以牽綴官軍，阻遏運道。自平涼以達前敵軍營，一路遞駐三十餘營，屯營之所，分設轉運局，軍裝火器糧餉車馱橐駝相屬於道，三十餘營按日迎送，護解勞費不可殫述。而地遠路雜，時有不測之虞。總兵鄧林楓參將馮桂僧於滾帛刷陽山、黃柳防隆德溝長山頭等處護

運殺賊周紹濂五營魏光燾五營於護送之便隨時搜勦東  
西兩山賊左宗棠親兵營雕勦靜甯安定賊各州縣防軍土  
勇雕勦本境及鄰境賊不時多有擒斬金積長圍將合陝回  
余彥祿先謀潰圍走九月丙子夜劉錦棠徐文秀等戰敗之  
余彥祿受傷死其餘黨千餘從漢伯堡竄出至半角城之倒  
洞子復由倒洞過山溝隨地露宿四更時周紹濂率各軍潛  
襲之鄒正魁先至見四山野火如螢賊尙酣臥卽斬其邏賊  
大呼官軍至矣紹濂等繼至從火光閃灼中開鎗測擊天明  
視之賊尸縱橫其餘黨敗匿李旺堡黑城子山谷中魏光燾  
擊之於家峴陳湜由問道擊之賊幾盡十月丁酉雷正綰黃  
鼎徐文秀各軍暨王衍慶礮隊攻克漢伯堡己亥正綰鼎文

秀攻克漢伯西南張家泉金陵堡兩寨甲辰錦棠運昌正綰  
鼎文秀軍會攻楊明堡在金積迤東五十里扼靈州西南要  
路諸軍齊隊堡外堡牆高聳周四里許正綰鼎駐堡東備王  
洪堡援賊運昌文秀軍西南杜堡賊外竄王衍慶軍東北錦  
棠督大隊護之既成列各督勇揮鋤築壘賊依濠列隊見官  
軍盛不敢擾後膛礮發衝塌堞牆賊驚懼入堡時已薄暮各  
令步兵少休遣哨馬巡邏防賊夜遁乙巳王洪堡賊馬步千  
餘來援正綰鼎兩路齊擊賊敗追三里許而還衍慶發大礮  
擊堡牆錦棠運昌文秀各督隊放礮霎時烟焰彌天衝圮爆  
臺寨牆各軍攀援而上堡上磚石亂下壯士傷而墜者數百  
訖不得上乃伏濠中避之二更後堡賊焚巢突出官兵伏起

斬賊目楊洪開楊十五於濠旁殲賊約二三百其衝過濠溝者各軍四面遮截無一漏網堡中老弱婦女皆赴火自焚軍械什物皆成灰燼惟拾焦麥數十石而已遂將寨牆毀平之丙辰各軍攻馬家河灘累日各堡寨團莊次第攻拔惟兩大地雷炸礮轟圮旋即補築遂相持月餘然堡中死傷山積所餘悍賊不過數百諸軍晝夜環攻而將領受傷者至數十壯士傷亡者千數百矣自金積合圍之後堡外陝回能戰者不過千餘老弱婦女五六千皆饑餓垂斃左宗棠遣已撫陝回劉秉信赴劉錦棠黃鼎營壕引之出圍拔出二百餘人於是出者絡繹不絕維時俘賊稱堡內戰賊馬化澂人日給錢二

千五百僅易麪一斤人多餓死賊糧垂罄矣十一月馬家灘  
王洪堡及金積堡各巢悉平丁未馬化澂隻身款營就撫左  
宗棠聞報卽檄前敵各軍暫緩其誅勒令招撫河西王家疇  
及通昌通貴兩堡悍賊遣陳湜馳赴金積會各軍辦理十二  
月壬戌馬化澂遣回目馬殿魁隨委員前詣河西諭知王家  
疇各賊繳馬械毀寨牆馬殿魁復領悍賊何生洲等三百餘  
人來金積就撫化澂復以書抵通昌通貴兩堡告以金積撫  
局已成於是兩堡陝回男女二百餘人赴黃鼎營就撫而金  
順張曜兩軍遂乘勢將王家疇通昌通貴兩堡攻克盡殲其  
類矣於是勒催化澂弟馬九化澂子耀邦及其黨譚生成等  
搜繳馬械耀邦等呈繳車輪大礮四九節狸礮四威遠礮二

十八劈山礮二十鳥鎗千三十洋鎗百八十擡鎗二百九十  
三刀矛二千四百一十八火藥鉛子硫黃各有差左宗棠遂  
密令各統領將堡回勒限遷徙以便清釐分辦劉錦棠等會  
商陳湜於陝回起解後首令馬耀邦等挑選堡內精壯者千  
人馬家灘四百人王洪堡百餘人及何生洲夥黨三百餘人  
爲義勇寘之外濠空堡中分交官軍鈴制次清點堡中貿易  
僑寓及被脅各甘回具冊聽遣安插次搜捕通賊文武官弁  
復勒令馬化澂等盡繳鎗械馬匹旋繳到馬四十三匹供稱  
馬料乏絕牲畜多斃除前繳五百匹續繳四十餘匹外實無  
存留洋鎗軍火實無藏匿如經搜獲甘心坐罪陳湜等以諸  
務經理就緒各堡回民驚疑漸釋乃遷王洪堡回眾於靈州

城附近安插遷馬家河灘回眾於張家圈安插

十年正月戊戌遷馬化澹父子兄弟及其家屬於濠外各廢堡中庚子辛丑提馬化澹馬耀邦馬九譚生成等分別嚴訊有無藏匿軍械及北口開設市肆交通洋人情事化澹盡誘其子耀邦比晝夜窮究耀邦茹刑不吐先是金積堡既平劉錦棠令回民掘毀其堡牆更令勇丁助之適勇丁掘得洋鎗千二百餘支遂詰以既具結無有藏匿軍械何官軍復掘獲鎗礮千二百之多無詞抵塞壬寅劉錦棠等提馬化澹馬耀邦馬中邦馬成澹馬恆邦馬定邦馬建邦馬九飛飛子暨譚生成父子三人同時凌遲處死其分置各廢堡之悍黨及何生洲部眾千八百餘人內統領參領佐領先行等偽官王六

馬壽等八十餘人，概予駢誅。其貿易僑寓及被擄脅之甘回三千餘人，解赴平涼安插。金積堡老弱婦女萬二千餘人，解赴固原州分撥荒地安插。賊巢保生堡，僞號王城，僭稱東府西府，一切違制什物儀仗，概予銷毀。屋宇則留待建置文武衙署兵房及死事諸臣祠廟之用。其所繳金銀銅錢綜合銀十九萬兩有奇，分賞前敵馬步七十一營。每營二千兩。老湘營一軍在事最久，酌量增給。其餘以爲遷居張家圈各回民購辦賑糧及水八堡修渠採買麥種之用。穆生花者，卽穆三其祖。穆大阿渾傳習新教，與馬化澂父馬二友善。新教中推爲大善人。穆大阿渾臨死，以其常服白帽紅衣傳馬化澂，令其眾歸化澂管束。穆生花與其弟穆四穆五皆爲新教。阿渾



行教於蓮花城一路與馬化澁相爲首尾化澁嗾其其攻陷平涼固原兩城屠戮極慘平涼大郡烟戶數萬亂後男女不滿七百縱橫數百里烟火蕭條殘黎泣訴爲古今未有之禍穆生花兄弟夥黨旋遷金積助馬化澁抗大兵上年五月穆生花以求撫不得仰藥死金積平陳湜黃鼎搜獲穆四穆五皆殺之於是邊患悉銷人心稱快焉是時河州賊由定安竄通渭秦安清水秦州西和禮縣等處總兵蕭賞謙提督張仲春楊世俊等軍擊敗之陝回之就撫者北路官軍所收納及東西兩山之眾悉解抵平涼左宗棠親臨點驗爲數一萬有奇中有爲前安插平涼回民親眷者聽其認領尙實存男女九千四百餘安插草亭縣西北百七十里化平川其地巖壑

環峙兩水縈繞一化平川一聖女川皆滙白面河入涇州界  
兩川中地廣五六里延三十里委記名道馮邦棟前往相度  
改聖女川曰聖諭川爲宣講之所白面河曰北面河示拱極  
之義遣千總牟春陽領土勇二百四十人分駐開山三才鎮  
各口調總兵喻勝營領所部平江營扼駐化平營以司稽察  
令邦棟按口給糧丈量地畝分撥房屋窑洞購給種籽發耕  
牛驟驢督其開墾播種回俗畏所管頭目較漢民畏官尤甚  
而彼教誦經祈福之師名爲阿渾又時以異說蠱惑愚蒙爲  
回俗所信奉以致一夫倡變亂者遙起道光時張格爾以回  
教阿渾和卓構亂者也按阿渾本曰阿訶訶與洪音近漢民  
呼爲阿洪今之馬化澁卽新教總阿訶也和卓者教師後裔

貴種在阿渾中尤尊明史所稱大者卽和卓音訛也今欲變其舊俗同我華風亦非先王不易民而治之理惟安插伊始於編審戶口中隱寓聯甲之意十戶一長百戶一百家長令其鈴束散戶而設官董之凡一切戶婚詞訟均取決焉藉可散回目之勢而以權歸之官庶政令行而統紀一乃奏請增設平川廳通判一員化平營都司一員以資鎮撫焉二月朝廷賞金積之功

詔陝甘總督一等伯左宗棠運籌決勝調度有方著加賞一騎都尉世職宗棠上書謙讓請以所賞合之劉松山原得之三等輕車都尉照三河殉難撫臣李續賓例

追賞劉松山令其嗣子肅承襲奏稱松山自秦晉轉戰燕齊

返旆以來復踰千數百里淨掃十數萬匪徒力攻四百餘賊窟英銳忠勇絕少比倫其死時令劉錦棠藁葬其遺骸吳忠堡必俟事平始歸骨先隴金積旣平劉錦棠搜得謀害松山之賊馬八條極刑處死瀝血以祭松山之靈三軍雨泣臣訊金積回眾皆稱劉帥亡後堡中夜靜時聞戈馬之聲如怒潮湧至月輒數四賊中每疑官軍夜襲不敢解衣臥又上年十一月望夜三鼓平涼城外忽聞大聲鳴鳴山谷響應守城將士疑爲狼陣開礮轟擊比緹城出視了無所見臣時徘徊帳中覺其有異後得諸軍馳報是日馬化澂就禽矣然則前史所載毅魄忠魂時露靈異未得謂其盡屬虛語也臣與松山同事數年知其行軍律已實一時名將而一月忠愛之忱出

於天性雖古人無以加每一追思悲痛不已

朝廷以松山前已降

旨優卹茲加

恩賜祭一壇己丑河州賊竄階州之黃鹿山署階州知州洪維善率楚勇團丁擊敗之階州山谷中有緝匪一種據險爲害維善攻破其巢賊首段世才逃匿瞿煥周所踞之石崖洞地勢尤險維善復攻克之段瞿兩賊皆逸四月河州賊竄秦徽伏甯禮各屬楊世俊張仲春軍擊敗之復竄徐家溝口田聯考擊敗之左宗棠繳總兵劉明燈率所部駐馬營監以向安定徐文秀撥所部四營由靜甯州延駐會甯修治蘭州中大道以利挽運更轉運軍糧子藥儲存靜甯州爲規取河州

計壬申總兵蘇家良攻成縣任家莊山頂匿賊圍甫合忽一賊自眾中躍出手提首級跪陣前乞降訊之自稱海富兒所提首級則小目豈老五也豈老五爲陝回楊生公所部悍賊楊生公潛赴傅先宗營求撫事覺爲崔三所殺餘眾復欲求撫豈老五更阻之富兒憤其屢梗撫議遂斬之以降家良受之富兒更呼願降者三十人伏地求撫其不願降者尙八九十人家良率隊撲之無一脫者海富兒三十人皆年力精壯令居隊伍中爲餘丁立功自贖家良以良回積功至總兵所部本回騎也五月洪維善攻克史家溝緝匪賊酋史學虎遁入何中幅堡中庚午攻克其堡生禽賊目趙金幅癸未劉明燈部總兵王前程追賊於秦州張家堡賊被追急躍避土穴

官軍引繩誘之賊固匿不出出者一人云穴中尙八九十人恐見殺不敢出也官軍乃傾土石入穴穴中號哭甚慘已而聲絕矣六月左宗棠檄諸軍進勦河州癸酉奏略曰前清水縣張家川撫回李德昌自請赴河州諭撫回目馬朵大馬占鼇臣諭令聽其自投不可招致德昌行至洮河東岸馬朵大等遞呈求撫適聞河西用兵疑德昌紿已得昌亦疑撫局有變忿懼而歸後探靈州平涼固原化平川等處安插陝甘各回皆安居耕墾始悟撫局終無可疑馬朵大馬占鼇等求撫之心益切但此時言撫固可省兵力而速戎機然以地勢言之河州西靈卽漢唐湟中故地爲歷代戰爭之塲蘭州東西南三面皆界河州河州不靖蘭州不能解嚴以賊勢言之

河回嗜利輕剽無事時尙出抄掠變亂十年來未受懲創更無畏忌此非創鉅痛深難望其帖服也見平涼慶陽涇州鞏昌秦州階州各屬已漸肅清賑撫耕墾善後諸務具有端緒雖中衛鹽固徽兩西禮等處時有游匪出沒其人馬多者不過數百少者數十而已倏隱倏見如蟲蠹著體殊費爬搔然固無能爲害現留黃鼎雷正縮魏光燾左日昇等軍自中衛至平涼扼要分駐其南路徽兩等處加復提督殷華廷馬隊護運緝匪更選地方官會各防營嚴密掩撲以淨根株而重後路據各路稟報淨橋渡船已辦芻糧運用粗備道路修治已平乃檄各將領赴會師進規河州傳先宗率所部由狄道進以其半渡渡河修壘半駐洮東岸爲中路楊世俊張



仲春兩軍直取道南坪關進峽城爲左路劉明燈由馬監營  
進紅土窰由紅土窰進安定掃除零匪以扼康家崖之要徐  
文秀由靜甯繼之爲右路俟中路渡洮之師修壘畢左右  
兩路乃渡洮繼進其岷州及洮州廳地居河州西南山徑叢  
雜以五營分駐兩城調土司楊元領番勇守隘口相機防勦  
統歸楊世俊調遣會甯安定皆接靖遠縣境當北竄之衝檄  
黃鼎分所部步隊入營益以桂錫楨馬隊三營歸徐占彪統  
領由中衛進靖遠南搜會甯安定游匪西顧蘭州臣俟諸路  
布置略定卽率親兵由隆德赴靜甯定安督勦俟河州大定  
乃圖西甯也維時雷正縮周紹濂黃鼎各率所部擊賊於苦  
永泉獲賊目李文虎楊天朝馬二楊耳環子復會軍進搗米

包山賊巢楊世俊所部擊敗秦州渭源竄賊七月丁巳左宗棠由靜甯率輕騎取道會甯八月庚申馳抵安定接見統領後路軍徐文秀統領左路軍劉明燈詢商一切知渭源狄道克復後河州諸賊出掠必由洮河西岸三甲集渡康家崖然後分竄則安定爲賊踪出沒之衝而康家崖又其必由之要津也遂定議文秀軍由安定西北巉口以達站灘明燈軍由安定東南馬家河出關門口抵站灘與文秀合隊攻康家崖壬戌各營先發甲子文秀明燈由安定繼進令各分隊包掃而前驅賊併歸康家崖然後聚殲之文秀行抵黃石坪詢得捷徑遂舍站灘逾馬寒山至下營子距康家崖僅二十里明燈由馬家河抵柳林溝遣總兵黃宏藻等各領所部由三十

里鋪沿洮河東岸前進參將殷得益等由大營坪斜抄而前  
文秀率總兵鄭守南等由魏家河出賀家溝總兵沈玉遂率  
陳締高等由大營坪出東溝合攻康家崖戊辰行距康家崖  
數里徑薄賊下堡賊出卡拒之文秀迎擊而陳締高等已由  
東溝抄賊後矣堡中復出步賊來援文秀揮軍兜擊陣斬悍  
賊二百餘步賊敗入卡馬賊爭上船西渡官軍薄之溺斃無  
算卡賊憑牆放鎗并丁傷者數人軍士周麾而登立破其卡  
斃三百餘生禽賊首哈章布等五人餘返入大堡明燈軍出  
柳林溝遇馬賊數百追入新田鋪適殷德益等從大營坪橫  
截而出陣斬百餘人賊退入康家新崖及孫家堡明燈率馬  
步追入立破其兩堡斃賊二百餘餘賊併入康家大堡徐劉

兩軍既合，卽下令圍康家大堡及各小堡，分撥甫定，堡中賊皆棄堡，向洮河亂竄。官軍分途逐之，遂破其大小十餘莊，斃賊約二千餘。兩軍遂分據各堡，立營，俘賊稱賊首馬爾和哈龍麻皆斃。康家橋在洮河東岸對岸十里，爲三甲集三甲集正西，爲太子寺，迤西稍北，爲大東鄉，皆逆回麴集之所，爲河州門戶。已卯，傅先宗楊世俊將所造船於狄道，架浮橋。辛巳，橋成。甲申，先宗遣彭忠國四營渡洮營西坪，世俊遣張仲春以宗岳四營營三汭河，何建威以四營營陳家坪。山頂皆在洮河兩岸，每官軍渡洮營壘，賊騎或數十百餘，往來窺伺，擊之卽走，不戀戰也。陳家坪營與三甲集賊巢爲近，賊亦於黑山頭築四壘七卡以守之。又築數壘於大坪山紅莊，與黑山

壘遙應高家集胭脂山亦皆築壘以防狄道官軍九月己亥賊分隊撲營擊斃其二百餘是夜四鼓賊復以千餘潛襲彭忠國營忠國知之設伏於營左右山溝又擊斃之乙巳先宗世俊會兵分三路進攻高家集沿路平其十餘卡賊皆望風潰師振楊家嶺西黑山頭出賊來援敖天印擊走之乘勝破紅莊一營甲辰賊由柳家溝偷渡黃宏藻擊退之副將睦金城中礮死丙午破高家集八營遂進攻高家集大堡令步軍合圍而以馬隊遮援賊方拔毀堡外木柵參將廖嵩先登中礮死將士憤登立克大堡分兵平毀新集子塢平川吉家山各莊堡兩日計殺賊二千餘紅山各賊壘亦以次攻破庚戌參將楊其昌以步隊百餘迎護糧運途遇賊戰死癸丑楊世

兩軍既合，卽下令圍康家大堡及各小堡，分撥甫定，堡中賊皆棄堡，向洮河亂竄。官軍分途逐之，遂破其大小十餘莊，斃賊約二千餘。兩軍遂分據各堡，立營，俘賊稱賊首馬爾和哈龍麻皆斃。康家橋在洮河東岸對岸十里，爲三甲集三甲集正西，爲太子寺，迤西稍北，爲大東鄉，皆逆回麴集之所。爲河州門戶。己卯，傅先宗楊世俊將所造船於狄道架浮橋。辛巳橋成。甲申，先宗遣彭忠國四營渡洮營西坪，世俊遣張仲春以宗岳四營營三汭河，何建威以四營營陳家坪。山頂皆在洮河西岸。每官軍渡洮營壘，賊騎或數十百餘，往來窺伺，擊之卽走，不戀戰也。陳家坪營與三甲集賊巢爲近，賊亦於黑山頭築四壘七卡以守之。又築數壘於大坪山紅莊，與黑山

壘遙應高家集胭脂山亦皆築壘以防狄道官軍九月己亥賊分隊撲營擊斃其二百餘是夜四鼓賊復以千餘潛襲彭忠國營忠國知之設伏於營左右山溝又擊斃之乙巳先宗世俊會兵分三路進攻高家集沿路平其十餘卡賊皆望風潰師抵楊家嶺西黑山頭出賊來援敖天印擊走之乘勝破紅莊一營甲辰賊由柳家溝偷渡黃宏藻擊退之副將睦金城中礮死丙午破高家集八營遂進攻高家集大堡令步軍合圍而以馬隊遮援賊方拔毀堡外木柵參將廖嵩先登中礮死將士憤登立克大堡分兵平毀新集子塢平川吉家山各莊堡兩日計殺賊二千餘紅山各賊壘亦以次攻破庚戌參將楊其昌以步隊百餘迎護糧運途遇賊戰死癸丑楊世

俊所部攻克馬家集遂向草灘前進中途瞥見騎賊從西馳至卽設伏截之禽賊二十餘而奪其馬餘賊驚覺而遁世俊率所部策馬疾追禽賊目馬五馬沅亮及其餘賊而還馬沅亮本名馬格力布在甯州充阿渾管回眾二千餘方先宗世俊之架橋渡洮也左宗棠議三甲集太子寺之師固不可緩然非先由狄道出師牽制賊勢令其備多力分是昧先其易者後其節目之義也且雨雪兼旬洮河消漲不時康家崖近岸洲渚縱橫其正流逼西岸邊家灣卯家灣而下水深滅頂人馬難越康崖對岸山腳直插洮濱卽達彼岸兵難展布賊又於岸邊掘濠伏匿其中開鎗抗拒我軍爭渡輒爲中傷實非良策擬俟洮濠漸落再議築橋而諸軍急欲赴戰於是徐



燈麾軍急過西岸立三壘旋助殺賊甲子傳先宗由石鼓墩  
攻黑山各壘王德榜會徐文秀等圍攻卯家灣於是三甲集  
賊萬餘來援官軍戰敗之遂克卯家灣賊壘及三甲集附近  
村堡皆平之黑山頭賊緣山岡綿亘二十餘壘其西南接新  
路坡紅馬家賊巢傳先宗因遣王德勝設伏蓮花山邊新路  
坡等處援賊遣諸軍分三路進攻石鼓墩赴黑山之路爲賊  
掘斷又守以堅壘則但令石鼓兩壘作進攻之勢以綴其力  
布置定乘夜進發四鼓中前兩路抵賊壘銳攻兩時許何建  
威拔幟先登破其第一卡彭忠國朱運廣繼破左右兩卡天  
明各壘之賊悉銳來援先宗揮隊酣戰敖天印攀藤緣墩自  
山後壓下賊方驚愕先宗突陣殺賊賊四散奔潰各營風馳

電掃黑山頭，袤延數十里，大小賊壘盡平，陣斬五百餘賊。新路坡之賊，聞黑山礮聲，由蓮花池後擁至。王德勝擊之，禽斬亦多。楊世俊攻克胭脂三川、油溝三賊壘，殺賊三百餘。乙丑，傅先宗留彭忠國四營分駐黑山要隘，而自率所部緣黑山後嶺上三甲集南山巔立營。隨將三甲集以西村寨掃蕩無遺。是時王德榜駐黑山迤南三甲集，前傅先宗駐三甲集後相犄角。徐文秀、劉明燈於康崖置浮橋，丙子王德榜率馬隊越山南下，與各軍會攻三甲集，逆首馬占黿、喉黨登牆防禦，相持半日。我軍冒險周麾而登，馬占黿奪門向八甲口遁。各軍遂分攻康家陽埕大小堡卡十餘所，破之，共斃賊二千餘。丁卯，徐文秀移駐三甲集，餘分扼要隘。己巳，各軍攻克張

家坪堡及大貝坪甘坪張家灣各堡斃賊千餘庚午劉明燈  
朱明亮攻破鮑家莊大坪等堡辛未會勦大東鄉口前隊甫  
至守賊已望風靡驅殺入谷見山溝紛錯恐有伏賊留敖天  
印尤成章駐谷口備援應各軍銜尾銳進搜殺二十餘里毀  
其數卡至陰窪泉伏賊環出王德榜等下馬督戰回目于海  
朝祖臂陷陣沈玉遂手及之士氣益奮敖天印聞礮聲急分  
隊從谷口衝入兩隊遙合賊不支遁踞山脊官軍收隊還壬  
申攻破紅莊賊壘是時劉明燈攻破包家嘴賊堡遂會攻太  
平堡克之明燈以包家嘴爲大東鄉後路要隘留營駐之狄  
道河州夙爲回藪土著漢民不過十之三類多爲回所役使  
謂之從教戶其稍強者不甘從教而勢力不敵往往失業爲

匪遊掠四方所謂黑頭勇丁者是也。又一種撒拉回民居河  
洮西甯之間別爲風氣亦掠剽爲業不受官司約束與河湟  
諸回相勾結承平時燕齊皖豫響馬劇盜多出其中此固不  
獨甘肅應除之賊也。左宗棠到安定諸回日上書求降而於  
繳馬械求安插獨不及知其賊心固未死也。遂令諸軍進勦  
令遞奪要隘斬馘萬餘足寒賊膽。失惟賊之眷屬死黨盡聚  
大東鄉其地在三甲集太子寺北周百餘里山巒層疊徑途  
狹隘賊又以重啖撒拉回使助拒官軍勝算匪易操也。左宗  
棠乃密遣傅先宗楊世俊先攻七甲集各壘卡直搗太子寺  
留兵守之乃回攻大東鄉與諸軍分道並進耳。是時賊雖屢  
敗凶饑尤張嗾撒拉於董家山謝家坪築壘抗拒於紅莊一

路增築堅壘更分詣各營乞撫獻良馬二十二匹蓋爲緩師計也諸軍令悉繳馬匹鎗礮許爲轉請逆首馬悟眞仍藉詞支展十一月壬辰王德榜等率四營進駐李家臺白嘴莊馬占鼇領其黨夥及撒拉遁歸牟尼溝老巢己亥王德榜進駐上七甲集大東鄉援賊紛至徐文秀等攻敗之斃賊千餘於是七甲集之賊併入謝家坪癸卯傅先宗攻紅莊大堡朱運廣由堡後距躍而上手及賊目周七十遂進克果園各堡哨官許德義等四員戰死徐文秀攻克八戶掌賊壘鄭守南先登沈玉遂破其後壘王德榜攻克朱家坪二壘四卡過趙家溝康家坪皆平之楊世俊張仲春攻小陳家坪馬家坪亦克之於是王德榜徐文秀會攻謝家坪賊棄壘走楊世俊列隊

平川遇太子寺之援朱明亮攻董家山參將廖福景攻破山腰一卡將攻次卡鎗子貫腦死將弁憤攻立破其卡斃賊甚多然董家山地險賊眾驟難下也是日各軍共破五十餘堡壘而殺賊不過數百蓋賊徑途既熟而攀巖越澗又其長技故耳於是左宗棠遣陳湜親往視師且規進取壬子傅先宗進駐米家坪賊悉銳來爭官軍刀阻之甲寅劉明燈列陣川中傅先宗楊世俊徐文秀三路並登賊踞半山拒之官軍前隊鏖戰後隊築營自辰至午世俊營朱定山成三壘徐文秀營董家山成五壘前隊且戰且前賊敗走躡追之遂奪陳家山楊家山等賊卡斃賊數百復拔隊窮追賊相率翻山竄走遂奪取董家山一路賊壘徐文秀分營駐各大壘於是大東

鄉及太子寺路徑疏通矣十二月傅先宗進攻新路坡克之  
戊午楊世俊駐四厚子徐文秀分兵衛築世俊累日滾營前  
進文秀等皆列陣衛之馬占鰲自敗遁老巢後復糾悍黨及  
撒拉循化各回虜聚太子寺環太子寺掘濠壘卡林立北與  
石納收潘家火紅等回堡相犄角壬戌楊世俊等分路撲之  
鏖戰四時奪其長濠及山頭一壘卽移營據之癸亥陳湜徐  
文秀等分隊攻太子寺北火紅莊等堡山高徑仄不能列隊  
賊礮石交下相持數時撤隊還丁卯傅先宗乃由南山頂列  
隊直搗賊巢徐文秀率所部分兩路從東上甫及山腰悍賊  
萬餘蜂至世俊文秀麾軍迎敵賊死傷相繼一悍目騎馬持  
刀斷後勒羣賊返鬥屢卻屢前刀矛擊戛有聲如是者十餘

次世俊麾所部衝入賊陣斬之於馬下賊乃大敗墮巖中斃  
死者千餘官軍奪太子寺外濠賊復濬二濠於寨外南由瓦  
房丹豆迄塌馬池北由火兒混堡循河而下抵黑山之尾築  
壘六七十所以斷狄道糧運戊寅又乘夜於黨川北築二壘  
已卯楊世俊傅先宗擊之遊擊石補天先登拔其兩壘傅先  
宗遣李占椿據之賊旋來撲占椿憑壘堵禦中斃死兩壘復  
爲賊據辛巳壬午賊以大隊攻營楊世俊督戰被兩創猶力  
戰賊乃奔總兵楊全雄張得志遊擊陳有祥董金成都司洪  
明泰守備韓鳳鳴主簿楊興藻皆戰死生禽馬老五馬禿子  
米一麻木等十三人陣斬撒拉回目馬鄉老癸未賊由四山  
抄至楊世俊傅先宗分三路擊敗之戰死者都司王照益把



總陳佩麟甲申官軍攻克新路坡黨川鋪各賊壘

次世俊麾所部衝入賊陣斬之於馬下賊乃大敗墮巖中斃  
死者千餘官軍奪太子寺外濠賊復濬二濠於寨外南由瓦  
房丹豆迤塲馬池北由火兒混堡循河而下抵黑山之尾築  
壘六七十所以斷狄道糧運戊寅又乘夜於黨川北築二壘  
己卯楊世俊傅先宗擊之遊擊石補天先登拔其兩壘傅先  
宗遣李占椿據之賊旋來撲占椿憑壘堵禦中斃死兩壘復  
爲賊據辛巳壬午賊以大隊攻營楊世俊督戰被兩創猶力  
戰賊乃奔總兵楊全雄張得志遊擊陳有祥董金成都司洪  
明泰守備韓鳳鳴主簿楊興藻皆戰死生禽馬老五馬禿子  
米一麻木等十三人陣斬撒拉回目馬鄉老癸未賊由四山  
抄至楊世俊傅先宗分三路擊敗之戰死者都司王照益把

官軍攻克新路坡黨川鋪各賊壘

平回志卷五終

平回志卷六

太湖王志沂

東湖楊毓秀子堅纂編

受業長陽張榮澤同校

伍楊存澤

蓬溪蓬萊山館刊

志廿肅四第六

十一年正月賊復於新路坡迤東官軍振威前左兩營聞倫  
築三壘更據爛泥溝四莊一壘爲犄角勢糧道復梗辛卯壬  
辰傅先宗等累日奮攻諸軍冒鎗礮拔木柵先宗振臂大呼  
自擁大旂先進突爲飛礮所中由右額貫腦立倒陣前癸巳  
陳湜遣徐文秀赴援會師爛泥溝克四莊一壘甲午楊世俊

以傅部主將旣沒乃商令各營退駐黨川鋪徐文秀適至卽以所部親兵附駐強勇中營丙申賊攻傅部振威前營及強勇中營徐文秀率所部擊敗之夜間賊復以全力攻撲傅部營官副將田大勝等相率棄壘潰文秀憤極率所部親兵務壘列隊鏖戰逾時被矛刺三創力竭死總兵鄭守南李旂楊文林劉篤志副將盧才華王福昌參將吳明勝遊擊陳東海都司李相南張有小舒有貴均沒於陣壯士同殉者百四十四人弁丁百餘從重圍衝出繞狄道回營報知陳湜陳湜令董家山三甲集康家崖營壘嚴扼要隘左宗棠聞報立令王德榜接統傅先宗軍沈玉遂接統徐文秀所部後路及果勇各營調楊世俊所部張仲春駐黑山頭邊更令譚拔萃張

福齊甘大有各營兼程赴安定聽調陳湜復遣沈玉遂等滾營進逼擇要立營時傅部放天印駐高家集堅守營壘斬逃者以徇潰卒乃止不奔楊世俊令所部扼狄道河橋斬逃者遣何建威駐蓮花山王德榜查點傅先宗所部各軍令王德勝駐高家集彭忠國駐太平山朱運廣駐虎牢關均扼太子寺竄狄道之衝於是逆首馬占鰲知官軍潰退復整各軍方增壘前進新調之軍絡繹奔赴度官軍之不可力抗也因遣回目馬俊等詣三甲集行營涕泣求撫陳湜遣使馳安行定營請示而令已撫回目馬壽清赴太子寺覘之左宗棠以爲賊於窮蹙之後忽稍得逞得逞之後復又投誠或有別故令陳湜姑許其速繳馬械暫緩進兵丙午馬壽清歸自太子寺

具言各回目頂經立誓永無反覆、遵諭盡繳馬械、先是安插化平之陝回陳霖、閻興春等爲窟踞西甯之陝回崔三禹得彥等求撫、左宗棠卽遣陳霖等往西甯察辦、未歸、馬壽清回甯并稱西甯回目馬承福等亦到太子寺、云崔三禹得彥及馬占鼇同求撫於西甯知府馬桂源、近聞馬桂源已到蘭州、無何、桂源果隨馬邦棟自蘭州到安定、行營求謁、並領撫回陳霖、閻壽春前來、所稱與馬承福告壽清者脗合、且出占鼇投誠稟詞、意甚迫切、蓋因其黨傷亡過多、又聞各路回衆皆就撫、番部亦聞風響應、外援皆絕、勢極窮蹙故也、於是左宗棠以馮邦棟前爲化平撫回取信、其西甯各回撫務悉委邦棟辦理、馬占鼇隨繳馬二千餘匹、軍械五千餘具、維時提督



徐占彪率隊赴肅州防，辛亥，師至高臺，遣步隊兩營，一駐河西壩，一駐清水，以顧運道。二月乙卯，馬步三營逼駐距肅州三十里紅水壩，成祿亦以兩營駐臨水，騎賊頻駛至紅水營，二、三里往來覘探。甲子，賊騎千餘撲營，與官軍殊死鬥。自辰至午，官軍分三面結方陣以進，賊始敗。庚午，賊至老鶴堡屯，莊兵至，賊遁躡，追及城，城賊出戰，官軍復敗之。諜報逆首馬四議糾死黨爲背城之戰，徐占彪卽輕騎率隊馳赴前敵。乙亥，遣步隊四營分伏距城十里亂石墩樹林中，遣右營馬隊列其東南，防援賊。自率馬隊導以鄉團，會署安肅道何元普由南河抵東關濠外，誘敵。賊啓東南兩門出，紅白旗馬步逐前迎拒，步賊趨伏濠旁渠內，占彪且戰且退，賊追至亂古。

墩伏兵分路突起，與占彪軍夾擊，賊反奔及濠，遂憑險死拒。官軍殺斃悍賊甚衆，城中復出藍紅花旗賊三路來援，官軍躍渠直進，鎗礮刀矛雜出，斃賊多，破其外圍，馬四遂親領黃旗隊由東南兩門來援，何元普令將士發開花礮轟之，人馬紛倒，馬四以坐騎傷蹶墮地，營官徐春光驟馬就禽之。忽右膊中飛子馬四乘間逸，官軍及鄉團爭先掩殺，賊大敗回城。陝回馬長順以馬隊千餘由南山往來衝突，占彪與成祿所部副部統明春、肅州鎮王子龍又擊敗之，賊趨入城，官軍追抵關廂，賊急拽浮橋閉門死拒，是役斃賊實六七百，傷者約千餘，馬長順先擬赴西甯求撫，至是悔未先往，羣相詬厲焉。官弁死事者都司賀洪山、千總蔡樹海、周開基、把總童德雲。

潘文揚黃迎春張萬發外委魏洪勛周廷貴王興秦癸酉劉厚基部游擊劉秀淮赴定邊行至安邊三里灘遇賊四馬陷陣累殪數賊被矛刺死四月乙卯雷正綽部副將趙聯科追賊於長峪河賊反門聯科左手受刀創四指皆墮千總周保泰戰死是時階成一路土匪游勇斬馘未盡諸防營探蹤雕勦禽獲頗多戰死者副將朱桂樑參將陳華彩游擊秦正明守備梁宗亮馮憲章千總劉啓運鄧荔春李高魁劉立忠楊樹恩把總李明道知縣李舒萼縣丞郭怡副將孫萬榮馬四受創後日在城外及北崖頭塔爾灣等處增設堅卡爲負隅計五月甲申朔桂錫楨率馬部疾抵城下城卡各出賊迎拒錫楨擊之賊敗入卡麾軍逼攻遂破其大卡乙酉桂錫楨以

一營預伏十里礮、自率馬隊於肅城東南角、往來馳騁、賊由東關突出、馬步千餘人、官軍戰且走、誘進十里墩、伏兵繞賊後、錫植回軍夾擊、賊潰、追斬百餘人、俘賊稱馬四、求援於西甯、及關外各回族、關外賊目魁頭老四、領纏頭賊三千餘入城、助守黃虎、臣率隊偵之列軍河灘、見城中花紅黑白各旗魚貫出、知爲賊舊隊也、繼出大黑旗三千餘、則關外援賊也、均排立城邊、發鎗礮誘之不前、虎臣繞北路奪牲畜數十頭而歸、徐占彪以賊情狡詐、必賺之遠出、始可痛勦、密令歸化營、回勇私約馬四、尅期出隊、許爲內應、麾旗爲號、辛丑、占彪親率精銳乘夜潛出、伏城南老馬堡、質明、先以步隊兩營逼城而戰、賊衆爭出、官軍戰且退、賊始猶前却、忽亂古墩上旗

幟麾轉遂大出錫楨自深林橫截而前賊見伏兵少分隊抵禦俄而歸化營迎頭猛擊徐占彪由老馬堡分三路徑衝賊隊賊尸枕藉遂分隊一趨城關一奔朱家堡占彪麾軍攻堡城賊馳援占彪縱擊之賊敗退是役斃賊數百所奪馬械稱是遂以黃虎臣兩營移駐三仙洞距賊僅八里馮邦棟到礮伯後馬永福率西甯咪喇講西馬營各回目求撫呈繳馬匹鎗礮各數百稱陝回禹得彥白彥虎崔三等皆踞大小南川尙未就撫遷巢慮其反噬不得不各留馬械以防之俟陝回事了當盡繳不敢藏匿自悞陝回惟崔三求撫情切禹白等自知稔惡有年疑畏殊甚撫回陳霖等亦稱禹白等私議如官軍速進當竄蜀滇崔三不能制也賊目畢大才等由大通

赴肅州之援，禹白崔三賊仍踞大小南川，近又遣人詣邦棟求撫，繳馬械各數千，藉以緩官軍之攻耳。左宗棠令邦棟姑諭以悉繳馬械，勿遽絕之，令馬永福、馬占鰲將陝回去路遮絕，遣何作霖由康家崖拔營前赴碾伯駐防，遣劉錦棠率隊由平涼進，宗棠以爲陝回家口均在大小南川，師指西甯攻所必救，畢大才等或當回援老巢，官軍力戰破之，然後分別勦撫，可速戎機也。馬占鰲、馬朵大等先後共繳馬匹四千有奇，鎗矛萬四千有奇，具結無有隱匿存留，方馬永瑞等之赴安定投誠也。左宗棠宣布

朝廷威德，諭以生死禍福聽其自裁，縱令歸巢，催繳馬械，回衆疑畏，益釋誓爲良民，至是據報馬械盡繳，乃許其就撫，宗

棠以爲辦撫之道以編審戶口爲要編審戶口以徙客回安土回爲要河州壤地五六百里回多漢少雜以番衆變亂以來陝回多避居其中自陝境肅清金積掃蕩固原東西山相繼平定各處倡亂之回亦多寄孥其間以避誅戮此客回之應徙者也其本籍漢民爲河回脅制役使者有仇隙已深逃至岷洮狄道入伍充勇而親屬仍留河州者宜分別拔出以免繫端此本境漢民之應徙者也其外來漢民有陝回脅之同竄河境者有被河回裹脅以爲義子而齒諸奴僕者悉令交出護送回籍以別種類而資完聚此外來漢民之應徙者也撫事已定乃分別圖之顧謀遷徙必先定安插之地安插之地漢回各有攸宜漢民安插狄道金縣安定會甯一路

近城駟漢民聚積之處也。同民則近城駟非所宜，近漢莊非所宜，並聚一處非所宜。又此次同民隸籍，有陝甘之異，當其併力抗

命，固無分彼此也。一旦就撫爲齊民，則甫被新恩，旋尋舊籍，不但陝回甘回氣類攸分，卽陝回與陝回、甘回與甘回，亦不能併域而居者。渙其羣，孤其勢，計之得也。乃預令安定會甯、平涼、隆德、靜甯各牧令，覓水草不乏、川原相間、荒絕無主之地，以便安置。委員分途履勘，度其地之廣狹，而分別遷徙之。計分置漢回民共十一區，綜男女三千餘，皆按口給賑糧、農器、俾資耕墾。安插旣定，署置官司。丙申，潘劾蘇到河州知府任，米聯璧到太子寺州判任。丁未，沈玉遂到河州總鎮任。



沿途漢回列案焚香迎送絡繹馬占鼇馬朵大馬永瑞及回  
目河渾咸跪道旁膜拜感泣並納糧百萬斤備軍食仍分置  
各防營於城內外及各要隘惟州西北二百餘里循化同知  
所轄番回雜處毘接西甯卽前史所稱吐谷渾地今爲撒拉  
回巢地險民悍久爲甘肅邊患官司不能履任遂以化外置  
之茲因河州撫定撒拉各回亦赴軍前求撫陳湜詢知首逆  
狗齒牙卽楊繼芳馬彥澂馬聶子等敗後竄匿河州境密諭  
馬占鼇掩捕陸續獲解先後伏誅甘南地當隴蜀之交深山  
密箐土匪時官軍不在輒肆擾掠雖賊數無多兩省不得解  
嚴者已非一日自河回就撫賊失其巢防營追捕雕勦奔馳  
往復於二千餘里之間殄滅殆盡而北路自甯州鹽茶至蘭

州亦無成隊之賊矣。庚戌，徐占彪夜赴塔爾灣，率所部分爲十隊，合攻一堡，賊未備，官軍乘間躍入，立破數卡，徑薄堡牆，賊奪門四竄，自寅至巳，攻克四堡。壬子，墩卡塔爾堡之賊出，經白旗來，援馬隊擊卻之，遂閉堡不出。徐占彪就地爲營，是夜復分隊襲破附近六墩堡，其焚堡自竄者十餘堡。癸丑，各團丁分道刈麥，以馬隊由三仙洞往來游駛爲疑兵，仍分軍卒輪攻塔爾堡，晝夜不絕。六月甲寅朔，陳春萬攻克東大堡，堡東焚堡夜遁者，蓋十餘堡。乙卯，占彪進駐黃草壩，督攻塔爾堡，益急。是夜軍功回，且蘇明泰先登，守備徐春先繼之，遂克塔爾堡，守堡賊鮮得免者，獲千斤大礮。丙辰，徐春先攻克支殊山前二堡，其餘七堡皆夜遁。丁巳，各營分攻黃草壩三

堡未下、戊午、占彪繞堡東築營、絕其糧道、累破數墩、賊開堡  
盡逃、斬馘無算、遂乘勝克其三十餘堡、於是肅城、南墩堡  
百餘皆平、諸軍進駐沙子壩、距城三里、己未、大南門出賊衆  
五六千、皆衣白衣、抹白巾、巾上貼黃紙、前作雁行、分兩路斜  
出、中排方陣、後列散隊、蓋賊中所謂喪門陣也、旣成列、牽一  
婦人一狗、斬於陣前、以厭勝之、遂狂譟齊撲、占彪令各軍勿  
動、賊前隊盡過、中隊已薄陣前、中軍鼓聲起、各營奮力衝出、  
賊殊死鬥、參將蕭蘭玉、以開花礮轟擊、桂錫楨率馬隊徑穿  
賊陣、賊隊大亂、占彪軍乘之、尸橫遍野、直追至城下、收隊、馬  
四弟馬六元帥、額中礮子、方賊之中隊薄官軍也、時方晴明、  
將弁皆按隊挺刃以待、忽迅雷從西北起、黑雲飛壓賊陣、震

兩並作各營聞鼓聲奮躍衝陣賊方驚悸繩藥盡濕官軍所用洋鎗不畏風雨人人皆喜得神助故所向披靡乙未夜占彪襲奪南門三里許賊築新堡卽移營駐之戊戌夜攻克香莊廟大堡斃賊數百千總孫三級手斬千長馬建功勇丁牛金勝生禽阿渾張景福於是馬四復哀詞求撫占彪諭以且再決數戰徐議之庚子攻克城南枯樹三堡六墩遂移營駐之夜間襲破雷臺廟東大墩丁丑馬四請退兵十里願獻城自贖占彪不許攻孫家堡益急復於堡南北立營卡斷其運糧汲水之路戊寅各營備攻具填濠薄堡牆賊棄堡奔追殺極多營移駐其堡於是肅城東西南三面賊壘皆平惟北崖頭廢壘尙爲賊據七月辛丑復率隊攻克之焚其積麥近城

賊壘皆平肅州城外皆沃壤又值雨澤優霑禾稼豐茂占彪率官軍獲稻調圍民收束之旬日得糧數千石南城外劉家空堡復爲賊踞約千餘人朱家堡北舊有三墩城賊二千餘援前墩陳萬春擊卻之回軍圍墩賊棄墩而逸賊復援中後二墩黃祖福等禦之占彪揮軍攻克中墩守備孫三級殺賊十餘身受七創力竭死是夜藍明泰復襲破後墩守賊鮮有脫者官軍皆移駐之是後旬日之間賊出城刈稻官軍伺而邀擊之叠有斬獲八月癸丑分所部環城爲營自西而南而東惟北門未合圍焉馮邦棟之往撫西甯也各令回繳馬械其客回崔白等則藉故遲延土回則以客回擾害不能不稍留馬械以備抵禦左宗棠乃令暫緩呈繳先將存留馬械造

冊申賫、俟客回事定再繳、更遣劉錦棠何作霖率各營前進、錦棠等行次礪伯、己未、土回回目續繳馬械到營、馬疲械鈍、多不適用、仍自稱限半月全繳、蓋欲緩師以待其收穫也、錦棠乃示諭土回安堵無恐、以便直搗陝回巢穴、留龍錫慶駐七里鋪、親率馬步進駐平戎驛、逼近陝回所居之大小南川、復分兵駐馬營灣及三十里鋪、與小峽口毘接、察沿途土回堡寨、僅留壯丁待收穫、餘皆潛逃、錦棠知其有異、仍令所部無犯秋毫、恐致藉口、壬戌、余虎恩率隊至峽口、周覽地勢、堡中出馬步百餘、放鎗、官軍舉鎗擊之、賊遁、甲子、馬營灣各營見馬步賊千餘、由山頂繞至檢柴溝、錦棠率諸軍擊敗之、於是各營累日有賊攻撲、乙丑、戰峽口、南北兩山、庚午、戰高臺

壬申戰高家堡甲戌復戰馬營峽口高家堡卽白彥虎行巢也土回與客回仍聯絡一氣每戰則彌山塞谷四出繞我累日官軍皆歷重險以苦戰獲奇捷先後斃賊千數百署西甯知府馬桂源者本循化回民捐候選同知前西甯辦事大臣玉通力不能制回遂主撫議委桂源署西甯知府又以桂源兄本源署鎮標游擊代理西甯鎮篆務其時回目馬朵三狡黠異常旣以撫局愚官復狹官以鈴制漢民凌虐殘殺無所不至漢民爭訟於玉通玉通無如何也馬朵三旣死馬永福代充回目甚謹愿官軍勦河州時請桂源赴安定行營求撫及劉錦棠進勦陝回而土回復與陝回合謀據撫回閩興春等云馬桂源在西甯府東關密與禹得彥白彥虎崔三等議

抗官軍復調各土回助亂馬本源自稱統領河湟陝兵馬太  
元帥桂源復往關外調集土回盡領城中回兵回民以出兩  
日不返西甯城內漢民遂閉城拒守請西甯道郭襄之及縣  
令主辦城防不納桂源入城見城中回民不過數十只馬永  
福在城中無憂內變惟永福子馬三哇回中所稱海裡飛者  
四出勾煽永福不能制亦不令入城也九月劉錦棠勦賊大  
捷先後斃賊二千餘白彥虎中礮子桂源之弟植源在小峽  
抗官軍亦中礮洞右肋丁亥攻克觀音堂賊壘庚子左宗棠  
奏請駐甯夏提督張曜移駐花馬池而以原駐花馬池譚拔  
萃老湘三營赴西甯助勦是時徐占鰲圍攻肅城兩月中賊  
不時撲營掘濠占鰲隨機應變大小數十戰殺獲甚多副將



吳占勝陣斬賊目馬采元帥而奪其旗兵少圍不能合左宗棠奏調金順及陶生林軍往助之十一月西甯土回冶福興馬福壽等及陝回崔三等皆歿營投誠請繳馬械西甯城內回民前隨馬桂源兄弟遁巴燕戎格者劉錦棠遣馬永福往招之前後逃歸三千餘尙絡繹於道未絕也桂源以夥黨既離乃赴劉明燈自陳爲西北川回民所誤蓋預爲逃罪地也西甯回目旣矢志輸誠人心漸定惟大通縣向陽堡回目馬進祿下亂泉韓起壽本馬桂源腹心大通營都司馬壽尤爲狡黠劉錦棠遣總兵胡萬亨赴大通督收所繳賑糧始甚踴躍而馬桂源自巴燕戎格遣人暗結馬壽等糾黨戕害領賑難民數十人於是撫回崔偉畢大才禹中海等願勦賊自效

錦棠遣總兵譚慎典率數十騎督同前進十二月己巳肅州賊以三千餘攻王子龍營徐占鰲率各營擊敗之癸酉占彪發地雷轟破城西賊堡禽斬三四百人陣斬偽千長馬文戊寅金順軍至肅州城北駐北崖頭

十二年正月壬午陶生林等軍馬步五營抵肅州甲申劉錦棠進兵攻向陽堡賊戰敗入堡吳隆海等焚其堡門而入各軍攀堞齊登巷戰之賊千餘悉駢誅之越牆走者尙三四百人熊隆名等追殺淨盡堡中賊皆遁入二小堡董福祥立破其一堡其一堡方將圍攻礮樓頂上賊呼號乞命稱爲賊目所脅請緩攻盡縛賊目以獻問賊目姓名則馬壽馬進祿龔起壽悉在其中遂縛獻首從四十餘人提馬進祿龔起壽磔

死陣前。餘賊概予駢誅。留馬壽不誅。令報縣城。各回勒限出城。並縛獻爲亂者。始免。勦洗撫回馬福壽。復於賊中指與馬桂源兄弟交通者三十餘人。悉訊明斬決。餘衆概免。於是各回聞風畏懼。槍籟哀鳴。願繳馬械。獻賊首。錦棠皆誠心撫納之。左宗棠以爲西甯地勢遼闊。向爲回番窟穴。山嶺複沓。西北通關外。西南接青海西藏。四十餘年等於絕域。聲教不行。若操之過蹙。必自人人致危。正宜宣示恩信。堅良回就撫之心。迨安撫漸多。來投者亦請速誅反側。自明心迹。而後因而用之。庶收以回攻回之效。此次錦棠所辦。賊目無一漏網。恩信無渝。聲威更暢。俾誠心就撫者知感。挾詐來投者知畏。其餘勦撫機宜。稱允協也。錦棠軍戰死者。提督朱南英。陳鳳源。

總兵李福星、張大興、謝東元、王聯升、副將王泰春、顧濟勝、易  
恆升、周忠久、游擊黃豐泰、成海清、彭傳陞、楊丕志、都司吳得  
勝、劉漢成、劉正開、守備吳福丞、許得勝、謝春和、黃玉泉、余祥  
麟、雷春秀、陳鳳林、周肇堂、王昇祥、千總武載喜、曹福魁、楊遠  
俊、余吉祥、胡瑞成、戴桂林、黃楚湘、把總傅長清、陳德友、邱清  
發、陳昆志、潘輔池、陳金順、陳大順、高占魁、秦滿才、姚喜庠、戴  
樹森、王被和、陳義堂、鄧東山、陶德勝、軍功高發揚、何吉祥、彭  
楚桂、宋文彬、李有福、陳桂堂、同知張恆丹、附生吳光燕、丁亥  
劉錦堂、進規、大通、留六營擇要駐守、而自整隊進、戊子、撫回  
治復興、馬福壽由通城馳至、稱城關衆回約三千餘、惟馬壽  
之黨仍誓死抗拒、餘皆畏懼兵威、錦棠遣遊擊董福祥、守向

陽堡親率各營縛馬壽以行甫至城踞城之賊礮石雨下錦棠揮軍環攻令治復興等繞城呼曰獻城迎降者免死禽賊者重賞俄而回衆數百開西門爭出羅拜馬前錦棠整隊入城賊嗾衆下城巷戰各營乘勢躍上立克縣城錦棠下令撫諭降衆使導官軍搜賊目獲二百餘人斬之分遣各營屯城關城內漢民舊稱三千餘馬壽自小俠敗歸戕於丁壯僅存老弱婦女六百餘口號哭之聲慘不忍聞錦棠提馬壽磔之於市漢民爭摘其心肝啖之立盡遂禽其死黨馬長忠等百八十餘駢戮之河東西及近城回首踵營納款盡繳馬械獻匪黨求免勦西甯道郭襄之委黃仁治署大通縣篆錦棠令其遷城關回民於河東西另招城北遷布馬厰利順張家寺

各漢堡難民實之。於是人心大定。錦棠率隊旋西甯。陝回在  
西甯者二萬有奇。崔偉禹得彥畢大才等。傾心向化。錦棠簡  
其精壯立爲旌善馬隊。向陽堡之役。助勦尤力。惟白彥虎黨  
最狡黠。僞詞求撫。不繳馬械。錦棠時在大通。遣冶復興率隊  
駐水硤。截之。甲午乙未兩戰皆捷。丙申深追。遇伏。所部亡失  
甚多。復興被賊生禽。不屈死之。白彥虎率其眷黨二千餘。走  
永安南山草灘。錦棠以方徙陝回。不遑追截。乃遣隊解送。各  
回赴平涼。秦安。清水等縣。擇地安插。一如化平故事。丁酉。肅  
城賊以馬步三四千出北稍門。撲營。金軍徐軍及陶生林等  
勦賊。敗退城下。徐占彪以鎗礮轟擊。礮聲不震。軍中正詫異。  
忽見賊殺二婦。女人倒豎陣前。似爲妖術。厭勝者。占彪累發。

二十餘礮轟塌其新築北門河灘堡牆賊竄出數百官軍圍  
殺之幾盡惟時馬本源兄弟踞巴燕戎格持兩端左宗棠遣  
陳湜沈玉遂率河州各營往勦令馬占鼇馬永瑞等率所部  
爲之前驅檄劉明燈赦天印扼米拉各要隘以杜竄越已酉  
沈玉遂等馳至戎城賊已西竄追獲賊眷及其姻黨二月庚  
戌劉明燈率所部由米拉來會分駐城關累日大雪迷漫知  
賊未遠颺明燈玉遂遣回勇楊生魁等入賊中諭以脅從因  
治之意回衆爭繳馬械乞撫桂源兄弟見人心已離懼甚陰  
遣求救於馬占鼇占鼇令盡繳馬械齊赴城外乞撫遂馳告  
玉遂密遣馬步環伏東山要隘比賊至遂俯首就縛陳湜赴  
巴燕戎廳先提其死黨馬主麻海一什等三十餘人斬之下

各漢堡難民實之。於是人心大定。錦棠率隊旋西甯。陝回在西甯者二萬有奇。崔偉禹得彥畢大才等傾心向化。錦棠簡其精壯立爲旌善馬隊。向陽堡之役助勦尤力。惟白彥虎黨最狡黠。僞詞求撫。不繳馬械。錦棠時在大通。遣冶復興率隊駐水硤。截之。甲午乙未兩戰皆捷。丙申深追。遇伏。所部亡失甚多。復興被賊生禽。不屈死之。白彥虎率其眷黨二千餘走永安南山草灘。錦棠以方徙陝回。不遑追截。乃遣隊解送各回。赴平涼。秦安。清水等縣。擇地安插。一如化平故事。丁酉。肅城賊以馬步三四千出北稍門撲營。金軍徐軍及陶生林等勦賊敗。退城下。徐占彪以鎗礮轟擊。礮聲不震。軍中正詫異。忽見賊殺二婦。女人倒豎陣前。似爲妖術。厭勝者占彪累發。



二十餘礮轟塌其新築北門河灘堡牆賊竄出數百官軍圍  
殺之幾盡惟時馬本源兄弟踞巴燕戎格持兩端左宗棠遣  
陳湜沈玉遂率河州各營往勦令馬占鼇馬永瑞等率所部  
爲之前驅檄劉明燈敖天印扼米拉各要隘以杜竄越己酉  
沈玉遂等馳至戎城賊已西竄追獲賊眷及其姻黨二月庚  
戌劉明燈率所部由米拉來會分駐城關累日大雪迷漫知  
賊未遠颺明燈玉遂遣回勇楊生魁等八賊中諭以脅從罔  
治之意回衆爭繳馬械乞撫桂源兄弟見人心已離懼甚陰  
遣求救於馬占鼇占鼇令盡繳馬械齊赴城外乞撫遂馳告  
玉遂密遣馬步環伏東山要隘比賊至遂俯首就縛陳湜赴  
巴燕戎廳先提其死黨馬主麻海一什等三十餘人斬之下

馬桂源、馬本源、馬楨源於獄，勒限五工，撒拉各頭目悉繳馬械，遣各營扼駐要隘，俟辦理循化就緒，乃班師先遣兩營解送桂源兄弟，眷口赴省訊辦。馬本源、桂源皆凌遲處死，楨源斬決。庚午夜，徐占彪襲攻肅州城外禮拜寺，克之，寺中賊無脫者。遣黃虎臣以副營三哨駐之，死事之弁參將張集昌、千總宋金勝、王高陞、溫寒清、王盛玉、楊慶雲、蔡德曜、把總李仁、和易有勝、王恆順、朱繼凱、外委張茂林、童占元是時陝回白彥虎自西甯竄扁都口、關門等處，楊世俊遣馬隊截之於口外，賊敗走洪水山丹，復追至東樂，由甘州北竄。世俊合楊占鼇軍擊之，敗奔撫彝至高臺，徐占彪慮後路運道梗塞，亦遣陶生林等馳至，賊知前途有備，折而西肅州之賊聞徐軍分

隊出遂出隊圍攻官軍壘占彪先已設伏賊至擊敗入城白  
彥虎遂竄至毛目擬先將眷屬安置毛目北山內親率大隊  
赴肅應城賊之援遂攻毛目城壬申陶生林與金順所遣馬  
隊自肅馳至立解城圍乙亥賊竄金塔之牛頭灣楊世俊軍  
出其前截擊之三月甲申白賊大隊携眷屬踞肅州塔爾  
灣乙酉肅城出賊二千餘撲官軍長濠徐占彪商調各軍濠  
濠抵禦白賊馬步三四千分五隊由塔爾灣撲官軍營徐占  
彪金順會勦賊大敗占彪麾軍追殺十餘里奪白賊旗幟大  
小二十餘殲賊四百餘奪馬百餘肅城賊見白賊大敗始入  
城丁亥謀報賊於夜間來撲長濠徐占彪議莫如先乘其虛  
擊之三更令各營嚴守長濠率隊由小路直搗塔爾灣而賊

已由大路赴援肅城矣、遂立破其堡、賊走南山、官軍追十餘里、斃賊四五百、時援賊已抵城南、南門出賊千餘、夾攻長濠、各營迎敵正相持、賊中隊伍自亂、皆勒馬反奔、蓋聞塔爾灣已破急、願巢穴也、適占彪等追賊收隊、行至距塔爾灣十餘里、見援賊回奔肅州、總兵王子龍提督李登策、都司劉芳海、千總李道修等、遽策馬衝入賊陣、各手刃數賊、中鎗死占彪、令各營整隊繼進、陣斬二百餘、適金順亦率隊會勦、賊紛紛潰竄、庚寅、賊走關外、大罕灘、黑山峽等處、留桂錫楨、馮桂、增兩營駐關防堵、陳澁旣克巴燕、戎格傳令城鄉呈繳馬械、許其自新、數日內繳到父子鎗二千支、馬三千四百匹、巴燕戎界接循化地、分入工、皆撒拉回族、惟青科一莊、卡勒岡工五

十莊號稱悍獷不繳馬械陳湜皆分別勦撫誅其匪目馬  
麻等五十六人而撫其馴順者攻木勒時總兵劉厚福遇於  
中鎗死卡勒東爲甘都工隔河爲循化上四工地上四工素  
懷反側暗煽甘都中匪挾良回以拒官軍其下四工則願  
賊自効甲午上四工回衆來攻沈玉遂等列隊擊之賊大敗  
乙未至庚子劉錦棠遣何作霖率湘軍四營及崔偉馬隊  
百到戎助勦餘莊餘回哀懇免勦願縛獻醜類當繳父鎗  
各千五百陳湜遂駐甘都工河岸俟事畢渡河赴循化  
連撒拉一種生性獷野見時卽習父子鎗技最精練平時  
獵能於百步外取飛鳥百不失一所居依山瀕河地勢險  
乾隆時機調隨征金川及石峯堡官軍倚爲先鋒其後不特

獲邊官軍進勦率於巴燕循化界上耀兵而還官軍去則殺  
孫如故蓋爲隴省邊患者近百年今乃一受懲創也四月甲  
寅巴燕戎旣定陳澁留數營駐甘都親率各軍成列以濟進  
遣馬占龍馬承瑞率左右兩旂登岸而壘各軍分駐循化城  
內外方渡河時自河岸至城居民扶攜老幼焚香跪迎者相  
屬於道入城見民房官廨皆荒廢城堞多圯當遣各營修城  
墉同歸鄉約及老民扶杖求見皆伏地涕泣號呼乞恩陳澁  
曉以大義令亟縛獻逆目呈繳馬械輸送軍糧毀平各莊臺  
臺礮樓賄修衙署廟宇有一違者卽予勦辦諸同聞命感泣  
叩頭不兩旬土四王縛送押自馬永祚沈五十七等二十餘  
人下四王亦解到數賊駢戮以徇綜計回三千戶先後繳金

四千餘大礮十六，凡彼中所稱金花銀花裝飾珊瑚松綠極  
精利各鎗，一概呈繳，惟番民以逐獵爲業，熟番槍械，令交千  
戶長百戶長收管，其生番逐水草居者，聽留以防猛獸護牛  
羊，彼處恃地險鎗利，不習馬戰，僅繳馬二三百匹，累日輸送  
軍糧，男婦荷戴，絡繹不絕，駐循十四營，皆有餘糧矣。遍勘各  
莊，礮臺礮樓皆已平毀，其沈家韓巴兩堡礮臺，明代所築，亦  
皆廢之。復繳賠修城廨廟宇銀萬二千九百兩，陳湜令代理，  
循化廳同知汪聲元經收辦理，事定，陳湜遣何作霖及崔偉  
兩軍回西甯，令循城文武到任視事，乃合規巴燕戎循化地  
勢，分營扼要，使與西甯礮伯河州聲息相通，遂率親軍回蘭  
州。左宗棠令地方有司招徠賑撫，清釐地畝，行保甲建義學。

及舉辦一切善後事宜，冀得長治久安，永紓邊患焉。肅城外禮拜寺，乃由塔爾灣出嘉峪關路也。賊以官軍奪據其竄路，力爭之，以三千人圍攻，戰敗，退駐城邊廢牆內。據牆爲營，外據深濠，又於濠內築牆，憑牆放鎗礮。牆內潛開地道，徐占彪亦於禮拜寺四面浚濠，截之。復於寺西長濠內築礮臺，移後膛礮擊賊壘，相持四晝夜。官軍迭爲戰守，賊猶苦抗。亦於西南築礮臺，斷禮拜寺出入之路，占彪開後膛礮轟倒之。臺上賊盡斃。賊復乘夜撲官軍，長濠官軍發後膛礮四十餘響，賊始敗入濠溝，復相持兩晝夜，遂分竄北城。官軍兩路夾擊，仍入濠，復由濠退入城，遂累日閉城不出。甲子城中逃出漢民，稱賊見官軍合圍，擬突圍逃命，又爲眷口所累，將擬殺眷而



逃占彪以回性殘忍，事或有之。遣各營晝夜防守，復就金慶元戴宏勝兩營外重開長濠，逼河灘誘賊出戰。丁卯戊辰，賊出戰，皆敗。還壬申，金順移營近湖灘，賊復出戰。金順徐占彪、楊世俊等軍環攻，鏖戰四時，先後斃賊四五百。賊敗由南稍門入城。五月丁亥，宋慶遣所部提督蔣東才馬步六營抵肅。逼東城築壘。乙未，復逼小北門築卡。宋慶復遣總兵李寶林等五營繼進。乙巳，親赴肅州，與金順、徐占彪會勦。丙午，占彪於禮拜寺築礮臺，置後膛礮位。六月戊申，發礮百十五響，肅州城高三丈六尺，厚三丈有奇。礮子入土轟炸處，象類蜂房，而城未迸裂。己酉，復轟百五十礮，城之圯者，賊旋補之。於是各營皆增修營卡，築礮臺。丙寅，金順軍發開花礮轟塌城東。

北角三四丈擬麾軍上城而關城阻濠濠內泉眼冬夏不涸古所謂酒泉者也賊於濠頭築壩遏水水深不可踰仍廢而返閏六月庚寅夜掘決壩頭濠水辛卯徐占彪遣各營運土石填濠壬辰乘賊懈占彪宋慶各選壯士越濠進攻占彪親率總兵李玉春參將方友升游擊武朝聘首先登城賊由北西蜂擁來撲皆頭裹白巾袒臂謹譟金宋兩軍蟻附而上遂克其東關賊遁入大城閉門拒守於是北稍門南稍門太南門皆出死黨夾擊官軍官軍皆擊之退宋慶駐東南角樓金軍駐東北角樓乙酉徐占彪督隊於中街紮卡守禦城內出賊二千奪卡占彪督隊卷賊左股兩中鎗子皆洞賊首馬六元帥得振者關外著名悍賊是日左額中鎗子死辛丑左宗

棠遣副將賴長解後膛礮及開花礮子到營壬寅徐占彪合  
蜀軍於城南半里許築營卡二所癸卯賴長發大礮轟坍三  
珠大南門出賊二千餘奪卡方友升見賊入卡令騎兵下馬  
巷戰友升頸中飛子貫脊骨賊乘勢撲礮臺賴長令礮隊以  
洋鎗測準擊之斃悍賊十餘賊竄入城占彪仍令各營修卡  
守之此次戰死者守備王安邦楊世泰李春榮千總劉映富  
李占奎李長勝湯得貴李均貴曹國洪余占春張有貴熊王  
山左宗棠以徐占彪被創未能親歷行陣又各郡縣善後事  
宜亦宜親往諮詢利病以期妥協七月乙丑自省城率隊赴  
肅州八月戊子抵肅州駐營城南兩里許己丑巡城關各軍  
約期會攻金順於城東北角掘地道備至期舉發徐占彪楊

世俊各選壯士於城西南角塞賊壕備乘城庚寅馬四遣人乞撫請出關討賊贖罪宗棠不與批答惟榜諭城中回民老幼婦女免死其誠心求撫者淮赴營聽遣馬四得榜諭匿不張貼壬辰城北角地雷發宋慶所部游擊張林麾軍冒鎗石登城中礮子死癸巳徐占彪楊世俊於城西南各掘地道乙未五鼓徐楊兩軍地雷並發世俊率壯士先登世俊持刀督戰甫上城礮子飛中世俊腦扶救歸營而死占彪仍督隊猛撲復戰死二十餘人礮傷者五百餘人城仍不下左宗棠商議賊據孤城援盡糧乏何憂不滅但仰攻徒損精銳不如仍修濠壘用後膛開花大礮向城轟擊增掘地道以困之時劉錦棠自西甯取道永安赴甘州候調左宗棠以前所撫定河

湟番回本賊舊黨可籍以用奇乃令錦棠率湘軍及諸番回  
來助勦九月乙卯錦棠軍至宗棠令駐營南門遂令陝甘撫  
回崔偉法鏡泉等日馳馬城下大呼馬四及各賊目告曰汝  
死期已至善自爲謀庚申馬四親詣左宗棠大營泥首乞命  
金順宋慶徐占彪劉錦棠皆在座當諭馬四汝罪不赦仍宜  
繳馬械造土客各回戶口清冊聽候審辦安插並令將各悍  
目赴大營聽諭馬四皆唯唯聽命於是陸續款營呈繳鎗礮  
刀矛二千有奇戰馬大半餓死或宰食充糧僅繳七十餘匹  
於是點驗各回於附近廢堡安置拔出漢民男婦千一百餘  
丙寅夜土回頭目金自明領賊眾數十由大北門竄出金順  
督隊轟殲之金自明伏誅戊辰左宗棠令提逆首馬四馬永

福馬照馬金龍馬良臣朵阿渾等數其罪磔之中軍金順宋  
慶徐占彪劉錦棠將各凶悍客回千五百七十三人悉數駢  
誅城中土回除拔出老弱婦女九百餘人其壯丁五千四百  
餘人夜中諸軍入城縱火鎗轟矛刺勦除淨盡肅州遂平其  
老幼男女遞解蘭州設局留養俟擇地安插於是關內全境  
肅清方議振旅出關以事西討云

論曰馬化澄始終爲陝回乞撫用濟其陰謀復潛驅其眾使  
抗官軍馬四能誘脅官吏攘權以自尊爲回中之最譎者矣  
然皆徒知守一堡一城以自固其於駕馭控制之方固未聞  
也及其敗也皆面縛泥首歎軍門乞命抑亦勇夫重閉而無  
雄才者歟然其時甘肅一省羣回蠢動渙散敗爛不可爬搔

前後督軍者舉不得其要領竊謂劉公松山之神勇如迅雷  
下天當者齋粉左文襄公之信義如太陽當空凌冰立釋嚮  
使無此二者互施交濟使羣回較然知所趨避而無少疑慮  
則成功未必若是之速也編中多本奏牘而兼采雲閣氏之  
書雲閣未詳何人其於蘭州肅州及關外事皆似目擊而痛  
切言之者有足貽來者龜鑑焉故錄之









28 27  
ChL3940 4282  
28

4

THE UNIVERSITY OF CHICAGO  
LIBRARY  
1207 EAST 58TH STREET  
CHICAGO, ILL. 60637  
SEP 21 1929







平回志卷七

太湖王志沂

東湖楊毓秀子堅纂編

受業長陽張榮澤全校

侄楊存澤

蓬溪紅杏山房雕

志新疆一第七

出嘉峪關外，天山南北，舊爲準回二部，皆古西域地也。

國朝平準噶爾之地，易其名曰伊犁，曰烏魯木齊，曰巴里坤，其城則曰惠遠，曰惠寧，曰熙春，曰綏定，曰廣仁，曰瞻德，曰拱辰，曰塔爾奇，曰甯遠，曰庫爾喀喇烏蘇，曰塔爾巴哈臺，皆在天山以北，天山南路則爲回部。乾隆時，其酋布拉敦、霍集占。





平回志卷七

太湖王志沂

東湖楊毓秀子堅纂編

受業長陽張榮澤仝校

侄楊存澤

蓬溪紅杏山房雕

志新疆一第七

出嘉峪關外天山南北舊爲準回二部皆古西域地也

國朝平準噶爾之地易其名曰伊犁曰烏魯木齊曰巴里坤

其城則曰惠遠曰惠寧曰熙春曰綏定曰廣仁曰瞻德曰拱

辰曰塔爾奇曰甯遠曰庫爾喀喇烏蘇曰塔爾巴哈臺皆在

天山以北天山南路則爲回部乾隆時其酋布拉敦霍集占

兄弟變亂大兵就平之其地分東西各四城西四城曰喀什噶爾曰葉爾羌曰英吉沙爾曰和闐東四城曰烏什曰阿克蘇曰庫車曰闕展其後又以東路哈密土魯番哈喇沙拉三城爲回疆門戶設將軍參贊都統提鎮及辦事領隊諸大臣及侍衛司官有差其回部司事各官則曰伯克南北兩路皆統於伊犁將軍南諸城則節制於喀什噶爾參贊大臣所謂新疆也新疆定後乾隆二十五年烏什回戶作亂殺辦事大臣蘇成自二月至七月始平徙其老幼萬口戍伊犁道光時布拉敦之孫張格爾犯邊陷西四城七年長齡楊遇春勦平之禽張格爾於喀爾鐵蓋山同治元年陝回亂起有教首阿渾安明者貧無業略識漢字以星祿卜筮游金積河湟間與

各回目相識。乘亂由西甯潛出關。至烏垣。寓參將索煥章家。假星卜煽誘羣回。從者日衆。煥章爲前甘州提督索文子。素懷不軌。得妄明推爲掌教。傳演經典。以師事之。常以其言蠱烏魯木齊提督聶布沖。布沖信之。二年。二人遂糾合各回謀亂。藏軍械於禮拜寺中。人言洶洶。而布沖莫之察也。三年春。紅廟子滿城都統平某。假防堵爲名。檄各州縣加征民糧。綏來知縣毛運吾。以爲加征恐失民心。平大怒。將坐以阻擾軍機之罪。運吾遂棄官去。復加征至奇臺。知縣恆顛亦不應。惟迪化知州孔福應之。於是平竟自遣主事舒額。四筆帖式裕厚等前往。按畝勒征。嚴刑催比。而本州快役馬全。官馱戶馬八。皆回民。倚勢苛索。民情愈不安。有奇臺富戶住家耕梗兒。

饒田產租戶數百家征斂尤重聚眾籌議皆忿忿怨馬全等  
入骨遂陰通木壘河漢民結團以抗苛征制回眾木壘河舊  
有秦鞏游民內地流軍及本地租戶素與回械鬪結仇甚深  
回民間之大懼時文武官署充役入伍者回居大半各訴其  
事於官官置不理遂欲興團以備漢請於奇臺縣不許馬全  
遂揚言曰漢起團以戕回不聞官禁之回起團以防漢官又  
不許明明欲殄滅我類矣不如早爲之所於是回中無賴者  
皆應之而其殷室有室家者多不從數日聚眾不滿百人四  
月在奇臺市與漢民決鬪回大敗遁入南山已而南路庫車  
回叛聶布冲遣兵往勦所遣兵多回族未至哈喇沙爾中途  
卽潰潛入烏城遂與城回謀舉城反當回兵入城時索賊猶

給布沖曰。回不爲亂也。有戍卒朱姓者。得回謀叛實徵。以告布沖。布沖惑於索賊反誣朱以謠惑衆。誅之。朱臨刑大呼曰。我死不足惜。獨惜百萬生靈。盡死回手。從容受刑。觀者皆流泣。自是無敢以賊情告布沖者。六月。索賊領死黨十數人。潛伏提督廳事後。而自入內署。布沖方與客飲。索賊僞爲報庫車軍情者。胸布沖曰。有密事白。請暫出。布沖辭客出。至煖閣。方欲問訊。索賊突出。袖劍刺布沖透胸而死。遂呼衆入臥內。殺其家屬。奪印綬。劫取庫藏軍械。於是回衆悉歸其隊伍。遂傳令漢兵速降。不聽者殺之。城中大亂。遂奪踞漢城。而推安明爲僞清真王。僞號清真。二千八百九十三年。封索賊爲僞元帥。以其親信馬升爲僞先鋒。時漢城內外商賈輻輳。貨賄

豐盈下令封市集搜括財物復招南山馬全等合兵進圍滿城平都統莫知爲計惟閉門日望援兵自六月至八月無一至者城中兵多虛額又皆老弱未操練促之出戰甫交綏卽大敗死者五百餘自後不敢復出困守百餘日城遂陷索賊擄鎮迪道尹某將囚之其母責之曰爾父官居一品吾榮膺詰命爾亦官三品世受

國恩今乃作叛賊執職官罪當族矣索賊乃舍之尹不堪凌虐居二十餘日仰藥自盡其眷口四十餘皆投井死平都統聞賊入城攜酒肴往迎欲與講和行至鼓樓遇賊前隊死於鎗槩孔福於城被前一夕僞爲亂民逃出賊由是分竄東西兩路凡阜康吉木薩哈密古城奇臺綏來昌吉等處俱爲攻

陷吐魯番呼圖壁庫爾哈拉烏蘇等處各回皆叛附之新疆  
數十城僅巴里坤一城猶全於是妥明自據烏城而降索賊  
爲散頭目使據吐魯番復以馬升馬官馬太馬仲爲僞元帥  
移檄僞封關內馬四爲肅州元帥馬朵三爲西甯元帥馬彥  
龍爲河州元帥馬化澂爲甯夏元帥遂分隊竄擾南諸城而  
南諸城乃爲纏頭所陷先是奇臺縣東四十里有東村口路  
通南諸城村後有地名中梗爾乾隆時安置叛種百餘家隨  
纏頭教不服王化後漸蕃衍往往至庫車等處行劫諸城多  
受其害回時人少引纏頭爲助共取南諸城及城拔纏頭竟  
自踞之安集延者本浩罕舊部其國城塔什幹爲俄羅斯所  
破安集延有小頭目自稱和碩伯克收合餘衆乘機由喀什

噶爾次第攻拔南諸城其始不事刼殺於漢官民商賈遇之甚厚故纏頭樂附焉北路伊犁戍遣者平日多恃強驕橫官常防制之及回亂將兆咸欲聚團相保苦爲官禁遂不備回而回終懷猜疑謀通纏頭將伊犁九城相繼陷沒後復與纏頭相惡索賊知之遣黨數千往取伊城竟爲纏頭所敗而俄夷遂乘機入先以兵二百試之繼以雄師四百壓境回與纏頭畏俄強不敢出戰因相率迎降伊犁遂爲俄人所踞回之據烏城也各營制兵皆閉門不出甚至乘隙抄掠爲民害始有張和張興鄧某者團練數千人頻年與回戰以不知兵乏聲援相繼敗亡而徐學功獨以勇傑稱學功者幼貧賤十二歲時遇人授刀矛技藝至二十二歲烏城陷逃居鄉邨結壯



士二十餘人，以劫掠回莊財物度日。回追急，則入山避之。由是漢民避亂者接踵來附，積一二年，有衆千人。三四年後，老幼男女至數千人。數年以來，與回相持，無月不戰。所練馬隊，驍勇絕倫。每戰必衝入賊陣，趨捷剽利。賊鎗礮不及施。每收隊回寨，衣袴鞍韉皆血淋漓。雖不善爲營壘，前後殺賊已一萬有奇。斃賊目數百，賊僞元帥馬太馬仲皆爲所殺。賊每聞學功至，無不膽落。時安集延尙在南諸城，聞學功名，遣使與學功講和，約同攻吐魯番。合圍八閱月，回賊詐降者再。烏垣賊來援者三，皆爲安夷所敗。城拔後，安夷縛回之精壯者，赴南諸城。同學功進攻烏城，抵距城四十里。賊傾巢出戰，爲學功馬隊衝敗。斃賊五六千。安夷亦斃賊萬餘，殺其僞元帥馬

官進逼烏垣。安明大敗，不敢入城。走綏來。數日病死。餘回隨索賊降安。安夷始冀學功成功後，以南諸城獻

朝廷，保其封哈密王。後與學功接談數月，鄙夷之，以爲功雖多。一勇夫耳，終不能成大名。遂仍以烏城與同學功，亦懷快。快常以馬隊攔截安夷商貨，殺斃安商無算。安夷遂與回合謀。同治九年八月己酉，率馬步萬餘攻學功，適其部下勇丁歸家度中，秋人少，爲安夷所敗，走綏來縣之南山。安夷遂留小頭目領隊守烏城，恣行淫虐，回不堪命，復降學功，合力攻殺安夷。學功率隊至烏城，與安夷鏖戰數月，互有勝負。後以糧罄返南山，回衆遂仍附安夷。十年冬，俄夷以駝馬數千載洋貨及俄鈔二萬餘，約纏頭及伊犁逆回赴綏來貿易，爲龔

取綏來烏垣計行抵拒綏來八十里石河學功率馬隊剿之  
殺斃數十人盡得其駝馬貨物由是俄夷不復東窺

十一年春都統景廉領兵抵古城聞學功能抗回遣弁往撫  
至綏來之沙山收集餘勇六七營分駐要隘兼令屯田且耕  
且戰然數年來未能攻克一城

十二年秋陝回白彥虎率眾數千分掠烏城綏來學功兩次  
截殺斃悍賊二百餘獲橐駝五百餘自後學功歸官節制無  
復從前之迅勇矣又有孔才者以團總保衛地方民多賴之  
剿殺回賊甚多後以勇二百投哈密辦事大臣文麟文麟編  
入隊伍遣往古城修堡屯田收得徐學功散勇二千人由此  
古城濟木薩屯田大興孔木之力也又肅州賊陰與金塔回

通尅期舉事。肅標把總侯建烈獲其傳書賊二人以告金民。金民累日捕城內回衆無少長皆殺之。焚其禮拜寺及各莊房。已而金塔都司馬萬福欲引肅回復仇亦爲戶勇所誅。金塔微城與賊逼處孤懸邊外士民一心保全十年之久爲後日進兵屯糧要道堅守之功不在攻城克敵下也。

光緒元年左宗棠旣平關隴。

朝廷諮以關外軍事宗棠奏稱關外用兵宜先規復烏魯木齊而南之巴哈兩城北之塔城皆宜增置重兵以張犄角關外統帥景廉正方有學術在承平時迴翔臺閣足式羣僚惟泥古太過少應變才金順心性和平雖失之寬緩然不忌嫉爲衆情所附平時粥粥無能臨陣尙能奮勉此臣所目擊者。

臣於景廉而知古所稱殷浩房瑄終不失爲清流於金順而知古所稱宮之奇董安于終不失爲智士以現在全局而言金順既居前敵似宜以戰事責之關外統馭之權在烏魯木齊都統若以景廉之任改畀金順令得節制各城辦事領隊大臣而以金順所任改畀景廉似於前敵事宜呼應較靈又云用兵之道規模局勢先後緩急尙可預爲商籌至臨敵審幾致決瞬息不同兵情因賊勢而生勝負止爭呼吸臣忝預軍事閱時頗久竊惟用兵在先察地勢險夷審彼己情形而以平時所知將士長短應之乃能稍有定算其中有算至十分而用七八分已效者有算祇七八分而效過十分者亦有算至十分而效不及三四分者更有我算多而賊不應並有

賊算出我算外者始歎古人云多算勝少算每一發兵須髮  
爲白非虛語也平時用兵親臨前敵於地勢賊情審之又審  
可免貽誤亦有時不必親履行陣但畫定大局料賊情用其  
素信之將領亦可集事惟過則歸己功則歸人以策後效可  
常勝而不敗若以此驟加之別部異地譬如盲人道黑白又  
若繫人手足令其搏鬪求勝不能盡人之長適以成己之短  
耳三月乙丑

詔左宗棠以欽差大臣督辦關外軍務金順爲烏魯木齊都  
統幫辦軍務景廉調補正白旗漢軍都統來

京供職左宗棠復奏請令劉典赴蘭州幫辦陝甘軍務以資  
同心之助俾得一意馳驅無憂後顧又奏云西事稽延至今

未覩成效者。由於冗食多而戰士少耳。旗綠諸營。久不足額。惟取土著兵民及各處就食者。授地耕墾。一備軍食。一備戰守。無事則驅之隴畝。有事則效命鋒鏑。卽農卽兵。名非不美。調赴朔會。則彼此觀望。麾令前驅。則勇怯雜糅。旣挂名伍籍。又督之耕耘。譬猶左手畫方。右手畫圓。兩者相兼。一無所就。茲宜畫兵農爲二擇。其精壯有膽者爲兵。束以營制。一如內地軍營。其曾著戰績如徐學功輩。用之爲管帶。爲督帶。其才能辦事如孔才輩。用之爲幫辦。其愿弱不任戰者。散之爲農。按計戶口。指餘荒地畝。令其承墾。官給籽種耕牛。收穫後。繳本歸倉。更不取息。其所穫糧石。官準時價收買。庶簡其精壯。營伍可得而實。散其愿弱。屯墾可得而增。兩利之道也。關外

駐兵有錫伯索倫達呼爾察哈爾蒙古厄魯特沙畢訥爾及  
綠營攜眷兵換防番戍兵之分亂後舊制不可復按而辦事  
幫辦領隊各大臣於本營存兵外兼帶馬步各營所稱馬步  
既罕能戰之兵而各員又非盡知兵之選徒糜餉糈無濟實  
用都統及各大臣力主畫地自封閉關謝客之議以護官私  
屯糧不顧兵事利鈍金順進駐古城張曜進屯哈密遲回不  
前而後隊尙迢迢原防者以此現巴里坤古城已辦採運哈  
密已開營屯張曜金順兩軍留後之隊應卽陸續啟行兵力  
既增則屯丁可減竊惟此時必分別兵農責兵以戰課農以  
耕而後餉可節兵可精也哈密巴里坤古城各大臣所轄兵  
依舊額就地挑丁壯補數但責其保守城隘不責以戰事脫



屯丁伍籍散之歸農則盡力隴畝民樂耕其野而官屯私地畝收穫餘糧準時價發糶民益得其饒不但分駐各軍可資接濟卽調發續進之師亦可就地採買於軍事更覺順利較之近此農兵兩荒不猶愈乎請

飭下金順文麟遵辦庶於時局有所裨益臣擬俟前敵糧運充裕甘省防守布置周妥卽簡率大軍進駐肅州區畫各軍西討

二年正月統領吉江馬隊涼州副都統額爾慶額聞白賊糾合瑪納斯南北兩城踞回將竄擾糧道因與總兵馮桂增參將徐學功約以辛酉會師大河廠進取瑪納城額馮兩軍先行辛酉寅刻逕薄瑪納斯北城北城瀕危南城賊馬步千餘

蜂至桂增縱橫馳突身負重創墜馬賊昇擁入城額爾慶額  
憤極陷陣斃賊多因弁勇傷亡亦多遂收隊回徐學功屆期  
進發行距瑪納斯城十餘里見兵勇紛退額爾慶額被創回  
遂率所部救護敗軍收隊回金順以學功救援不力摘去翎  
頂左宗棠聞報以爲額爾慶額等輕進貪功咎由自取兩軍  
先夕進攻尤非徐學功所能預知也二月庚午劉典抵蘭州  
左宗棠與商摧軍務及善後事宜癸未宗棠率親兵馬隊自  
蘭州進發其所部前隊二十四營先期由涼州啟行令至肅  
州會師次第繼進臨發宗棠奏略曰烏魯木齊踞賊土回居  
多白彥虎所領陝甘逆回皆踞紅廟子古牧地瑪納斯等處  
與南路踞賊怕夏通怕夏卽安集延回首和碩伯克也怕夏

當卽伯克轉音俄羅斯旣滅浩罕踞其塔什干都城浩罕  
部安集延獨免同治四年乘回部之變入踞南路喀什噶爾  
及各回城於是吐魯番闢展以西土回皆附之怕夏能以詐  
力制其衆又從印度多購西洋鎗礮勢益猖獗陝甘回及土  
回均倚重焉獨不敢顯與俄羅斯較是俄兵之強可知俄人  
頗言其狡猾異於諸賊是安集延之強亦可知也官軍出塞  
自宜先剿北路烏魯木齊各城之賊當北路進兵時安集延  
或悉其醜類與北路賊合抗官軍授如天之福白賊授首安  
集延賊就戮由此而下兵南路其勢較易是致力於北而收  
功於南也若賊先圖自固不敢互相援應但期固守以老我  
師則曠日持久亦意中事外間議論頗謂軍臨前敵陝甘竄

回必有倒戈之事臣不敢信其誠然卽令誠然白賊必逃入南路安集延未經重創其狡焉思逞之志不忘也如其併力穩抗自可獎率師徒爲一了百了之計倘詭詞乞撫仍思踞我腴疆或兵至則逃妄擬乘間竊逞爲死灰復燃之計則新疆隱患方殷豈可不預爲之所議者但以陝甘竄回及新疆各城爲慮不復知有安集延竄踞南路之事或以爲事可緩圖或以爲功可速就或至撤兵節餉之議並爲難得易失之談辯說紛紜橫議歧出揆其命意皆因裨益洋防起見豈真由衷之談哉臣本一介儒生辱蒙

殊恩高位顯爵爲平生夢想所不到豈猶思邀功邊域况臣年已六十有五正苦日暮途長乃不自忖量妄引邊荒鉅艱

爲己任雖至愚極陋亦不出此而事顧有萬不容已者焉魯  
木齊各城不克無總要之處可以屯兵各城旣克重兵鉅餉  
費將安出康熙雍正

兩朝爲之肝食者準部也乾隆中準部旣克繼平回部始於  
各城分設軍府然後九邊靖謐者百數十年是則拓邊境腴  
亶以養兵之成效也今雖時易世殊不必盡遵舊制而伊犁  
爲俄人所踞喀什噶爾各城爲安集延所踞事平後應如何  
布置尙費綢繆若此時卽置之不問後患環生不免日蹙百  
里之慮區區愚忱竊有不敢不盡者三月乙巳駐軍肅州劉  
錦棠先率馬步全軍駐城北漢中總兵譚上聯領所部先進  
寧夏總兵譚拔萃繼之陝安總兵余虎恩又繼之四月壬戌

劉錦棠親率漢回馬步各軍啟行，擬抵安西後分隊續進。以師過哈密，行戈壁中，水泉缺乏，故也。閏五月，劉錦棠令各軍均就哈密，取存糧，踰天山，由巴里坤抵古城，候令進止。自率輕騎赴濟木薩，金順行營商定方略，詢知土回馬明所踞爲古牧地，迤西而南數十里，爲烏魯木齊紅廟子。必先攻古牧，撤烏垣紅廟之藩籬，乃可成搗穴犁巢之舉。又會師進勦，必先據要地，爲儲糧屯師之所。濟木薩距烏垣尙遠，不能扼賊之吭。阜康地當賊衝，錦棠注意於此，一爲進攻古牧地，一以遏賊奔衝。錦棠旣與金順會商，卽馳赴三臺，滋泥阜康一路，相度布置。錦棠所部分駐木壘河迤東，其迤西百三十餘里，奇臺古城諸處，金順遣原防各營駐之。哈密則張曜十二營

駐之巴古則徐占彪一軍駐之左宗棠復咨委烏魯木齊領隊大臣錫綸赴沙山一帶預籌截剿分撥各兵歸其統領錫綸生長邊陲熟習蒙部情形爲人個儻與金順榮全皆稱相得近屬俄人代買軍糧由沙山運送皆錫綸迎護茲令防勦竄匪更爲攸宜六月壬辰左宗棠奏曰竊維用兵宜布遠勢金順所陳請將塔爾巴哈臺索倫等隊扼烏魯木湖科布多蒙古等隊扼布倫託海或烏梁海通中之地烏里雅蘇臺黑龍江等隊扼沙札蓋因賊騎颺忽特甚北路平沙廣漠防不勝防故爲此節節邀截之計臣以賊之情勢度之白彥虎迫脅出關者非皆其死黨若白賊復劫其棄眷屬北竄遐荒似非所願至關外土回自勘定後馴服有年已成積弱之勢嗜

亂者無多縱糾其北竄亦必無應之者如大軍進逼環攻諭以勦撫兼施之意釋脅從而急渠魁解散必衆賊如從阜康境內竄出劉錦棠金順所部截之自有餘力從瑪納斯竄出近則孔才各營稍遠則錫綸各營截之亦不可令其脫走而塔爾巴哈臺後路又阻其前英廉所部雖單榮全應挑撥勁旅歸其調遣或扼之烏魯木湖或就近擇要截擊皆可摧操勝算惟備禦不虞古之善教科烏兩城舊爲邊城要地自古用兵西北皆從北路從無由南路者當此殘賊喘息僅存而使百密一疎亦非全策如慮兩城兵單則

諭調精兵於科城烏城前路擇要扼防或卽由兩城領兵大臣添調防兵嚴遏奔衝以資周防北路兵事當可尅期告藏



伏懇

申諭榮全廉額等實力籌維，共襄茲舉，毋因惜小費而忽遠  
猷，則誠時局之幸也。六月丁酉，金順進駐阜康縣城，劉錦棠  
駐城東九營街，白彥虎聞之，由紅廟子移踞古牧地，糾合同  
目併力迎敵。安集延亦遣黨助戰。阜康西至黑溝驛七十里，  
縣西一帶深林蔽日，野潦縱橫，三十里爲西樹兒頭子，有廢  
渠可引縣西之水，以供汲飲。由此五十里抵黑溝驛，則盡戈  
壁，無水泉，中惟甘泉堡有一智井，開濬僅供百人一日之需，  
不能駐軍。錦棠詢知士人云：黑溝驛上爲黃田，水盈溝澮，上  
流卽古牧地，賊於此築卡，斷官軍汲道。迨官軍令由大道越  
戈壁而來，前阻堅城，人馬渴乏，可乘其敝也。戊甲，錦棠拔營

至城西十里督勇丁開溝引水至二十里之西樹兒頭子築壘焉已酉遣各隊至甘泉堡掘智井以示賊將由大道進以懈其黃田之防賊騎覘之卽引去庚戌夜錦棠會金順軍進襲黃田行至方曙卡賊騎馬出迎旋聞古牧地附近角聲四起錦棠與金順率所部先踞山岡金順進右路錦棠分兩路進左部署定余虎恩黃萬鵬等先率馬隊分馳下山賊騎迎敵遂奮擊之賊且戰且走復步賊來會余虎恩等馬隊張兩翼抄之譚拔萃等步隊由中路衝出賊遂大敗卡賊棄輜重狂竄各隊躡踪追殺逕抵古牧地錦棠見古牧城堅難猝拔遂收隊駐黃田壬子錦棠分營駐古牧地城東北癸丑會金順軍攻破其城關及山壘遣各營據之紅廟子援賊來撲戰

逾時賊敗潰兩軍合追至卡子溝收隊斃賊千餘丙辰兩軍  
攻克古牧地城城中悍賊五六千盡殪其逸出者預遣馬步  
截殺之錦棠所部弁勇死者百五十八受傷者四百餘錦棠  
以烏垣賊已聞風膽落乘勢直搗可一鼓下之古牧地關壘  
克復時賊首馬人得及白彥虎等聚議以官軍鋒不可當先  
遣婦女輜重南竄留精壯駐守後見官軍大至遂相率逃奔  
戊午錦棠親督軍進烏垣金順繼之行近七道灣堡餘賊見  
官軍皆飛騎竄走至近烏垣十里城中賊皆紛紛南遁遂收  
復迪化州烏魯木齊及其前僞清真王妥得璘所築之王城  
妥得璘者卽妥明也遂追北及城南三十里池墩踰此而南  
卽戈壁遂收隊是役斃賊五六百錦棠所部弁勇死者百三

十人，城中難民及避匿山谷者，皆設法安撫之，遣直隸州袁  
奎齡經理其事，委以代理，迪化州篆俾專責成焉。昌吉呼圖  
壁等城踞賊，皆先後聞風南竄，安集延酋怕夏遣賊五千騎  
來援，至距烏城百八十里大板地，亦聞風退。是日總兵孔才  
會副都統福珠哩軍，攻克瑪納斯北城，逆首余小虎率衆東  
竄，死事者佐領長德、驍騎校祥來、都司孔憲明，守備樂萬德，  
把總李發魁。於是新疆北路肅清。初，安明踞烏垣，嗾其黨馬  
泰興、安集延戰於庫車，爲安集延所敗，安集延復往吐魯番，  
糾安明之黨馬仲攻敗安明，安明乞降，仍令爲清真王踞烏  
城別，以馬仲爲阿奇木，總管其事。後徐學功陣斬馬仲，其子  
龔阿奇木僞職，與安明積不相能，復糾安集延攻之，安明旣

斃其黨馬明馬官等悉降自是安集延遂於烏垣征收地稅  
令漢回髡髮易服效其舊俗皆光頂圓領以自別而烏垣各  
城遂淪爲異域矣怕夏之降妥明也盡掠其遺賫搜括漢回  
金帛輸歸南路實其窟穴而驅其壯丁守烏垣各城以爲屏  
蔽迨白彥虎來奔自度勢力不敵安集延乃思藉爲聲援以  
自固凡怕夏所欲不敢違也故怕夏日富而土回日益貧比  
聞大軍由巴里坤古城席卷而來白賊亦髡髮圓領附於安  
集延以紿其死黨與土回堅拒官軍自觀成敗伺間脫走是  
則此賊之慣技也左宗棠奏略云此次兵進北路者一在扼  
賊紛竄以省防兵一在下兵南路防賊牽綴乃由關內踰伊  
吾車師越天山蒲類重險與犬羊相角逐不自忖兵餉之足

與否置成敗利鈍不顧者蓋不得烏魯木齊無駐軍之所且賊如紛竄無以制之不僅陝甘之憂卽燕晉內外蒙古將無息肩之日若停軍巴古以東瘠區兵少無以扼奔衝兵多徒耗軍餉無論非時局所堪卽四海晏安軍儲贍裕亦斷難爲持久計今幸旬日之間遞下堅城肅伸

天討固非微臣始念所及也七月己未瑪納斯南城土回頭目黑寶財率其黨南竄其餘賊尙踞城死守而北路各城敗賊伏匿東南山谷間劉錦棠下令分路搜山譚和義等率所部取道七道灣赴東山黃萬鵬等取道大小鹽池墩東南至柴窩堡皆略有斬獲俘賊稱敗賊眷口輜重皆南徙其壯丁集柴窩堡西百二十里達板城白彥虎于小虎等踞南山小

東溝口、乙卯、劉錦棠率各營向小東溝口進發、比至則聞賊  
眷先一日移金口峽、復追至金口峽、而白于諸逆則已率黨  
竄託克遜安集延賊巢矣、庚午、錦棠仍返烏垣、維時怕夏以  
騎賊五千合烏垣紅廟逃賊踞達板城以拒官軍、怕夏自居  
託克遜築三壘爲犄角、與其悍黨守之、白于兩賊之入託克  
遜也、怕夏遇之甚倨、勒其黨傍三城以居、蓋賊之守吐魯番  
者、以拒哈密官軍、其守達板城者、以拒烏垣官軍、皆所以護  
託克遜堅巢也、左宗棠遣張曜率所部嵩武軍由哈密之西  
入吐魯番界、取道七克騰木、以向闢展、遣徐占彪率蜀軍由  
巴古分隊搜山、凡通吐魯番各徑皆搜捕之、其馬步大隊則  
由木壘河進、木壘河地勢寬衍、可容萬騎、亦饒水草、爲通吐

魯番大道雍正中岳鍾琪奏請以重軍駐之者也九月甲戌左宗棠以官軍南下籌調客軍厚集兵力奏略曰南路由吐魯番而西歷喀喇沙爾庫車阿克蘇葉爾羌英沙爾以抵喀什噶爾計四十九臺爲程四千一百餘里較之烏魯木齊至伊犁千三百餘里遠逾三倍茲擬以劉錦棠全軍自北而南張曜徐占彪自東而西以規南路馬步共四十餘營兵力不爲不厚然大軍前進不特後路根本之地兵力宜增卽糧餉軍火亦宜層遞設局以便取用是監護不可無軍也前敵攻克城堡必留營駐守以資撫輯是留後不可無軍也師行日遠留防之兵日增進戰之兵日減况轉戰千里士卒傷亡疾病又所不免乎南路地勢東南長而西北狹由吐魯番達板



城西至阿克蘇可一路隨行，無取分途並進。至阿克蘇則局勢寬濶，中路千四百里抵葉爾羌，又三百六十里抵英吉沙爾，又二百里抵喀什噶爾，而阿克蘇之北逼近伊犁，葉爾羌之東南又遙與和闐接，皆宜分遣大隊扼其總要，然後直搗中堅，可速集事。道光時張格爾之變，僅踞南路西四城，故長齡楊遇春兵由烏魯木齊托克遜進，其時長清先扼阿克蘇，憑河擊退賊衆，扼守阿克蘇，然後東四城無敢蠢動，官軍乃得據無賊之地以擊賊，卒成底定之功。此次進兵局勢如昔，而吐魯番、達板城、托克遜皆爲賊踞，前途二千餘里皆爲賊守，其致力難易判然。然而餉絀兵少，又不如當時遠甚，與其徘徊中道始請濟師，正恐曠日需時，事有不可測者，現駐包

頭提督金運昌前在甘肅寧靈會勦所部淮勇好勇尙氣甚耐勞苦近在包頭軍民相安頗得時譽以在防無事堅請隨征聞其軍馬步五千有奇尙稱精實請

飭其迅速拔營西來歸劉錦棠調遣庶錦棠中路之軍得此後勁可以一意馳驅而將來克復各城有移駐之軍則前敵兵力常足不虞竭蹶矣九月戊寅官軍會克瑪納斯南城全順軍自七月望抵城下至八月望五次攻城弁勇死者六七百斃賊千餘礮轟城圯者再賊抵死守禦夜以繩繫草灌油燒之光如白晝城轟缺處旋以蘆薄裹土塞之近城屋頂俱築垛口置鎗礮提督孔才副將方春發等多方攻薄不能下劉錦棠乃遣羅長裕譚拔萃黃萬鵬董福祥各率所部馳援

伊犁將軍榮全亦來會勦開長濠掘地道復轟城塌二丈餘  
官軍從缺口入賊憑城內短垣施鎗礮牆上鎗石紛飛無隙  
可乘賊復於缺口豎木柵以溼氈裹柵上鎗礮不能入會地  
道成發地雷轟塌其城北二丈餘壯土方鼓勇爭登忽南風  
大作煙塵障天賊乘勢猛撲官軍多死賊復乘夜兩次越濠  
來撲官軍皆擊走之已而僞元帥韓刑膿中礮死接充頭目  
者爲海晏赴徐學功營求撫金順諭以繳馬械獻各逆首然  
後造名籍聽辦海晏聽命次日平明賊衆二三千突出西門  
老幼婦女居中悍黨持鎗械夾衛之金順知其詐遣所部列  
隊城北湘軍列城南皆嚴陣以待別遣馬隊分駐隘口防竄  
逸令徐學功前往開導使棄鎗械卽免死僞元帥何碌忽發

洋鎗揮衆撲壕、徐學功立禽、何祿斬於陣前、賊黨遂棄眷口、猛撲譚枚、萃董福祥等督隊禦之、金順軍由北鈔至、賊左右衝突、斃者大半、僞元帥黑峻以洋鎗自斃、其逸賊官軍分途追斬無遺、城中匿賊皆搜斬之、老幼婦女悉釋、勿誅、禽其僞帥馬有全、海晏、王奇玉、馬受等皆極刑處死、韓刑臙、黑峻及僞清真王尸骸一併掘戮示衆、官弁死事者百一十五員、提督李大洪、熊佑林、楊必耀、總兵張大發、杜生萬、司世道、參將陸輝先、副將胡耀羣、游擊楊占魁、把總邵芝尤爲慘烈焉、十一月左宗棠以北路肅清、請汰防軍、期收餉節、兵精實效、戊辰奏略曰、竊北路所宜籌者防、南路所宜籌者勦、主勦之軍程途愈進愈遠、兵力愈分愈單、故宜預籌增調、防軍則但就

地勢夷險衝僻定兵數多寡別籌游擊之師備緩急策應且  
防守之兵步宜多騎宜少策應之兵步可少騎宜多地有定  
形兵數固可得而定也綜計南路征軍不過四十餘營而北  
路金順所部二十餘營復合景廉十九營亦號稱四十餘營  
人馬之數與南路軍埒以驛程計之除伊犁未復不計則北  
路較南路縮二千里有奇此其可議汰者也又其月餉多至  
二十二萬兩較之劉錦棠見統各軍餉銀多至十二萬兩有  
奇而勢力未能一律若非分別汰減任其虛糜弱者與壯者  
勇者與怯者同一缺餉何以鼓舞羣情收戰勝攻取之效請  
汰金順所部併作馬步二十營則勇丁得有實餉自期翕服  
其娶有家室及汰遣之下願留口外者借以牛力耔種撥荒

廢無主之地令其承懇秋後以糧抵還仿古徙民實邊之意而無其勞費於時局實便近時古城巴里坤屯墾多用汰遣客軍比值歲稔價平屯丁獲利薪糧倍徙人情樂趨卽其明驗也

三年三月丁巳西甯道劉錦棠率十九營自烏魯木齊踰嶺而南己未會各營圍達板城壬戌以開花礮轟圯城中礮臺及月城最後一子飛墮城中轟然一聲山摧地裂風火迸作烈焰彌天乃知引然城中藥彈及開花子碎匄震撼賊中人馬骨騰肉飛賊急開東門走官軍攔截不得出錦棠傳令賊衆有能縛獻頭目者受上賞於是大小頭目悉致麾下無一人一騎漏網者是役斃賊二千數百生禽千二百餘獲馬八

百餘鎗礮軍械千四百餘，俘賊內有安集延夷官大通哈一人，名愛伊德爾呼哩，大通哈者，華言大總管也。又安集延胖色提六人，胖色提華言營官也。又王子巴什九十八人，王子巴什華言哨官也。大通哈愛伊德爾呼里願遣人馳報怕夏，縛送白彥虎以表歸順之誠，且願獻回南八城再求

恩宥。各胖色提同聲代怕夏乞款。錦棠令其歸陳怕夏，愛伊德爾呼里等願留軍中候怕夏回音，以自明。錦棠許之。其所俘南八城各土爾扈特種人及土回等皆給衣糧，縱令各歸原部候官軍前進，或爲內應，或爲導引，各回目皆驚喜過望，踴躍歡呼而去。其前潛赴烏垣求撫土回三百人，皆給牛種，令就達板舊城耕墾，使復故業。戊辰，錦棠行抵白楊河，維時

徐占彪及張曜等所部提督孫金彪軍分道攻克七克騰木  
關展魯克沁臺勝金臺哈拉和卓城遂進攻吐魯番於是錦  
棠遣羅長祐以馬步六營趣吐魯番會攻而自帥十四營由  
西南直搗託克遜城行九十里抵小草湖託克遜纏回報安  
酋聞達板失亟圖竄走白彥虎嗾其黨四出擄掠焚村堡脅  
纏回謀西竄泣求大軍往援且言所遣回目馳歸宣布威德  
回衆無復疑懼俱延頸以待官軍錦棠卽令將士傳餐馬隊  
先發步隊繼之抵近城十餘里與賊戰而錦棠大隊至賊遂  
驚潰舉火自焚其軍糧火藥棄城而逃已巳遂收復託克遜  
城自攻達坂至是將校前後死者四十二員於是回衆二萬  
餘齊跪馬前乞降錦棠悉受之而怕夏子海古拉及白彥虎



已前一日遷其輜重西竄矣。是日羅長祐等馳一晝夜抵吐魯番會徐張兩軍攻克其滿漢兩城安集延所置夷官阿齊木馬人得及回衆乞降羅長祐受之前克達坂所獲大通哈胖色提等遣其親信齎書於怕夏者迄未得回報五月乃知怕夏自託克遜竄庫爾勒將官軍所釋遣纏回目九百人殺其數十人監錮其半於是各城纏回感官軍威德愈憾怕夏不受其約束怕夏知人心已去日夜憂泣遂仰藥死其子海古拉沈其尸水中三日取出以香牛皮裹之舁以行至庫車爲纏回所殺其留庫爾勒之大通哈等聞之遂以糧倉軍火付白彥虎而皆西竄白彥虎遂移駐開都河西岸吐魯番旣

詔詢左宗棠以通籌新疆全局庚辰奏曰竊維立國有疆古  
今通義規模存乎建置而建置因乎形勢必合時與地通籌  
之乃能權其輕重而建置始得其宜伊古以來中國邊患西  
北恆劇於東南蓋東南以大海爲界形格勢禁尙易爲功西  
北則廣莫無垠專恃兵力爲強弱兵少固啟戎心兵多又耗  
國用以言防則無天險可限戎馬之足以言戰則無舟楫可  
省轉饋之煩周秦至今惟漢唐爲得中策其衰也舉邊要而  
捐之國勢遂益以不振往代陳蹟可覆按矣顧祖禹於地學  
最稱淹貫其論方輿形勢視列朝建都之地爲重輕我

朝定鼎燕都蒙部環衛北方百數十年無烽燧之警不特前  
代所謂九邊皆成腹地卽由科布多烏里雅蘇臺以達張家

口亦肯分屯列戍斥堠遙通而後

畿甸晏然蓋

祖宗朝削平準部兼定回部開新疆立軍府之所貽也是故  
重新疆者所以保蒙古保蒙古者所以衛

京師西北臂指相聯形勢完固外患自無隙可乘若新疆不  
固則蒙部不安匪特陝甘山西各邊時虞侵軼卽直北關山  
亦將無晏眠之日而況今之與昔事勢攸殊俄人拓境日廣  
由西而東萬餘里與我北境相接僅中段有蒙部爲之遮闔  
徙薪宜遠曲突宜先尤不可不預爲綢繆者也

高宗平定新疆拓地周二萬里一時帷幄諸臣不能無耗中

事西之疑

聖意堅定不搖者，推舊戍之瘠土，置新定之腴區，邊軍仍舊，餉不外加，疆宇益增鞏固，可爲長久計耳。方今北路已復，烏魯木齊全境，祇伊犁尙未收回，南路已復，吐魯番全境，祇白彥虎尙偷息，都河西岸，喀什噶爾尙有叛弁逃軍，終煩兵力。此外各城，則方去虎口而投慈母之懷，自無更抗顏行者。新秋採運足供，餘糧栖畝，鼓行而西，宣布

朝廷威德，且勦且撫，無難挈舊有之疆宇，還隸職方。此外如安集延、布魯特諸部落，則等諸邱索之外，聽其翔泳故區可矣。英人爲安集延說者，慮俄之蠶食其地，於英有所不利，俄方爭土耳其，其與英相持，我收復舊疆，兵以義動，彼將何以難之。設有意外爭辯，在我仗義執言，亦決無所撓屈。至新疆全

境尙稱水草豐饒牲畜充牣者北路除伊犁外奇臺古城濟木薩至烏魯木齊昌吉綏來等處回亂以來漢回死喪流亡地皆荒蕪近惟奇臺古城濟木薩商民散勇及土著者聚集開墾收穫甚饒官軍高價收取足省轉運其餘尙待經理始望復元南路以吐魯番爲腴區八城除喀喇沙爾所屬地多磽瘠餘雖廣衍不及北路而饒沃過之矣官軍近得腴地尙不及三之一若全境收復經畫得人軍食餉需可就近取資不至如前此之拮据也區區愚忱實因地不可棄兵不可停而餉事價絕非速復腴疆無從著手至省費節勞爲新疆畫久安長治之策紆

朝廷西顧之憂則設行省置郡縣事有不容已者懇

傷戶兵兩部將咸豐初年陝甘新疆報銷卷冊及新疆額徵俸薪餉需兵制各冊由驛發交肅州俾臣得稽考舊章斟酌時宜以便從長計議焉七月庚子劉錦棠先遣提督湯仁和率隊由託克遜進駐蘇巴什阿哈布拉兩處各營分道至曲惠安營己卯齊抵曲惠庚辰遣余恩虎黃萬鵬等十四營取道烏沙塔拉傍博斯騰淖爾西行出庫爾勒之背爲奇兵壬午錦棠率隊由大路向開都河進發爲正兵開都河源出天山之麓匯而南趨貫庫爾勒喀喇沙爾之中下流注於博斯騰淖爾古所謂洶澤者也白彥虎過開都西岸卽壅水以阻官軍漫流汜濫濶可百餘里深者沒頂遂舍淖路望埡地逕行六七十里過溪深丈許令將士泅水徑過復紆折行百二

十里達開都河東岸遣馬步五營造浮橋塞上流就墮地掘  
治車道九月癸丑錦棠入喀喇沙爾城城中水深數尺官廨  
民舍蕩然無存其纏回皆爲白賊脅之去於是錦棠諭和碩  
特臺吉札希德勒克速遷所管蒙民數百戶入城以實後路  
甲寅率蒙民嚮道探河淺處輕騎亂流而渡沿途民舍皆燒  
毀無居民乙卯過哈爾哈阿滿溝馬隊在前遇騎賊百餘縱  
馬追斬十餘騎禽兩賊皆陝回而效安夷裝束者稱白賊迫  
纏頭運糧入庫車聞官軍至將挾之隨行此來爲探官軍進  
止也是日余虎恩等亦從間道馳至比入庫爾勒亦空城闐  
無人煙適行糧已盡錦棠令軍士搜掘窖糧得數十萬斤遂  
委員招輯難回錦棠偵知白賊復至洋薩爾驅脅諸難回乃

精簡馬步各千餘爲頭隊，親率以行。令羅長祐領後隊及輜重繼進。戊午己未兩日行三百三十里，駐策達雅爾。諜報白賊於日內盡驅纏頭同回布告爾，卽令頭隊炊食，二更啟行。百八十里至布告爾，日方午回莊之前，賊騎千餘排列。黃萬鵬譚拔萃等擊敗之，陣斬百餘人，至回莊十餘里收隊。是日蓋行二百里矣。俘賊稱白賊家口已於前十日過此，有悍賊二千護之。其所脅各城漢回蒙民及纏頭白賊悉令其頭目驅往庫車，此皆殿後賊也。壬戌五鼓頭隊行四十里，望見前面騎步數萬，以測微鏡窺之，持械者不過千餘，餘皆攜老扶幼驅車牽牛雜糞，集知爲所脅難民也。錦棠傳令執械者斬餘皆不問，須臾馬步並進，賊敗委難民而走行數里復列。



隊挺矛以待，官軍奮擊之，賊乃狂奔。是日駐阿爾巴臺，錦棠遣陶生林護難民歸布告爾洋薩爾兩處，安插癸亥，馳抵託和奈蒙，回未被脅者尙萬餘，伏地號呼。錦棠撫諭，令安居勿怖。是夜四鼓，拔隊行三十里，將近庫車，聞鎗礮聲，乃急進，則見纏回數萬散步原野，訊之，皆不願隨賊行者。賊見官軍至，勒隊抗拒。錦棠令各營分左右進，而自率馬隊居中。羅長祐率後隊繼之，賊四五千騎兩路來迎，官軍擊之，斃賊多，仍死鬪。譚拔萃等步隊繼進，正鏖戰，間長祐後隊馬步大至，橫躍入陣，賊始大潰。官軍乘勝蹙之，追殺四十里，斃賊不下千餘。自此而西，卽戈壁，非攜水不可行，遂收隊回庫車，詭禽賊云。白賊所脅回不願前進者，正擬開鎗逼之，忽官軍大至，乃舍

回抗官軍，問其脅回隨行者何意，答云：賊中議計，一使官軍無所資藉，難以遠追；一欲多畏纏回，至喀什噶爾獻之，新怕夏伯克胡里爲結納計也。左宗棠以喀什噶爾本南八城之一，庫爾勒舊號腴區，蒙回被賊驅迫，非其本懷，宜善爲撫輯，課以耕牧，且令平治道路，造渡船以通商旅，而速郵傳，委知縣黃繼裕爲喀什噶爾善後撫輯局員，前往經理。其庫車至阿克蘇一路，亦需撫輯，則遣道員陶兆熊赴劉錦棠軍聽委。此次錦棠自庫爾勒躡蹤追擊，六晝夜，馳九百里，收復喀什噶爾、庫車兩城，及他城堡回莊無數，拔出亂民以十萬計。庫車一路糧料充足，採買較吐魯番爲易，可省轉運，且免遲悞賊機也。戰死之員，提督王慶福、曾義德、都司楊玉昌、楊寶林、李景

清守備廖翰卿、千總孫得勝、康福、梁得勝、把總鄧成忠、鄆得勝、丁卯，錦棠自和色爾拔隊馳至拜城，城門牢閉，但見一二探頭外望者，遣譯者告以官軍至，乃稱白彥虎過此燒掠莊堡，迫脅回民與俱行，城內回衆閉城門拒之，白賊攻之未下，今早率黨西竄矣。錦棠徧加撫慰，令方友升率馬隊駐城外，招集逃亡，而令各軍蓐食疾進。戊辰五鼓，履冰行八十里，抵銅廠，望見騎賊數百，領纏頭約二萬餘，聚河岸，卽揮隊猛撲，人馬之尸頃刻很籍，河中水爲不流，其被脅纏頭悉遣歸拜城，令復舊業，遂率隊亂流而渡，行三十里，聞賊在上銅廠列陣，錦棠率馬隊前行，步隊繼之，賊分兩路迎戰，官軍張兩翼包之，夏辛酉，躍馬衝入賊陣，生禽貂衣賊一人，賊驚走，官軍

馬步夾擊左路之賊見右路大敗相率奔潰黃萬鵬等乘勝追之及察爾齊克臺西三十餘里計斃賊數千生禽百二十六日暮回察爾齊克臺駐軍已巳度戈壁百四十里至哈拉裕勒小憩卽行庚午夜半抵札木臺復解鞍憩逾時遂馳薄阿克蘇城未至城數里遙見城頭鎗矛林立望西南飛塵蔽天諜知白賊及各胖色提同率黨遁城內纏回十數萬則皆守城以待官軍者錦棠飛遣譚慎典黃萬鵬等兩路追之而自收撫阿克蘇城內回衆遂入居城中追軍至胡瑪納克河遇賊接戰斃其四五百人拔出哈密纏回數百白賊從行賊眷以追急棄道者二千餘併送歸庫車候安插焉俘賊稱白賊與安集延各酋分路一竄烏什一竄葉爾羌錦棠遂舍安

夷而追白賊，遣黃萬鵬等進烏什，辛未五鼓踏冰渡胡瑪納克河，行戈壁中，禽白賊後隊馬有才等十六人，斬之。壬申行距烏什城東二十里，瞥見賊蹤，各將張兩翼抄之，斬馘數十，獲馬八十匹，賊狂奔日暮，駐軍烏什城外。癸酉行九十里至阿他伯計，彌望戈壁杳無賊蹤矣。新疆南路以阿克蘇爲關鍵，北通伊犁，西走烏什，東接庫車，迤西達喀什噶爾，又達葉爾羌，英吉沙爾，稍南而東，則達和闐，形勢所必爭。阿克蘇旣復，賊竄路悉窮，其由烏什邊外逸去，則舍喀什噶爾無可歸者。此次官軍西征，一月馳三千餘里，南疆四城已復其半，其疊次戰死者，總兵朱成琪，副將楊隆輝，陳祥發，參將馬正揚，都司成聯吉，戴有鵬，徐九德，守備譚雲芳，千總羅人富，趙富

林把總崔仁馬成旺庫車迤南回目麻木爾者舊充安集延  
王子巴什之職官軍克達坂時生禽之縱歸復煽土回及哈  
密各回仍附安集延所設庫車胖色提聽其指揮官軍克庫  
車麻木爾挈其黨竄哈番近復有匪回六七百來與哈番合  
拒官軍哈番在阿克蘇西南四百餘里十月己丑錦棠率各  
營往攻辛卯抵巴河賊復竄屈烏克拱拜官軍卽之麻木爾  
麾黨迎戰不敵軍中有舊識麻木爾者測準洋鎗擊之中其  
頰數騎擁之而逃賊遂驚潰錦棠揮隊衝殺斃賊三百餘搜  
獲沙雅爾老幼眷屬五百餘使隨征回目送歸之乃收隊還  
阿克蘇和闐伯克呢呀斯者屢乞撫於官軍聞官軍西進率  
所部進圖葉爾羌怕夏長子伯克胡里聞之以五千騎赴援

與呢呀斯戰，呢呀斯爲其所敗，且失和闐。伯克胡里聞官軍已克庫車，遂留黨踞和闐，而自引衆竄英吉沙爾。先是白彥虎竄喀什噶爾，頭目阿里達什拒白賊不納，而前換防守備何步雲、旗員英韶等率漢滿兵民數百據其漢城。阿克達什復攻之，且聞伯克胡里將引白賊助攻漢人，何步雲等乃遣人間道來營，急求反正。劉錦棠遣余虎恩、黃萬鵬等分兩路進，期以十一月乙丑同抵喀什噶爾。各軍皆受余虎恩節制。巴爾楚克瑪納巴什形勢最盛，錦棠親率各營往駐之，以扼和闐。葉爾羌要衝，且策應前敵之軍，於是設防營於喀喇沙爾、庫爾勒、拜城一路。蓋自肅州嘉峪關以抵吐魯番，自吐魯番託克遜以抵庫車，皆防軍也。自庫車至阿克蘇、巴爾楚克

爲且防且戰之軍，自巴爾楚克瑪納巴什以抵喀什噶爾，英吉沙爾則爲主戰之軍，常山率然首尾一氣，而官軍所歷，自庫爾勒以西地皆腴美，天時地氣不殊中土，回思關塞荒寒苦樂迥異，人人心慰焉。戊辰，劉錦棠師至葉爾羌，踞城之賊已先夕遁，令羅長祐等搜殺餘賊，安撫纏回，遣董福祥率所部略定和闐，自率馬步向英吉沙爾，比至則城內之賊已隨伯克胡里竄喀城矣。癸酉，抵喀什噶爾，適余虎恩方以攻克喀城後追捕竄賊收隊歸，先是兩軍之分進也，皆星夜疾馳。黃萬鵬以甲子抵喀城之北，麻古木、余虎恩亦以是日抵喀城東，牌素特賊正攻漢城急，兩軍夜往援之，賊蒼黃走，獨有騎賊千餘，徑撲中軍，其賊首方指麾衝突，我軍矛刺之，隊馬



遂斬首以獻，訊之俘賊，稱爲白賊副元帥王元林也。馬步合圍其餘賊，聚而殲之。而城西北馬步賊三四千奔救，忽聞北路號鼓之聲，則黃萬鵬、張俊率各營馳至。余虎恩督隊力戰，何步雲、英韶等憑城吶喊助勢，賊慌懼狂奔。時天未明，余虎恩乃下令傳餐，適何步雲率百騎來營云：「昨聞大兵至，白賊已向西北竄。」伯克胡里向正北竄，其給諸賊留後者欲綴官軍，使其眷口輜重得善脫也。天明，黃萬鵬追白彥虎，余虎恩追伯克胡里。丙寅，追至明要路及之，禽得落後賊云：「此隊賊乃于小虎頌以斷後，獲眷口者，伯克胡里先行矣。」余虎恩令桂錫楨等率馬隊由捷徑疾馳，而自督步隊躡追，前後夾擊，生禽于小虎陣，斬哈密叛回藍德全，餘賊盡殲，方擬窮追，適

布魯特回子來報，伯克胡里昨日過此，計此時已抵俄國窩什。俄國早遣人候之，伯克胡里到，即收軍械放入界內。余虎恩聞其入俄界，遂與黃萬鵬合追白賊。丁丑，黃萬鵬追賊至炭炭槽，及賊之尾隊，正掩擊時，余虎恩所遣蕭元亨步隊至，合力縱殺，生禽偽元帥馬元，斬其副將白彥龍。聞前一日白賊經此，遂復追三十餘里，忽山溝中衝出騎馬持械者約五六百，諦視裝束與賊殊，將整隊擊之，殊按兵不動。遣譯者探問，乃知爲俄屬布魯特部衆，所稱黑勒黑斯者也。詢其在此何爲，答云：我頭目云中國有人過路，遣我等來此放卡。前隊過此已遠矣，告以過者爲賊白彥虎來者，乃中國自軍。答云：地屬俄羅斯界，非先知照，不得遠進。再詢之，則言語

支吾無從究詰。蕭元亨與黃萬鵬商以奉令追賊未便於事，外別起郵端。會余虎恩至，亦謂遠追無益。於是劉錦棠到喀城而余虎恩亦於是日馳歸。提訊各俘賊，僉稱白彥虎於秋杪遣甘回馬壯、齋金銀貨寶赴俄國買路求生。昨聞官軍至，卽與叛弁守備馬振威、甘回索老三、黑寶財馬良會等竄走。蓋白彥虎伯克胡里先後由布魯特納林河橋入俄境，俄人皆納之。庚辰董福祥馳抵和闐，追捕安集延餘黨生禽頭目三十二人，撫諭和闐回衆。十二月壬午，復於城南追勦安集延賊，及之三十餘里，禽其頭目四十餘，及夷衆三百餘，皆斬之。和闐肅清，而羅長祐過葉爾羌時，生禽麻木爾等夷官三人，陣斬七十餘人。葉爾羌餘氛亦清。劉錦棠在喀什城聞怕夏

阿古柏眷口爲官軍衝散，尚有伏匿近地者，遣隊搜覓，獲阿古柏子四人，女二人，孫一人，伯克胡里子一人，又獲逆回金相印父子，同于小虎馬元，一併磔死。此外正法者，千一百六十六人，奪獲後膛開花大礮七，開花螺絲銅礮四，前膛銅礮百餘，戰馬萬數千。於是回疆一律肅清，安集延、怕夏、阿古柏、本浩罕別部一胖色提耳，同治三年，布魯特叛酋思的克等肇亂，喀什噶爾逆回金相印父子引之過山，攻陷喀什噶爾城，遂蠶食南八城，踞吐魯番及烏魯木齊，恣其饕虐十餘年矣。此次戰死者，提督鍾興發、副將張興隆、都司謝得勝、成東來、何得所、守備楊占魁、黃發喜、陳崇元、譚榮發、千總滿承德、傅得勝、康祖振、楊春勝、戴國志、葉得盛、把總張富全、董振海。

周得勝、胡春華

平回志卷七終

卷七

平回志

三

紅杏山房



平回志卷八

太湖王志沂

東湖楊毓秀子堅纂編

受業長陽張榮澤全校

侄楊存澤

蓬溪蓬萊山館刊

志新疆二第八

四年二月壬辰論克復回疆之功

詔左宗棠由一等伯晉爲二等侯劉錦棠由騎都尉世職晉爲二等男其餘

賞卹各有差左宗棠以巨款漏誅伊犁尙遲收復再上疏陳情請收回

成命

朝廷未之許也。九月。

詔問左宗棠以規復伊犁及前議新疆建置行省事宜。十月戊戌，左宗棠奏覆曰：

伏讀

諭旨，伊犁在昔爲西路第一重鎮，今爲俄人久據，形勢變遷，能否交還，固無把握。而交還以後，如何防守，未交以前，如何布置，尤應先事圖維。臣謹按俄人自據伊犁，於西面拱宸，瞻德廣仁，塔勒奇，四城均棄而弗守，傾圮殆盡。綏定一城，近以之雜置陝回，距伊犁僅三十里，伊犁大城，人烟甚少。俄兵及商戶，均萃居東面，惠寧，熙春，甯遠三城，而金頂寺，烟戶尤多。



伊犁管事俄官名馬依爾品秩不過中國同知通判之類主  
伊犁之事者七河巡撫也七河一作七水其官爲固必納土  
爾其名爲喀爾帕科斯克依所駐阿爾瑪圖地屬俄境在伊  
犁西八百餘里其兼轄之官名圖爾齊斯坦總督名爲克復  
滿亦呼高伏滿自稱代國大臣駐浩罕故都塔什干城距我  
喀什噶爾不過十數程由喀什噶爾至俄邊納林河中隔俄  
屬布魯特部喀城馬行六日可至從前伊犁本不與俄境相  
接以哈薩克布魯特種人與浩罕所部安集延及噶布爾所  
屬爲之隔閡近年俄人先後脅誘哈薩克布魯特種人又攻  
奪浩罕三部據其都城而浩罕屬安集延亦隨風而靡故我  
北路伊犁南路喀什噶爾之邊境皆與俄屬相接距我境亦

近也。臣前疏所稱地不可棄者，竊以腴地不可捐以資寇糧，要地不可借以長敵勢，非乘此兵威迅速圖之，彼得志日驕，將愈進愈逼，而我饋運艱阻，勢將自絀，無地堪立軍府，所憂不僅西北也。伊犁收還以後，應於邊境擇要築壘開濠，安設大小礮位，挑勁兵以扼其險。至伊犁大城西北之塔勒奇廣仁、瞻德拱宸各城，戶口鮮存，水草卻便，應各擇要隘暫駐各營分屯其間，所有旗綠各營剩存兵丁，各給牛種牲畜，督令游牧耕墾，舊有城堡，緩議修復，尙非不可。大城以東，惠寧、熙春、寧遠各城，民戶商戶，願遷徙者遷徙，願歸業者歸業，邊圉旣奠，人安其土，耕其野，而出其途者，不待招徠，迥非甘肅從前東路西路數百千里，蒿萊滿望，杳無人烟，難於措置可比。

亦非若烏魯木齊所屬各城相距甚遠難於照料此伊犁收  
還以後情形也伊犁未還之前金順大軍駐庫爾喀喇烏蘇  
其西精河地方設處要隘向駐馬隊以資扼截自福珠哩歸  
後金順未及置防致被漢回侵掠金順旋遣馬隊二百前往  
填防當可無虞由精河西行一日爲永集湖再西數十里卽  
伊犁俄官所設之頭卡又三日卽抵伊犁中間山徑五道可  
達伊犁不由惠甯熙春甯遠三城經過然巖谷幽邃僅容一  
人一騎不能通車若收還伊犁則驛道山徑皆成腹地此形  
勢變遷俄人現在布置官軍防守及距伊犁道里遠近大略  
也

諭旨郡縣之制以民爲本現由嘉峪關烏魯木齊至庫爾喀

喇烏蘇迤西商戶回戶各存若干由吐魯番至南八城纏頭  
共存若干除舊有各廳州縣外其餘各城改設行省究竟合  
宜與否倘置郡縣無可治之民不設行省此外有無良策臣  
謹按新疆之變起於北路迪化失守所屬相繼淪陷戶口傷  
亡最多漢民被禍尤酷以逆回仇視漢民故也比大軍進勦  
屢拔堅城而昌吉呼圖壁綏來回民又因畏剿逃奔南路烟  
戶頓減克復以來還定安集招徠開墾戶口漸增迪化州較  
各屬尤成效可觀舊額民戶共四千二百有奇現報承墾者  
已三千六百餘戶昌吉縣民戶舊共三千九百有奇現報承  
墾者僅四百數十戶阜康縣民舊有三千九十餘現報承墾  
者僅二百十餘戶綏來縣民戶舊有三千七百餘現報承墾

者八百五十餘戶奇臺縣舊有民戶四千三百六十有奇現  
報承墾者五百七十餘戶濟木薩縣丞所屬舊有民戶二千  
八百有奇現報承墾者三百五十餘戶呼圖壁巡檢所屬舊  
有民戶一千七百三十有奇現報承墾者二百八十餘戶庫  
爾喀喇烏蘇舊有民戶僅八十有奇現報承墾者尙數十戶  
精河舊有民戶四十有奇現報承墾者一百餘戶鎮西廳戶  
口無考舊種地六萬畝現報民墾三萬六千餘畝兵墾四千  
餘畝土客漸增此北路民戶現存實數也久罹兵燹戶口凋  
耗無怪其然鎮迪一道所屬雖孑黎僅存頻年散給耕牛種  
籽酌發賑糧廣示招徠自木壘河抵精河除戈壁外又均是  
腴區土客民人及遣散勇丁領地耕墾逐漸增加署鎮迪道

周崇傳勤慎廉幹事必躬親漸有明效需之時日百堵皆興  
卽以目前論之亦非無可治之民也吐魯番舊隸鎮迪道荒  
地尙少現委道員雷聲遠署同知奎紱妥爲撫輯糧石租稅  
已逾舊額之半南八城除英吉沙爾壞地褊小烏什土性瘠  
薄餘均較吐魯番爲饒而喀什噶爾和闐葉爾羌阿克蘇庶  
而兼富物產豐盈又較各城爲盛劉錦棠張曜悉心經理現  
委員開河引渠清文地畝修築城堡塘站鑄錢徵釐百廢肇  
興具有端緒較之北路尤易爲功是南北開設行省天時人  
事均有可乘之機失今不圖未免可惜此新疆之應改省者  
一也北路得之準部南路得之回部皆因俗施治未能與內  
地一道同風久已概爲邊地伊犁設將軍又設叅贊大臣一

員烏魯木齊設都統塔爾巴哈臺葉爾羌均設參贊大臣喀什噶爾阿克蘇庫車和闐喀喇沙爾均設辦事大臣伊犁等處設領隊大臣五員塔爾巴哈臺烏魯木齊庫爾喀喇烏蘇古城巴里坤吐魯番烏什英吉沙爾均設領隊大臣哈密設辦事大臣一員協辦大臣一員葉爾羌設兼管和闐事務協辦大臣一員烏什設幫辦大臣一員喀什噶爾設換防總兵一員是邊地腹地皆一律視之無甚區別與經野馭邊之義不符將軍都統與參贊辦事大臣協辦與領隊大臣職分等夷或皆出自

禁闔或久握兵符民隱未能周知吏事素少歷鍊一旦持節臨邊各不相下稽察督責有所難行地周二萬里治兵之官

多治民之官少而望政教旁敷遠民被澤不亦難哉北路糧員但管徵收而承催則責之頭目南路徵收均由回目阿奇木伯克等交官官民隔絕民之畏官不如其畏所管之頭目官之不肖者玩狎其民輒以犬羊視之凡有徵索頭目人等輒以官意傳取倚勢作威民知怨官不知怨所管頭目也內地徵收常制地丁合而爲一按畝出賦故無無賦之地亦無無地之賦新疆則按丁索賦富戶丁少賦役或輕貧戶丁多則賦役反重事理失平莫甚於此貨幣之制子母不能相權爭訟之事曲直不能徑達官與民言語不通文字不曉全恃通事居閒傳述顛倒混淆時所不免此非官與民親漸通其情實去其壅蔽廣置義塾先教以漢文俾其畧識字義徵收



所用券票其戶民數目漢文居中旁行兼注回字令戶民易曉遇有舛誤卽予隨時更正責成各廳州縣而道府察之則綱目具而事易舉頭目人等之權殺官司之令行民之情僞易知政事之修廢易見長治久安之效實基於此新疆之應改行省者二也夫立國有疆古今通義傳曰天子有道守在四夷周秦以前姑弗具論自漢以來通道始於張騫不能得月氏要領求馬繼以廣利不能下小國堅城漢於西域窮天下之力以務之卒有輪臺之悔故班固以爲得之無益棄之不爲損也今生棄地之說者祖之臣愚非不謂然顧斷斷於兵不可停地不可棄者蓋以地形無今昔之殊而建置之有因創之異窮變通久因時制宜事固有不容已者謹按新疆

開拓肇自

高宗當時移涼州西安熱河滿兵延安綏德甯夏興安漢中西甯固原肅州河州安西綠營兵丁駐守南北兩路餉不外增各城養廉經費則以京口杭州等處出旂漢軍俸餉口糧馬乾及甘肅等處所減草料充之計內地每歲節省之數共一百二十九萬兩有奇而劃抵新疆養廉經費一百零七萬八千四百餘兩外尙餘銀二十一萬一千五百餘兩不特無糜餉之虞且有節餉之實論者竊以耗中事西疑之於聖意拓邊節餉固無當也臣自度隴以來卽留心稽考甘肅新疆餉數僉稱承平時每歲約銀五百餘萬兩自變亂以來冊籍散佚難以覆按請部鈔示成案亦無以應近據藩司崇

保詳稱查得道光二十七年甘肅口內外駐防滿州蒙古旗  
綠官兵應需俸餉紅白賞卹等項銀四百一十五萬二千三  
百五十三兩三錢九分九釐四絲一忽內先一年預撥銀一  
百四十萬兩外銀二百七十五萬二千三百五十三兩三錢  
九分九釐四絲一忽由部臣照依估撥預撥完數以此準之  
甘肅新疆實餉五百餘萬之數雖無可考而一歲之中預撥  
正撥四百一十五萬有奇則有數可稽也臣竊度南北兩路  
如行清丈之法就畝徵賦仿什一之法制而從寬定額民收  
十數分官徵其一以給軍食尙可有餘修渠導流以備旱潦  
改鑄制錢以便民用設局徵釐以裕課稅創設義塾教之識  
字選調匠師教之藝事自季春至今次第經理甫有端緒容

俟各處緘贖取齊，卽行具奏。此外南北兩路無產，尙有藥材、皮、張、吐魯番之綿花、和闐之玉、庫車之金、銅、鉛、鐵，均應設籌及之。是新疆利源非無可開也。甘肅地處邊陲，土曠人稀，瘠苦甲於天下，承平時錢糧徵收不及東南一大郡，此其明徵。亂後子黎，皮骨僅存，氣息僅屬，雖頻年拊循休養，漸有起色，究之致力多而成功少者，時地實有以限之。通省舊設額兵太多，全恃各省協款接濟，自中原軍興，各省未能兼顧，於是回禍起，新疆淪陷，甘肅全省名雖僅存，實則亡矣。幸值聖明在上，洞矚無遺，移東南之餘財，救西北之奇厄，親賢夾輔，內外一心，先關內而後關外，次第圖之，乃有今日，不可謂非幸也。此時所當亟籌者，善後之策，善後之策，當規久遠利。

純所繫匪僅一時以甘肅與新疆並論新疆利源可開流亦可節甘肅則開源爲難而節流尙有可議從前額兵之多者一則新疆與蒙部回番雜處兵少恐起禍心一則新疆需由內地撥兵換防兵少難敷調派也若以現在局勢而言蒙部回番已就鈴束防營可以漸減前奏改行餉爲坐餉圖節勇餉爲復甘肅制兵之漸新疆南北如置行省換防之制可以永停又擬節制兵之餉以紓各省協款之力也竊計甘肅新疆承平時預撥估撥餉銀四百數十萬兩俟伊犁收遠每歲約可節省百數十萬兩後此利源日增餉更可節部臣可隨時察酌而任甘肅新疆之事者可隨時陳奏特恐非微臣所及見耳此統籌甘肅新疆節省餉需以規久遠之大略也

韶答以伊犁未復建置之規且徐圖之安集延賊目阿里達  
什者前竄俄境復潛率賊黨百八十人竄至奈曼勾通布魯  
特頭目種人三百餘謀襲喀什噶爾擾及玉都巴什卡倫復  
分隊入烏帕爾之瑪雜爾念經散食以誘約回眾瑪雜爾者  
回子祖墓卽所謂拱拜者也劉錦棠聞之先嚴兵備喀什噶  
爾而自率隊一夜馳百五十里抵烏帕爾賊見官軍至卽返  
走玉都巴什復躡追三十餘里至玉都巴什望見戈壁中聚  
賊騎數百立遣夏辛酉譚慎典羅長祐等次第進發自率馬  
隊二百策應賊列隊迎敵夏辛酉張宗本怒馬陷陣斬執旗  
賊奪其旗賊眾遂潰追斬三百餘生禽三十餘復進馳百餘  
里亂山叢集谿徑莫測錦棠傳令收隊而遣布魯特總管以

尙胡里率所部入山搜剿而奈曼回目庫彌什先率部眾四百餘伏山谷阿里達什敗走經過庫彌什要殺之盡殲其黨禽阿里達什搜得其玉印遂割取首級同以尙胡里獻功於軍錦棠重賞之歡呼膜拜而去於是提所禽伯克玉子巴什阿渾等五十餘人駢誅梟示焉阿里達什之謀攻喀什噶爾也布魯特逆回阿布都勒哈瑪及其子買賣提斯拉木實與焉及阿里達什伏誅其父子敗竄俄屬之阿來復勾結安集延酋愛克木汗條勒阿希木汗條勒咬買提和卓再爲內犯之計回中曰汗曰比者君長之稱曰條勒和卓者稱其教祖後裔也愛克木汗阿希木汗卽張格爾弟玉素普之兩孫也愛克木汗等率其回眾八九百徑抵烏魯克哈提復誘脅布

魯特各部至聚眾千七八百。

新疆二

五年正月朔乙巳自畢勒套格依趨駐博斯塘特勒克博斯塘特勒克爲布魯特比所居地意欲引以爲助也劉錦棠以官軍往剿必度戈壁中賊得覘我虛實非計之得不如伏兵山谷待賊來擊之且更爲四面圍剿之策下未遣方友升進烏帕爾譚慎典進王都巴什駐軍令各偵明賊踪來報又陰縱布魯特人入賊中佯言官軍無多誘其深入辛亥方友升報賊游騎已至烏帕拉特劉錦棠分兵守漢回兩城遣張俊等步隊由英吉沙爾取道圖木舒克至烏魯阿提防賊旁竄遣董福祥等馬步由喀什噶爾回城取道卡浪圭至無胡素魯克如軍到時賊尙未返則急進畢勒套格依駐營扼賊回



竄皆令捲旗息鼓以行。癸丑，錦棠自率羅長祐等馬步由喀什噶爾漢城啟行。是夜方友升報獲賊諜，稱賊中傳令夜撲烏帕爾官軍營。劉錦棠以賊由南路平地來，勢散漫不能多殺，不如先取其巢，候賊返更擊之。遂留劉必勝等駐烏帕爾莊外助剿，而遣羅長祐等率各營由北嚮小路銜枚疾走，向博斯塘特勒克邁進。比至守巢之賊，方熟睡未醒，乘其未備擊之，斃賊五百餘，俘賊稱大隊。賊已於初鼓向烏帕爾去。羅長祐令各隊飲馬造飯，遙見戈壁東塵沙大起，偵者報賊自烏帕爾歸矣。遂令各隊偃息以待。方賊之進襲官軍也，錦棠聞報，卽令劉必勝何俊先往擊之，自率段伯溪馬步繼進爲策應。復令張復良李照雲多張旗幟分兩路，左由烏帕爾樹

林抄出右由山溝抄出皆約於賊隊屯集處會劉必勝等首  
與賊遇賊敗走方追剿忽西南溝內大隊騎賊紛紛結團衝  
出劉必勝等勒馬整隊以待騎賊分團迭撲迄不少動賊更  
作圓陣四面環攻鎗礮互轟鏖戰正急何俊右額中鎗子忽  
號鼓之聲震山谷旗幟閃耀各營四路層見歧出賊不測官  
軍多少遂無心戀戰錦棠麾隊壓追三十餘里禽賊百餘賊  
向博斯塘特克返竄知其已墮計中乃從容收隊還至蘇巴  
什駐軍甲寅午初敗賊進谷口羅長祐令譚慎典等以馬隊  
列谷外湯彥和等率步隊列谷中自登山相機調度賊見官  
軍卽結爲團陣圍約四五十騎前後兩隊共四十餘團作聯  
珠勢與官軍接鎗礮互施戰移時不決勝負羅長祐令馬隊

以長矛衝陣、譚慎典率數十騎怒馬直入、斬賊首買賣提斯、拉木於陣前、賊遂大亂、楊金龍方友升、分左右進、弁勇皆奮、逆超躍、賊不能成陣、分兩隊走、右隊約千騎、奔歸谷中、不料復遇伏也、湯彥和等鎗矛迎擊、斬馘遂多、賊棄馬越山、羅長祐麾隊追之、禽斬盡淨、殺賊首咬買提和卓、阿希木汗、條勒於陣、其左隊約五百騎、繞谷外、榜嶺麓西竄、譚慎典等躡追一夜、力馳二百里、至阿伊阿提外卡、沿途殺賊三百餘、羅長祐亦於是夜拔隊進、乙卯午正、抵阿依阿提、令布魯特騎卒馳探、令譚慎典等追至、俄界止、丙辰、譚慎典等馳至卡、拉阿爾提騎卒回報、賊首愛克木漢、條勒、阿布都勒哈瑪、賸百餘騎、已入阿來俄境矣、乃收隊回、其餘敗賊、董福祥等分途搜

剿已盡己未庚申各軍先後回防營是役共斃賊二千餘死  
事者提督李青雲總兵陳大根沈煦階副將李春廷叅將周  
桂蘭都司陳松廷孫祥吉守備王永朝龍碧雲千總張保林  
周喜祥王銓衡王益生把總鄒鳳玉朱有福沈福隆羅文燦  
陳仁俄人之據伊犁也在咸豐十年其時謂代我收復俟我  
克復烏魯木齊瑪納斯當以伊犁歸我比官軍遞下各城克  
復南疆而我食言穩居如故

朝廷命將軍崇厚往論之議以五百萬圓盧布償其代爲收  
復之費乃歸我伊犁盧布卽所稱俄元者也又稱伊犁歸後  
陔爾果斯河西及伊犁山南之帖克斯河歸俄屬山南爲通  
南八城要道帖克斯河屬俄則新疆南北中梗伊犁勢成孤

注又伊犁人民遷居俄國者准照俄人看待俄人在伊犁准照舊管業則是伊犁雖還中外仍無界限左宗棠以爲俄人包藏禍心預爲復蹶之謀是宜先之以議論不然則決之以兵戰不可依違以貽後患中外臣工亦多謂不便乃改遣曾紀澤往議初左宗棠總師入秦行次漢臬招在籍刑部主事監利王柏心與商方計柏心夙負時譽乞養歸嘗主荊州講席粵寇起當事爭延致戎幕概辭不赴素與宗棠善聞其請爲一至軍留旬日柏心旣留意時務又早歲游幕關隴最久凡其山川形勢暨漢回各種人情僞尤洞悉故所籌畫皆切中機宜宗棠深韙其論卒賴以濟至是柏心卒乃推本平回策歸功於柏心疏稱始臣奉

命入關人人皆爲臣危柏心獨不謂然臣爲氣壯後此三道  
進兵堅持緩進急戰之議皆柏心有以啟之其學問深遠識  
略超羣足達其忠孝之忱非時賢所及也因進柏心所著樞  
言漆室吟詩稿雜文請

宣付史館立傳又穎州府教授當塗夏斡耄而篤學著景紫  
堂文集辨朱陸異同甚晰宗棠擊賊婺源及督軍入浙時爲  
代籌軍食師得宿飽斡時已七十餘猶時至軍舉兩浙形勢  
用兵次第以告宗棠倚其商略以有功又中書科中書巴陵  
吳士邁爲諸生時已留心經濟之學粵寇犯湖南湖北撫臣  
常大醕議防江不防湖親赴岳州延士邁主其事士邁傾貲  
集漁戶千餘分堵洞庭諸港口賊至漁戶遁去賊遂陷岳州

趨武漢其時鄂撫實未委之事權漁舟皆倉卒召集未編隊  
目無人鈴束又未發給糧餼遇賊卽潰非戰之罪士邁乃引  
爲私感日夜思所以報

國雪恥者會宗棠西征士邁募勇教督隨以入關于三水秦  
安陳村羅局諸處數豎奇功著在前編後以病歿于軍士邁  
爲人尙志節重然諾治軍嚴整與下卒同甘苦臨陣意度安  
閒堅不可撼軍名宗岳蓋其微意所嚮也每論功敘保必再  
三推辭雖虛銜亦不肯受嘗曰吾藉此補咎報

國若復希圖利達是負初心也其特立獨行如此又仁和吳  
觀禮始以優貢舉人捐貲爲員外郎潛心經史篤于內行宗  
棠督閩浙時調入軍從克復漳州復從入粵剿賊著功效復

從入關由晉追賊赴燕齊與宗棠講求陣法所用惟方圓仰  
月偃月諸式步兵鎗礮刀矛結陣諸中騎兵斜布于後張左  
右翼賊敗則移陣追之所至成營師行平原曠野中雖夜深  
天黑哨隊不亂觀禮短衣匹馬輒居主帥前時或並轡徐行  
與商戰略傳宣進止宗棠深賴之以患肝疾兩睛且陷令歸  
就醫後大軍度隴目稍瘥復馳書請從襄事宗棠以隴右苦  
寒非目疾所宜商其暫駐西安督辦糧需而觀禮以爲從軍  
而避勞就逸于義不可乃註銷所保陝西道員復赴試成進  
士入翰林一典蜀試歸然猶乃心西事以宗棠衰老擔荷日  
重無分任勞勩之人爲憂寓書于軍所論多痛切旋以肝疾  
歿于邸寓計緘書之日相距不過旬日其憂



國之忱蓋未嘗一日少閒而竟賚志以殞也宗棠以爲此四人立身本末均有可觀然皆未克多所建樹以竟厥施實有耿耿于懷不能釋然者均奏請

宣付史館以存其人俾士之矜尚志節者有所觀感焉

詔悉許之

六年二月庚申左宗棠奏曰竊維俄國與崇厚所議恣其要求

朝廷改命使臣前往再議詞嚴義正曾紀澤上稟

宸謨成議而返庶幾息事安邊倘其始終狡執論辨竭則衅

端開非合南北兩路慎以籌之不可按伊犁轄境千數百里

北倚大山本葱嶺北出之幹首起西荒尾插東海山陽水入

中國山陰水入俄部歸西海乃中俄天然界畫也其由葱嶺  
中出者爲天山山北諸流東行迤北爲伊犁河天山北路至  
此而止與葱嶺北出大幹不相聯附故伊犁幹山爲北邊盡  
處究不得指爲天山北路也至喀什噶爾北境舊與浩罕所  
部安集延南境相接自俄人據浩罕舊都塔什干城併其三  
部浩罕遂亡安集延北境亦爲俄有逆酋阿古柏由南境糾  
其餘眾竄踞回疆八城及吐魯番乃與俄約將南境之地併  
入回疆自爲一部此次大兵既定天山北路引兵而南克吐  
魯番及南八城阿古柏滅安集延亡其南境又歸於我卽喀  
什噶爾西北卡外地也雖闢地無多而以山川條列言之葱  
嶺北出大幹水北流者爲俄屬南流者爲新疆天山界居其

間南北兩路諸城錯布皆吾舊土也至喀什噶爾卡外安集延所遺南境之地本非俄境又在伊犁界外官軍得之叛豎之手與俄無涉俄自無所藉口以與我爭但堅持定議於伊犁界務概以同治三年所定爲斷其未定之喀什噶爾卡外卽仍阿逆與俄人所約定局如此則山川條列朗若列眉以守則固安集延布魯特餘眾亦可斷其勾結相莩以安誠數世之利也至不得已而用兵現擬規復伊犁東路宜嚴兵精河一帶扼其紛竄伊犁將軍金順主之中路由阿克蘇冰嶺之東沿特克斯逕趨伊犁計程千二百五十里廣東陸路提督張曜主之西路取道烏什由冰嶺西經布魯特游牧地抵伊犁計程千二百五十里通政使司通政使劉錦棠主之三

踏兵力本不爲單，但戰守相資，非增撥各軍，厚集其勢，不可就現在局勢言之。俄之官商兵力，皆歸重金頂寺各處。距精河一帶較近，金順只宜堅扼要隘，遏其紛竄，不必以深入爲功。中路阿克蘇之軍，逕抵伊犁大城，斷金頂寺歸路。劉錦棠如由烏什冰嶺西路，逕指大城，則俄國援伊犁來路可斷。如此路難進，則屯兵喀什噶爾外卡，遙張窠入俄境之勢，亦使知內患堪虞，時勤狼顧，不敢復爲豨突矣。臣俟布置周妥，暮春之吉，當率馬步各營出屯哈密，與南北路諸將領籌議，謹先舉大略爲

皇上陳之。四月乙卯，左宗棠自肅州行營出關。五月乙亥，抵哈密，駐軍城西鳳凰臺。前調金運昌所部王鳳鳴等軍，皆先

後到精河譚上聯軍亦於是日抵喀什噶爾譚拔萃等軍亦抵哈密時俄人增兵踞伊犁阿來者合計不過數千志在固守伊犁與納林河門戶唯時越界放哨築壘似有意挑衅劉錦棠金順但遣人詰問未遽加以聲色也左宗棠以爲伊犁東北切近俄境塔爾巴哈臺外惟科布多斗插朔方形勢孤露陝漢逆回之在伊犁者頗思從此以覓生路若越科布多而南轉而西趨則古城巴里坤之奎素皆當其衝逾天山卽哈密境山谷綿亘介南北兩路之中爲程二千餘里防不勝防若賊由科布多而南不犯古城巴里坤哈密附近邊界專由草地有水泉處狂奔而來偷越安西州可徑抵玉門及布隆吉橋灣三道灣且可由花海子以達金塔毛目諸處果爾

則甘涼內地均不免風鶴之警現於科布多設坐探於科布多通古城之八臺外復設漢三臺以速郵傳遇有寇警馳報古城令古城巴里坤哈密各防營皆戒備焉增古城西路及巴里坤防兵復調兩營於安西州附近築壘駐之時發偵諜於科布多烏里雅蘇臺商販往來要口巡望遇有賊踪飛報防營橫截而出痛予勦辦蓋欲於收復伊犁之外別籌間著以備緩急也七月壬申

詔左宗棠來京陛見以備顧問並舉賢以自代奏稱劉錦棠具匡時濟變之才近辦新疆善後事宜威惠並行邊民感服臣嘗自愧不及請以

欽差大臣關防交劉錦棠祇領

詔許之。十月丁未，左宗棠自哈密入關，赴蘭州。俟交陝甘總督篆務，卽由秦晉北上。劉錦棠既至哈密，領

欽差大臣關防，與左宗棠商計軍事，遂留駐哈密。緘請張曜移防喀什噶爾、英吉沙爾兩城，總辦西四城邊防。就近調度一切。董福祥領張俊、夏辛酉等軍移駐葉爾羌和闐等處。羅長祐領譚慎典等軍移防阿克蘇、瑪納斯。譚上聯領余虎恩軍移駐烏什。譚和義暫駐吐魯番聽調。譚拔萃駐庫車。令諸將嚴備，在在露戰迹。時時不忘戰心，蓄養精銳，靜以觀變焉。錦棠自以弱歲從軍，未諳學術，難任吏治。數上疏陳病，請另簡賢能以膺重寄。情詞懇迫。

朝廷嘉其敬慎，昇倚益深。

七年會紀澤與俄人定約收還伊犁

詔遣錫綸會俄官辦理於是西郵解嚴凡善後諸務次第修  
舉劉錦棠乃與陝甘總督譚鍾麟會商申左宗棠前議建行  
省設郡縣除自哈密南至吐魯番北至精河仍舊所置外回  
疆東四城擬設兵備道一員駐阿克蘇督飭所屬水利屯墾  
錢糧刑名事務撫馭蒙部彈壓布魯特稽查卡倫喀喇沙爾  
與吐爾扈特和碩特游牧犬牙相錯事多交涉設直隸廳撫  
民同知一員加理事銜治喀喇沙爾城庫車設直隸廳撫民  
同知一員治庫車城阿克蘇爲古溫宿國設溫宿直隸州知  
州一員治阿克蘇城拜城縣知縣一員治拜城歸溫宿直隸  
州管轄烏什接鄰布魯特部落爲極邊衝要設直隸廳撫



同知一員、治烏什城。以上各廳州縣統轄於東四城巡道。其西四城擬設兵備道一員、駐劄喀什噶爾回城、管理通商事。宜督飭所屬水利屯墾錢糧刑名彈壓布魯特控馭外夷稽查卡倫喀什噶爾爲古疏勒國、設疏勒直隸州知州一員、治漢城、疏附縣知縣一員、治回城、歸疏勒直隸州管轄。英吉沙爾逼鄰布魯特爲極邊要衝、設直隸廳撫綏同知一員、治英吉沙爾城、葉爾羌爲古莎車國、設莎車直隸州知州一員、治漢城、葉城縣知縣一員、治回城、歸莎車直隸州管轄。葉爾羌所屬瑪喇巴什一城爲回疆東西咽喉要地、積年河水爲患、宜置官撫治、設直隸廳水利撫民通判一員、治瑪喇巴什城、和闐爲古于闐國、設和闐直隸州知州一員、治和闐城、于闐

七年、會紀澤與俄人定約、收還伊犁、

詔遣錫綸會俄官辦理、於是西郵解嚴、凡善後諸務、次第修舉、劉錦棠乃與陝甘總督譚鍾麟會商、申左宗棠前議、建行省、設郡縣、除自哈密南至吐魯番、北至精河、仍舊所置外、回疆東四城、擬設兵備道一員、駐阿克蘇、督飭所屬水利、屯墾、錢糧、刑名事務、撫馭蒙部、彈壓布魯特、稽查卡倫、喀喇沙爾、與吐爾扈特和碩特游牧犬牙相錯、事多交涉、設直隸廳、撫民同知一員、加理事銜、治喀喇沙爾城、庫車、設直隸廳、撫民同知一員、治庫車城、阿克蘇、爲古溫宿國、設溫宿直隸州、知州一員、治阿克蘇城、拜城、縣、知縣一員、治拜城、歸溫宿直隸州管轄、烏什、接鄰布魯特部落、爲極邊衝要、設直隸廳、撫民

同知一員治烏什城以上各廳州縣統轄於東四城巡道其西四城擬設兵備道一員駐劄喀什噶爾回城管理通商事宜督飭所屬水利屯墾錢糧刑名彈壓布魯特控馭外夷稽查卡倫喀什噶爾爲古疏勒國設疏勒直隸州知州一員治漢城疏附縣知縣一員治回城歸疏勒直隸州管轄英吉沙爾逼鄰布魯特爲極邊要衝設直隸廳撫彝同知一員治英吉沙爾城葉爾羌爲古莎車國設莎車直隸州知州一員治漢城葉城縣知縣一員治回城歸莎車直隸州管轄葉爾羌所屬瑪喇巴什一城爲回疆東西咽喉要地積年河水爲患宜置官撫治設直隸廳水利撫民通判一員治瑪喇巴什城和闐爲古于闐國設和闐直隸州知州一員治和闐城于闐

縣知縣一員治哈拉哈什歸和闐直隸州管轄以上各廳州縣統轄於西四城巡道凡茲建置皆準光緒六年左宗棠所擬而斟酌之又以甘肅與新疆本爲唇齒凡關外兵餉運轉諸務皆倚關內爲根本前左宗棠擬以新疆另爲一省與甘肅離而爲二事多不便請將哈密鎮迪道等處暨議設南路各廳州縣併歸甘肅爲一省依江蘇建置例增設甘肅巡撫一員駐烏魯木齊管轄哈密以西南北兩路各員并請賞加兵部尚書銜俾得統轄全疆官兵督辦邊防設甘肅關外等處布政使司一員隨巡撫駐劄舊有鎮迪道員擬請援福建臺灣例

賞加按察使銜令其兼管全疆刑名驛傳事務改迪化直隸

州爲迪化縣增設迪化府知府一員治迪化城管轄迪化昌吉綏來阜康奇臺五縣凡舊設參贊辦事領隊各大臣員缺除伊犁將軍塔爾巴哈臺參贊兩處旂營外其餘兩路各大臣悉罷之移烏魯木齊提督於喀什噶爾移喀什噶爾總兵於阿克蘇

詔下部臣反覆雜議悉先後准行又奏新疆舊設回官阿奇木伯克等員其職銜有三品四品者今旣建郡縣設丞倅牧令若回官仍循舊章殊有枝大於本之嫌疑罷回官各缺暨阿奇木伯克等名目各廳州縣另設頭目額數略如各省辦公紳士不得以官目之遇有缺額就近選舉出具考語請邊疆大員給發委牌仍回官舊例撥給地畝以作辦公薪水免

滋需索侵吞之弊又南路纏頭大半愚懦彼教中所謂條勒  
阿渾者往往造爲邪說肆其誘脅人心易搖禍亂斯起纏回  
語言文字與滿漢殊遇有訟獄徵收官民隔閡不通阿木奇  
伯克通事等得以舞弊是非被以文教錮習難除自全疆勘  
定以來各城設義塾令回童讀書識字習華語其中儘多聰  
穎之資授以書輒能背誦習字居然端好講解亦能領會足  
見秉彝之良無分中外雖不必侈言化民成俗而其效已可  
覩是宜設法鼓勵使回族爭奮於學庶教化可興所有原設  
各塾應由各廳州縣延師訓課以小學孝經及六經教授各  
回童擬每歲令各廳州縣一試有能誦習一經熟諳華語者  
卽送道署覆試由邊疆大員咨部給予生監頂戴待其年長

卽准充頭目如有勤學不倦誦習多經者准各州縣考送由道覆試請獎再行遞換五品以下頂戴不得逾六品以示限制惟曾任三四五品阿奇木伯克者裁缺後准仍舊翎頂充頭目其各項頭目如辦事出力隨時保奏懇

賞三四五品頂戴用昭激勸後部議以習一經諳華語卽予生監頂戴與例不符錦棠復奏新疆纏回聚處謠俗異宜庶定以來欲使殊方異族同我華風故於各城創設義學選纏回子弟入塾讀書其始羣相疑沮且謂讀書爲使之充徭役迨旨議定條規倣內地書院章程取粗知文義按月給膏火銀兩以示獎勵行之數年漸知向化各廳州縣近資課卷其文理儘多可造近日鄉民且有率子弟求入塾者是風氣漸

開之時當令各塾拔取一二人咨送甘肅學臣註冊備作生俟設學後俾充佾舞數年後學業有成再議設學官定學額以符定制

詔可其奏

九年八月劉錦棠奏委羅長祐署理阿克蘇道陳寶善署理喀什噶爾道其餘府廳州縣各缺就簡在事各員署理暫給木刻關防鈴記前往任事

十年十一月以劉錦棠補授甘肅新疆巡撫

賞加兵部尚書銜以魏光燾補授新疆布政使

十一年三月劉錦棠自哈密移營晉駐烏垣五月移巴里坤烏魯木齊滿營歸併古城改設古城府守尉一員八月復請



改設庫爾喀喇烏蘇撫民直隸同知一員兼理事銜管理地方戶籍田賦刑案兼管土爾扈特游牧諸事宜並轄精河屬境設分防驛巡檢一員隸同知管轄其同知仍隸道屬七月大學士文襄公左宗棠薨於閩劉錦棠臚陳事實奏請宣付史館其略曰臣於左宗棠有鄉子弟之誼自束髮從戎轉戰晉豫燕齊關隴間相從萬數千里厯事二十餘年其於左宗棠平日立心行事相知最深謹就見聞所及爲

皇上陳之竊維左宗棠廉正果毅學問深純道光末年里居不仕授徒自給於邑中柳莊置薄田躬稼以明淡泊鄉人士咸以漢臣諸葛亮目之會粵賊肇變湘楚戒嚴湖廣提臣張亮基湖南撫臣駱秉章先後強起入幕倚爲參謀左宗棠遇

事不避嫌怨，遂爲言者所摘蒙

文宗顯皇帝特達之知，感激奮發，以身許

國，遂由舉人擢升卿寺，任疆圻襄

綸扉，

賞延世爵，蹇蹇臣心，始終不渝，事無鉅細，必究極原本，而要之以力行，每營帳所止，壘旁荒地，輒令軍士開墾，招民承種，民至如歸，城堡橋路溝渠，館舍戰事餘間，輒令修治完善，隴官道兩旁，悉令種樹，迄今數千里，柳陰夾道，行旅便之，贊織畜牧諸政，皆因勢利導，民賴其樂利焉，生平絕少嗜好，家私一無所營，所得廉俸，稍置田供祀，歲給其兄嫂，餘悉以義舉，襟懷瀟灑，絕無滯機，公餘或徒步出營，循畦流覽，或

書以適意而已。性獨好學，身在行間，講習不輟。凡有設施，援古證今，必求適於時宜。軍書旁午，批答如流。章奏悉由手出。每復一城，招徠撫綏，其秀良者，必教之嚮學勵行，鼓舞振興。如恐不及，嘗謂民者士之望也，不作士氣，無以勸民。其與人開誠布公，取長略短，舊寮宿將，與共患難者，念之至終身不忘。待降將一以坦白，以故隨從征剿，能得其死力。愛人而不流於姑息，疾惡而不傷於苛刻。精察明斷，不爲己甚。雖其性情之正，抑亦學術有以濟之。在蘭州時，俄官索斯諾福斯齊攜其教師，演說西教。左宗棠以禮接見之，飲食酬酢，倍極款曲。與講孟子三自反之義，俄官爲之斂容。臣時在坐，拱默而已。後語臣曰：忠信篤敬，蠻貊可行，彼亦人也。心知血氣不甚。

相遠但積誠相與將自感也已而索斯諾福斯齊自請由齋桑薄爾代購軍糧訂約而去終不爽信其以誠感人類如此行軍必謀定後動雖事機所赴變動不執成見然由陝度隴由隴出關步驟次第皆如其始策之言其進規新疆也慮糧運不給乃令師行遞次以出先遣張曜置屯哈密金順進駐古城遠自晉疆俄境近而甘涼肅州四路籌策軍儲備足然後檄臣率大軍出關與金順會師先清北路以固根本遂乃遣師南嚮勢如破竹不數年全疆底定伊犁收還非謀出萬全未能如此奏功迅速也關內外自遭兵燹田地荒蕪左宗棠籌發籽種給耕牛使兵民雜耕收穫有餘官更糴之以佐軍公私悉便嘗自謂籌邊莫要於屯田然與屯必籌經費今

度文告紬安可復以此上煩

朝廷故行軍以來未嘗顯言屯政其實所行無非古人屯田遺意及新疆既平乃議設行省以規久遠臣愚不學猥承其後所以展轉數年尙無遺誤者皆左宗棠先事預籌之力也其戰蹟經楊昌濬已陳及平日見諸奏報者臣皆毋庸復述謹就見聞所及陳之懇宣付史館以備採擇焉

十二年四月奏請以譚上聯署喀什噶爾提督董福祥署阿克蘇總兵十月設伊犁副都統二員均與將軍同城駐紮

十三年升伊犁廳爲府罷撫民同知設知府一員治綏定城設附府知縣一員爲綏定縣以廣仁瞻德拱宸塔勒奇四城隸之設甯遠縣知縣一員治甯遠城隸伊犁府而以惠甯熙

春兩城隸之。設伊塔兵備道一員。督飭所屬水利屯田錢糧刑名諸務。稽查卡倫。兼管通商事宜。於是佐雜營哨各官亦以次增設。凡官制營制。清釐田賦戶籍。興辦屯田一切經制。具備。於是漢回各安生業。西陲稱大定云。屯田之制。戶受地六十畝。假子籽種三石。農器銀六兩。蓋屋銀八兩。牛二頭。合值銀二十四兩。每二人爲一戶。月給鹽菜銀一兩八錢。口食麵九十斤。自春耕起訖秋收。按八月計算。每戶假子成本銀七十三兩壹錢。定限初年償半。次年全償。遇歉酌展。償本後按畝升科。征額糧自第三年始。始征其半。次年全征。做營田制。十戶一屯。長五十戶。一屯正五屯。正一委員管之。凡領成本。督農工一切事宜。地方官責之。委員委員責之。屯正屯正

責之屯長十戶聯環保結互相糾察屯正屯長亦如戶民例  
領地畝假予成本惟屯正月另給銀四兩屯長月給銀二兩  
以示獎勵不責償錄之俾後之爲政者取法焉。

論曰關外之亂其時東南粵賊方平泰西島夷釁起議者皆  
欲棄塞防以事海防左文襄獨以爲英夷爭商事小俄人侵  
疆有蹙

國之勢且新疆爲

兩朝祖宗勤宵旰而得之者豈於此而棄之遂概然以兵餉  
之全任之一身席卷雲馳舉二萬里糜爛之土宇不數年掃  
蕩廓清還之

朝廷其時回民語言文字不與漢通爲之設塾延師被以文

教建郡縣置屯田用夏變夷與民更始西陲之頌功德者將  
百世不忘焉豈不偉哉文襄入

朝劉公錦棠能繼成其志尤爲委任之得人云

平回志卷八終





